

1,1

ये त्रिषप्ताः परियन्ति विश्वा रूपाणि बिभ्रतः ।  
वाचस्पतिर्बला तेषां तन्वो अद्य दधातु मे ॥१॥  
पुनरेहि वचस्पते देवेन मनसा सह ।  
वसोष्पते नि रमय मय्येवास्तु मयि श्रुतम् ॥२॥  
इहैवाभि वि तनूभे आर्त्नी इव ज्यया ।  
वाचस्पतिर्नि यच्छतु मय्येवास्तु मयि श्रुतम् ॥३॥  
उपहृतो वाचस्पतिरुपास्मान् वाचस्पतिह्वयताम् ।  
सं श्रुतेन गमेमहि मा श्रुतेन वि राधिषि ॥४॥

1.2

विद्वा शरस्य पितरं पर्जन्यं भूरिधायसम् ।  
विद्वा ष्वस्य मातरं पृथिवीं भूरिवर्षसम् ॥१॥  
ज्याके परि णो नमाश्मानं तन्वं कृधि ।  
वीडुर्वरीयोऽरातीरप द्वेषांस्या कृधि ॥२॥  
वृक्षं यद्गावः परिष्वजाना अनुस्फुरं शरमर्चन्त्यृभुम् ।  
शरुमस्मद्यावय दिद्युमिन्द्र ॥३॥  
यथा द्यां च पृथिवीं चान्तस्तिष्ठति तेजनम् ।  
एवा रोगं चास्त्रावं चान्तस्तिष्ठतु मुञ्ज इत् ॥४॥

1.3

विद्वा शरस्य पितरं पर्जन्यं शतवृष्ण्यम् ।  
तेना ते तन्वे शं करं पृथिव्यां ते निषेचनं बहिष्टे अस्तु बालिति ॥१॥  
विद्वा शरस्य पितरं मित्रं शतवृष्ण्यम् ।  
तेना ते तन्वे शं करं पृथिव्यां ते निषेचनं बहिष्टे अस्तु बालिति ॥२॥  
विद्वा शरस्य पितरं वरुणं शतवृष्ण्यम् ।  
तेना ते तन्वे शं करं पृथिव्यां ते निषेचनं बहिष्टे अस्तु बालिति ॥३॥  
विद्वा शरस्य पितरं चन्द्रं शतवृष्ण्यम् ।  
तेना ते तन्वे शं करं पृथिव्यां ते निषेचनं बहिष्टे अस्तु बालिति ॥४॥  
विद्वा शरस्य पितरं सूर्यं शतवृष्ण्यम् ।  
तेना ते तन्वे शं करं पृथिव्यां ते निषेचनं बहिष्टे अस्तु बालिति ॥५॥  
यदान्त्रेषु गवीन्योर्यद्वस्तावधि संश्रितम् ।  
एवा ते मूत्रं मुच्यतां बहिर्बालिति सर्वकम् ॥६॥  
प्र ते भिनाद्भि मेहनं वर्त्रं वेशन्त्या इव ।  
एवा ते मूत्रं मुच्यतां बहिर्बालिति सर्वकम् ॥७॥  
विषितं ते वस्तिबिलं समुद्रस्योदधेरिव ।  
एवा ते मूत्रं मुच्यतां बहिर्बालिति सर्वकम् ॥८॥  
यथेषुका परापतदवसृष्टाधि धन्वनः ।  
एवा ते मूत्रं मुच्यतां बहिर्बालिति सर्वकम् ॥९॥

1.4

अम्बयो यन्त्यध्वभिर्जामयो अध्वरीयताम् ।  
पृञ्चतीर्मधुना पयः ॥१॥  
अमूर्या उप सूर्ये याभिर्वा सूर्यः सह ।  
ता नो हिन्वन्त्वध्वरम् ॥२॥  
अपो देवीरुप ह्वये यत्र गावः पिबन्ति नः ।  
सिन्धुभ्यः कर्त्वं हविः ॥३॥  
अप्स्वन्तरमृतमप्सु भेषजम् ।  
अपामुत प्रशस्तिभिरश्वा भवथ वाजिनो गावो भवथ वाजिनीः ॥४॥

1.5

आपो हि ष्टा मयोभुवस्ता न ऊर्जे दधातन ।  
महे रणाय चक्षसे ॥१॥  
यो वः शिवतमो रसस्तस्य भाजयतेह नः ।  
उशतीरिव मातरः ॥२॥  
तस्मा अरं गमाम वो यस्य क्षयाय जिन्वथ ।  
आपो जनयथा च नः ॥३॥  
ईशाना वार्याणां क्षयन्तीश्चर्षणीनाम् ।  
अपो याचामि भेषजम् ॥४॥

1.6

शं नो देवीरभिष्टय आपो भवन्तु पीतये ।

शं योरभि स्रवन्तु नः ॥१॥  
 अप्सु मे सोमो अब्रवीदन्तर्विश्वानि भेषजा ।  
 अग्निं च विश्वशंभुवम् ॥२॥  
 आपः पृणीत भेषजं वरूथं तन्वे मम ।  
 ज्योक्च सूर्यं दृशे ॥३॥  
 शं न आपो धन्वत्याः शमु सन्त्वनूप्याः ।  
 शं नः खनित्रिमा आपः शमु याः कुम्भ आभृताः ।  
 शिवा नः सन्तु वार्षिकीः ॥४॥

#### 1.7

स्तुवानमग्न आ वह यातुधानं किमीदिनम् ।  
 त्वं हि देव वन्दितो हन्ता दस्योर्बभूविथ ॥१॥  
 आज्यस्य परमेष्ठिन् जातवेदस्तनूवशिन् ।  
 अग्ने तौलस्य प्राशान यातुधानान् वि लापय ॥२॥  
 वि लपन्तु यातुधाना अत्त्रिणो ये किमीदिनः ।  
 अथेदमग्ने नो हविरिन्द्रश्च प्रति हर्यतम् ॥३॥  
 अग्निः पूर्वं आ रभतां प्रेन्द्रो नुदतु बाहुमान् ।  
 ब्रवीतु सर्वा यातुमान् अयमस्मीत्येत्य ॥४॥  
 पश्याम ते वीर्यं जातवेदः प्र णो ब्रूहि यातुधानान् नृचक्षः ।  
 त्वया सर्वे परितप्ताः पुरस्तात् आ यन्तु प्रब्रुवाणा उपेदम् ॥५॥  
 आ रभस्व जातवेदोऽस्माकार्थाय जज्ञिषे ।  
 दूतो नो अग्ने भूत्वा यातुधानान् वि लापय ॥६॥  
 त्वमग्ने यातुधानान् उपबद्धामिहा वह ।  
 अथेषामिन्द्रो वज्रेणापि शीर्षाणि वृश्चतु ॥७॥

#### 1.8

इदं हविर्यातुधानान् नदी फेनमिवा वहत् ।  
 य इदं स्त्री पुमान् अकरिह स स्तुवतां जनः ॥१॥  
 अयं स्तुवान आगमदिमं स्म प्रति हर्यत ।  
 बृहस्पते वशे लब्ध्वाग्नीषोमा वि विध्यतम् ॥२॥  
 यातुधानस्य सोमप जहि प्रजां नयस्व च ।  
 नि स्तुवानस्य पातय परमक्ष्युतावरम् ॥३॥  
 यत्रैषामग्ने जनिमानि वेत्थ गुहा सतामत्त्रिणां जातवेदः ।  
 तांस्त्वं ब्रह्मणा वावृधानो जह्येषां शततर्हमग्ने ॥४॥

#### 1.9

अस्मिन् वसु वसवो धारयन्त्विन्द्रः पूषा वरुणो मित्रो अग्निः ।  
 इममादित्या उत विश्वे च देवा उत्तरस्मिन् ज्योतिषि धारयन्तु ॥१॥  
 अस्य देवाः प्रदिशि ज्योतिरस्तु सूर्यो अग्निरुत वा हिरण्यम् ।  
 सपत्ना अस्मदधरे भवन्तूत्तमं नाकमधि रोहयेमम् ॥२॥  
 येनेन्द्राय समभरः पर्यास्युत्तमेन ब्रह्मणा जातवेदः ।  
 तेन त्वमग्न इह वर्धयेमं सजातानां श्रेष्ठ्य आ धेह्येनम् ॥३॥  
 ऐषां यज्ञमुत वर्चो ददेऽहं रायस्पोषमुत चित्तान्यग्ने ।  
 सपत्ना अस्मदधरे भवन्तूत्तमं नाकमधि रोहयेमम् ॥४॥

#### 1.10

अयं देवानामसुरो वि राजति वशा हि सत्या वरुणस्य राज्ञः ।  
 ततस्परि ब्रह्मणा शाशदान उग्रस्य मन्योरुदिमं नयामि ॥१॥  
 नमस्ते रजन् वरुणास्तु मन्यवे विश्वं ह्युग्र निचिकेषि द्रुग्धम् ।  
 सहस्रमन्यान् प्र सुवामि साकं शतं जीवाति शरदस्तवायम् ॥२॥  
 यदुवक्थानृतं जिह्वया वृजिनं बहु ।  
 राजस्त्वा सत्यधर्मणो मुञ्चामि वरुणादहम् ॥३॥  
 मुञ्चामि त्वा वैश्वानरादर्णवान् महतस्परि ।  
 सजातान् उग्रहा वद ब्रह्म चाप चिकीहि नः ॥४॥

#### 1.11

वषट्ते पूषन् अस्मिन्सूतावर्यमा होता कृणोतु वेधाः ।  
 सिंस्रतां नार्यतप्रजाता वि पर्वाणि जिहतां सूतवा उ ॥१॥  
 चतस्रो दिवः प्रदिशश्चतस्रो भूम्या उत ।  
 देवा गर्भं समैरयन् तं व्यूर्णवन्तु सूतवे ॥२॥  
 सूषा व्यूर्णोतु वि योनिं हापयामसि ।  
 श्रथया सूषणे त्वमव त्वं बिष्कले सृज ॥३॥  
 नेव मांसे न पीवसि नेव मज्जस्वाहतम् ।  
 अवैतु पृश्नि शेवलं शुने जराय्वत्तवेऽव जरायु पद्यताम् ॥४॥

वि ते भिनद्धि मेहनं वि योनिं वि गवीनिके ।  
वि मातरं च पुत्रं च वि कुमारं जरायुणाव जरायु पद्यताम् ॥५॥  
यथा वातो यथा मनो यथा पतन्ति पक्षिणः ।  
एवा त्वं दशमास्य साकं जरायुणा पताव जरायु पद्यताम् ॥६॥

1.12

जरायुजः प्रथम उस्त्रियो वृषा वाताभ्रजा स्तनयन् एति वृष्ट्या ।  
स नो मृडाति तन्व ऋजुगो रुजन् य एकमोजस्त्रेधा विचक्रमे ॥१॥  
अङ्गेअङ्गे शोचिषा शिश्रियाणं नमस्यन्तस्त्वा हविषा विधेम ।  
अङ्कान्तसमङ्कान् हविषा विधेम यो अग्रभीत्पर्वास्या ग्रभीता ॥२॥  
मूञ्च शीर्षक्त्या उत कास एनं परुष्परुराविवेशा यो अस्य ।  
यो अभ्रजा वातजा यश्च शुष्मो वनस्पतीन्त्सचतां पर्वतांश्च ॥३॥  
शं मे परस्मै गात्राय शमस्त्ववराय मे ।  
शं मे चतुर्भ्यो अङ्गेभ्यः शमस्तु तन्वे मम ॥४॥

1.13

नमस्ते अस्तु विद्युते नमस्ते स्तनयित्नवे ।  
नमस्ते अस्त्वशमने येना दूडाशे अस्यसि ॥१॥  
नमस्ते प्रवतो नपाद्यतस्तपः समूहसि ।  
मृडया नस्तनूभ्यो मयस्तोकेभ्यस्कृधि ॥२॥  
प्रवतो नपान् नम एवास्तु तुभ्यं नमस्ते हेतये तपुषे च कृष्णः ।  
विद्म ते धाम परमं गुहा यत्समुद्रे अन्तर्निहितासि नाभिः ॥३॥  
यां त्वा देवा असृजन्त विश्व इषुं कृण्वाना असनाय धृष्णुम् ।  
सा नो मृड विदथे गृणाना तस्यै ते नमो अस्तु देवि ॥४॥

1.14

भगमस्या वर्च आदिष्यधि वृक्षादिव स्रजम् ।  
महाबुध्न इव पर्वतो ज्योक्पितृष्वास्ताम् ॥१॥  
एषा ते राजन् कन्या वधूर्नि धूयतां यम ।  
सा मातुर्बध्यतां गृहेऽथो भ्रातुरथो पितुः ॥२॥  
एषा ते कुलपा राजन् तामु ते परि दद्वसि ।  
ज्योक्पितृष्वासाता आ शीर्ष्णाः शमोप्यात् ॥३॥  
असितस्य ते ब्रह्मणा कश्यपस्य गयस्य च ।  
अन्तःकोशमिव जामयोऽपि नह्यामि ते भगम् ॥४॥

1.15

सं सं स्रवन्तु सिन्धवः सं वाताः सं पतत्रिणः ।  
इमं यज्ञं प्रदिवो मे जुषन्तां संस्राव्येण हविषा जुहोमि ॥१॥  
इहैव हवमा यात म इह संस्रावणा उतेमं वर्धयता गिरः ।  
इहैतु सर्वो यः पशुरस्मिन् तिष्ठतु या रयिः ॥२॥  
ये नदीनां संस्रवन्त्युत्सासः सदमक्षिताः ।  
तेभिर्मे सर्वैः संस्रावैर्धनं सं स्रावयामसि ॥३॥  
ये सर्पिषः संस्रवन्ति क्षीरस्य चोदकस्य च  
तेभिर्मे सर्वैः संस्रावैर्धनं सं स्रावयामसि ॥४॥

1.16

येऽमावास्यां रात्रिमुदस्थुर्वाजमत्त्रिणः ।  
अग्निस्तुरीयो यातुहा सो अस्मभ्यमधि ब्रवत् ॥१॥  
सीसायाध्याह वरुणः सीसायाग्निरुपावति ।  
सीसं म इन्द्रः प्रायच्छत्तदङ्ग यातुचातनम् ॥२॥  
इदं विष्कन्धं सहत इदं बाधते अत्त्रिणः ।  
अनेन विश्वा ससहे या जातानि पिशाच्याः ॥३॥  
यदि नो गां हंसि यद्यश्चं यदि पूरुषम् ।  
तं त्वा सीसेन विध्यामो यथा नोऽसो अवीरहा ॥४॥

1.17

अमूर्या यन्ति योषितो हिरा लोहितवाससः ।  
अभ्रातर इव जामयस्तिष्ठन्तु हतवर्चसः ॥१॥  
तिष्ठावरे तिष्ठ पर उत त्वं तिष्ठ मध्यमे ।  
कनिष्ठिका च तिष्ठति तिष्ठादिद्धमनिर्मही ॥२॥  
शतस्य धमनीनां सहस्रस्य हिराणाम् ।  
अस्थुरिन् मध्यमा इमाः साकमन्ता अरंसत ॥३॥  
परि वः सिकतावती धनुर्बृहत्यक्रमीत् ।  
तिष्ठतेलयता सु कम् ॥४॥

1.18

निर्लक्ष्यं ललाम्यं निररातिं सुवामसि ।  
अथ या भद्रा तानि नः प्रजाया अरातिं नयामसि ॥१॥  
निररणिं सविता साविषक्पदोर्निर्हस्तयोर्वरुणो मित्रो अर्यमा ।  
निरस्मभ्यमनुमती रराणा प्रेमां देवा असाविषुः सौभगाय ॥२॥  
यत् आत्मानि तन्वां घोरमस्ति यद्वा केशेषु प्रतिचक्षणे वा ।  
सर्वं तद्वाचाप हन्मो वयं देवस्त्वा सविता सूदयतु ॥३॥  
रिश्यपदीं वृषदतीं गोषेधां विधमामुत ।  
विलीढ्यं ललाम्यं ता अस्मन् नाशयामसि ॥४॥

1.19

मा नो विदन् विव्याधिनो मो अभिव्याधिनो विदन् ।  
आराच्छरव्या अस्मद्विषूचीरिन्द्र पातय ॥१॥  
विष्वञ्चो अस्मच्छरवः पतन्तु ये अस्ता ये चास्याः ।  
दैवीर्मनुष्येसवो ममामित्रान् वि विध्यत ॥२॥  
यो नः स्वो यो अरणः सजात उत निष्ट्यो यो अस्मामभिदासति ।  
रुद्रः शरव्यैतान् ममामित्रान् वि विध्यतु ॥३॥  
यः सपत्नो योऽसपत्नो यश्च द्विषन् छपाति नः ।  
देवास्तं सर्वे धूर्वन्तु ब्रह्म वर्म ममान्तरम् ॥४॥

1.20

अदारसूद्भवतु देव सोमास्मिन् यज्ञे मरुतो मृडता नः ।  
मा नो विददभिभा मो अशस्तिर्मा नो विददृजिना द्वेष्या या ॥१॥  
यो अद्य सेन्यो वधोऽघायूनामुदीरते ।  
युवं तं मित्रावरुणावस्मद्यावयतं परि ॥२॥  
इतश्च यदमुतश्च यद्धधं वरुण यावय ।  
वि महच्छर्म यच्छ वरीयो यावया वधम् ॥३॥  
शास इत्था महामस्यमित्रसाहो अस्तुतः ।  
न यस्य हन्यते सखा न जीयते कदा चन ॥४॥

1.21

स्वास्तिदा विशां पतिर्वृत्रहा विमृधो वशी ।  
वृषेन्द्रः पुर एतु नः सोमपा अभयंकरः ॥१॥  
वि न इन्द्र मृधो जहि नीचा यच्छ पूतन्यतः ।  
अधमं गमया तमो यो अस्मामभिदासति ॥२॥  
वि रक्षो वि मृधो जहि वि वृत्रस्य हनू रुज ।  
वि मन्युमिन्द्र वृत्रहन् अमित्रस्याभिदासतः ॥३॥  
अपेन्द्र द्विषतो मनोऽप जिज्यासतो वधम् ।  
वि महच्छर्म यच्छ वरीयो यावया वधम् ॥४॥

1.22

अनु सूर्यमुदयतां हृद्योतो हरिमा च ते ।  
गो रोहितस्य वर्णेन तेन त्वा परि दध्मसि ॥१॥  
परि त्वा रोहितैर्वर्णेर्दीर्घायुत्वाय दध्मसि ।  
यथायमरपा असदथो अहरितो भुवतु ॥२॥  
या रोहिणीर्देवत्या गावो या उत रोहिणीः ।  
रूपंरूपं वयोवयस्ताभिष्ट्वा परि दध्मसि ॥३॥  
शुक्रेषु ते हरिमाणं रोपणाकासु दध्मसि ।  
अथो हारिद्रवेषु ते हरिमाणं नि दध्मसि ॥४॥

1.23

नक्तंजातासि ओषधे रामे कृष्णे असिक्नि च ।  
इदं रजनि रजय किलासं पलितं च यत् ॥१॥  
किलासं च पलितं च निरितो नाशया पृषत् ।  
आ त्वा स्वो विशतां वर्णः परा शुक्लानि पातय ॥२॥  
असितं ते प्रलयनमास्थानमसितं तव ।  
असिक्नी अस्योषधे निरितो नाशया पृषत् ॥३॥  
अस्थिजस्य किलासस्य तनूजस्य च यत्त्वचि ।  
दृष्या कृतस्य ब्रह्मणा लक्ष्म श्वेतमनीनशम् ॥४॥

1.24

सुपर्णो जातः प्रथमस्तस्य त्वं पित्तमासिथ ।  
तदासुरी युधा जिता रूपं चक्रे वनस्पतीन् ॥१॥

आसुरी चक्रे प्रथमेदं किलासभेषजमिदं किलासनाशनम् ।  
अनीनशक्तिलासं सरूपामकरत्त्वचम् ॥२॥  
सरूपा नाम ते माता सरूपो नाम ते पिता ।  
सरूपकृत्वमौषधे सा सरूपमिदं कृधि ॥३॥  
श्यामा सरूपंकरणी पृथिव्या अध्युद्धता ।  
इदम् षु प्र साधय पुना रूपाणि कल्पय ॥४॥

1.25

यदग्निरापो अदहत्प्रविश्य यत्राकृण्वन् धर्मधृतो नमांसि ।  
तत्र त आहुः परमं जनित्रं स नः संविद्वान् परि वृङ्ग्धि तक्मन् ॥१॥  
यद्यर्चिर्यदि वासि शोचिः शकल्येषि यदि वा ते जनित्रम् ।  
हृडुर्नामासि हरितस्य देव स नः संविद्वान् परि वृङ्ग्धि तक्मन् ॥२॥  
यदि शोको यदि वाभिशोको यदि वा राज्ञो वरुणस्यासि पुत्रः ।  
हृडुर्नामासि हरितस्य देव स नः संविद्वान् परि वृङ्ग्धि तक्मन् ॥३॥  
नमः शीताय तक्मने नमो रूराय शोचिषे कृणोमि ।  
यो अन्येद्युरुभयद्युरभ्येति तृतीयकाय नमो अस्तु तक्मने ॥४॥

1.26

आरेऽसावस्मदस्तु हेतिर्देवासो असत् ।  
आरे अश्मा यमस्यथ ॥१॥  
सखासावस्मभ्यमस्तु रातिः सखेन्द्रो भगः ।  
सविता चित्रराधाः ॥२॥  
यूयं नः प्रवतो नपान् मरुतः सूर्यत्वचसः ।  
शर्म यच्छथ सप्रथाः ॥३॥  
सुषूदत मृडत मृडया नस्तनूभ्यो ।  
मयस्तोकेभ्यस्कृधि ॥४॥

1.27

अमूः पारे पदाक्वस्त्रिषप्ता निर्जरायवः ।  
तासां जरायुभिर्वयमक्षयावपि व्ययामस्यघायोः परिपन्थिनः ॥१॥  
विषूच्येतु कृन्तती पिनाकमिव बिभ्रती ।  
विष्वक्पुनर्भुवा मनोऽसमृद्धा अघायवः ॥२॥  
न बहवः समशकन् नाभका अभि दाधृषुः ।  
वेणोरद्गा इवाभितोऽसमृद्धा अघायवः ॥३॥  
प्रेतं पादौ प्र स्फुरतं वहतं पृणतो गृहान् ।  
इन्द्रान्येतु प्रथमाजीतामुषिता पुरः ॥४॥

1.28

उप प्रागाद्देवो अग्नी रक्षोहामीवचातनः ।  
दहन् अप द्वयाविनो यातुधानान् किमीदिनः ॥१॥  
प्रति दह यातुधानान् प्रति देव किमीदिनः ।  
प्रतीचीः कृष्णवर्तने सं दह यातुधान्यः ॥२॥  
या शशाप शपनेन याघं मरमादधे ।  
या रसस्य हरणाय जातमारिभे तोकमत्तु सा ॥३॥  
पुत्रमत्तु यातुधानीः स्वसारमुत नप्त्यम् ।  
अथा मिथो विकेश्यो वि घ्नतां यातुधान्यो वि तृह्यन्तामराय्यः ॥४॥

1.29

अभीवर्तेन मणिना येनेन्द्रो अभिववृधे ।  
तेनास्मान् ब्रह्मणस्पतेऽभि राष्ट्राय वर्धय ॥१॥  
अभिवृत्य सपत्नान् अभि या नो अरातयः ।  
अभि पृतन्यन्तं तिष्ठाभि यो नो दुरस्यति ॥२॥  
अभि त्वा देवः सविताभि षोमो अवीवृधत् ।  
अभि त्वा विश्वा भूतान्यभीवर्तो यथाससि ॥३॥  
अभीवर्तो अभिभवः सपत्नक्षयणो मणिः ।  
राष्ट्राय मह्यं बध्यतां सपत्नेभ्यः पराभुवे ॥४॥  
उदसौ सूर्यो अगादुदिदं मामकं वचः ।  
यथाहं शत्रुहोऽसान्यसपत्नः सपत्नहा ॥५॥  
सपत्नक्षयणो वृषाभिरष्ट्रो विषासहिः ।  
यथाहमेषां वीराणां विराजानि जनस्य च ॥६॥

1.30

विश्वे देवा वसवो रक्षतेममुतादित्या जागृत यूयमस्मिन् ।  
मेमं सनाभिरुत वान्यनाभिर्ममं प्रापत्पौरुषेयो वधो यः ॥१॥

ये वो देवाः पितरो ये च पुत्राः सचेतसो मे शृणुतेदमुक्तम् ।  
 सर्वेभ्यो वः परि ददाम्येतं स्वस्त्येनं जरसे वहाथ ॥२॥  
 ये देवा दिवि ष्ट ये पृथिव्यां ये अन्तरिक्ष ओषधीषु पशुष्वप्स्वन्तः ।  
 ते कृणुत जरसमायुरस्मै शतमन्यान् परि वृणक्तु मृत्यून् ॥३॥  
 येषां प्रयाजा उत वानुयाजा हुतभागा अहुतादश्च देवाः ।  
 येषां वः पञ्च प्रदिशां विभक्तास्तान् वो अस्मै सत्रसदः कृणोमि ॥४॥

1.31

आशानामाशापालेभ्यश्चतुर्भ्यो अमृतेभ्यः ।  
 इदं भूतस्याध्यक्षेभ्यो विधेम हविषा वयम् ॥१॥  
 य आशानामाशापालाश्चत्वार स्थन देवाः ।  
 ते नो निरृत्याः पाशेभ्यो मुञ्चतांहसोअंहसः ॥२॥  
 अस्रामस्त्वा हविषा यजाम्यश्लोणस्त्वा घृतेन जुहोमि ।  
 य आशानामाशापालस्तुरीयो देवः स नः सुभूतमेह वक्षत् ॥३॥  
 स्वस्ति मात्र उत पित्रे नो अस्तु स्वस्ति गोभ्यो जगते पुरुषेभ्यः ।  
 विश्वं सुभूतं सुविदत्रं नो अस्तु ज्योगेव दृशेम सूर्यम् ॥४॥

1.32

इदं जनासो विदथ महदब्रह्म वदिष्यति ।  
 न तत्पृथिव्यां नो दिवि येन प्राणन्ति वीरुधः ॥१॥  
 अन्तरिक्ष आसां स्थाम श्रान्तसदामिव ।  
 आस्थानमस्य भूतस्य विदुष्टद्वेधसो न वा ॥२॥  
 यद्रोदसी रेजमाने भूमिश्च निरतक्षतम् ।  
 आर्द्रं तदद्य सर्वदा समुद्रस्येव श्रोत्याः ॥३॥  
 विश्वमन्यामभीवार तदन्यस्यामधि श्रितम् ।  
 दिवे च विश्ववेदसे पृथिव्यै चाकरं नमः ॥४॥

1.33

हिरण्यवर्णाः शुचयः पावका यासु जातः सविता यास्वग्निः ।  
 या अग्निं गर्भं दधिरे सुवर्णास्ता न आपः शं स्योना भवन्तु ॥१॥  
 यासां राजा वरुणो याति मध्ये सत्यान्ते अवपश्यन् जनानाम् ।  
 या अग्निं गर्भं दधिरे सुवर्णास्ता न आपः शं स्योना भवन्तु ॥२॥  
 यासां देवा दिवि कृण्वन्ति भक्षं या अन्तरिक्षे बहुधा भवन्ति ।  
 या अग्निं गर्भं दधिरे सुवर्णास्ता न आपः शं स्योना भवन्तु ॥३॥  
 शिवेन मा चक्षुषा पश्यतापः शिवया तन्वोप स्पृशत त्वचं मे ।  
 घृतश्रुतः शुचयो याः पावकास्ता न आपः शं स्योना भवन्तु ॥४॥

1.34

इयं वीरुन् मधुजाता मधुना त्वा खनामसि ।  
 मधोरधि प्रजातासि सा नो मधुमतस्कृधि ॥१॥  
 जिह्वाया अग्रे मधु मे जिह्वामूले मधूलकम् ।  
 ममेदह क्रतावसो मम चित्तमुपायसि ॥२॥  
 मधुमन् मे निक्रमणं मधुमन् मे परायणम् ।  
 वाचा वदामि मधुमद्भूयासं मधुसंदृशः ॥३॥  
 मधोरस्मि मधुतरो मदुघान् मधुमत्तरः ।  
 मामित्किल त्वं वनाः शाखां मधुमतीमिव ॥४॥  
 परि त्वा परितन्नुनेक्षुणागामविद्विषे ।  
 यथा मां कमिन्यसो यथा मन् नापगा असः ॥५॥

1.35

यदाबध्नन् दाक्षायणा हिरण्यं शतानीकाय सुमनस्यमानाः ।  
 तत्ते बध्नाम्यायुषे वर्चसे बलाय दीर्घायुत्वाय शतशारदाय ॥१॥  
 नैनं रक्षांसि न पिशाचाः सहन्ते देवानामोजः प्रथमजं ह्येतत् ।  
 यो बिभर्ति दाक्षायणं हिरण्यं स जीवेषु कृणुते दीर्घमायुः ॥२॥  
 अपां तेजो ज्योतिरोजो बलं च वनस्पतीनामुत वीर्याणि ।  
 इन्द्र इवेन्द्रियाण्यधि धारयामो अस्मिन् तद्दक्षमाणो बिभरद्विरण्यम् ॥३॥  
 समानां मासामृतुभिष्ट्वा वयं संवत्सरस्य पयसा पिपर्मि ।  
 इन्द्राग्नी विश्वे देवास्तेऽनु मन्यन्तामहणीयमानाः ॥४॥

2.1

वेनस्तत्पश्यत्परमं गुहा यद्यत्र विश्वं भवत्येकरूपम् ।  
 इदं पृश्निरदुहज्जायमानाः स्वर्विदो अभ्यनूषत ब्राः ॥१॥

प्र तद्बोचेदमृतस्य विद्वान् गन्धर्वो धाम परमं गुहा यत्।  
 त्रीणि पदानि निहिता गुहास्य यस्तानि वेद स पितुष्पितासत् ॥२॥  
 स नः पिता जनिता स उत बन्धुर्धामानि वेद भुवनानि विश्वा ।  
 यो देवानां नामध एक एव तं संप्रश्रं भुवना यन्ति सर्वा ॥३॥  
 परि द्यावापृथिवी सद्य आयमुपातिष्ठे प्रथमजामृतस्य ।  
 वाचमिव वक्तरि भुवनेष्ठा धास्युरेष नन्वेषो अग्निः ॥४॥  
 परि विश्वा भुवनान्यायमृतस्य तन्तुं विततं दृशे कम् ।  
 यत्र देवा अमृतमानशानाः समाने योनावधैरयन्त ॥५॥

## 2.2

दिव्यो गन्धर्वो भुवनस्य यस्पतिरेक एव नमस्यो विक्ष्वीड्यः ।  
 तं त्वा यौमि ब्रह्मणा दिव्य देव नमस्ते अस्तु दिवि ते सधस्थम् ॥१॥  
 दिवि स्पृष्टो यजतः सूर्यत्वगवयाता हरसो दैव्यस्य ।  
 मृडात्गन्धर्वो भुवनस्य यस्पतिरेक एव नमस्यः सुशेवाः ॥२॥  
 अनवद्याभिः समु जग्म आभिरप्सरास्वपि गन्धर्व आसीत्।  
 समुद्र आसां सदनं म आहुर्यतः सद्य आ च परा च यन्ति ॥३॥  
 अभिये दिद्युन् नक्षत्रिये या विश्वावसुं गन्धर्व सचध्वे ।  
 ताभ्यो वो देवीर्नम इत्कृणोमि ॥४॥  
 याः क्लन्दास्तमिषीचयोऽक्षकामा मनोमुहः ।  
 ताभ्यो गन्धर्वभ्योऽप्सराभ्योऽकरं नमः ॥५॥

## 2.3

अदो यदवधावत्यवत्कमधि पर्वतात्।  
 तत्ते कृणोमि भेषजं सुभेषजं यथाससि ॥१॥  
 आदङ्गा कुविदङ्ग शतं या भेषजानि ते ।  
 तेषामसि त्वमुत्तममनास्त्रावमरोगणम् ॥२॥  
 नीचैः खनन्त्यसुरा अरुस्त्राणमिदं महत्।  
 तदास्त्रावस्य भेषजं तदु रोगमनीनशत् ॥३॥  
 उपजीका उद्भरन्ति समुद्रादधि भेषजम् ।  
 तदास्त्रावस्य भेषजं तदु रोगमशीशमत् ॥४॥  
 अरुस्त्राणमिदं महत्पृथिव्या अध्युद्भूतम् ।  
 तदास्त्रावस्य भेषजं तदु रोगमनीनशत् ॥५॥  
 शं नो भवन्त्वप ओषधयः शिवाः ।  
 इन्द्रस्य वज्रो अप हन्तु रक्षस आराद्विसृष्टा इषवः पतन्तु रक्षसाम् ॥६॥

## 2.4

दीर्घायुत्वाय बृहते रणायारिष्यन्तो दक्षमाणाः सदैव ।  
 मणिं विष्कन्धदूषणं जङ्गिडं बिभ्रमो वयम् ॥१॥  
 जङ्गिडो जम्भाद्विशराद्विष्कन्धादभिशीचनात्।  
 मणिः सहस्रवीर्यः परि णः पातु विश्वतः ॥२॥  
 अयं विष्कन्धं सहतेऽयं बाधते अत्रिणः ।  
 अयं नो विश्वभेषजो जङ्गिडः पात्वहसः ॥३॥  
 देवैर्दत्तेन मणिना जङ्गिडेन मयोभुवा ।  
 विष्कन्धं सर्वा रक्षांसि व्यायामे सहामहे ॥४॥  
 शणश्च मा जङ्गिडश्च विष्कन्धादभि रक्षताम् ।  
 अरण्यादन्य आभूतः कृष्या अन्यो रसेभ्यः ॥५॥  
 कृत्यादूषिरयं मणिरथो अरातिदूषिः ।  
 अथो सहस्वान् जङ्गिडः प्र ण आयुषि तारिषत् ॥६॥

## 2.5

इन्द्र जुषस्व प्र वहा याहि शूर हरिभ्याम् ।  
 पिबा सुतस्य मतेरिह मधोश्चकानश्चारुमदाय ॥१॥  
 इन्द्र जठरं नव्यो न पृणस्व मधोर्दिवो न ।  
 अस्य सुतस्य स्वर्णोप त्वा मदाः सुवाचो अगुः ॥२॥  
 इन्द्रस्तुराषाण्मित्रो वृत्रं यो जघान यतीर्न ।  
 बिभेद वलं भृगुर्न ससहे शत्रून् मदे सोमस्य ॥३॥  
 आ त्वा विशन्तु सुतास इन्द्र पृणस्व कुक्षी विद्धि शक्र धियेह्या नः ।  
 श्रुधी हवं गिरो मे जुषस्वेन्द्र स्वयुग्भिर्मत्स्वेह महं रणाय ॥४॥  
 इन्द्रस्य नु प्र वोचं वीर्याणि यानि चकार प्रथमानि वज्री ।  
 अहन् अहिमनु अपस्ततर्दं प्र वक्षणा अभिनत्पर्वतानाम् ॥५॥  
 अहन् अहिं पर्वते शिश्रियाणं त्वष्टास्मै वज्रं स्वयं ततक्ष ।  
 वाश्रा इव धेनवः स्यन्दमाना अज्जः समुद्रमव जग्मुरापः ॥६॥  
 वृषायमाणो अवृणीत सोमं त्रिकट्टकेषु अपिबत्सुतस्य ।  
 आ सायकं मघवादत्त वज्रमहन् एनं प्रथमजामहीनाम् ॥७॥

2.6

समास्त्वाग्न ऋतवो वर्धयन्तु संवत्सरा ऋषयो यानि सत्या ।  
सं दिव्येन दीदिहि रोचनेन विश्वा आ माहि प्रदिशश्चतस्रः ॥१॥  
सं वेध्यस्वाग्ने प्र च वर्धयेममुच्च तिष्ठ महते सौभगाय ।  
मा ते रिषन्न उपसत्तारो अग्ने ब्रह्मणास्ते यशसः सन्तु मान्ये ॥२॥  
त्वामग्ने वृणते ब्राह्मणा इमे शिवो अग्ने संवरणे भवा नः ।  
सपत्नहाग्ने अभिमातिजिद्धव स्वे गये जागृह्यप्रयुच्छन् ॥३॥  
क्षत्रेणाग्ने स्वेन सं रभस्व मित्रेणाग्ने मित्रधा यतस्व ।  
सजातानां मध्यमेष्ठा राज्ञामग्ने विहव्यो दीदिहीह ॥४॥  
अति निहो अति सृधोऽत्यचितीरति द्विषः ।  
विश्वा ह्याग्ने दुरिता तर त्वमथास्मभ्यं सहवीरं रयिं दाः ॥५॥

2.7

अघद्विष्टा देवजाता वीरुच्छपथयोपनी ।  
आपो मलमिव प्राणैक्षीत्सर्वान् मच्छपथामधि ॥१॥  
यश्च सापत्नः शपथो जाम्याः शपथश्च यः ।  
ब्रह्मा यन् मन्युतः शपात्सर्वं तन् नो अधस्पदम् ॥२॥  
दिवो मूलमवततं पृथिव्या अध्युत्ततम् ।  
तेन सहस्रकाण्डेन परि णः पाहि विश्वतः ॥३॥  
परि मां परि मे प्रजां परि णः पाहि यद्धनम् ।  
अरातिर्नो मा तारीन् मा नस्तारिशुरभिमातयः ॥४॥  
शप्तारमेतु शपथो यः सुहार्त्तेन नः सह ।  
चक्षुर्मन्त्रस्य दुर्हर्दः पृष्टीरपि शृणीमसि ॥५॥

2.8

उदगातां भगवती विचृतौ नाम तारके ।  
वि क्षेत्रियस्य मुञ्चतामधमं पाशमुत्तमम् ॥१॥  
अपेयं राज्यच्छत्वपोच्छन्त्वभिकृत्वरीः ।  
वीरुक्षेत्रियनाशन्यप क्षेत्रियमुच्छतु ॥२॥  
बभ्रोरर्जुनकाण्डस्य यवस्य ते पलाल्या तिलस्य तिलपिञ्ज्या ।  
वीरुक्षेत्रियनाशन्यप क्षेत्रियमुच्छतु ॥३॥  
नमस्ते लाङ्गलेभ्यो नम ईषायुगेभ्यः ।  
वीरुक्षेत्रियनाशन्यप क्षेत्रियमुच्छतु ॥४॥  
नमः सनिस्रसाक्षेभ्यो नमः संदेश्येभ्यः ।  
नमः क्षेत्रस्य पतये वीरुक्षेत्रियनाशन्यप क्षेत्रियमुच्छतु ॥५॥

2.9

दशवृक्ष मुञ्चेमं रक्षसो ग्राह्या अधि यैनं जग्राह पर्वसु ।  
अथो एनं वनस्पते जीवानां लोकमुन् नय ॥१॥  
आगादुदगादयं जीवानां व्रातमप्यगात् ।  
अभूदु पुत्राणां पिता नृणां च भगवत्तमः ॥२॥  
अधीतीरध्यगादयमधि जीवपुरा अगान् ।  
शतं ह्यस्य भिषजः सहस्रमुत वीरुधः ॥३॥  
देवास्ते चीतिमविदन् ब्रह्मण उत वीरुधः ।  
चीतिं ते विश्वे देवा अविदन् भूम्यामधि ॥४॥  
यश्चकार स निष्करत्स एव सुभिषक्तमः ।  
स एव तुभ्यं भेषजानि कृणवद्विषजा शुचिः ॥५॥

2.10

क्षेत्रियात्त्वा निर्ऋत्या जामिशंसादद्द्रुहो मुञ्चामि वरुणस्य पाशात् ।  
अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥१॥  
शं ते अग्निः सहाद्भिरस्तु शं सोमः सहौषधीभिः ।  
एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥२॥  
शं ते वातो अन्तरिक्षे वयो धाच्छं ते भवन्तु प्रदिशश्चतस्रः ।  
एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥३॥  
इमा या देवीः प्रदिशश्चतस्रो वातपत्नीरभि सूर्या विचष्टे ।  
एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥४॥  
तासु त्वान्तर्जरस्या दधामि प्र यक्ष्म एतु निर्ऋतिः पराचैः ।  
एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥५॥



अमुक्था यक्ष्मादुरितादवद्यादद्द्रुहः पाशाद्ग्राह्याश्चोदमुक्थाः ।  
 एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
 अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥६॥  
 अहा अरातिमविदः स्योनमप्यभूद्रे सुकृतस्य लोके ।  
 एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
 अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥७॥  
 सूर्यमृतं तमसो ग्राह्या अधि देवा मुञ्चन्तो असृजन् निरेनसः ।  
 एवाहं त्वां क्षेत्रियान् निर्ऋत्या जामिशंसादद्द्रुहो मुञ्चामि वरुणस्य पाशात् ।  
 अनागसं ब्रह्मणा त्वा कृणोमि शिवे ते द्यावापृथिवी उभे स्ताम् ॥८॥

### 2.11

दूष्या दूषिरसि हेत्या हेतिरसि मेन्या मेनिरसि ।  
 आप्नुहि श्रेयांसमति समं क्राम ॥१॥  
 स्रक्त्योऽसि प्रतिसरोऽसि प्रत्यभिचरणोऽसि ।  
 आप्नुहि श्रेयांसमति समं क्राम ॥२॥  
 प्रति तमभि चर योऽस्मान् द्वेष्टि यं वयं द्विष्मः ।  
 आप्नुहि श्रेयांसमति समं क्राम ॥३॥  
 सूरिरसि वर्चोधा असि तनूपानोऽसि ।  
 आप्नुहि श्रेयांसमति समं क्राम ॥४॥  
 शुक्रोऽसि भ्राजोऽसि स्वरसि ज्योतिरसि ।  
 आप्नुहि श्रेयांसमति समं क्राम ॥५॥

### 2.12

द्यावापृथिवी उर्वन्तरिक्षं क्षेत्रस्य पत्न्युरुगायोऽद्भुतः ।  
 उतान्तरिक्षमुरु वातगोपं त इह तप्यन्तां मयि तप्यमाने ॥१॥  
 इदं देवाः शृणुत ये यज्ञिया स्थ भरद्वाजो मह्यमुक्थानि शंसति ।  
 पाशे स बद्धो दुरिते नि युज्यतां यो अस्माकं मन इदं हिनस्ति ॥२॥  
 इदमिन्द्र शृणुहि सोमप यत्त्वा हृदा शोचता जोहवीमि ।  
 वृश्चामि तं कुलिशेनेव वृक्षं यो अस्माकं मन इदं हिनस्ति ॥३॥  
 अशीतिभिस्तिस्मिभिः सामगोभिरादित्येर्भिवसुभिरङ्गिरोभिः ।  
 इष्टापूर्तमवतु नः पितृणामामुं ददे हरसा दैव्येन ॥४॥  
 द्यावापृथिवी अनु मा दीधीथां विश्वे देवासो अनु मा रभध्वम् ।  
 अङ्गिरसः पितरः सोम्यासः पापमार्छत्वपकामस्य कर्ता ॥५॥  
 अतीव यो मरुतो मन्यते नो ब्रह्म वा यो निन्दिषत्क्रियमाणम् ।  
 तपूषि तस्मै वृजिनानि सन्तु ब्रह्मद्विषं द्यौरभिसंतपाति ॥६॥  
 सप्त प्राणान् अष्टौ मन्यस्तास्ते वृश्चामि ब्रह्मणा ।  
 अया यमस्य सादनमग्निदूतो अरंकृतः ॥७॥  
 आ दधामि ते पदं समिद्धे जातवदसि ।  
 अग्निः शरीरं वेवेष्ट्वसुं वागपि गच्छतु ॥८॥

### 2.13

आयुर्दा अग्ने जरसं वृणानो घृतप्रतीको घृतपृष्ठो अग्ने ।  
 घृतं पीत्वा मधु चारु गव्यं पितेव पुत्रान् अभि रक्षतादिमम् ॥१॥  
 परि धत्त धत्त नो वर्चसेमं जरामृत्युं कृणुत दीर्घमायुः ।  
 बृहस्पतिः प्रायच्छद्वास एतत्सोमाय राज्ञे परिधातवा उ ॥२॥  
 परीदं वासो अधिथाः स्वस्तयेऽभूर्गृहीनामभिशस्तिपा उ ।  
 शतं च जीव शरदः पुरूची रायश्च पोषमुपसंव्ययस्व ॥३॥  
 एह्यश्मानमा तिष्ठाश्मा भवतु ते तनूः ।  
 कृण्वन्तु विश्वे देवा आयुष्टे शरदः शतम् ॥४॥  
 यस्य ते वासः प्रथमवास्यं हरामस्तं त्वा विश्वेऽवन्तु देवाः ।  
 तं त्वा भ्रातरः सुवृधा वर्धमानमनु जायन्तां बहवः सुजातम् ॥५॥

### 2.14

निःसालां धृष्णुं धिषणमेकवाद्यां जिघत्स्वम् ।  
 सर्वाश्चण्डस्य नप्त्यो नाशयामः सदान्वाः ॥१॥  
 निर्वो गोष्ठादजामसि निरक्षान् निरुपानशात् ।  
 निर्वो मगुन्द्या दुहितरो गृहेभ्यश्चातयामहे ॥२॥  
 असौ यो अधराद्गहस्तत्र सन्त्वराय्यः ।  
 तत्र सेदिन्युच्यतु सर्वाश्च यातुधान्यः ॥३॥  
 भूतपतिर्निरजत्विन्द्रश्चेतः सदान्वाः ।  
 गृहस्य बुध्न आसीनास्ता इन्द्रो वज्रेणाधि तिष्ठतु ॥४॥  
 यदि स्थ क्षेत्रियाणां यदि वा पुरुषेषिताः ।  
 यदि स्थ दस्युभ्यो जाता नश्यततः सदान्वाः ॥५॥  
 परि धामान्यासामाशुर्गाष्ठांमिवासरम् ।

अजैषं सर्वान् आजीन् वो नश्यतेतः सदान्वाः ॥६॥

2.15

यथा द्यौश्च पृथिवी च न बिभीतो न रिष्यतः ।  
एवा मे प्राण मा बिभेः ॥१॥  
यथाहश्च रात्री च न बिभीतो न रिष्यतः ।  
एवा मे प्राण मा बिभेः ॥२॥  
यथा सूर्यश्च चन्द्रश्च न बिभीतो न रिष्यतः ।  
एवा मे प्राण मा बिभेः ॥३॥  
यथा ब्रह्म च क्षत्रं च न बिभीतो न रिष्यतः ।  
एवा मे प्राण मा बिभेः ॥४॥  
यथा सत्यं चानृतं च न बिभीतो न रिष्यतः ।  
एवा मे प्राण मा बिभेः ॥५॥  
यथा भूतं च भव्यं च न बिभीतो न रिष्यतः ।  
एवा मे प्राण मा बिभेः ॥६॥

2.16

प्राणापानौ मृत्योर्मा पातं स्वाहा ॥१॥  
द्यावापृथिवी उपश्रुत्या मा पातं स्वाहा ॥२॥  
सूर्यं चक्षुषा मा पाहि स्वाहा ॥३॥  
अग्ने वैश्वानर विश्वैर्मा देवैः पाहि स्वाहा ॥४॥  
विश्वम्भर विश्वेन मा भरसा पाहि स्वाहा ॥५॥

2.17

ओजोऽस्योजो मे दाः स्वाहा ॥१॥  
सहोऽसि सहो मे दाः स्वाहा ॥२॥  
बलमसि बलं दाः स्वाहा ॥३॥  
आयुरस्यायुर्मे दाः स्वाहा ॥४॥  
श्रोत्रमसि श्रोत्रं मे दाः स्वाहा ॥५॥  
चक्षुरसि चक्षुर्मे दाः स्वाहा ॥६॥  
परिपाणमसि परिपाणं मे दाः स्वाहा ॥७॥

2.18

भ्रातृव्यक्षयणमसि भ्रातृव्यचातनं मे दाः स्वाहा ॥१॥  
सपत्नक्षयणमसि सपत्नचातनं मे दाः स्वाहा ॥२॥  
अरायक्षयणमस्यरायचातनं मे दाः स्वाहा ॥३॥  
पिशाचक्षयणमसि पिशाचचातनं मे दाः स्वाहा ॥४॥  
सदान्वाक्षयणमसि सदान्वाचातनं मे दाः स्वाहा ॥५॥

2.19

अग्ने यत्ते तपस्तेन तं प्रति तप योऽस्मान् द्वेष्टि यं वयं द्विष्मः ॥१॥  
अग्ने यत्ते हरस्तेन तं प्रति हर योऽस्मान् द्वेष्टि यं वयं द्विष्मः ॥२॥  
अग्ने यत्तेऽर्चिस्तेन तं प्रत्यर्च योऽस्मान् द्वेष्टि यं वयं द्विष्मः ॥३॥  
अग्ने यत्ते शोचिस्तेन तं प्रति शोच योऽस्मान् द्वेष्टि यं वयं द्विष्मः ॥४॥  
अग्ने यत्ते तेजस्तेन तमतेजसं कृणु योऽस्मान् द्वेष्टि यं वयं द्विष्मः ॥५॥

2.20

वायो यत्ते तपस्तेन तं प्रति तप योऽस्मान् द्वेष्टि यं वयं द्विष्मः ॥१॥  
वायो यत्ते हरस्तेन तं प्रति हर योऽस्मान् द्वेष्टि यं वयं द्विष्मः ॥२॥  
वायो यत्तेऽर्चिस्तेन तं प्रत्यर्च योऽस्मान् द्वेष्टि यं वयं द्विष्मः ॥३॥  
वायो यत्ते शोचिस्तेन तं प्रति शोच योऽस्मान् द्वेष्टि यं वयं द्विष्मः ॥४॥  
वायो यत्ते तेजस्तेन तमतेजसं कृणु योऽस्मान् द्वेष्टि यं वयं द्विष्मः ॥५॥

2.21

सूर्यं यत्ते तपस्तेन तं प्रति तप योऽस्मान् द्वेष्टि यं वयं द्विष्मः ॥१॥  
सूर्यं यत्ते हरस्तेन तं प्रति हर योऽस्मान् द्वेष्टि यं वयं द्विष्मः ॥२॥  
सूर्यं यत्तेऽर्चिस्तेन तं प्रत्यर्च योऽस्मान् द्वेष्टि यं वयं द्विष्मः ॥३॥  
सूर्यं यत्ते शोचिस्तेन तं प्रति शोच योऽस्मान् द्वेष्टि यं वयं द्विष्मः ॥४॥  
सूर्यं यत्ते तेजस्तेन तमतेजसं कृणु योऽस्मान् द्वेष्टि यं वयं द्विष्मः ॥५॥

2.22

चन्द्रं यत्ते तपस्तेन तं प्रति तप योऽस्मान् द्वेष्टि यं वयं द्विष्मः ॥१॥  
चन्द्रं यत्ते हरस्तेन तं प्रति हर योऽस्मान् द्वेष्टि यं वयं द्विष्मः ॥२॥  
चन्द्रं यत्तेऽर्चिस्तेन तं प्रत्यर्च योऽस्मान् द्वेष्टि यं वयं द्विष्मः ॥३॥

चन्द्र यत्ते शोचिस्तेन तं प्रति शोच योऽस्मान् द्वेष्टि यं वयं द्विष्मः ॥४॥  
चन्द्र यत्ते तेजस्तेन तमतेजसं कृणु योऽस्मान् द्वेष्टि यं वयं द्विष्मः ॥५॥

2.23

आपो यद्वस्तपस्तेन तं प्रति तपत योऽस्मान् द्वेष्टि यं वयं द्विष्मः ॥१॥  
आपो यद्वस्हरस्तेन तं प्रति हरत योऽस्मान् द्वेष्टि यं वयं द्विष्मः ॥२॥  
आपो यद्वसर्चिस्तेन तं प्रति अर्चत योऽस्मान् द्वेष्टि यं वयं द्विष्मः ॥३॥  
आपो यद्वस्शोचिस्तेन तं प्रति शोचत योऽस्मान् द्वेष्टि यं वयं द्विष्मः ॥४॥  
आपो यद्वस्तेजस्तेन तमतेजसं कृणुत योऽस्मान् द्वेष्टि यं वयं द्विष्मः ॥५॥

2.24

शेरभक शेरभ पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥१॥  
शेवृधक शेवृध पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥२॥  
मोकानुम्रोक् पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥३॥  
सर्पानुसर्प पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥४॥  
जूर्णि पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥५॥  
उपब्दे पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥६॥  
अर्जुनि पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥७॥  
भरूजि पुनर्वो यन्तु यातवः पुनर्हेतिः किमीदिनः ।  
यस्य स्थ तमत्त यो वो प्राहैत्तमत्त स्वा मांसान्यत्त ॥८॥

2.25

शं नो देवी पृश्निपर्यशं निर्ऋत्या अकः ।  
उग्रा हि कण्वजम्भनी तामभक्षि सहस्वतीम् ॥१॥  
सहमानेयं प्रथमा पृश्निपर्यजायत ।  
तयाहं दुर्णाम्नां शिरो वृश्चामि शकुनेरिव ॥२॥  
अरायमसृक्पावानं यश्च स्फातिं जिहीर्षति ।  
गर्भादं कण्वं नाशय पृश्निपर्णि सहस्व च ॥३॥  
गिरिमेनामा वेशय कण्वान् जीवितयोपनान् ।  
तांस्त्वं देवि पृश्निपर्यग्निरिवानुदहन्न इहि ॥४॥  
पराच एनान् प्र गुद कण्वान् जीवितयोपनान् ।  
तमांसि यत्र गच्छन्ति तत्क्रव्यादो अजीगमम् ॥५॥

2.26

एह यन्तु पशवो ये परेयुर्वायुर्येषां सहचारं जुजोष ।  
त्वष्टा येषां रूपधेयानि वेदास्मिन् तान् गोष्ठे सविता नि यच्छतु ॥१॥  
इमं गोष्ठं पशवः सं स्रवन्तु बृहस्पतिरा नयतु प्रजानन् ।  
सिनीवाली नयत्वाग्रमेषामाजग्मुषो अनुमते नि यच्छ ॥२॥  
सं सं स्रवन्तु पशवः समश्वाः समु पूरुषाः ।  
सं धान्यस्य या स्फातिः संसाव्येण हविषा जुहोमि ॥३॥  
सं सिञ्चामि गवां क्षीरं समाज्येन बलं रसम् ।  
संसिक्ता अस्माकं वीरा ध्रुवा गावो मयि गोपतौ ॥४॥  
आ हरामि गवां क्षीरमाहार्षं धान्यं रसम् ।  
आहृता अस्माकं वीरा आ पत्नीरिदमस्तकम् ॥५॥

2.27

नेच्छत्रुः प्राशं जयाति सहमानाभिभूरसि ।  
प्राशं प्रतिप्राशो जह्यरसान् कृण्वोषधे ॥१॥  
सुपर्णस्त्वान्विन्दत्सूकरस्त्वाखनन् नसा ।  
प्राशं प्रतिप्राशो जह्यरसान् कृण्वोषधे ॥२॥  
इन्द्रो ह चक्रे त्वा बाहावसुरेभ्य स्तरीतवे ।  
प्राशं प्रतिप्राशो जह्यरसान् कृण्वोषधे ॥३॥  
पाटामिन्द्रो व्याश्रादसुरेभ्य स्तरीतवे ।  
प्राशं प्रतिप्राशो जह्यरसान् कृण्वोषधे ॥४॥  
तयाहं शत्रून्त्साक्ष इन्द्रः सालावृकामिव ।  
प्राशं प्रतिप्राशो जह्यरसान् कृण्वोषधे ॥५॥

रुद्र जलाषभेषज नीलशिखण्ड कर्मकृत्।  
प्राशं प्रतिप्राशो जह्यरसान् कृण्वोषधे ॥६॥  
तस्य प्राशं त्वं जहि यो न इन्द्राभिदासति ।  
अधि नो ब्रूहि शक्तिभिः प्राशि मामुत्तरं कृधि ॥७॥

2.28

तुभ्यमेव जरिमन् वर्धतामयं मेममन्ये मृत्यवो हिंसिषुः शतं ये ।  
मातेव पुत्रं प्रमना उपस्थे मित्र एनं मित्रियात्पात्वंहसः ॥१॥  
मित्र एनं वरुणो वा रिशादा जरामृत्युं कृणुतां संविदानौ ।  
तदग्निर्होता वयुनानि विद्वान् विश्वा देवानां जनिमा विवक्ति ॥२॥  
त्वमीशिषे पशूनां पार्थिवानां ये जाता उत वा ये जनित्राः ।  
मेमं प्राणो हासीन् मो अपानो मेमं मित्रा वधिषुर्मो अमित्राः ॥३॥  
द्यौष्ट्वा पिता पृथिवी माता जरामृत्युं कृणुतां संविदाने ।  
यथा जीवा अदितेरुपस्थे प्राणापानाभ्यां गुपितः शतं हिमाः ॥४॥  
इममग्ने आयुषे वर्चसे नय प्रियं रेतो वरुण मित्र राजन् ।  
मातेवास्मा अदिते शर्म यच्छ विश्वे देवा जरदष्टिर्थासत् ॥५॥

2.29

पार्थिवस्य रसे देवा भगस्य तन्वो बले ।  
आयुष्यमस्मा अग्निः सूर्यो वर्च आ धाद्ब्रह्मस्पतिः ॥१॥  
आयुरस्मै धेहि जातवेदः प्रजां त्वष्टरधिर्निधेहि अस्मै ।  
रायस्पोषं सवितरा सुवास्यै शतं जीवाति शरदस्तवायम् ॥२॥  
आशीर्षा ऊर्जमुत सौप्रजास्त्वं दक्षं धत्तं द्रविणं सचेतसौ ।  
जयं क्षेत्राणि सहसायमिन्द्र कृण्वानो अन्यान् अधरान्त्सपत्नान् ॥३॥  
इन्द्रेण दत्तो वरुणेन शिष्टो मरुद्भिरुगः प्रहितो नो आगन् ।  
एष वां द्यावापृथिवी उपस्थे मा क्षुधन् मा तृषत् ॥४॥  
ऊर्जमस्मा ऊर्जस्वती धत्तं पयो अस्मै पयस्वती धत्तम् ।  
ऊर्जमस्मै द्यावपृथिवी अधातां विश्वे देवा मरुत ऊर्जमापः ॥५॥  
शिवाभिष्टे हृदयं तर्पयाम्यनमीवो मोदिषीष्ठाः सुवर्चाः ।  
सवासिनौ पिबतां मन्थमेतमश्विनो रूपं परिधाय मायाम् ॥६॥  
इन्द्र एतां ससृजे विद्धो अग्र ऊर्जा स्वधामजरां सा त एषा ।  
तया त्वं जीव शरदः सुवर्चा मा त आ सुस्रीद्विषजस्ते अक्रन् ॥७॥

2.30

यथेदं भूम्या अधि तृणं वातो मथायति ।  
एवा मथ्नामि ते मनो यथा मां कामिन्यसो यथा मन् नापगा असः ॥१॥  
सं चेन् नयाथो अश्विना कामिना सं च वक्षथः ।  
सं वां भगासो अगमत सं चित्तानि समु व्रता ॥२॥  
यत्सुपर्णा विवक्षवो अनमीवा विवक्षवः ।  
तत्र मे गच्छताद्भवं शल्य इव कुल्मलं यथा ॥३॥  
यदन्तरं तद्वाह्यं यद्वाह्यं तदन्तरम् ।  
कन्यानां विश्वरूपाणां मनो गृभायोषधे ॥४॥  
एयमगन् पतिकामा जनिकामोऽहमागमम् ।  
अश्वः कनिक्रदद्यथा भगेनाहं सहागमम् ॥५॥

2.31

इन्द्रस्य या मही दृषत्किमेर्विश्वस्य तर्हणी ।  
तया पिनष्मि सं क्रिमीन् दृषदा खल्वामिव ॥१॥  
दृष्टमदृष्टमत्तुहमथो कुरूरुमत्तुहम् ।  
अल्पाण्डून्त्सर्वान् छलुनान् क्रिमीन् वचसा जम्भयामसि ॥२॥  
अल्पाण्डून् हन्मि महता वधेन दूना अदूना अरसा अभूवन् ।  
शिष्टान् अशिष्टान् नि तिरामि वाचा यथा क्रिमीणां नकिरुच्छिषातै ॥३॥  
अन्वान्यं शीर्षण्यमथो पार्थेयं क्रिमीन् ।  
अवस्कवं व्यध्वरं क्रिमीन् वचसा जम्भयामसि ॥४॥  
ये क्रिमयः पर्वतेशु वनेष्वोषधीषु पशुष्वप्स्वन्तः ।  
ये अस्माकं तन्वमाविविशुः सर्वं तद्भन्मि जनिम क्रिमीणाम् ॥५॥

2.32

उद्यन्न आदित्यः क्रिमीन् हन्तु निम्नोचन् हन्तु रश्मिभिः ।  
ये अन्तः क्रिमयो गवि ॥१॥  
विश्वरूपं चतुरक्षं क्रिमिं सारङ्गमर्जुनम् ।  
शृणाम्यस्य पृष्टीरपि वृश्चामि यच्छिरः ॥२॥  
अत्रिवद्भुः क्रिमयो हन्मि कण्ववज्जमदग्निवत् ।  
अगस्त्यस्य ब्रह्मणा सं पिनष्म्यहं क्रिमीन् ॥३॥

हतो राजा क्रिमीणामुतैषां स्थपतिर्हतः ।  
 हतो हतमाता क्रिमिर्हतभ्राता हतस्वसा ॥४॥  
 हतासो अस्य वेशसो हतासः परिवेशसः ।  
 अथो ये क्षुल्लका इव सर्वे ते क्रिमयो हताः ॥५॥  
 प्र ते शृणामि शृङ्गे याभ्यां वितुदायसि ।  
 भिनाद्भि ते कुषुम्भं यस्ते विषधानः ॥६॥

2.33

अक्षीभ्यां ते नासिकाभ्यां कर्णाभ्यां छुबुकादधि ।  
 यक्षं शीर्षण्यं मस्तिष्काज्जिह्वाया वि वृहामि ते ॥१॥  
 ग्रीवाभ्यस्त उष्णिहाभ्यः कीकसाभ्यो अनुक्यात् ।  
 यक्षं दोषण्यमंसाभ्यां बाहुभ्यां वि वृहामि ते ॥२॥  
 हृदयात्ते परि क्लोम्नो हलीक्षणात्पार्श्वभ्याम् ।  
 यक्षं मतस्नाभ्यां प्लीहो यक्नस्ते वि वृहामसि ॥३॥  
 आन्त्रेभ्यस्ते गुदाभ्यो वनिष्ठोरुदरादधि ।  
 यक्षं कुक्षिभ्यां प्लाशेर्नाभ्या वि वृहामि ते ॥४॥  
 ऊरुभ्यां ते अष्ठीवद्भ्यां पाष्णिभ्यां प्रपदाभ्याम् ।  
 यक्षं भसद्यं श्रोणिभ्यां भासदं भंससो वि वृहामि ते ॥५॥  
 अस्थिभ्यस्ते मज्जभ्यः स्नावभ्यो धमनिभ्यः ।  
 यक्षं पाणिभ्यामङ्गुलिभ्यो नखेभ्यो वि वृहामि ते ॥६॥  
 अङ्गेअङ्गे लोम्निर्लोम्नि यस्ते पर्वणिपर्वणि ।  
 यक्षं त्वचस्यं ते वयं कश्यपस्य वीबर्हेण विष्वञ्चं वि वृहामसि ॥७॥

2.34

य ईशे पशुपतिः पशूनां चतुष्पदामुत यो द्विपदाम् ।  
 निष्क्रीतः स यज्ञियं भागमेतु रायस्पोषा यजमानं सचन्ताम् ॥१॥  
 प्रमुञ्चन्तो भुवनस्य रेतो गातुं धत्त यजमानाय देवाः ।  
 उपाकृतं शशमानं यदस्थात्प्रियं देवानामप्येतु पाथः ॥२॥  
 ये बध्यमानमनु दीध्याना अन्वैक्षन्त मनसा चक्षुषा च ।  
 अग्निष्टान् अग्रे प्र मुमोक्तु देवो विश्वकर्मा प्रजया संरराणः ॥३॥  
 ये ग्राम्याः पशवो विश्वरूपा विरूपाः सन्तो बहुधैकरूपाः ।  
 वायुष्टान् अग्रे प्र मुमोक्तु देवः प्रजापतिः प्रजया संरराणः ॥४॥  
 प्रजानन्तः प्रति गृह्णन्तु पूर्वं प्राणमङ्गेभ्यः पर्याचरन्तम् ।  
 दिवं गच्छ प्रति तिष्ठा शरीरैः स्वर्गं याहि पथिभिर्देवयानैः ॥५॥

2.35

ये भक्षयन्तो न वसून्यानुधुर्यान् अग्नयो अन्वतप्यन्त धिष्ण्याः ।  
 या तेषामवया दुरिष्टिः स्विष्टिं नस्तां कृणवद्विश्वकर्मा ॥१॥  
 यज्ञपतिमृषयः एनसाहुर्निर्भक्तं प्रजा अनुतप्यमानम् ।  
 मथव्यान्त्स्तोकान् अप यान् रराध सं नष्टेभिः सृजतु विश्वकर्मा ॥२॥  
 अदान्यान्त्सोमपान् मन्यमानो यज्ञस्य विद्वान्त्समये न धीरः ।  
 यदेनश्चकृवान् बद्ध एष तं विश्वकर्मन् प्र मुञ्चा स्वस्तये ॥३॥  
 घोरा ऋषयो नमो अस्त्वेभ्यश्चक्षुर्यदिषां मनसश्च सत्यम् ।  
 बृहस्पतये महिष द्युमन्त्रं नमो विश्वकर्मन् नमस्ते पाह्यास्मान् ॥४॥  
 यज्ञस्य चक्षुः प्रभृतिर्मुखं च वाचा श्रोत्रेण मनसा जुहोमि ।  
 इमं यज्ञं विततं विश्वकर्मणा देवा यन्तु सुमनस्यमानाः ॥५॥

2.36

आ नो अग्ने सुमतिं संभलो गमेदिमां कुमारीं सह नो भगेन ।  
 जुष्टा वरेषु समनेषु वल्गुरोषं पत्या सौभगमस्तु अस्यै ॥१॥  
 सोमजुष्टं ब्रह्मजुष्टमर्यम्ना संभृतं भगम् ।  
 धातुर्देवस्य सत्येन कृणोमि पतिवेदनम् ॥२॥  
 इयमग्ने नारी पतिं विदेष्ट सोमो हि राजा सुभगां कृणोति ।  
 सुवाना पुत्रान् महिषी भवाति गत्वा पतिं सुभगा वि राजतु ॥३॥  
 यथाखरो मघवंश्चारुरेष प्रियो मृगाणां सुषदा बभूव ।  
 एवा भगस्य जुष्टेयमस्तु नारी संप्रिया पत्याविराधयन्ती ॥४॥  
 भगस्य नावमा रोह पूर्णामनुपदस्वतीम् ।  
 तयोपप्रतारय यो वरः प्रतिकाम्यः ॥५॥  
 आ क्रन्दय धनपते वरमामनसं कृणु ।  
 सर्वं प्रदक्षिणं कृणु यो वरः प्रतिकाम्यः ॥६॥  
 इदं हिरण्यं गुल्गुल्वयमौक्षो अथो भगः ।  
 एते पतिभ्यस्त्वामदुः प्रतिकामाय वेत्तवे ॥७॥  
 आ ते नयतु सविता नयतु पतिर्यः प्रतिकाम्यः ।  
 त्वमस्यै धेह्योषधे

### 3.1

अग्निर्नः शत्रून् प्रत्येतु विद्वान् प्रतिदहन् अभिशस्तिमरातिम् ।  
स सेनां मोहयतु परेषां निर्हस्तांश्च कृणवज्जातवेदाः ॥१॥  
यूयमुग्रा मरुत ईदृशे स्थाभि प्रेत मृणत सहध्वम् ।  
अमीमृणन् वसवो नाथिता इमे अग्निर्होषां दूतः प्रत्येतु विद्वान् ॥२॥  
अमित्रसेनां मघवन् अस्मान् छत्रूयतीमभि ।  
युवं तामिन्द्र वृत्रहन् अग्निश्च दहतं प्रति ॥३॥  
प्रसूत इन्द्र प्रवता हरिभ्यां प्र ते वज्रः प्रमृणन् एतु शत्रून् ।  
जहि प्रतीचो अनुचः पराचो विष्वक्सत्यं कृणुहि चित्तमेषाम् ॥४॥  
इन्द्र सेनां मोहयामित्राणाम् ।  
अग्नेर्वातस्य ध्राज्या तान् विषूचो वि नाशय ॥५॥  
इन्द्रः सेनां मोहयतु मरुतो घ्नन्त्वोजसा ।  
चक्षूंस्पग्निरा दत्तां पुनरेतु पराजिता ॥६॥

### 3.2

अग्निर्नो दूतः प्रत्येतु विद्वान् प्रतिदहन् अभिशस्तिमरातिम् ।  
स चित्तानि मोहयतु परेषां निर्हस्तांश्च कृणवज्जातवेदाः ॥१॥  
अयमग्निरमूहुद्धानि चित्तानि वो हृदि ।  
वि वो धमत्वोकसः प्र वो धमतु सर्वतः ॥२॥  
इन्द्र चित्तानि मोहयन् अर्वाडाकृत्या चर ।  
अग्नेर्वातस्य ध्राज्या तान् विषूचो वि नाशय ॥३॥  
व्याकृतय एषामिताथो चित्तानि मुह्यत ।  
अथो यददृषां हृदि तदेषां परि निर्जहि ॥४॥  
अमीषां चित्तानि प्रतिमोहयन्ती गृहाणाङ्गान्यप्ये परेहि ।  
अभि प्रेहि निर्दह हृत्सु शोकैर्ग्राह्यामित्रांस्तमसा विध्य शत्रून् ॥५॥  
असौ या सेना मरुतः परेषामस्मान् ऐत्यभ्योजसा स्पर्धमाना ।  
तां विध्यत तमसापव्रतेन यथैषामन्यो अन्यं न जानात् ॥६॥

### 3.3

अचिक्रदत्स्वपा इह भुवदग्ने व्यचस्व रोदसी उरूची ।  
युञ्जन्तु त्वा मरुतो विश्ववेदस आमुं नय नमसा रातहव्यम् ॥१॥  
दूरे चित्सन्तमरुषास इन्द्रमा च्यावयन्तु सख्याय विप्रम् ।  
यद्वायत्रीं बृहतीमर्कमस्मै सौत्रामण्या दधृषन्त देवाः ॥२॥  
अद्भ्यस्त्वा राज वरुणो ह्वयतु सोमस्त्वा ह्वयतु पर्वतेभ्यः ।  
इन्द्रस्त्वा ह्वयतु विड्भ्य आभ्यः श्येनो भूत्वा विश आ पतेमाः ॥३॥ {४}  
श्येनो हव्यं नयत्वा परस्मादन्यक्षेत्रे अपरुद्धं चरन्तम् ।  
अश्विना पन्थां कृणुतां सुगं त इमं सजाता अभिसंविशध्वम् ॥४॥ {५}  
ह्वयन्तु त्वा प्रतिजनाः प्रति मित्रा अवृषत ।  
इन्द्राग्नी विश्वे देवास्ते विशि क्षेममदीधरन् ॥५॥ {६}  
यस्ते हवं विवदत्सजातो यश्च निष्ट्यः ।  
अपाञ्चमिन्द्र तं कृत्वाथेममिहाव गमय ॥६॥ {७}

### 3.4

आ त्वा गन् राष्ट्रं सह वर्चसोदिहि प्राड्विशां पतिरेकराट्त्वं वि राज ।  
सर्वास्त्वा राजन् प्रदिशो ह्वयन्तुपसद्यो नमस्यो भवेह ॥१॥  
त्वां विशो वृणतां राज्याय त्वामिमाः प्रदिशः पञ्च देवीः ।  
वर्षमन् राष्ट्रस्य ककुदि श्रयस्व ततो न उग्रो वि भजा वसूनि ॥२॥  
अच्छ त्वा यन्तु हविनः सजाता अग्निर्दूतो अजिरः सं चरातै ।  
जायाः पुत्राः सुमनसो भवन्तु बहुं बलिं प्रति पश्यासा उग्रः ॥३॥  
अश्विना त्वाग्रे मित्रावरुणोभा विश्वे देवा मरुतस्त्वा ह्वयन्तु ।  
अथा मनो वसुदेयाय कृणुष्व ततो न उग्रो वि भजा वसूनि ॥४॥  
आ प्र द्रव परमस्याः परावतः शिवे ते द्यावापृथिवी उभे स्ताम् ।  
तदयं राजा वरुणस्तथाह स त्वायमह्वत्स उपेदमेहि ॥५॥  
इन्द्रेन्द्र मनुष्याः परेहि सं ह्यज्ञास्था वरुणैः संविदानः ।  
स त्वायमह्वत्स्वे सधस्थे स देवान् यक्षत्स उ कल्पयद्विशः ॥६॥  
पथ्या रेवतीर्बहुधा विरूपाः सर्वाः संगत्य वरीयस्ते अक्रन् ।  
तास्त्वा सर्वाः संविदाना ह्वयन्तु दशमीमुग्रः सुमना वशेह ॥७॥

### 3.5

आयमगन् पर्णमणिर्बली बलेन प्रमृणन्त्सपत्नान् ।  
ओजो देवानां पय ओषधीनां वर्चसा मा जिन्वन्त्वप्रयावन् ॥१॥  
मयि क्षत्रं पर्णमणे मयि धारयताद्रयिम् ।  
अहं राष्ट्रस्याभीवर्गे निजो भूयासमुत्तमः ॥२॥

यं निदधुर्वनस्पतौ गुह्यं देवाः प्रियं मणिम् ।  
 तमस्मभ्यं सहायुषा देवा ददतु भर्तवे ॥३॥  
 सोमस्य पर्णः सह उग्रमागन्न इन्द्रेण दत्तो वरुणेन शिष्टः ।  
 तं प्रियासं बहु रोचमानो दीर्घायुत्वाय शतशारदाय ॥४॥  
 आ मारुक्षत्पर्णमणिर्महा अरिष्टतातये ।  
 यथाहमुत्तरोऽसान्यर्यम्ण उत संविदः ॥५॥  
 ये धीवानो रथकाराः कर्मारो ये मनीषिणः ।  
 उपस्तीन् पर्णं मह्यं त्वं सर्वान् कृण्वभितो जनान् ॥६॥  
 ये राजानो राजकृतः सूता ग्रामण्यश्च ये ।  
 उपस्तीन् पर्णं मह्यं त्वं सर्वान् कृण्वभितो जनान् ॥७॥  
 पर्णोऽसि तनूपानः सयोनिर्वीरो वीरेण मया ।  
 संवत्सरस्य तेजसा तेन बध्नामि त्वा मणे ॥८॥

### 3.6

पुमान् पुंसः परिजातोऽश्वत्थः खदिरादधि ।  
 स हन्तु शत्रून् मामकान् यान् अहं द्वेष्मि ये च माम् ॥१॥  
 तान् अश्वत्थ निः शृणीहि शत्रून् वैबाधदोधतः ।  
 इन्द्रेण वृत्रघ्ना मेदी मित्रेण वरुणेन च ॥२॥  
 यथाश्वत्थ निरभनोऽन्तर्महत्यर्णवे ।  
 एवा तान्त्सर्वान् निर्भङ्गिधे यान् अहं द्वेष्मि ये च माम् ॥३॥  
 यः सहमानश्चरसि सासहान इव ऋषभः ।  
 तेनाश्वत्थ त्वया वयं सपत्नान्त्सहिषीमहि ॥४॥  
 सिनात्वेनान् निर्ऋतिर्मुत्योः पाशैरमोक्चैः ।  
 अश्वत्थ शत्रून् मामकान् यान् अहं द्वेष्मि ये च माम् ॥५॥  
 यथाश्वत्थ वानस्पत्यान् आरोहन् कृणुषेऽधरान् ।  
 एवा मे शत्रोर्मूर्धानं विष्वग्भिन्द्धि सहस्व च ॥६॥  
 तेऽधराञ्चः प्र प्लवन्तां छिन्ना नौरिव बन्धनात् ।  
 न वैबाधप्रणुत्तानां पुनरस्ति निवर्तनम् ॥७॥  
 प्रैणान् नुदे मनसा प्र चित्तेनोत ब्रह्मणा ।  
 प्रैणान् वृक्षस्य शाखयाश्वत्थस्य नुदामहे ॥८॥

### 3.7

हरिणस्य रघुष्यदोऽधि शीर्षणि भेषजम् ।  
 स क्षेत्रियं विषाणया विषूचीनमनीनशत् ॥१॥  
 अनु त्वा हरिणो वृषा पद्भिश्चतुर्भिरक्रमीत् ।  
 विषाणे वि ष्य गुष्पितं यदस्य क्षेत्रियं हृदि ॥२॥  
 अदो यदवरोचते चतुष्पक्षमिव छदिः ।  
 तेना ते सर्वं क्षेत्रियमङ्गभ्यो नाशयामसि ॥३॥  
 अमू ये दिवि सुभगे विचृतौ नाम तारके ।  
 वि क्षेत्रियस्य मुञ्चतामधमं पाशमुत्तमम् ॥४॥  
 आप इद्वा उ भेषजीरापो अमीवचातनीः ।  
 आपो विश्वस्य भेषजीस्तास्त्वा मुञ्चन्तु क्षेत्रियात् ॥५॥  
 यदासुतेः क्रियमानायाः क्षेत्रियं त्वा व्यानशे ।  
 वेदाहं तस्य भेषजं क्षेत्रियं नाशयामि त्वत् ॥६॥  
 अपवासे नक्षत्राणामपवास उषसामुत ।  
 अपास्मत्सर्वं दुर्भूतमप क्षेत्रियमुच्छतु ॥७॥

### 3.8

आ यातु मित्र ऋतुभिः कल्पमानः संवेशयन् पृथिवीमुस्त्रियाभिः ।  
 अथास्मभ्यं वरुणो वायुरग्निर्बृहद्राष्ट्रं संवेश्यं दधातु ॥१॥  
 धाता रातिः सवितेदं जुशन्तामिन्द्रस्त्वष्टा प्रति हर्यन्तु मे वचः ।  
 हुवे देवीमदितिं शूरपुत्रां सजातानां मध्यमेष्ठा यथासानि ॥२॥  
 हुवे सोमं सवितारं नमोभिर्विश्वान् आदित्यामहमुत्तरत्वे ।  
 अयमग्निर्दीदायद्दीर्घमेव सजातैरिद्धोऽप्रतिब्रुवद्भिः ॥३॥  
 इहेदसाथ न परो गमार्थेयो गोपाः पुष्टपतिर्व आजत् ।  
 अस्मै कामायोप कामिनीर्विश्वे वो देवा उपसंयन्तु ॥४॥  
 सं वो मनांसि सं व्रता समाकृतीर्नमामसि ।  
 अमी ये विव्रता स्थन तान् वः सं नमयामसि ॥५॥  
 अहं गृभ्णामि मनसा मनांसि मम चित्तमनु चित्तेभिरेत ।  
 मम वशेषु हृदयानि वः कृणोमि मम यातमनुवर्तमान एत ॥६॥

### 3.9

कर्शफस्य विशफस्य द्यौः पिता पृथिवी माता ।  
 यथाभिचक्र देवास्तथाप कृणुता पुनः ॥१॥

अश्रेष्माणो अधारयन् तथा तन् मनुना कृतम् ।  
 कृणोमि वधि विष्कन्धं मुष्काबर्हो गवामिव ॥२॥  
 पिशङ्गे सूत्रे खगलं तदा बध्नन्ति वेधसः ।  
 श्रवस्युं शुष्मं काबवं वधि कृण्वन्तु बन्धुरः ॥३॥  
 येना श्रवस्यवश्वरथ देवा इवासुरमायया ।  
 शुनां कपिरिव दूषणो बन्धुरा काबवस्य च ॥४॥  
 दुष्ट्यै हि त्वा भत्स्यामि दूषयिष्यामि काबवम् ।  
 उदाशवो रथा इव शपथेभिः सरिष्यथ ॥५॥  
 एकशतं विष्कन्धानि विष्टिता पृथिवीमनु ।  
 तेषां त्वामग्रे उज्जहरुर्मणिं विष्कन्धदूषणम् ॥६॥

### 3.10

प्रथमा ह व्युवास सा धेनुरभवद्यमे ।  
 सा नः पयस्वती दुहामुत्तरामुत्तरां समाम् ॥१॥  
 यां देवाः प्रतिनन्दन्ति रात्रिं धेनुमुपायतीम् ।  
 संवत्सरस्य या पत्नी सा नो अस्तु सुमङ्गली ॥२॥  
 संवत्सरस्य प्रतिमां यां त्वा रात्र्युपास्महे ।  
 सा न आयुष्मतीं प्रजां रायस्पोषेण सं सृज ॥३॥  
 इयमेव सा या प्रथमा व्यौच्छदास्वितरासु चरति प्रविष्टा ।  
 महान्तो अस्यां महिमानो अन्तर्वधुर्जिगाय नवगज्जनित्री ॥४॥  
 वानस्पत्या ग्रावाणो घोषमक्रत हविष्कृण्वन्तः परिवत्सरीणम् ।  
 एकाष्टके सुप्रजसः सुवीरा वयं स्याम पतयो रयीणाम् ॥५॥  
 इडायास्पदं घृतवत्सरीसृपं जातवेदः प्रति हव्या गृभाय ।  
 ये ग्राम्याः पशवो विश्वरूपास्तेषां सप्तानां मयि रन्तिरस्तु ॥६॥  
 आ मा पुष्टे च पोषे च रात्रि देवानां सुमतौ स्याम ।  
 पूर्णा दर्वे परा पत सुपूर्णा पुनरा पत ।  
 सर्वान् यज्ञान्तसंभुज्जतीषमूर्जं न आ भर ॥७॥  
 आयमगन्तसंवत्सरः पतिरेकाष्टके तव ।  
 सा न आयुष्मतीं प्रजां रायस्पोषेण सं सृज ॥८॥  
 ऋतून् यज ऋतुपतीन् आर्तवान् उत हायनान् ।  
 समाः संवत्सरान् मासान् भूतस्य पतये यजे ॥९॥  
 ऋतुभ्यश्चार्तवेभ्यो माद्भ्यः संवत्सरेभ्यः ।  
 धात्रे विधात्रे समृधे भूतस्य पतये यजे ॥१०॥  
 इडया जुह्वतो वयं देवान् घृतवता यजे ।  
 गृहान् अलुभ्यतो वयं सं विशेमोप गोमतः ॥११॥  
 एकाष्टका तपसा तप्यमाना जजान गर्भं महिमानमिन्द्रम् ।  
 तेन देवा व्यसहन्त शत्रून् हन्ता दस्यूनामभवच्छचीपतिः ॥१२॥  
 इन्द्रपुत्रे सोमपुत्रे दुहितासि प्रजापतेः ।  
 कामान् अस्माकं पूरय प्रति गृह्णाहि नो हविः ॥१३॥

### 3.11

मुञ्चामि त्वा हविषा जीवनाय कमजातयक्षमादुत राजयक्षमात् ।  
 ग्राहिर्जग्राह यद्येतदेनं तस्या इन्द्राग्नी प्र मुमुक्तमेनम् ॥१॥  
 यदि क्षितायुर्यदि वा परेतो यदि मृत्योरन्तिकमेव ।  
 तमा हरामि निर्ऋतेरुपस्थादस्पार्शमेनं शतशारदाय ॥२॥  
 सहस्राक्षेण शतवीर्येण शतायुषा हविषाहार्शमेनम् ।  
 इन्द्रो यथैनं शरदो नयात्यति विश्वस्य दुरितस्य पारम् ॥३॥  
 शतं जीव शरदो वर्धमानः शतं हेमन्तान् छतमु वसन्तान् ।  
 शतं ते इन्द्रो अग्निः सविता बृहस्पतिः शतायुषा हविषाहार्शमेनम् ॥४॥  
 प्र विशतं प्राणापानावनड्वाहाविव व्रजम् ।  
 व्यन्ये यन्तु मृत्यवो यान् आहुरितरान् छतम् ॥५॥  
 इहैव स्तं प्राणापानौ माप गातमितो युवम् ।  
 शरीरमस्याङ्गानि जरसे वहतं पुनः ॥६॥  
 जरायै त्वा परि ददामि जरायै नि धुवामि त्वा ।  
 जरा त्वा भद्रा नेष्ट व्यन्ये यन्तु मृत्यवो यान् आहुरितरान् छतम् ॥७॥  
 अभि त्वा जरिमाहित गामुक्षणामिव रज्ज्वा ।  
 यस्त्वा मृत्युरभ्यधत्त जायमानं सुपाशया ।  
 तं ते सत्यस्य हस्ताभ्यामुदमुञ्चद्बृहस्पतिः ॥८॥

### 3.12

इहैव ध्रुवां नि मिनोमि शालां क्षमे तिष्ठाति घृतमुक्षमाणा ।  
 तां त्वा शाले सर्ववीराः सुवीरा अरिष्टवीरा उप सं चरेम ॥१॥  
 इहैव ध्रुवा प्रति तिष्ठ शालेऽश्रावती गोमती सूनृतावती ।  
 ऊर्जस्वती घृतवती पयस्वत्युच्छ्रयस्व महते सौभगाय ॥२॥



धरुण्यसि शाले बृहच्छन्दाः पूतिधान्या ।  
 आ त्वा वत्सो गमेदा कुमार आ धेनवः सायमास्पन्दमानाः ॥३॥  
 इमां शालां सविता वायुरिन्द्रो बृहस्पतिर्नि मिनोतु प्रजानन् ।  
 उक्षन्तूदना मरुतो घृतेन भगो नो राजा नि कृषिं तनोतु ॥४॥  
 मानस्य पत्नि शरणा स्योना देवी देवेभिर्निमितास्यग्रे ।  
 तृणं वसाना सुमना असस्त्वमथास्मभ्यं सहवीरं रयिं दाः ॥५॥  
 ऋतेन स्थूणामाधि रोह वंशोग्रो विराजन् अप वृङ्क्ष्व शत्रून् ।  
 मा ते रिषन् उपसत्तारो गृहाणां शाले शतं जीवेम शरदः सर्ववीराः ॥६॥  
 एमां कुमारस्तरुण आ वत्सो जगता सह ।  
 एमां परिस्सुतः कुम्भ आ दध्नः कलशैरगुः ॥७॥  
 पूर्णं नारि प्र भर कुम्भमेतं घृतस्य धाराममृतेन संभृतम् ।  
 इमां पातून् अमृतेन समङ्गधीष्ठापूर्तमभि रक्षात्येनाम् ॥८॥  
 इमा आपः प्र भराम्ययक्ष्मा यक्षमनाशनीः ।  
 गृहान् उप प्र सीदाम्यमृतेन सहाग्निना ॥९॥

### 3.13

यददः संप्रयतीरहावनदता हते ।  
 तस्मादा नद्यो नाम स्थ ता वो नामानि सिन्धवः ॥१॥  
 यत्प्रेषिता वरुणेनाच्छीभं समवल्गत ।  
 तदाप्रोदिन्द्रो वो यतीस्तस्मादापो अनु ष्ठन ॥२॥  
 अपकामं स्यन्दमाना अवीवरत वो हि कम् ।  
 इन्द्रो वः शक्तिभिर्देवीस्तस्माद्धानमि वो हितम् ॥३॥  
 एकः वो देवोऽप्यतिष्ठत्स्यन्दमाना यथावशम् ।  
 उदानिषुर्महीरिति तस्मादुदकमुच्यते ॥४॥  
 आपो भद्रा घृतमिदाप आसन् अग्नीषोमौ बिभ्रत्याप इत्ताः ।  
 तीव्रो रसो मधुपृचामरंगम आ मा प्राणेन सह वर्चसा गमेत् ॥५॥  
 आदित्यश्याम्युत वा शृणोम्या मा घोषो गच्छति वाङ्गासाम् ।  
 मन्ये भेजानो अमृतस्य तर्हि हिरण्यवर्णा अतृपं यदा वः ॥६॥  
 इदं व आपो हृदयमयं वत्स ऋतावरीः ।  
 इहेत्थमेत शक्वरीर्यत्रेदं वेशयामि वः ॥७॥

### 3.14

सं वो गोष्ठेन सुषदा सं रय्या सं सुभूत्या ।  
 अहर्जातस्य यन् नाम तेना वः सं सृजामसि ॥१॥  
 सं वः सृजत्वयमा सं पुषा सं बृहस्पतिः ।  
 समिन्द्रो यो धनंजयो मयि पुष्यत यद्वसु ॥२॥  
 संजग्माना अबिभ्युषीरस्मिन् गोष्ठे करीषिणीः ।  
 बिभ्रतीः सोम्यं मध्वनमीवा उपेतन ॥३॥  
 इहैव गाव एतनेहो शकेव पुष्यत ।  
 इहैवोत प्र जायध्वं मयि संज्ञानमस्तु वः ॥४॥  
 शिवो वो गोष्ठो भवतु शारिशकेव पुष्यत ।  
 इहैवोत प्र जायध्वं मया वः सं सृजामसि ॥५॥  
 मया गावो गोपतिना सचध्वमयं वो गोष्ठ इह पोषयिष्णुः ।  
 रायस्पोषेण बहुला भवन्तीर्जीवा जीवन्तीरुप वः सदेम ॥६॥

### 3.15

इन्द्रमहं वणिजं चोदयामि स न ऐतु पुरएता नो अस्तु ।  
 नुदन् अरातिं परिपन्थिनं मृगं स ईशानो धनदा अस्तु मह्यम् ॥१॥  
 ये पन्थानो बहवो देवयाना अन्तरा द्यावापृथिवी संचरन्ति ।  
 ते मा जुषन्तां पयसा घृतेन यथा क्रीत्वा धनमाहराणि ॥२॥  
 इध्मेनाग्न इच्छमानो घृतेन जुहोमि हव्यं तरसे बलाय ।  
 यावदीशे ब्रह्मणा वन्दमान इमां धियं शतसेयाय देवीम् ॥३॥  
 इमामग्ने शरणिं मीमूषो नो यमध्वानमगाम दूरम् ।  
 शुनं नो अस्तु प्रपणो विक्रयश्च प्रतिपणः फलिने मा कृणोतु ।  
 इदं हव्यं संविदानौ जुषेथां शुनं नो अस्तु चरितमुत्थितं च ॥४॥  
 येन धनेन प्रपणं चरामि धनेन देवा धनमिच्छमानः ।  
 तन् मे भूयो भवतु मा कनीयोऽग्ने सातघ्नो देवान् हविषा नि षेध ॥५॥  
 येन धनेन प्रपणं चरामि धनेन देवा धनमिच्छमानः ।  
 तस्मिन् म इन्द्रो रुचिमा दधातु प्रजापतिः सविता सोमो अग्निः ॥६॥  
 उप त्वा नमसा वयं होतवैश्वानर स्तुमः ।  
 स नः प्रजास्वात्मसु गोषु प्राणेषु जागृहि ॥७॥  
 विश्वाहा ते सदमिद्भरेमाश्वयेव तिष्ठते जातवेदः ।  
 रायस्पोषेण समिषा मदन्तो मा ते अग्ने प्रतिवेशा रिषाम ॥८॥

## 3.16

प्रातरग्निं प्रातरिन्द्रं हवामहे प्रातर्मित्रावरुणा प्रातरश्विना ।  
 प्रातर्भगं पूषणं ब्रह्मणस्पतिं प्रातः सोममुत् रुद्रं हवामहे ॥१॥  
 प्रातर्जितं भगमुग्रं हवामहे वयं पुत्रमदितेर्यो विधर्ता ।  
 आध्रश्चिद्यं मन्यमानस्तुरश्चिद्राजा चिद्यं भगं भक्षीत्याह ॥२॥  
 भग प्रणेत्भग सत्यराधो भगेमां धियमुदवा ददन् नः ।  
 भग प्र णो जनय गोभिरश्वैर्भग प्र नृभिर्नृवन्तः स्याम ॥३॥  
 उतेदानीं भगवन्तः स्यामोत् प्रपित्व उत मध्ये अह्नाम् ।  
 उतोदितौ मघवन्त्सूर्यस्य वयं देवानां सुमतौ स्याम ॥४॥  
 भग एव भगवामस्तु देवस्तेना वयं भगवन्तः स्याम ।  
 तं त्वा भग सर्व इज्जोहवीमि स नो भग पुरएता भवेह ॥५॥  
 समध्वरायोषसो नमन्त दधिक्रावेव शुचये पदाय ।  
 अर्वाचीनं वसुविदं भगं मे रथमिवाश्वा वाजिन आ वहन्तु ॥६॥  
 अश्ववतीर्गोमतीर्न उषासो वीरवतीः सदमुच्छन्तु भद्राः ।  
 घृतं दुहाना विश्वतः प्रपीता यूयं पात स्वास्तिभिः सदा नः ॥७॥

## 3.17

सीरा युञ्जन्ति कवयो युगा वि तन्वते पृथक् ।  
 धीरा देवेषु सुम्नयौ ॥१॥  
 युनक्त सीरा वि युगा तनोत कृते योनौ वपतेह बीजम् ।  
 विराजः श्रुष्टिः सभरा असन् नो नेदीय इत्सृण्यः पक्वमा यवन् ॥२॥  
 लाङ्गलं पवीरवत्सुशीमं सोमसत्सरु ।  
 उदिद्वपतु गामविं प्रस्थावद्रथवाहनं पीबरीं च प्रफर्व्यम् ॥३॥  
 इन्द्रः सीतां नि गृह्णातु तां पूषाभि रक्षतु ।  
 सा नः पयस्वती दुहामुत्तरामुत्तरां समाम् ॥४॥  
 शुनं सुफाला वि तुदन्तु भूमिं शुनं कीनाशा अनु यन्तु वाहान् ।  
 शुनासीरा हविषा तोशमाना सुपिप्पला ओषधीः कर्तमस्मै ॥५॥  
 शुनं वाहाः शुनं नरः शुनं कृषतु लाङ्गलम् ।  
 शुनं वरत्रा बध्यन्तां शुनमष्टामुदिङ्गय ॥६॥  
 शुनासीरेह स्म मे जुषेथाम् ।  
 यद्विवि चक्रथुः पयस्तेनेमामुप सिञ्चतम् ॥७॥  
 सीते वन्दामहे त्वावाची सुभगे भव ।  
 यथा नः सुमना असो यथा नः सुफला भुवः ॥८॥  
 घृतेन सीता मधुना समक्ता विश्वैर्देवैरनुमता मरुद्भिः ।  
 सा नः सीते पयसाभ्याववृत्स्वोर्जस्वती घृतवत्पिन्वमाना ॥९॥

## 3.18

इमां खनाम्योषधिं वीरुधां बलवन्तमाम् ।  
 यया सपत्नीं बाधते यया संविन्दते पतिम् ॥१॥  
 उत्तानपर्णे सुभगे देवजूते सहस्वति ।  
 सपत्नीं मे परा णुद पतिं मे केवलं कृधि ॥२॥  
 नहि ते नाम जग्राह नो अस्मिन् रमसे पतौ ।  
 परामेव परावतं सपत्नीं गमयामसि ॥३॥  
 उत्तराहमुत्तर उत्तरेदुत्तराभ्यः ।  
 अधः सपत्नी या ममाधरा साधराभ्यः ॥४॥  
 अहमस्मि सहमानाथो त्वमसि सासहिः ।  
 उभे सहस्वती भूत्वा सपत्नीं मे सहावहै ॥५॥  
 अभि तेऽधां सहमानामुप तेऽधां सहीयसीम् ।  
 मामनु प्र ते मनो वत्सं गौरिव धावतु पथा वारिव धावतु ॥६॥

## 3.19

संशितं म इदं ब्रह्म संशितं वीर्यं बलम् ।  
 संशितं क्षत्रमजरमस्तु जिष्णुर्येषामस्मि पुरोहितः ॥१॥  
 समहमेषां राष्ट्रं स्यामि समोजो वीर्यं बलम् ।  
 वृश्चामि शत्रूणां बाहून् अनेन हविषा अहम् ॥२॥  
 नीचैः पद्यन्तामधरे भवन्तु ये नः सूरिं मघवानं पृतन्यान् ।  
 क्षिणामि ब्रह्मणामित्रान् उन् नयामि स्वान् अहम् ॥३॥  
 तीक्ष्णीयांसः परशोरग्नेस्तीक्ष्णतरा उत ।  
 इन्द्रस्य वज्रात्तीक्ष्णीयांसो येषामस्मि पुरोहितः ॥४॥  
 एषामहमायुधा सं स्याम्येषां राष्ट्रं सुवीरं वर्धयामि ।  
 एषां क्षत्रमजरमस्तु जिष्णवेषां चित्तं विश्वेऽवन्तु देवाः ॥५॥  
 उद्धर्षन्तां मघवन् वाजिनान्युद्धीराणां जयतामेतु घोषः ।  
 पृथग्घोषा उलुलयः केतुमन्त उदीरताम् ।  
 देवा इन्द्रज्येष्ठा मरुतो यन्तु सेनया ॥६॥

प्रेता जयता नर उग्रा वः सन्तु बाहवः ।  
 तीक्ष्णेष्वोऽबलधन्वनो हतो ग्रायुधा अबलान् उग्रबाहवः ॥७॥  
 अवसृष्टा परा पत शरव्ये ब्रह्मसंशिते ।  
 जय अमित्रान् प्र पद्यस्व जह्येषां वरंवरं मामीषां मोचि कश्चन ॥८॥

3.20

अयं ते योनिर्ऋत्वियो यतो जातो अरोचथाः ।  
 तं जानन्न अग्न आ रोहाधा नो वर्धय रयिम् ॥१॥  
 अग्ने अह्ना वदेह नः प्रत्यङ्गनः सुमना भव ।  
 प्र णो यच्छ विशां पते धनदा असि नस्त्वम् ॥२॥  
 प्र णो यच्छत्वयमा प्र भगः प्र बृहस्पतिः ।  
 प्र देवीः प्रोत सूनता रयिं देवी दधातु मे ॥३॥  
 सोमं राजानमवसेऽग्निं गीर्भिर्हवामहे ।  
 आदित्यं विष्णुं सूर्यं ब्रह्माणं च बृहस्पतिम् ॥४॥  
 त्वं नो अग्ने अग्निभिर्ब्रह्म यज्ञं वर्धय ।  
 त्वं नो देव दातवे रयिं दानाय चोदय ॥५॥  
 इन्द्रवायू उभावहिह सुहवेह हवामहे ।  
 यथा नः सर्व इज्जनः संगत्यां सुमना असदानकामश्च नो भुवत् ॥६॥  
 अर्यमणं बृहस्पतिमिन्द्रं दानाय चोदय ।  
 वातं विष्णुं सरस्वतीं सवितारं च वाजिनम् ॥७॥  
 वाजस्य नु प्रसवे सं बभूविमेमा च विश्वा भुवनानि अन्तः ।  
 उतादित्सन्तं दापयतु प्रजानन् रयिं च नः सर्ववीरं नि यच्छ ॥८॥  
 दुह्रां मे पञ्च प्रदिषो दुह्रामुर्वीर्यथाबलम् ।  
 प्रापेयं सर्वा आकृतीर्मनसा हृदयेन च ॥९॥  
 गोसनिं वाचमुदेयं वर्चसा माभ्युदिहि ।  
 आ रुन्धां सर्वतो वायुस्त्वष्टा पोषं दधातु मे ॥१०॥

3.21

ये अग्नयो अप्स्वन्तर्ये वृत्रे ये पुरुषे ये अशमसु ।  
 य आविवेशोषधीर्यो वनस्पतींस्तेभ्यो अग्निभ्यो हुतमस्त्वेतत् ॥१॥  
 यः सोमे अन्तर्यो गोष्वन्तर्य आविष्टो वयःसु यो मृगेषु ।  
 य आविवेश द्विपदो यस्चतुष्पदस्तेभ्यो अग्निभ्यो हुतमस्त्वेतत् ॥२॥  
 य इन्द्रेण सरथं याति देवो वैश्वानर उत विश्वदाव्यः ।  
 यं जोहवीमि पृतनासु सासहिं तेभ्यो अग्निभ्यो हुतमस्त्वेतत् ॥३॥  
 यो देवो विश्वाद्यम् काममाहुर्यं दातारं प्रतिगुह्यन्तमाहुः ।  
 यो धीरः शक्रः परिभूरदाभ्यस्तेभ्यो अग्निभ्यो हुतमस्त्वेतत् ॥४॥  
 यं त्वा होतारं मनसाभि संविदुस्त्रयोदश भौवनाः पञ्च मानवाः ।  
 वर्चोधसे यशसे सूनतावते तेभ्यो अग्निभ्यो हुतमस्त्वेतत् ॥५॥  
 उक्षान्नाय वशान्नाय सोमपृष्ठाय वेधसे ।  
 वैश्वानरज्येष्ठेभ्यस्तेभ्यो अग्निभ्यो हुतमस्त्वेतत् ॥६॥  
 दिवं पृथिवीमन्वन्तरिक्षं ये विद्युतमनुसंचरन्ति ।  
 ये दिक्स्वन्तर्ये वाते अन्तस्तेभ्यो अग्निभ्यो हुतमस्त्वेतत् ॥७॥  
 हिरण्यपाणिं सवितारमिन्द्रं बृहस्पतिं वरुणं मित्रमग्निम् ।  
 विश्वान् देवान् अङ्गिरसो हवामहे इमं क्रव्यादं शमयन्त्वग्निम् ॥८॥  
 शान्तो अग्निः क्रव्याच्छान्तः पुरुषरेषणः ।  
 अथो यो विश्वदाव्यस्तं क्रव्यादमशीशमम् ॥९॥  
 ये पर्वताः सोमपृष्ठा आप उत्तानशीवरीः ।  
 वातः पर्जन्य आदग्निस्ते क्रव्यादमशीशमन् ॥१०॥

3.22

हस्तिवर्चसं प्रथतां बृहद्यशो अदित्या यत्तन्वः संबभूव ।  
 तत्सर्वे समदुर्मह्यमेतद्विश्वे देवा अदितिः सजोषाः ॥१॥  
 मित्रश्च वरुणश्चेन्द्रो रुद्रश्च चेततु ।  
 देवासो विश्वधायसस्ते माञ्जन्तु वर्चसा ॥२॥  
 येन हस्ती वर्चसा संबभूव येन राजा मनुष्येस्वप्स्वन्तः ।  
 येन देवा देवतामग्र आयन् तेन मामद्य वर्चसाग्ने वर्चस्विनं कृणु ॥३॥  
 यत्ते वर्चो जातवेदो बृहद्भवत्याहुतेः ।  
 यावत्सूर्यस्य वर्च आसुरस्य च हस्तिनः ।  
 तावन् मे अश्विना वर्च आ धत्तां पुष्करस्रजा ॥४॥  
 यावच्चतस्रः प्रदिशश्चक्षुर्यावत्समश्रुते ।  
 तावत्समैत्विन्द्रियं मयि तद्धस्तिवर्चसम् ॥५॥  
 हस्ती मृगाणां सुषदामतिष्ठवान् बभूव हि ।  
 तस्य भगेन वर्चसाभि षिञ्चामि मामहम् ॥६॥

3.23

येन वेहद्भूविथ नाशयामसि तत्त्वत्।  
इदं तदन्यत्र त्वदप दूरे नि दध्मसि ॥१॥  
आ ते योनिं गर्भ एतु पुमान् बाण इवेषुधिम् ।  
आ वीरोऽत्र जायतां पुत्रस्ते दशमास्यः ॥२॥  
पुमांसं पुत्रं जनय तं पुमान् अनु जायताम् ।  
भवासि पुत्राणां माता जातानां जनयाश्च यान् ॥३॥  
यानि बद्राणि बीजान्यृषभा जनयन्ति च ।  
तैस्त्वं पुत्रं विन्दस्व सा प्रसूर्धनुका भव ॥४॥  
कृणोमि ते प्राजापत्यमा योनिं गर्भ एतु ते ।  
विन्दस्व त्वं पुत्रं नारि यस्तुभ्यं शमसच्छमु तस्मै त्वं भव ॥५॥  
यासां द्यौः पिता पृथिवी माता समुद्रो मूलं वीरुधां बभूव ।  
तास्त्वा पुत्रविद्याय दैवीः प्रावन्त्वोषधयः ॥६॥

3.24

पयस्वतीरोषधयः पयस्वन् मामकं वचः ।  
अथो पयस्वतीनामा भरेऽहं सहस्रशः ॥१॥  
वेदाहं पयस्वन्तं चकार धान्यं बहु ।  
संभृत्वा नाम यो देवस्तं वयं हवामहे योयो अयज्वनो गृहे ॥२॥  
इमा याः पञ्च प्रदिशो मानवीः पञ्च कृष्टयः ।  
वृष्टे शापं नदीरिवेह स्फातिं समावहान् ॥३॥  
उदुत्सं शतधारं सहस्रधारमक्षितम् ।  
एवास्माकेदं धान्यं सहस्रधारमक्षितम् ॥४॥  
शतहस्त समाहर सहस्रहस्त सं किर ।  
कृतस्य कार्यस्य चेह स्फातिं समावह ॥५॥  
तिस्रो मात्रा गन्धर्वाणां चतस्रो गृहपत्याः ।  
तासां या स्फातिमत्तमा तया त्वाभि मृशामसि ॥६॥  
उपोहश्च समूहश्च क्षत्तारौ ते प्रजापते ।  
ताविहा वहतां स्फातिं बहुं भूमानमक्षितम् ॥७॥

3.25

उत्तुदस्त्वोत्तुदतु मा धृथाः शयने स्वे ।  
इषुः कामस्य या भीमा तया विध्यामि त्वा हृदि ॥१॥  
आधीपर्णा कामशल्यामिषु संकल्पकुल्मलाम् ।  
तां सुसंनतां कृत्वा कामो विध्यतु त्वा हृदि ॥२॥  
या प्लीहानं शोषयति कामस्येषुः सुसंनता ।  
प्राचीनपक्षा व्योषा तया विध्यामि त्वा हृदि ॥३॥  
शुचा विद्धा व्योषया शुष्कास्याभि सर्प मा ।  
मृदुर्निमन्युः केवली प्रियवादिन्यनुव्रता ॥४॥  
आजामि त्वाजन्या परि मातुरथो पितुः ।  
यथा मम क्रतावसो मम चित्तमुपायसि ॥५॥  
व्यस्यै मित्रावरुणौ हृदश्चित्तान्यस्यतम् ।  
अथैनामक्रतुं कृत्वा ममैव कृणुतं वशे ॥६॥

3.26

येऽस्यां स्थ प्राच्यां दिशि हेतयो नाम देवास्तेषां वो अग्निरिषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥१॥  
येऽस्यां स्थ दक्षिणायां दिश्यविष्यवो नाम देवास्तेषां वः काम इषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥२॥  
येऽस्यां स्थ प्रतीच्यां दिशि वैराजा नाम देवास्तेषां व आप इषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥३॥  
येऽस्यां स्थोदीच्यां दिशि प्रविध्यन्तो नाम देवास्तेषां वो वात इषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥४॥  
येऽस्यां स्थ ध्रुवायां दिशि निलिम्पा नाम देवास्तेषां व ओषधीरिषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥५॥  
येऽस्यां स्थोर्ध्वायां दिश्यवस्वन्तो नाम देवास्तेषां वो बृहस्पतिरिषवः ।  
ते नो मृडत ते नोऽधि ब्रूत तेभ्यो वो नमस्तेभ्यो वः स्वाहा ॥६॥

3.27

प्राची दिगग्निरधिपतिरसितो रक्षितादित्या इषवः ।  
तेभ्यो नमोऽधिपतिभ्यो नमो रक्षितुभ्यो नम इषुभ्यो नम एभ्यो अस्तु ।  
योऽस्मान् द्वेष्टि यं वयं द्विष्मस्तं वो जम्भे दध्मः ॥१॥  
दक्षिणा दिगिन्द्रोऽधिपतिस्तिरश्चिराजी रक्षिता पितर इषवः ।

तेभ्यो नमोऽधिपतिभ्यो नमो रक्षितृभ्यो नम इषुभ्यो नम एभ्यो अस्तु ।  
 योऽस्मान् द्वेष्टि यं वयं द्विष्मस्तं वो जम्भे दध्मः ॥२॥  
 प्रतीची दिग्वरुणोऽधिपतिः पृदाकू रक्षितान्नमिषवः ।  
 तेभ्यो नमोऽधिपतिभ्यो नमो रक्षितृभ्यो नम इषुभ्यो नम एभ्यो अस्तु ।  
 योऽस्मान् द्वेष्टि यं वयं द्विष्मस्तं वो जम्भे दध्मः ॥३॥  
 उदीची दिक्सोमोऽधिपतिः स्वजो रक्षिताशनिरिषवः ।  
 तेभ्यो नमोऽधिपतिभ्यो नमो रक्षितृभ्यो नम इषुभ्यो नम एभ्यो अस्तु ।  
 योऽस्मान् द्वेष्टि यं वयं द्विष्मस्तं वो जम्भे दध्मः ॥४॥  
 ध्रुवा दिग्विष्णुरधिपतिः कल्माषग्रीवो रक्षिता वीरुध इषवः ।  
 तेभ्यो नमोऽधिपतिभ्यो नमो रक्षितृभ्यो नम इषुभ्यो नम एभ्यो अस्तु ।  
 योऽस्मान् द्वेष्टि यं वयं द्विष्मस्तं वो जम्भे दध्मः ॥५॥  
 ऊर्ध्वा दिग्बृहस्पतिरधिपतिः श्वित्रो रक्षिता वर्षमिषवः ।  
 तेभ्यो नमोऽधिपतिभ्यो नमो रक्षितृभ्यो नम इषुभ्यो नम एभ्यो अस्तु ।  
 योऽस्मान् द्वेष्टि यं वयं द्विष्मस्तं वो जम्भे दध्मः ॥६॥

3.28

एकैकयैषा सृष्ट्या सं बभूव यत्र गा असृजन्त भूतकृतो विश्वरूपाः ।  
 यत्र विजायते यमिन्यपर्तुः सा पशून् क्षिणाति रिफती रुशती ॥१॥  
 एषा पशून्त्सं क्षिणाति क्रव्याद्भूत्वा व्यद्वरी ।  
 उतैनां ब्रह्मणे दद्यात्तथा स्योना शिवा स्यात् ॥२॥  
 शिवा भव पुरुषेभ्यो गोभ्यो अश्वेभ्यः शिवा ।  
 शिवास्मै सर्वस्मै क्षेत्राय शिवा न इहैधि ॥३॥  
 इह पुष्टिरिह रस इह सहस्रसातमा भव ।  
 पशून् यमिनि पोषय ॥४॥  
 यत्रा सुहार्दः सुकृतो मदन्ति विहाय रोगं तन्वः स्वायाः ।  
 तं लोके यमिन्याभिसंबभूव सा नो मा हिंसीत्पुरुषान् पशूंश्च ॥५॥  
 यत्रा सुहार्दा सुकृतामग्निहोत्रहुतां यत्र लोकः ।  
 तं लोके यमिन्याभिसंबभूव सा नो मा हिंसीत्पुरुषान् पशूंश्च ॥६॥

3.29

यद्राजानो विभजन्त इष्टापूर्तस्य षोडशं यमस्यामी सभासदः ।  
 अविस्तस्मात्प्र मुञ्चति दत्तः शितिपात्स्वधा ॥१॥  
 सर्वान् कामान् पूरयत्याभवन् प्रभवन् भवन् ।  
 आकूतिप्रोऽविर्दत्तः शितिपात्र् नोप दस्यति ॥२॥  
 यो ददाति शितिपादमविं लोकेन संमितम् ।  
 स नाकमभ्यारोहति यत्र शुल्को न क्रियते अबलेन बलीयसे ॥३॥  
 पञ्चापूपं शितिपादमविं लोकेन संमितम् ।  
 प्रदातोप जीवति पितृणां लोकेऽक्षितम् ॥४॥  
 पञ्चापूपं शितिपादमविं लोकेन संमितम् ।  
 प्रदातोप जीवति सूर्यामासयोरक्षितम् ॥५॥  
 इरेव नोप दस्यति समुद्र इव पयो महत् ।  
 देवो सवासिनाविव शितिपान् नोप दस्यति ॥६॥  
 क इदं कस्मा अदात्कामः कामायादात् ।  
 कामो दाता कामः प्रतिग्रहीता कामः समुद्रमा विवेश ।  
 कामेन त्वा प्रति गृह्णामि कामैतत्ते ॥७॥  
 भूमिष्ट्वा प्रति गृह्णात्वन्तरिक्षमिदं महत् ।  
 माहं प्राणेन मात्मना मा प्रजया प्रतिगृह्य वि राधिषि ॥८॥

3.30

सहृदयं सांमनस्यमविद्वेषं कृणोमि वः ।  
 अन्यो अन्यमभि हर्यत वत्सं जातमिवाघ्न्या ॥१॥  
 अनुव्रतः पितुः पुत्रो मात्रा भवतु संमनाः ।  
 जाया पत्ये मधुमतीं वाचं वदतु शन्तिवाम् ॥२॥  
 मा भ्राता भ्रातरं द्विक्षन् मा स्वसारमुत स्वसा ।  
 सम्यञ्चः सन्नता भूत्वा वाचं वदत भद्रया ॥३॥  
 येन देवा न वियन्ति नो च विद्विषते मिथः ।  
 तत्कृणोमो ब्रह्म वो गृहे संज्ञानं पुरुषेभ्यः ॥४॥  
 ज्यायस्वन्तश्चित्तिनो मा वि यौष्ट संराधयन्तः सधुराश्चरन्तः ।  
 अन्यो अन्यस्मै वल्गु वदन्त एत सध्रीचीनान् वः संमनसस्क्रणोमि ॥५॥  
 समानी प्रपा सह वोऽन्नभागः समाने योक्त्रे सह वो युनज्मि ।  
 सम्यञ्चोऽग्निं सपर्यतारा नाभिमिवाभितः ॥६॥  
 सध्रीचीनान् वः संमनसस्कृणोम्येकश्रुष्टीन्त्संवननेन सर्वान् ।  
 देवा इवामृतं रक्षमाणाः सायंप्रातः सौमनसो वो अस्तु ॥७॥

### 3.31

वि देवा जरसावृतन् वि त्वमग्ने अरात्या ।  
व्यहं सर्वेण पाप्मना वि यक्ष्मेण समायुषा ॥१॥  
व्यात्या पवमानो वि शक्रः पापकृत्या ।  
व्यहं सर्वेण पाप्मना वि यक्ष्मेण समायुषा ॥२॥  
वि ग्राम्याः पशव आरण्यैर्व्यापिस्तृष्णायासरन् ।  
व्यहं सर्वेण पाप्मना वि यक्ष्मेण समायुषा ॥३॥  
वी मे द्यावापृथिवी इतो वि पन्थानो दिशंदिशम् ।  
व्यहं सर्वेण पाप्मना वि यक्ष्मेण समायुषा ॥४॥  
त्वष्टा दुहित्रे वहतुं युनक्तीतीदं विश्वं भुवनं वि याति ।  
व्यहं सर्वेण पाप्मना वि यक्ष्मेण समायुषा ॥५॥  
अग्निः प्राणान्त्सं दधाति चन्द्रः प्राणेन संहितः ।  
व्यहं सर्वेण पाप्मना वि यक्ष्मेण समायुषा ॥६॥  
प्राणेन विश्वतोवीर्यं देवाः सूर्यं समैरयन् ।  
व्यहं सर्वेण पाप्मना वि यक्ष्मेण समायुषा ॥७॥  
आयुष्मतामायुष्कृतां प्राणेन जीव मा मृथाः ।  
व्यहं सर्वेण पाप्मना वि यक्ष्मेण समायुषा ॥८॥  
प्राणेन प्राणतां प्राणेहैव भव मा मृथाः ।  
व्यहं सर्वेण पाप्मना वि यक्ष्मेण समायुषा ॥९॥  
उदायुषा समायुषोदोषधीनां रसेन ।  
व्यहं सर्वेण पाप्मना वि यक्ष्मेण समायुषा ॥१०॥  
आ पर्जन्यस्य वृष्ट्योदस्थामामृता वयम् ।  
व्यहं सर्वेण पाप्मना वि यक्ष्मेण समायुषा ॥११॥

### 4.1

ब्रह्म जज्ञानं प्रथमं पुरस्ताद्वि सीमतः सुरुचो वेन आवः ।  
स बुध्या उपमा अस्य विष्ठाः सतश्च योनिमसतश्च वि वः ॥१॥  
इयं पित्र्या राष्ट्रयेत्वग्रे प्रथमाय जनुषे भुवनेष्ठाः ।  
तस्मा एतं सुरुचं ह्यारमह्यं घर्मं श्रीणन्तु प्रथमाय धास्यवे ॥२॥  
प्र यो जज्ञे विद्वान् अस्य बन्धुर्विश्वा देवानां जनिमा विवक्ति ।  
ब्रह्म ब्रह्मण उज्जभार मध्यान् निचैरुच्चैः स्वधा अभि प्र तस्थौ ॥३॥  
स हि विदः स पृथिव्या ऋतस्था मही क्षेमं रोदसी अस्कभायत् ।  
महान् मही अस्कभायद्वि जातो द्यां सद्य पार्थिवं च रजः ॥४॥  
स भुध्यादाष्ट्र जनुषोऽभ्यग्रं बृहस्पतिर्देवता तस्य सम्राट् ।  
अहयच्छुक्रं ज्योतिषो जनिष्ठाथ द्युमन्तो वि वसन्तु विप्राः ॥५॥  
नूनं तदस्य काव्यो हिनोति महो देवस्य पूर्वस्य धाम ।  
एष जज्ञे बहुभिः साकमित्था पूर्वं अर्धे विषिते ससन् नु ॥६॥  
योऽथर्वाणं पितरं देवबन्धुं बृहस्पतिं नमसाव च गच्छात् ।  
त्वं विश्वेषां जनिता यथासः कविर्देवो न दभायत्स्वधावान् ॥७॥

### 4.2

य आत्मदा बलदा यस्य विश्व उपासते प्रशिषं यस्य देवाः ।  
योऽस्येशे द्विपदो यश्चतुष्पदः कस्मै देवाय हविषा विधेम ॥१॥  
यः प्राणतो निमिषतो महित्वैको राजा जगतो बभूव ।  
यस्य छायामृतं यस्य मृत्युः कस्मै देवाय हविषा विधेम ॥२॥  
यं क्रन्दसी अवतश्चस्कभाने भियसाने रोदसी अह्वयेथाम् ।  
यस्यासौ पन्था रजसो विमानः कस्मै देवाय हविषा विधेम ॥३॥  
यस्य द्यौरुर्वी पृथिवी च मही यस्याद उर्वन्तरिक्षम् ।  
यस्यासौ सूरौ विततो महित्वा कस्मै देवाय हविषा विधेम ॥४॥  
यस्य विश्वे हिमवन्तो महित्वा समुद्रे यस्य रसामिदाहुः ।  
इमाश्च प्रदिशो यस्य बाहू कस्मै देवाय हविषा विधेम ॥५॥  
आपो अग्रे विश्वमावन् गर्भं दधाना अमृता ऋतज्ञाः ।  
यासु देवीष्वधि देव आसीत्कस्मै देवाय हविषा विधेम ॥६॥  
हिरण्यगर्भः समवर्तताग्रे भूतस्य जातः पतिरेक आसीत् ।  
स दाधार पृथिवीमुत द्यां कस्मै देवाय हविषा विधेम ॥७॥  
आपो वत्सं जनयन्तीर्गर्भमग्रे समैरयन् ।  
तस्योत जायमानस्योल्ब आसीद्धिरण्ययः कस्मै देवाय हविषा विधेम ॥८॥

### 4.3

उदितस्त्रयो अक्रमन् व्याघ्रः पुरुषो वृकः ।  
हिरुग्धि यन्ति सिन्धवो हिरुग्देवो वनस्पतिर्हिरुङ्गनमन्तु शत्रवः ॥१॥  
परेणैतु पथा वृकः परमेणोत तस्करः ।  
परेण दत्वती रज्जुः परेणाघायुर्षतु ॥२॥  
अक्ष्यौ च ते मुखं च ते व्याघ्र जम्भयामसि ।

आत्सर्वान् विशति नखान् ॥३॥  
 व्याघ्रं दत्वतां वयं प्रथमं जम्भयामसि ।  
 आदु ष्ठेनमथो अहिं यातुधानमथो वृकम् ॥४॥  
 यो अद्य स्तेन आयति स संपिष्टो अपायति ।  
 पथामपध्वंसेनैत्विन्द्रो वज्रेण हन्तु तम् ॥५॥  
 मूर्णां मृगस्य दन्ता अपिशीर्णा उ पृष्टयः ।  
 निमृक्ते गोधा भवतु नीचायच्छशयुर्मृगः ॥६॥  
 यत्संयमो न वि यमो वि यमो यन् न संयमः ।  
 इन्द्रजाः सोमजा आथर्वणमसि व्याघ्रजम्भनम् ॥७॥

4.4

यां त्वा गन्धर्वो अखनद्वरुणाय मृतभ्रजे ।  
 तां त्वा वयं खनामस्योषधिं शेषहर्षणीम् ॥१॥  
 उदुषा उदु सूर्य उदिदं मामकं वचः ।  
 उदेजतु प्रजापतिर्वृषा शुष्मेण वाजिना ॥२॥  
 यथा स्म ते विरोहतोऽभितप्तमिवानति ।  
 ततस्ते शुष्मवत्तरमियं कृणोत्वोषधिः ॥३॥  
 उच्छुष्मौषधीनां सारा ऋषभाणाम् ।  
 सं पुंसामिन्द्र वृष्यमस्मिन् धेहि तनूवशिन् ॥४॥  
 अपां रसः प्रथमजोऽथो वनस्पतीनाम् ।  
 उत सोमस्य भ्रातास्युताशमसि वृष्यम् ॥५॥  
 अद्याग्ने अद्य सवितरद्य देवि सरस्वति ।  
 अद्यास्य ब्रह्मणस्पते धनुरिवा तानया पसः ॥६॥  
 आहं तनोमि ते पसो अधि ज्यामिव धन्वनि ।  
 क्रमस्वर्श इव रोहितमनवग्लायता सदा ॥७॥  
 अश्वस्याश्वतरस्याजस्य पेत्यस्य च ।  
 अथ ऋषभस्य ये वाजास्तान् अस्मिन् धेहि तनूवशिन् ॥८॥

4.5

सहस्रशृङ्गो वृषभो यः समुद्रादुदाचरत् ।  
 तेना सहस्येना वयं नि जनान्त्स्वापयामसि ॥१॥  
 न भूमिं वातो अति वाति नाति पश्यति कश्चन ।  
 स्त्रियश्च सर्वाः स्वापय शुनश्चेन्द्रसखा चरन् ॥२॥  
 प्रोष्ठेशयास्तल्पेशया नारीर्या वह्नीशीवरीः ।  
 स्त्रियो याः पुण्यगन्धयस्ताः सर्वाः स्वापयामसि ॥३॥  
 एजदेजदजग्रभं चक्षुः प्राणमजग्रभम् ।  
 अङ्गान्यजग्रभं सर्वा रात्रीणामतिशर्वरे ॥४॥  
 य आस्ते यश्चरति यश्च तिष्ठन् विपश्यति ।  
 तेषां सं दध्मो अक्षीणि यथेदं हर्म्यं तथा ॥५॥  
 स्वप्तु माता स्वप्तु पिता स्वप्तु श्वा स्वप्तु विशपतिः ।  
 स्वपन्त्वस्यै ज्ञातयः स्वपत्वयमभितो जनः ॥६॥  
 स्वप्न स्वप्नाभिकरणेन सर्वं नि स्वापया जनम् ।  
 ओत्सूर्यमन्यान्त्स्वापयाव्युषं जागृतादहमिन्द्र इवारिष्टो अक्षितः ॥७॥

4.6

ब्राह्मणो जज्ञे प्रथमो दशशीर्षो दशास्यः ।  
 स सोमं प्रथमः पपौ स चकारारसं विषम् ॥१॥  
 यावती द्यावापृथिवी वरिष्णा यावत्सप्त सिन्धवो वितष्ठिरे ।  
 वाचं विषस्य दूषणीं तामितो निरवादिषम् ॥२॥  
 सुपर्णस्त्वा गरुत्मान् विष प्रथममावयत् ।  
 नामीमदो नास्वरुप उतास्मा अभवः पितुः ॥३॥  
 यस्त आस्यत्पञ्चाङ्गुरिर्वक्राच्चिदधि धन्वनः ।  
 अपस्कम्भस्य शल्यान् निरवोचमहं विषम् ॥४॥  
 शल्याद्विषं निरवोचं प्राञ्जनादुत पर्णधेः ।  
 अपाष्ठाच्छृङ्गात्कुल्मलान् निरवोचमहं विषम् ॥५॥  
 अरसस्त इषो शल्योऽथो ते अरसं विषम् ।  
 उतारसस्य वृक्षस्य धनुष्टे अरसारसम् ॥६॥  
 ये अपीषन् ये अदिहन् य आस्यन् ये अवासृजन् ।  
 सर्वे ते वध्रयः कृता वध्रिर्विषगिरिः कृतः ॥७॥  
 वध्रिः खनितारो वध्रिस्त्वमस्योषधे ।  
 वध्रिः स पर्वतो गिरिर्यतो जातमिदं विषम् ॥८॥

4.7

वारिदं वारयातै वरणावत्यामधि ।

तत्रामृतस्यासिक्तं तेना ते वारये विषम् ॥१॥  
 अरसं प्राच्यं विषमरसं यदुदीच्यम् ।  
 अथेदमधराच्यं करम्भेण वि कल्पते ॥२॥  
 करम्भं कृत्वा तिर्यं पीबस्पाकमुदारथिम् ।  
 क्षुधा किल त्वा दुष्टनो जक्षिवान्त्स न रूरुपः ॥३॥  
 वि ते मदं मदावति शरमिव पातयामसि ।  
 प्र त्वा चरुमिव येषन्तं वचसा स्थापयामसि ॥४॥  
 परि ग्राममिवाचितं वचसा स्थापयामसि ।  
 तिष्ठा वृक्ष इव स्थान्यभिखाते न रूरुपः ॥५॥  
 पवस्तैस्त्वा पर्यक्रीणन् दूर्शीभिरजिनैरुत ।  
 प्रक्रीरसि त्वमोषधेऽभिखाते न रूरुपः ॥६॥  
 अनाप्ता ये वः प्रथमा यानि कर्माणि चक्रिरे ।  
 वीरान् नो अत्र मा दभन् तद्व एतत्पुरो दधे ॥७॥

4.8

भूतो भूतेषु पय आ दधाति स भूतानामधिपतिर्बभूव ।  
 तस्य मृत्युश्चरति राजसूयं स राजा अनु मन्यतामिदम् ॥१॥  
 अभि प्रेहि माप वेन उग्रश्चेत्ता सपत्नहा ।  
 आ तिष्ठ मित्रवर्धन तुभ्यं देवा अधि ब्रुवन् ॥२॥  
 आतिष्ठन्तं परि विश्वे अभूषं छियं वसानश्चरति स्वरोचिः ।  
 महत्तद्दृष्णो असुरस्य नामा विश्वरूपो अमृतानि तस्थौ ॥३॥  
 व्याघ्रो अधि वैयाघ्रे वि क्रमस्व दिशो महीः ।  
 विशस्त्वा सर्वा वाञ्छन्त्वापो दिव्याः पयस्वतीः ॥४॥  
 या आपो दिव्याः पयसा मदन्त्यन्तरिक्ष उत वा पृथिव्याम् ।  
 तासां त्वा सर्वासामपामभि षिञ्चामि वर्चसा ॥५॥  
 अभि त्वा वर्चसासिचन् आपो दिव्याः पयस्वतीः ।  
 यथासो मित्रवर्धनस्तथा त्वा सविता करत् ॥६॥  
 एना व्याघ्रं परिष्वजानाः सिंहं हिन्वन्ति महते सौभगाय ।  
 समुद्रं न सुभुवस्तस्थिवांसं मर्मज्यन्ते द्वीपिनमप्स्वन्तः ॥७॥

4.9

एहि जीवं त्रायमाणं पर्वतस्यास्यक्षयम् ।  
 विश्वेभिर्देवैर्दत्तं परिधिर्जीवनाय कम् ॥१॥  
 परिपाणं पुरुषाणां परिपाणं गवामसि ।  
 अश्वानामवतां परिपाणाय तस्थिषे ॥२॥  
 उतासि परिपाणं यातुजम्भनमाञ्जन ।  
 उतामृतस्य त्वं वेत्थाथो असि जीवभोजनमथो हरितभेषजम् ॥३॥  
 यस्याञ्जनं प्रसर्पस्यङ्गमङ्गं परुष्परुः ।  
 ततो यक्ष्मं वि बाधस उग्रो मध्यमशीरिव ॥४॥  
 नैनं प्राप्नोति शपथो न कृत्या नाभिश्चोचनम् ।  
 नैनं विष्कन्धमश्रुते यस्त्वा विभत्याञ्जन ॥५॥  
 असन्मन्त्राहुष्वप्याहुष्कृताच्छमलादुत ।  
 दुर्हर्दश्चक्षुषो घोरात्तस्मान् नः पाह्याञ्जन ॥६॥  
 इदं विद्वान् आञ्जन सत्यं वक्ष्यामि नानृतम् ।  
 सनेयमश्वं गामहमात्मानं तव पूरुष ॥७॥  
 त्रयो दासा आञ्जनस्य तक्मा बलास आदहिः ।  
 वर्षिष्ठः पर्वतानां त्रिककुन् नाम ते पिता ॥८॥  
 यदाञ्जनं त्रैककुदं जातं हिमवतस्परि ।  
 यातुंश्च सर्वाञ्जम्भयत्सर्वाश्च यातुधान्यः ॥९॥  
 यदि वासि त्रैककुदं यदि यामुनमुच्यसे ।  
 उभे ते भद्रे नाम्नी ताभ्यां नः पाह्याञ्जन ॥१०॥

4.10

वाताज्जातो अन्तरिक्षाद्विद्युतो ज्योतिषस्परि ।  
 स नो हिरण्यजाः शङ्खः कृशनः पात्वंहसः ॥१॥  
 यो अग्रतो रोचनानां समुद्रादधि जज्ञिषे ।  
 शङ्खेन हत्वा रक्षांस्यत्त्रिणो वि षहामहे ॥२॥  
 शङ्खेनामीवाममतिं शङ्खेनोत सदान्वाः ।  
 शङ्खो नो विश्वभेषजः कृशनः पात्वंहसः ॥३॥  
 दिवि जातः समुद्रजः सिन्धुतस्पर्याभृतः ।  
 स नो हिरण्यजाः शङ्ख आयुष्प्रतरणो मणिः ॥४॥  
 समुद्राज्जातो मणिवृत्राज्जातो दिवाकरः ।  
 सो अस्मान्त्सर्वतः पातु हेत्या देवासुरेभ्यः ॥५॥  
 हिरण्यानामेकोऽसि सोमात्त्वमधि जज्ञिषे ।



रथे त्वमसि दर्शत इषुधौ रोचनस्त्वं प्र ण आयुषि तारिषत् ॥६॥  
देवानामस्थि कृशनं बभूव तदात्मन्वच्चरत्यप्स्वन्तः ।  
तत्ते बध्नाम्यायुषे वर्चसे बलाय दीर्घायुत्वाय शतशारदाय कार्शनस्त्वाभि रक्षतु ॥७॥

#### 4.11

अनड्वान् दाधार पृथिवीमुत द्यामनड्वान् दाधारोर्वन्तरिक्षम् ।  
अनड्वान् दाधार प्रदिशः षडुर्वीरनड्वान् विश्वं भुवनमा विवेश ॥१॥  
अनड्वान् इन्द्रः स पशुभ्यो वि चष्टे त्रयां छक्रो वि मिमीते अध्वनः ।  
भूतं भविष्यद्भुवना दुहानः सर्वा देवानां चरति व्रतानि ॥२॥  
इन्द्रो जातो मनुष्येष्वन्तर्घर्मस्तप्तश्चरति शोशुचानः ।  
सुप्रजाः सन्त्स उदारे न सर्षद्यो नाश्रीयादनडुहो विजानन् ॥३॥  
अनड्वान् दुहे सुकृतस्य लोक ऐनं प्याययति पवमानः पुरस्तात् ।  
पर्जन्यो धारा मरुत ऊधो अस्य यज्ञः पयो दक्षिणा दोहो अस्य ॥४॥  
यस्य नेशे यज्ञपतिर्न यज्ञो नास्य दातेशे न प्रतिग्रहीता ।  
यो विश्वजिद्विश्वभृद्विश्वकर्मा घर्म नो ब्रूत यतमश्रुत्तुष्पात् ॥५॥  
येन देवाः स्वरारुरुर्हृत्वा शरीरममृतस्य नाभिम ।  
तेन गेष्म सुकृतस्य लोकं घर्मस्य व्रतेन तपसा यशस्यवः ॥६॥  
इन्द्रो रूपेणाग्निर्वहेन प्रजापतिः परमेष्ठी विराट् ।  
विश्वानरे अक्रमत वैश्वानरे अक्रमतानडुह्यक्रमत ।  
सोऽदुहयत सोऽधारयत ॥७॥  
मध्यमेतदनडुहो यत्रैष वह आहितः ।  
एतावदस्य प्राचीनं यावान् प्रत्यङ्गसमाहितः ॥८॥  
यो वेदानडुहो दोहान्त्सप्तानुपदस्वतः ।  
प्रजां च लोकं चाप्नोति तथा सप्तऋषयो विदुः ॥९॥  
पद्भिः सेदिमवक्रामन् इरां जङ्घाभिरुत्खिदन् ।  
श्रमेणानड्वान् कीलालं कीनाशश्वाभि गच्छतः ॥१०॥  
द्वादश वा एता रात्रीर्व्रत्या आहुः प्रजापतेः ।  
तत्रोप ब्रह्म यो वेद तद्वा अनडुहो व्रतम् ॥११॥  
दुहे सायं दुहे प्रातर्दुहे मध्यंदिनं परि ।  
दोहा ये अस्य संयन्ति तान् विद्वानुपदस्वतः ॥१२॥

#### 4.12

रोहण्यसि रोहण्यस्त्रिच्छिन्नस्य रोहणी ।  
रोहयेदमरुन्धति ॥१॥  
यत्ते रिष्टं यत्ते द्युत्तमस्ति पेष्टं त आत्मनि ।  
धाता तद्भद्रया पुनः सं दधत्परुषा परुः ॥२॥  
सं ते मज्जा मज्जा भवतु समु ते परुषा परुः ।  
सं ते मांसस्य विस्रस्तं समस्थपि रोहतु ॥३॥  
मज्जा मज्जा सं धीयतां चर्मणा चर्म रोहतु ।  
असृक्ते अस्थि रोहतु मांसं मांसेन रोहतु ॥४॥  
लोम लोम्ना सं कल्पया त्वचा सं कल्पया त्वचम् ।  
असृक्ते अस्थि रोहतु छिन्नं सं धेह्योषधे ॥५॥  
स उत्तिष्ठ प्रेहि प्र द्रव रथः सुचक्रः ।  
सुपविः सुनाभिः प्रति तिष्ठोर्ध्वः ॥६॥  
यदि कर्त पतित्वा संशश्रे यदि वाशमा प्रहृतो जघान ।  
ऋभू रथस्येवाङ्गानि सं दधत्परुषा परुः ॥७॥

#### 4.13

उत देवा अवहितं देवा उन् नयथा पुनः ।  
उतागश्चक्रुषं देवा देवा जीवयथा पुनः ॥१॥  
द्वाविमौ वातौ वात आ सिन्धोरा परावतः ।  
दक्षं ते अन्य आवातु व्यन्यो वातु यद्रपः ॥२॥  
आ वात वाहि भेषजं वि वात वाहि यद्रपः ।  
त्वं हि विश्वभेषज देवानां दूत ईयसे ॥३॥  
त्रायन्तामिमं देवास्त्रायन्तां मरुतां गणाः ।  
त्रायन्तां विश्वा भूतानि यथायमरपा असत् ॥४॥  
आ त्वागमं शंतातिभिरथो अरिष्टतातिभिः ।  
दक्षं त उग्रमाभारिषं परा यक्षं सुवामि ते ॥५॥  
अयं मे हस्तो भगवान् अयं मे भगवत्तरः ।  
अयं मे विश्वभेषजोऽयं शिवाभिमर्शनः ॥६॥  
हस्ताभ्यां दशशाखाभ्यां जिह्वा वाचः पुरोगवी ।  
अनामयित्नुभ्यां हस्ताभ्यां ताभ्यां त्वाभि मृशामसि ॥७॥

#### 4.14

अजो ह्याग्नेरजनिष्ठ शोकात्सो अपश्यज्जनितारमग्रे ।  
 तेन देवा देवतामग्रा आयन् तेन रोहान् रुरुहुर्मध्यासः ॥१॥  
 क्रमध्वमग्निना नाकमुख्यान् हस्तेषु बिभ्रतः ।  
 दिवस्पृष्टं स्वर्गत्वा मिश्रा देवेभिराध्वम् ॥२॥  
 पृष्ठात्पृथिव्या अहमन्तरिक्षमारुहमन्तरिक्षादिवमारुहम् ।  
 दिवो नाकस्य पृष्ठात्स्वर्ग्यातिरगामहम् ॥३॥  
 स्वर्यन्तो नापेक्षन्त आ द्यां रोहन्ति रोदसी ।  
 यज्ञं ये विश्वतोधारं सुविद्वांसो वितेनिरे ॥४॥  
 अग्ने प्रेहि प्रथमो देवतानां चक्षुर्देवानामुत मानुषानाम् ।  
 इयक्षमाणा भृगुभिः सजोषाः स्वर्यन्तु यजमानाः स्वस्ति ॥५॥  
 अजमनज्मि पयसा घृतेन दिव्यं सुपर्णं पयसं बृहन्तम् ।  
 तेन गेष्म सुकृतस्य लोकं स्वरारोहन्तो अभि नाकमुत्तमम् ॥६॥  
 पञ्चौदनं पञ्चभिरङ्गुलिभिर्दिव्याद्भ्रुव पञ्चधैतमोदनम् ।  
 प्राच्यां दिशि शिरो अजस्य धेहि दक्षिणायां दिशि दक्षिणं धेहि पार्श्वम् ॥७॥  
 प्रतीच्यां दिशि भसदमस्य धेह्युत्तरस्यां दिश्युत्तरं धेहि पार्श्वम् ।  
 ऊर्ध्वायां दिश्यजस्यानकं धेहि दिशि ध्रुवायां धेहि पाजस्यमन्तरिक्षे मध्यतो मध्यमस्य ॥८॥  
 शृतमजं शृतया प्रोणुहि त्वचा सर्वैरङ्गैः संभृतं विश्वरूपम् ।  
 स उत्तिष्ठेतो अभि नाकमुत्तमं पद्भिश्चतुर्भिः प्रति तिष्ठ दिक्षु ॥९॥

#### 4.15

समुत्पतन्तु प्रदिशो नभस्वतीः समभ्राणि वातजूतानि यन्तु ।  
 महर्षभस्य नदतो नभस्वतो वाश्रा आपः पृथिवीं तर्पयन्तु ॥१॥  
 समीक्षयन्तु तविषाः सुदानवोऽपां रसा ओषधीभिः सचन्ताम् ।  
 वर्षस्य सर्गा महयन्तु भूमिं पृथग्जायन्तामोषधयो विश्वरूपाः ॥२॥  
 समीक्षयस्व गायतो नभस्यपां वेगासः पृथग्द्विजन्ताम् ।  
 वर्षस्य सर्गा महयन्तु भूमिं पृथग्जायन्तां वीरुधो विश्वरूपाः ॥३॥  
 गणास्त्वोप गायन्तु मारुताः पर्जन्य घोषिणः पृथक् ।  
 सर्गा वर्षस्य वर्षतो वर्षन्तु पृथिवीमनु ॥४॥  
 उदीरयत मरुतः समुद्रतस्त्वेषां अर्को नभ उत्पातयाथ ।  
 महर्षभस्य नदतो नभस्वतो वाश्रा आपः पृथिवीं तर्पयन्तु ॥५॥  
 अभि क्रन्द स्तनयार्दयोदधिं भूमिं पर्जन्य पयसा समङ्धि ।  
 त्वया सृष्टं बहुलमैतु वर्षमाशारेषी कृशगुरेत्वस्तम् ॥६॥  
 सं वोऽवन्तु सुदानव उत्सा अजगरा उत ।  
 मरुद्भिः प्रच्युता मेघा वर्षन्तु पृथिवीमनु ॥७॥  
 आशामाशां वि द्योततां वाता वान्तु दिशोदिशः ।  
 मरुद्भिः प्रच्युता मेघाः सं यन्तु पृथिवीमनु ॥८॥  
 आपो विद्युदभ्रं वर्षं सं वोऽवन्तु सुदानव उत्सा अजगरा उत ।  
 मरुद्भिः प्रच्युता मेघाः प्रावन्तु पृथिवीमनु ॥९॥  
 अपामग्निस्तनूभिः संविदानो य ओषधीनामधिपा बभूव ।  
 स नो वर्षं वनुतां जातवेदाः प्राणं प्रजाभ्यो अमृतं दिवस्परि ॥१०॥  
 प्रजापतिः सलिलादा समुद्रादाप ईरयन्न उदधिर्दयाति ।  
 प्र प्यायतां वृष्णो अश्वस्य रेतोऽर्वान् एतेन स्तनयित्नुनेहि ॥११॥  
 अपो निषिञ्चन्न असुरः पिता नः श्वसन्तु गर्गरा अपां वरुणाव नीचीरपः सृज ।  
 वदन्तु पृथ्विबाहवो मण्डूका इरिणानु ॥१२॥  
 संवत्सरं शशयाना ब्राह्मणा व्रतचारिणः ।  
 वाचं पर्जन्यजिन्वितां प्र मण्डूका अवादिषुः ॥१३॥  
 उपप्रवद मण्डूकि वर्षमा वद तादुरि ।  
 मध्ये हृदस्य प्लवस्व विगृह्य चतुरः पदः ॥१४॥  
 खण्वखा३ खैमखा३ मध्ये तदुरि ।  
 वर्षं वनुध्वं पितरो मरुतां मन इच्छत ॥१५॥  
 महान्तं कोशमुदचाभि षिञ्च सविद्युतं भवतु वातु वातः ।  
 तन्वतां यज्ञं बहुधा विसृष्टा आनन्दिनीरोषधयो भवन्तु ॥१६॥

#### 4.16

बृहन्न एषामधिष्ठाता अन्तिकादिव पश्यति ।  
 य स्तायन् मन्यते चरन्त्सर्वं देवा इदं विदुः ॥१॥  
 यस्तिष्ठति चरति यश्च वञ्चति यो निलायं चरति यः प्रतङ्कम् ।  
 द्वौ संनिषद्य यन् मन्त्रयेते राजा तद्वेद वरुणस्तृतीयः ॥२॥  
 उतैयं भूमिर्वरुणस्य राज उतासी द्यौर्बृहती दूरेअन्ता ।  
 उतो समुद्रौ वरुणस्य कुक्षी उतास्मिन्न अल्प उदके निलीनः ॥३॥  
 उत यो द्यामतिसर्पात्परस्तान् न स मुच्यातै वरुणस्य राजः ।  
 दिव स्पशः प्र चरन्तीदमस्य सहस्राक्षा अति पश्यन्ति भूमिम् ॥४॥  
 सर्वं तद्राजा वरुणो वि चष्टे यदन्तरा रोदसी यत्परस्तात् ।  
 संख्याता अस्य निमिषो जनानामक्षान् इव श्वघ्नी नि मिनोति तानि ॥५॥

ये ते पाशा वरुण सप्तसप्त त्रेधा तिष्ठन्ति विषिता रुषन्तः ।  
छिनन्तु सर्वे अनृतं वदन्तं यः सत्यवाद्यति तं सृजन्तु ॥६॥  
शतेन पाशैरभि धेहि वरुणैनं मा ते मोच्यन्तवाङ्मनचक्षः ।  
आस्तां जाल्म उदरं श्रंशयित्वा कोश इवाबन्धः परिकृत्यमानः ॥७॥  
यः समाभ्यो वरुणो यो व्याभ्यो यः संदेश्यो वरुणो यो विदेश्यो ।  
यो देवो वरुणो यश्च मानुषः ॥८॥  
तैस्त्वा सर्वैरभि ष्यामि पाशैरसावामुष्यायणामुष्याः पुत्र ।  
तान् उ ते सर्वान् अनुसंदिशामि ॥९॥

4.17

ईशाणां त्वा भेषजानामुज्जेष आ रभामहे ।  
चक्रे सहस्रवीर्यं सर्वस्मा ओषधे त्वा ॥१॥  
सत्यजितं शपथयावनीं सहमानां पुनःसराम् ।  
सर्वाः समह्वयोषधीरितो नः पारयादिति ॥२॥  
या शशाप शपनेन याघं मूरमादधे ।  
या रसस्य हरणाय जातमारिभे तोकमत्तु सा ॥३॥  
यां ते चक्रुरामे पात्रे यां चक्रुर्नीललोहिते ।  
आमे मांसं कृत्यां यां चक्रुस्तया कृत्याकृतो जहि ॥४॥  
दौष्वप्यं दौर्जीवित्यं रक्षो अभ्वमराय्यः ।  
दुर्णाम्नीः सर्वा दुर्वाचस्ता अस्मन् नाशयामसि ॥५॥  
क्षुधामारं तृष्णामारमगोतामनपत्यताम् ।  
अपामार्गं त्वया वयं सर्वं तदप मृज्महे ॥६॥  
तृष्णामारं क्षुधामारमथो अक्षपराजयम् ।  
अपामार्गं त्वया वयं सर्वं तदप मृज्महे ॥७॥  
अपामार्गं ओषधीनां सर्वासामेक इद्वशी ।  
तेन ते मृज्म आस्थितमथ त्वमगदश्चर ॥८॥

4.18

समं ज्योतिः सूर्येणाह्ना रात्री समावती ।  
कृणोमि सत्यमृतयेऽरसाः सन्तु कृत्वरीः ॥१॥  
यो देवाः कृत्यां कृत्वा हरादविदुषो गृहम् ।  
वत्सो धारुरिव मातरं तं प्रत्यगुप पद्यताम् ॥२॥  
अमा कृत्वा पाप्मानं यस्तेनान्यं जिघांसति ।  
अश्मानस्तस्यां दग्धायां बहुलाः फट्करिक्रति ॥३॥  
सहस्रधामन् विशिखान् विग्रीवां छायया त्वम् ।  
प्रति स्म चक्रुषे कृत्यां प्रियां प्रियावते हर ॥४॥  
अनयाहमोषध्या सर्वाः कृत्या अदृदुषम् ।  
यां क्षेत्रे चक्रुर्यां गोषु यां वा ते पुरुषेषु ॥५॥  
यश्चकार न शशाक कर्तुं शश्रे पादमङ्गुरिम् ।  
चकार भद्रमस्मभ्यमात्मने तपनं तु सः ॥६॥  
अपामार्गोऽप मार्हुं क्षेत्रियं शपथश्च यः ।  
अपाह यातुधानीरप सर्वा अराय्यः ॥७॥  
अपमृज्य यातुधानान् अप सर्वा अराय्यः ।  
अपामार्गं त्वया वयं सर्वं तदप मृज्महे ॥८॥

4.19

उतो अस्यबन्धुकुदुतो असि नु जामिकृत् ।  
उतो कृत्याकृतः प्रजां नदमिवा छिन्धि वार्षिकम् ॥१॥  
ब्राह्मणेन पर्युक्तासि कण्वेन नार्षदेन ।  
सेनेवैषि त्विषीमती न तत्र भयमस्ति यत्र प्राप्नोष्योषधे ॥२॥  
अग्रमेष्योषधीनां ज्योतिषेवाभिदीपयन् ।  
उत त्रातासि पाकस्याथो हन्तासि रक्षसः ॥३॥  
यददो देवा असुरांस्त्वयाग्रे निरकुर्वत ।  
ततस्त्वमध्योषधेऽपामार्गो अजायथाः ॥४॥  
विभिन्दती शतशाखा विभिन्दन् नाम ते पिता ।  
प्रत्यग्वि भिन्धि त्वं तं यो अस्मामभिदासति ॥५॥  
असद्भूम्याः समभवत्तद्यामेति महद्व्यचः ।  
तद्वै ततो विधूपायत्प्रत्यक्कर्तारमृच्छतु ॥६॥  
प्रत्यङ्गिहि संबभूविथ प्रतीचीनफलस्त्वम् ।  
सर्वान् मच्छपथामधि वरीयो यावया वधम् ॥७॥  
शतेन मा परि पाहि सहस्रेणाभि रक्षा मा ।  
इन्द्रस्ते वीरुधां पत उग्र औज्मानमा दधत् ॥८॥

4.20

आ पश्यति प्रति पश्यति परा पश्यति पश्यति ।  
 दिवमन्तरिक्षमाद्भूमिं सर्वं तद्देवि पश्यति ॥१॥  
 तिस्रो दिवस्त्रिः पृथिवीः षट्चेमाः प्रदिशाः पृथक् ।  
 त्वयाहं सर्वा भूतानि पश्यानि देव्योषधे ॥२॥  
 दिव्यस्य सुपर्णस्य तस्य हासि कनीनिका ।  
 सा भूमिमा रुरोहिथ वह्नां श्रान्ता वधूरिव ॥३॥  
 तां मे सहस्राक्षो देवो दक्षिणे हस्त आ दधत् ।  
 तयाहं सर्वं पश्यामि यश्च शूद्र उतार्यः ॥४॥  
 आविष्कृणुष्व रूपानि मात्मानमप गृहथाः ।  
 अथो सहस्रचक्षो त्वं प्रति पश्याः किमीदिनः ॥५॥  
 दर्शय मा यातुधानान् दर्शय यातुधान्यः ।  
 पिशाचान्त्सर्वान् दर्शयेति त्वा रभ ओषधे ॥६॥  
 कश्यपस्य चक्षुरसि शुन्याश्च चतुरक्षयाः ।  
 वीध्रे सूर्यमिव सर्पन्तं मा पिशाचं तिरस्करः ॥७॥  
 उदग्रभं परिपाणाद्यातुधानं किमीदिनम् ।  
 तेनाहं सर्वं पश्याम्युत शूद्रमुतार्यम् ॥८॥  
 यो अन्तरिक्षेण पतति दिवं यश्च अतिसर्पति ।  
 भूमिं यो मन्यते नाथं तं पिशाचं प्र दर्शय ॥९॥

4.21

आ गावो अगमन् उत भद्रमक्रन्त्सीदन्तु गोष्ठे रणयन्त्वस्मे ।  
 प्रजावतीः पुरुरूपा इह स्युरिन्द्राय पूर्वीरुषसो दुहानाः ॥१॥  
 इन्द्रो यज्वने गुणते च शिक्षत उपेद्ददाति न स्वं मुषायति ।  
 भूयोभूयो रयिमिदस्य वर्धयन् अभिन्ने खिल्ये नि दधाति देवयुम् ॥२॥  
 न ता नशन्ति न दभाति तस्करो नासामामित्रो व्यथिरा दधर्षति ।  
 देवांश्च याभिर्यजते ददाति च ज्योगित्ताभिः सचते गोपतिः सह ॥३॥  
 न ता अर्वा रेणुककाटोऽश्रुते न संस्कृतत्रमुप यन्ति ता अभि ।  
 उरुगायमभयं तस्य ता अनु गावो मर्तस्य वि चरन्ति यज्वनः ॥४॥  
 गावो भगो गाव इन्द्रो म इच्छाद्वाव सोमस्य प्रथमस्य भक्षः ।  
 इमा या गावः स जनास इन्द्र इच्छामि हृदा मनसा चिदिन्द्रम् ॥५॥  
 यूयं गावो मेदयथ कृशं चिदश्रीरं चित्कृणुथा सुप्रतीकम् ।  
 भद्रं गृहं कृणुथ भद्रवाचो बृहद्वो वय उच्यते सभासु ॥६॥  
 प्रजावतीः सूयवसे रुशन्तीः शुद्धा अपः सुप्रपाणे पिबन्तीः ।  
 मा व स्तेन ईशत माघशंसः परि वो रुद्रस्य हेतिर्वृणक्तु ॥७॥

4.22

इममिन्द्र वर्धय क्षत्रियं मे इमं विशामेकवृषं कृणु त्वम् ।  
 निरमित्रान् अक्षुण्हास्य सर्वास्तान् रन्धयास्मा अहमुत्तरेषु ॥१॥  
 एमं भज ग्रामे अश्वेषु गोषु निष्ठं भज यो अमित्रो अस्य ।  
 वर्ष्म क्षत्राणामयमस्तु राजेन्द्र शत्रुं रन्धय सर्वमस्मै ॥२॥  
 अयमस्तु धनपतिर्धनानामयं विशां विशपतिरस्तु राजा ।  
 अस्मिन् इन्द्र महि वर्चांसि धेहावर्चसं कृणुहि शत्रुमस्य ॥३॥  
 अस्मै द्यावापृथिवी भूरि वामं दुहाथां घर्मदुधे इव धेनू ।  
 अयं राजा प्रिय इन्द्रस्य भूयात्प्रियो गवामोषधीनां पशूनाम् ॥४॥  
 युनज्मि त उत्तरावन्तमिन्द्रं येन जयन्ति न पराजयन्ते ।  
 यस्त्वा करदेकवृषं जनानामुत राजामुत्तमं मानवानाम् ॥५॥  
 उत्तरस्त्वमधरे तं सपत्ना ये के च राजन् प्रतिशत्रवस्ते ।  
 एकवृष इन्द्रसखा जिगीवां छत्रूयतामा भरा भोजनानि ॥६॥  
 सिंहप्रतीको विशो अद्धि सर्वा व्याघ्रप्रतीकोऽव बाधस्व शत्रून् ।  
 एकवृष इन्द्रसखा जिगीवां छत्रूयतामा खिदा भोजनानि ॥७॥

4.23

अग्नेर्मन्वे प्रथमस्य प्रचेतसः पाञ्चजन्यस्य बहुधा यमिन्धते ।  
 विशोविशः प्रविशिवांसमीमहे स नो मुञ्चत्वंहसः ॥१॥  
 यथा हव्यं वहसि जातवेदो यथा यज्ञं कल्पयसि प्रजानन् ।  
 एवा देवेभ्यः सुमतिं न आ वह स नो मुञ्चत्वंहसः ॥२॥  
 यामन्यामन् उपयुक्तं वहिष्ठं कर्मङ्कर्मन् आभगमग्निमीडे ।  
 रक्षोहणं यज्ञवृधं घृताहुतं स नो मुञ्चत्वंहसः ॥३॥  
 सुजातं जातवेदसमग्निं वैश्वानरं विभुम् ।  
 हव्यवाहं हवामहे स नो मुञ्चत्वंहसः ॥४॥  
 येन ऋषयो बलमद्योतयन् युजा येनासुराणामयुवन्त मायाः ।  
 येनाग्निना पणीन् इन्द्रो जिगाय स नो मुञ्चत्वंहसः ॥५॥  
 येन देवा अमृतमन्वविन्दन् येनौषधीर्मधुमतीरकृण्वन् ।  
 येन देवाः स्वराभरन्त्स नो मुञ्चत्वंहसः ॥६॥

यस्येदं प्रदिशि यद्विरोचते यज्जातं जनितव्यं च केवलम् ।  
स्तौम्यग्निं नाथितो जोहवीमि स नो मुञ्चत्वंहसः ॥७॥

4.24

इन्द्रस्य मन्महे शश्वदिदस्य मन्महे वृत्रघ्न स्तोमा उप मेम आगुः ।  
यो दाशुषः सुकृतो हवमेति स नो मुञ्चत्वंहसः ॥१॥  
य उग्रीणामुग्रबाहुर्ययुर्यो दानवानां बलमारुरोज ।  
येन जिताः सिन्धवो येन गावः स नो मुञ्चत्वंहसः ॥२॥  
यश्रुषणिप्रो वृषभः स्वर्विद्यस्मै ग्रावाणः प्रवदन्ति नृम्णम् ।  
यस्याध्वरः सप्तहोता मदिष्ठः स नो मुञ्चत्वंहसः ॥३॥  
यस्य वशास ऋषभास उक्षणो यस्मै मीयन्ते स्वरवः स्वर्विदे ।  
यस्मै शुक्रः पवते ब्रह्मशुम्भितः स नो मुञ्चत्वंहसः ॥४॥  
यस्य जुष्टिं सोमिनः कामयन्ते यं हवन्त इषुमन्तं गविष्टौ ।  
यस्मिन् अर्कः शिश्रिये यस्मिन् ओजः स नो मुञ्चत्वंहसः ॥५॥  
यः प्रथमः कर्मकृत्याय जज्ञे यस्य वीर्यं प्रथमस्यानुबुद्धम् ।  
येनोद्यतो वज्रोऽभ्यायताहिं स नो मुञ्चत्वंहसः ॥६॥  
यः संग्रामान् नयति सं युधे वशी यः पुष्टानि संसृजति द्वयानि ।  
स्तौमीन्द्रं नाथितो जोहवीमि स नो मुञ्चत्वंहसः ॥७॥

4.25

वायोः सवितुर्विदधानि मन्महे यावात्मन्वद्विशथो यौ च रक्षथः ।  
यौ विश्वस्य परिभू बभूवथुस्तौ नो मुञ्चतमंहसः ॥१॥  
ययोः संख्याता वरिमा पोर्हिवानि याभ्यां रजो युपितमन्तरिक्षे ।  
ययोः प्रायं नान्वानशे कश्चन तौ नो मुञ्चतमंहसः ॥२॥  
तव व्रते नि विशन्ते जनासस्त्वप्युदिते प्रेरते चित्रभानो ।  
युवं वायो सविता च भुवनानि रक्षथस्तौ नो मुञ्चतमंहसः ॥३॥  
अपेतो वायो सविता च दुष्कृतमप रक्षांसि शिमिदां च सेधतम् ।  
सं ह्यूर्जया सृजथः सं बलेन तौ नो मुञ्चतमंहसः ॥४॥  
रयिं मे पोषं सवितोत वायुस्तनू दक्षमा सुवतां सुशेवम् ।  
अयक्षमतातिं मह इह धत्तं तौ नो मुञ्चतमंहसः ॥५॥  
प्र सुमतिं सवितर्वाय ऊतये महस्वन्तं मत्सरं मादयाथः ।  
अर्वाग्वामस्य प्रवतो नि यच्छतं तौ नो मुञ्चतमंहसः ॥६॥  
उप श्रेष्ठा न आशिषो देवयोर्धामन् अस्थिरन् ।  
स्तौमि देवं सवितारं च वायुं तौ नो मुञ्चन्त्वंहसः ॥७॥

4.26

मन्वे वां द्यावापृथिवी सुभोजसौ सचेतसौ ये अप्रथेथाममिता योजनानि ।  
प्रतिष्ठे ह्यभवतं वसूनां ते नो मुञ्चतमंहसः ॥१॥  
प्रतिष्ठे ह्यभवतं वसूनां प्रवृद्धे देवी सुभगे उरूची ।  
द्यावापृथिवी भवतं मे स्योने ते नो मुञ्चतमंहसः ॥२॥  
असन्तापे सुतपसौ हुवेऽहमुर्वी गम्भीरे कविभिर्नमस्ये ।  
द्यावापृथिवी भवतं मे स्योने ते नो मुञ्चतमंहसः ॥३॥  
ये अमृतं बिभृथो ये हवींषि ये स्रोत्या बिभृथो ये मनुष्यान् ।  
द्यावापृथिवी भवतं मे स्योने ते नो मुञ्चतमंहसः ॥४॥  
ये उस्त्रिया बिभृथो ये वनस्पतीन् ययोर्वा विश्वा भुवनान्यन्तः ।  
द्यावापृथिवी भवतं मे स्योने ते नो मुञ्चतमंहसः ॥५॥  
ये कीलालेन तर्पयथो ये घृतेन याभ्यामृते न किं चन शक्नुवन्ति ।  
द्यावापृथिवी भवतं मे स्योने ते नो मुञ्चतमंहसः ॥६॥  
यन् मेदमभिशीचति येनयेन वा कृतं पौरुषेयान् न दैवात् ।  
स्तौमि द्यावापृथिवी नाथितो जोहवीमि ते नो मुञ्चतमंहसः ॥७॥

4.27

मरुतां मन्वे अधि मे ब्रुवन्तु प्रेमं वाजं वाजसाते अवन्तु ।  
आशून् इव सुयमान् अह्ण ऊतये ते नो मुञ्चन्त्वंहसः ॥१॥  
उत्सर्माक्षितं व्यचन्ति ये सदा य आसिञ्चन्ति रसमोषधीषु ।  
पुरो दधे मरुतः पृश्निमातृस्ते नो मुञ्चन्त्वंहसः ॥२॥  
पयो धेनूनां रसमोषधीनां जवमर्वतां कवयो य इन्वथ ।  
शग्मा भवन्तु मरुतो नः स्योनास्ते नो मुञ्चन्त्वंहसः ॥३॥  
अपः समुद्राद्देवमुद्ग्रहन्ति दिवस्पृथिवीमभि ये सृजन्ति ।  
ये अद्भिरीशाना मरुतश्चरन्ति ते नो मुञ्चन्त्वंहसः ॥४॥  
ये कीलालेन तर्पयन्ति ये घृतेन ये वा वयो मेदसा संसृजन्ति ।  
ये अद्भिरीशाना मरुतो वर्षयन्ति ते नो मुञ्चन्त्वंहसः ॥५॥  
यदीदिदं मरुतो मारुतेन यदि देवा दैव्येनेदृगार ।  
यूयमीशिध्वे वसवस्तस्य निष्कृतेस्ते नो मुञ्चन्त्वंहसः ॥६॥

तिग्ममनीकं विदितं सहस्वन् मारुतं शर्धः पृतनासूग्रम् ।  
स्तौमि मरुतो नाथितो जोहवीमि ते नो मुञ्चन्त्वहसः ॥७॥

4.28

भवाशर्वो मन्वे वां तस्य वित्तं ययोर्वामिदं प्रदिशि यद्विरोचते ।  
यावस्येशाथे द्विपदो यौ चतुष्पदस्तौ नो मुञ्चतमंहसः ॥१॥  
ययोरभ्यभ्व उत यदूरे चिद्यौ विदिताविषुभृतामसिधौ ।  
यावस्येशथे द्विपदो यौ चतुष्पदस्तौ नो मुञ्चतमंहसः ॥२॥  
सहस्राक्षौ वृत्रहना हुवेहं दूरगव्यूती स्तुवन् एम्युगौ ।  
यावस्येशथे द्विपदो यौ चतुष्पदस्तौ नो मुञ्चतमंहसः ॥३॥  
यावारेभाथे बहु साकमग्रे प्र चेदस्राष्ट्रमभिभां जनेषु ।  
यावस्येशथे द्विपदो यौ चतुष्पदस्तौ नो मुञ्चतमंहसः ॥४॥  
ययोर्वधान् नापपद्यते कश्चनान्तर्देवेषूत मानुषेषु ।  
यावस्येशथे द्विपदो यौ चतुष्पदस्तौ नो मुञ्चतमंहसः ॥५॥  
यः कृत्याकृन् मूलकृद्यातुधानो नि तस्मिन् धत्तं वज्रमुग्रौ ।  
यावस्येशथे द्विपदो यौ चतुष्पदस्तौ नो मुञ्चतमंहसः ॥६॥  
अथि नो ब्रूतं पृतनासूग्रौ सं वज्रेण सजतं यः किमीदी ।  
स्तौमि भवाशर्वो नाथितो जोहवीमि तौ नो मुञ्चतमंहसः ॥७॥

4.29

मन्वे वां मित्रावरुणावृतावृधौ सचेतसौ द्रुहणो यौ नुदेथे ।  
प्र सत्यावानमवथो भरेषु तौ नो मुञ्चतमंहसः ॥१॥  
सचेतसौ द्रुहणो यौ नुदेथे प्र सत्यावानमवथो भरेषु ।  
यौ गच्छथो नृचक्षसौ बभ्रुणा सुतं तौ नो मुञ्चतमंहसः ॥२॥  
यावङ्गिरसमवथो यावगस्ति मित्रावरुणा जमदग्निमत्त्रिम् ।  
यौ कश्यपमवथो यौ वसिष्ठं तौ नो मुञ्चतमंहसः ॥३॥  
यौ श्यावाश्वमवथो वाध्यश्वं मित्रावरुणा पुरुमीढमत्त्रिम् ।  
यौ विमदमवथो सप्तवर्धिं तौ नो मुञ्चतमंहसः ॥४॥  
यौ भरद्वाजमवथो यौ गविष्ठिरं विश्वामित्रं वरुण मित्र कुत्सम् ।  
यौ कक्षीवन्तमवथो प्रोत कण्वं तौ नो मुञ्चतमंहसः ॥५॥  
यौ मेधातिथिमवथो यौ त्रिशोकं मित्रावरुणावुशनां काव्यं यौ ।  
यौ गौतममवथो प्रोत मुग्दलं तौ नो मुञ्चतमंहसः ॥६॥  
ययो रथः सत्यवर्त्म जूरश्मिर्मिथुया चरन्तमभियाति दूषयन् ।  
स्तौमि मित्रावरुणौ नाथितो जोहवीमि तौ नो मुञ्चतमंहसः ॥७॥

4.30

अहं रुद्रेभिर्वसुभिश्चराम्यहमादित्यैरुत विश्वदेवैः ।  
अहं मित्रावरुणोभा बिभर्म्यहमिन्द्राग्नी अहमश्विनोभा ॥१॥  
अहं राष्ट्री संगमनी वसूनां चिकितुषी प्रथमा यज्ञियानाम् ।  
तां मा देवा व्यदधुः पुरुत्रा भूरिस्थात्रां भूर्यविशयन्तः ॥२॥  
अहमेव स्वयमिदं वदामि जुष्टं देवानामुत मानुषाणाम् ।  
यं कामये तन्तमुग्रं कृणोमि तं ब्रह्माणं तमृषिं तं सुमेधाम् ॥३॥  
मया सोऽन्नमत्ति यो विपश्यति यः प्राणति य ईं शृणोत्युक्तम् ।  
अमन्तवो मां त उप क्षियन्ति श्रुधि श्रुत श्रुद्धेयं ते वदामि ॥४॥  
अहं रुद्राय धनुरा तनोमि ब्रह्मद्विषे शरवे हन्तवा उ ।  
अहं जनाय समदं कृणोमि अहं द्यावापृथिवी आ विवेश ॥५॥  
अहं सोममाहनसं बिभर्म्यहं त्वष्टारमुत पूषणं भगम् ।  
अहं दधामि द्रविणा हविष्मते सुप्राव्या यजमानाय सुन्वते ॥६॥  
अहं सुवे पितरमस्य मूर्धन् मम योनिरप्स्वन्तः समुद्रे ।  
ततो वि तिष्ठे भुवनानि विश्वोतामूं द्यां वर्ष्मणीप स्पृशामि ॥७॥  
अहमेव वातेव प्र वाम्यारभमाणो भुवनानि विश्वा ।  
परो दिवा पर एना पृथिव्यैतावती महिम्ना सं बभूव ॥८॥

4.31

त्वया मन्यो सरथमारुजन्तो हर्षमाणा हृषितासो मरुत्वन् ।  
तिग्मेषव आयुधा संशिशाना उप प्र यन्तु नरो अग्निरूपाः ॥१॥  
अग्निरिव मन्यो त्विषितः सहस्व सेनानीर्नः सहरे हूत एधि ।  
हत्वाय शत्रून् वि भजस्व वेद ओजो मिमानो वि मृधो नुदस्व ॥२॥  
सहस्व मन्यो अभिमातिमस्मै रुजन् मृणन् प्रमृणन् प्रेहि शत्रून् ।  
उग्रं ते पाजो नन्वा रुरुधे वशी वशं नयासा एकज त्वम् ॥३॥  
एको बहूनामसि मन्य ईडिता विशंविशं युद्धाय सं शिशाधि ।  
अकृत्तरुक्त्वया युजा वयं द्युमन्तं घोषं विजयाय कृण्मसि ॥४॥  
विजेषकृदिन्द्र इवानवब्रवोऽस्माकं मन्यो अधिपा भवेह ।  
प्रियं ते नाम सहरे गृणीमसि विद्या तमुत्सं यत आबभूथ ॥५॥

आभूत्या सहजा वज्र सायक सहो बिभर्षि सहभूत उत्तरम् ।  
 क्रत्वा नो मन्यो सह मेद्योधि महाधनस्य पुरुहूत संसृजि ॥६॥  
 संसृष्टं धनमुभयं समाकृतमस्मभ्यं धत्तां वरुणश्च मन्युः ।  
 भियो दधाना हृदयेषु शत्रवः पराजितासो अप नि लयन्ताम् ॥७॥

4.32

यस्ते मन्योऽविधद्वज्र सायक सह ओजः पुष्यति विश्वमानुषक् ।  
 साह्याम दासमार्यं त्वया युजा वयं सहस्कृतेन सहसा सहस्वता ॥१॥  
 मन्युरिन्द्रो मन्युरेवास देवो मन्युर्होता वरुणो जातवेदाः ।  
 मन्यु विश ईडते मानुषीर्याः पृहि नो मन्यो तपसा सजोषाः ॥२॥  
 अभीहि मन्यो तवसस्तवीयान् तपसा युजा वि जहि शत्रून् ।  
 अमित्रहा वृत्रहा दस्युहा च विश्वा वसून्या भरा त्वं नः ॥३॥  
 त्वं हि मन्यो अभिभूत्योजाः स्वयंभूर्भामो अभिमातिषाहः ।  
 विश्वचर्षणिः सहुरिः सहीयान् अस्मास्वोजः पृतनासु धेहि ॥४॥  
 अभागः सन्न अप परेती अस्मि तव क्रत्वा तविषस्य प्रचेतः ।  
 तं त्वा मन्यो अक्रतुर्जिहीडाहं स्वा तनूर्बलदावा न एहि ॥५॥  
 अयं ते अस्म्युप न एह्यर्वाङ्प्रतीचीनः सहुरे विश्वदावन् ।  
 मन्यो वज्रिन् अभि न आ ववृत्स्व हनाव दस्यूरुत बोध्यापेः ॥६॥  
 अभि प्रेहि दक्षिणतो भवा नोऽथा वृत्राणि जङ्घनाव भूरि ।  
 जुहोमि ते धरुणं मध्वो अग्रमुभावुपांशु प्रथमा पिबाव ॥७॥

4.33

अप नः शोशुचदघमग्ने शुशुग्ध्या रयिम् ।  
 अप नः शोशुचदघम् ॥१॥  
 सुक्षेत्रिया सुगातुया वसूया च यजामहे ।  
 अप नः शोशुचदघम् ॥२॥  
 प्र यद्भन्दिष्ठ एषां प्रास्माकासश्च सूरयः ।  
 अप नः शोशुचदघम् ॥३॥  
 प्र यत्ते अग्ने सूरयो जायेमहि प्र ते वयम् ।  
 अप नः शोशुचदघम् ॥४॥  
 प्र यदग्नेः सहस्वतो विश्वतो यन्ति भानवः ।  
 अप नः शोशुचदघम् ॥५॥  
 त्वं हि विश्वतोमुख विश्वतः परिभूरसि ।  
 अप नः शोशुचदघम् ॥६॥  
 द्विषो नो विश्वतोमुखाति नावेव पारय ।  
 अप नः शोशुचदघम् ॥७॥  
 स नः सिन्धुमिव नावाति पर्ष स्वस्तये ।  
 अप नः शोशुचदघम् ॥८॥

4.34

ब्रह्मास्य शीर्षं बृहदस्य पृष्ठं वामदेव्यमुदरमोदनस्य ।  
 छन्दासि पक्षी मुखमस्य सत्यं विष्टारी जातस्तपसोऽधि यज्ञः ॥१॥  
 अनस्थाः पूताः पवनेन शुद्धाः शुचयः शुचिमपि यन्ति लोकम् ।  
 नैषां शिश्रं प्र दहति जातवेदाः स्वर्गे लोके बहु स्त्रैणमेषाम् ॥२॥  
 विष्टारिणमोदनं ये पचन्ति नैनान् अवर्तिः सचते कदा चन ।  
 आस्ते यम उप याति देवान्त्सं गन्धर्वैर्मदते सोम्येभिः ॥३॥  
 विष्टारिणमोदनं ये पचन्ति नैनान् यमः परि मुष्णाति रेतः ।  
 रथी ह भूत्वा रथयान ईयते पक्षी ह भूत्वाति दिवः समेति ॥४॥  
 एष यज्ञानां विततो वहिष्ठो विष्टारिणं पक्त्वा दिवमा विवेश ।  
 आण्डीकं कुमुदं सं तनोति बिसं शालूकं शफको मुलाली ।  
 एतास्त्वा धारा उप यन्तु सर्वाः स्वर्गे लोके मधुमत्पिन्वमाना उप त्वा तिष्ठन्तु पुष्करिणीः समन्ताः ॥५॥  
 घृतहृदा मधुकूलाः सुरोदकाः क्षीरेण पूर्णा उदकेन दध्ना ।  
 एतास्त्वा धारा उप यन्तु सर्वाः स्वर्गे लोके मधुमत्पिन्वमाना उप त्वा तिष्ठन्तु पुष्करिणीः समन्ताः ॥६॥  
 चतुरः कुम्भांश्चतुर्धा ददामि क्षीरेण पूर्णामुदकेन दध्ना ।  
 एतास्त्वा धारा उप यन्तु सर्वाः स्वर्गे लोके मधुमत्पिन्वमाना उप त्वा तिष्ठन्तु पुष्करिणीः समन्ताः ॥७॥  
 इममोदनं नि दधे ब्राह्मणेषु विष्टारिणं लोकजितं स्वर्गम् ।  
 स मे मा क्षेप स्वधया पिन्वमानो विश्वरूपा धेनुः कामदुघा मे अस्तु ॥८॥

4.35

यमोदनं प्रथमजा ऋतस्य प्रजापतिस्तपसा ब्रह्मणेऽपचत् ।  
 यो लोकानां विधृतिर्नाभिरेषात्तेनौदनेनाति तराणि मृत्युम् ॥१॥  
 येनातरन् भूतकृतोऽति मृत्युं यमन्वविन्दन् तपसा श्रमेण ।  
 यं पपाच ब्रह्मणे ब्रह्म पूर्वं तेनौदनेनाति तराणि मृत्युम् ॥२॥  
 यो दाधार पृथिवीं विश्वभोजसं यो अन्तरिक्षमापृणाद्रसेन ।

यो अस्तभ्नाद्विवमूर्ध्वो महिम्ना तेनौदनेनाति तराणि मृत्युम् ॥३॥  
 यस्मान् मासा निर्मितास्त्रिंशदराः संवत्सरो यस्मान् निर्मितो द्वादशारः ।  
 अहोरात्रा यं परियन्तो नापुस्तेनौदनेनाति तराणि मृत्युम् ॥४॥  
 यः प्राणदः प्राणदवान् बभूव यस्मै लोका घृतवन्तः क्षरन्ति ।  
 ज्योतिष्मतीः प्रदिशो यस्य सर्वास्तेनौदनेनाति तराणि मृत्युम् ॥५॥  
 यस्मात्पक्वादमृतं संबभूव यो गायत्र्या अधिपतिर्बभूव ।  
 यस्मिन् वेदा निहिता विश्वरूपास्तेनौदनेनाति तराणि मृत्युम् ॥६॥  
 अव बाधे द्विषन्तं देवपीयुं सपत्ना ये मेऽप ते भवन्तु ।  
 ब्रह्मौदनं विश्वजितं पचामि शृण्वन्तु मे श्रद्धानस्य देवाः ॥७॥

4.36

तान्त्सत्यौजाः प्र दहत्वग्निर्वैश्वानरो वृषा ।  
 यो नो दुरस्याद्विप्साच्चाथो यो नो अरातियात् ॥१॥  
 यो नो दिप्साददिप्सतो दिप्सतो यश्च दिप्सति ।  
 वैश्वानरस्य दंष्ट्रयोरग्नेरपि दधामि तम् ॥२॥  
 य आगरे मृगयन्ते प्रतिक्रोशेऽमावास्ये ।  
 क्रव्यादो अन्यान् दिप्सतः सर्वास्तान्त्सहसा सहे ॥३॥  
 सहे पिशाचान्त्सहसैषां द्रविणं ददे ।  
 सर्वान् दुरस्यतो हन्मि सं म आकूतिर्ऋध्यताम् ॥४॥  
 ये देवास्तेन हासन्ते सूर्येण मिमते जवम् ।  
 नदीषु पर्वतेषु ये सं तैः पशुभिर्विदे ॥५॥  
 तपनो अस्मि पिशाचानां व्याघ्रो गोमतामिव ।  
 श्वानः सिंहमिव दृष्ट्वा ते न विन्दन्ते न्यञ्चनम् ॥६॥  
 न पिशाचैः सं शक्नोमि न स्तेनैः न वनर्गुभिः ।  
 पिशाचास्तस्मान् नश्यन्ति यमहं ग्राममाविशे ॥७॥  
 यं ग्राममाविशत इदमुग्रं सहो मम ।  
 पिशाचास्तस्मान् नश्यन्ति न पापमुप जानते ॥८॥  
 ये मा क्रोधयन्ति लपिता हस्तिनं मशका इव ।  
 तान् अहं मन्ये दूर्हितान् जने अल्पशयून् इव ॥९॥  
 अभि तं निर्ऋतिर्धत्तामश्वमिव अश्वभिधान्या ।  
 मत्वो यो मह्यं कुध्यति स उ पाशान् न मुच्यते ॥१०॥

4.37

त्वया पूर्वमथर्वाणो जघ्नू रक्षांस्योषधे ।  
 त्वया जघान कश्यपस्त्वया कण्वो अगस्त्यः ॥१॥  
 त्वया वयमप्सरसो गन्धर्वास्चातयामहे ।  
 अजशृङ्गयज रक्षः सर्वान् गन्धेन नाशय ॥२॥  
 नदीं यन्त्वप्सरसोऽपां तारमवश्वसम् ।  
 गुल्गुलूः पीला नलद्यौक्षगन्धिः प्रमन्दनी ।  
 तत्परेताप्सरसः प्रतिबुद्धा अभूतन ॥३॥  
 यत्राश्वत्था न्यग्रोधा महावृक्षाः शिखण्डिनः ।  
 तत्परेताप्सरसः प्रतिबुद्धा अभूतन ॥४॥  
 यत्र वः प्रेङ्खा हरिता अर्जुना उत यत्राघाताः कर्कर्यः संवदन्ति ।  
 तत्परेताप्सरसः प्रतिबुद्धा अभूतन ॥५॥  
 एयमगन्न ओषधीनां वीरुधां वीर्यावती ।  
 अजशृङ्गयराटकी तीक्ष्णशृङ्गी व्युषतु ॥६॥  
 आनुत्यतः शिखण्डिनो गन्धर्वास्याप्सरापतेः ।  
 भिर्नन्नि मुष्कावपि यामि शेषः ॥७॥  
 भीमा इन्द्रस्य हेतयः शतमृष्टीरयस्मयीः ।  
 ताभिर्हविरदान् गन्धर्वान् अवकादान् व्युषतु ॥८॥  
 भीमा इन्द्रस्य हेतयः शतमृष्टीर्हिरण्ययीः ।  
 ताभिर्हविरदान् गन्धर्वान् अवकादान् व्युषतु ॥९॥  
 अवकादान् अभिशोचान् अप्सु ज्योतय मामकान् ।  
 पिशाचान्त्सर्वान् ओषधे प्र मृणीहि सहस्व च ॥१०॥  
 श्वैकः कपिरिवैकः कुमारः सर्वकेशकः ।  
 प्रियो दृश इव भूत्वा गन्धर्वः सचते स्त्रियस् ।  
 तमितो नाशयामसि ब्रह्मणा वीर्यावता ॥११॥  
 जाया इद्धो अप्सरसो गन्धर्वाः पतयो यूयम् ।  
 अप धावतामर्त्या मर्त्यान् मा सचध्वम् ॥१२॥

4.38

उद्भिन्दतीं संजयन्तीमप्सरां साधुदेविनीम् ।  
 ग्लहे कृतानि कृण्वानामप्सरां तामिह हुवे ॥१॥  
 विचिन्वतीमाकिरन्तीमप्सरां साधुदेविनीम् ।



गलहे कृतानि गृह्णानामप्सरां तामिह हुवे ॥२॥  
 यायैः परिनृत्यत्याददाना कृतं गलहात् ।  
 सा नः कृतानि सीषती प्रहामाप्रोतु मायया ।  
 सा नः पयस्वत्वैतु मा नो जैषुरिदं धनम् ॥३॥  
 या अक्षेषु प्रमोदन्ते शुचं क्रोधं च बिभ्रती ।  
 आनन्दिनीं प्रमोदिनीमप्सरां तामिह हुवे ॥४॥  
 सूर्यस्य रश्मीन् अनु याः सञ्चरन्ति मरीचीर्वा या अनुसञ्चरन्ति ।  
 यासामृषभो दूरतो वाजिनीवान्त्सद्यः सर्वान् लोकान् पर्येति रक्षन् ।  
 स न एतु होममिमं जुषाणोऽन्तरिक्षेण सह वाजिनीवान् ॥५॥  
 अन्तरिक्षेण सह वाजिनीवन् कर्की वत्सामिह रक्ष वाजिन् ।  
 इमे ते स्तोका बहुला एह्यर्वाडियं ते कर्कीह ते मनोऽस्तु ॥६॥  
 अन्तरिक्षेण सह वाजिनीवन् कर्की वत्सामिह रक्ष वाजिन् ।  
 अयं घासो अयं व्रज इह वत्सां नि बध्नीमः ।  
 यथानाम व ईशमहे स्वाहा ॥७॥

4.39

पृथिव्यामग्नये समनमन्त्स आर्धोत् ।  
 यथा पृथिव्यामग्नये समनमन् एवा मह्यं संनमः सं नमन्तु ॥१॥  
 पृथिवी धेनुस्तस्या अग्निर्वत्सः ।  
 सा मेऽग्निना वत्सेनेषमूर्जं कामं दुहाम् ।  
 आयुः प्रथमं प्रजां पोषं रयिं स्वाहा ॥२॥  
 अन्तरिक्षे वायवे समनमन्त्स आर्धोत् ।  
 यथान्तरिक्षे वायवे समनमन् एवा मह्यं संनमः सं नमन्तु ॥३॥  
 अन्तरिक्षं धेनुस्तस्या वत्सः ।  
 सा मे वायुना वत्सेनेषमूर्जं कामं दुहाम् ।  
 आयुः प्रथमं प्रजां पोषं रयिं स्वाहा ॥४॥  
 दिव्यादित्याय समनमन्त्स आर्धोत् ।  
 यथा दिव्यादित्याय समनमन् एवा मह्यं संनमः सं नमन्तु ॥५॥  
 द्यौर्धेनुस्तस्या आदित्यो वत्सः ।  
 सा मे आदित्येन वत्सेनेषमूर्जं कामं दुहाम् ।  
 आयुः प्रथमं प्रजां पोषं रयिं स्वाहा ॥६॥  
 दिक्षु चन्द्राय समनमन्त्स आर्धोत् ।  
 यथा दिक्षु चन्द्राय समनमन् एवा मह्यं संनमः सं नमन्तु ॥७॥  
 दिशो धेनवस्तासां चन्द्रो वत्सः ।  
 ता मे चन्द्रेण वत्सेनेषमूर्जं कामं दुहामायुः प्रथमं प्रजां पोसं रयिं स्वाहा ॥८॥  
 अग्नावग्निश्चरति प्रविष्ट ऋषीणां पुत्रो अभिशस्तिपा उ ।  
 नमस्कारेण नमसा ते जुहोमि मा देवानां मिथुया कर्म भागम् ॥९॥  
 हृदा पूतं मनसा जातवेदो विश्वानि देव वयुनानि विद्वान् ।  
 सप्तास्थानि तव जातवेदस्तेभ्यो जुहोमि स जुषस्व हव्यम् ॥१०॥

4.40

ये पुरस्ताज्जुह्वति जातवेदः प्राच्या दिशोऽभिदासन्त्यस्मान् ।  
 अग्निमृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥१॥  
 ये दक्षिणतो जुह्वति जातवेदो दक्षिणाया दिशोऽभिदासन्त्यस्मान् ।  
 यममृत्वा ते पराञ्चो व्यथन्तां प्रत्यगेना प्रतिसरेण हन्मि ॥२॥  
 ये पश्चाज्जुह्वति जातवेदः प्रतीच्या दिशोऽभिदासन्त्यस्मान् ।  
 वरुणमृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥३॥  
 ये उत्तरतो जुह्वति जातवेद उदीच्या दिशोऽभिदासन्त्यस्मान् ।  
 सोममृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥४॥  
 येऽधस्ताज्जुह्वति जातवेद उदीच्या दिशोऽभिदासन्त्यस्मान् ।  
 भूमिमृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥५॥  
 येऽन्तरिक्षाज्जुह्वति जातवेदो व्यध्वाया दिशोऽभिदासन्त्यस्मान् ।  
 वायुमृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥६॥  
 ये उपरिष्ठाज्जुह्वति जातवेद ऊर्ध्वाया दिशोऽभिदासन्त्यस्मान् ।  
 सूर्यमृत्वा ते पराञ्चो व्यथन्तां प्रत्यगेनान् प्रतिसरेण हन्मि ॥७॥  
 ये दिशामन्तर्देशेभ्यो जुह्वति जातवेदः सर्वाभ्यो दिग्भ्योऽभिदासन्ति अस्मान् ।  
 ब्रह्म त्वा ते पराञ्चो व्यथन्तां प्रत्यगेनान् प्रतिसरेण हन्मि ॥८॥

5.1

ऋधङ्गन्त्रो योनिं य आबभूवामृतासुवर्धमानः सुजन्मा ।  
 अदब्धासुर्भाजमानोऽहेव त्रितो धर्ता दाधार त्रीणि ॥१॥  
 आ यो धर्माणि प्रथमः ससाद ततो वपूंषि कृणुषे पुरूणि ।  
 धास्युर्योनिं प्रथम आ विवेशा यो वाचमनुदितां चिकेत ॥२॥

यस्ते शोकाय तन्वं रिरेच क्षरद्विरण्यं शुचयोऽनु स्वाः ।  
 अत्रा दधेते अमृतानि नामास्मे वस्त्राणि विश एरयन्ताम् ॥३॥  
 प्र यदेते प्रतरं पूर्व्यं गुः सदःसद आतिष्ठन्तो अजुर्यम् ।  
 कविः शुषस्य मातरा रिहाणे जाम्यै धुर्यं पतिमेरयथाम् ॥४॥  
 तदू षु ते महत्पृथुज्मन् नमः कविः काव्येना कृणोमि ।  
 यत्सम्यञ्चावाभियन्तावभि क्षामत्रा मही रोधचक्रे वावृधेते ॥५॥  
 सप्त मर्यादाः कवयस्ततक्षुस्तासामिदेकामभ्यंहुरो गात् ।  
 आयोर्ह स्कम्भ उपमस्य नीडे पथां विसर्गे धरुणेषु तस्थौ ॥६॥  
 उतामृतासुव्रत एमि कृन्वन् असुरात्मा तन्वस्तत्सुमद्रुः ।  
 उत वा शक्रो रत्नं दधात्यूर्जया वा यत्सचते हविदोः ॥७॥  
 उत पुत्रः पितरं क्षत्रमीडे ज्येष्ठं मर्यादमह्वयन्तस्वस्तये ।  
 दर्शनं नु ता वरुण यास्ते विष्ठा आवर्तततः कृणवो वपूंषि ॥८॥  
 अर्धमर्धेन पयसा पूणक्षयर्धेन शुष्म वर्धसे अमुर ।  
 अविं वृधाम शग्मियं सखायं वरुणं पुत्रमदित्या इषिरम् ।  
 कविशस्तान्यस्मै वपूंष्यवोचाम रोदसी सत्यवाचा ॥९॥

### 5.2

तदिदास भुवनेषु ज्येष्ठं यतो यज्ञ उग्रस्त्वेषनृमृगः ।  
 सद्यो जज्ञानो नि रिणाति शत्रून् अनु यदेनं मदन्ति विश्व ऊमाः ॥१॥  
 ववृधानः शवसा भूर्योजाः शत्रुदासाय भियसं दधाति ।  
 अव्यनच्च व्यनच्च सस्मि सं ते नवन्त प्रभृता मदेषु ॥२॥  
 त्वे क्रतुमपि पृञ्चन्ति भूरि द्विर्यदिते त्रिर्भवन्त्यूमाः ।  
 स्वदोः स्वादीयः स्वादुना सृजा समदः सु मधु मधुनाभि योधीः ॥३॥  
 यदि चिन् नु त्वा धना जयन्तं रणेरणे अनुमदन्ति विप्राः ।  
 ओजीयः शुष्मिन्तिस्थरमा तनुष्व मा त्वा दभन् दुरेवासः कशोकाः ॥४॥  
 त्वया वयं शाशद्वाहे रणेषु प्रपश्यन्तो युधेन्यानि भूरि ।  
 चोदयामि त आयुधा वचोभिः सं ते शिशामि ब्रह्मणा वयांसि ॥५॥  
 नि तद्दधिषेऽवरे परे च यस्मिन् आविथावसा दुरोणे ।  
 आ स्थापयत मातरं जिगत्नुमत इन्वत कर्वराणि भूरि ॥६॥  
 स्तुष्व वर्षन् पुरुवर्तमानं समृभ्वाणामिनतममाप्तमाप्त्यानाम् ।  
 आ दर्शति शवसा भूर्योजाः प्र सक्षति प्रतिमानं पृथिव्याः ॥७॥  
 इमा ब्रह्म बृहद्विवः कृणवदिन्द्राय शूषमग्रियः स्वर्षाः ।  
 महो गौत्रस्य क्षयति स्वराजा तुरश्विद्विश्वमर्णवत्तपस्वान् ॥८॥  
 एवा महान् बृहद्विवो अथर्वावोचत्स्वां तन्वमिन्द्रमेव ।  
 स्वसारौ मातरिभ्वरी अरिप्रे हिन्वन्ति चैने शवसा वर्धयन्ति च ॥९॥

### 5.3

ममाग्ने वचो विहवेष्वस्तु वयं त्वेन्धानास्तन्वं पुषेम ।  
 मह्यं नमन्तां प्रदिशश्चतस्रस्त्वयाध्यक्षेण पूतना जयेम ॥१॥  
 अग्ने मनुं प्रतिनुदन् परेषां त्वं नो गोपाः परि पाहि विश्वतः ।  
 अपाञ्चो यन्तु निवता दुरस्यवोऽमैषां चित्तं प्रबुधां वि नेशत् ॥२॥  
 मम देवा विहवे सन्तु सर्व इन्द्रवन्तो मरुतो विष्णुरग्निः ।  
 ममान्तरिक्षमुरुलोकमस्तु मह्यं वातः पवतां कामायास्मै ॥३॥  
 मह्यं यजन्तां मम यानीष्टाकृतिः सत्या मनसो मे अस्तु ।  
 एनो मा नि गां कतमच्चनाहं विश्वे देवा अभि रक्षन्तु मेह ॥४॥  
 मयि देवा द्रविणमा यजन्तां मयि आशीरस्तु मयि देवहृतिः ।  
 दैवाः होतारः सनिषन् न एतदरिष्टाः स्याम तन्वा सुवीराः ॥५॥  
 दैवीः षडुर्वीरु नः कृणोत विश्वे देवास इह मादयध्वम् ।  
 मा नो विददभिभा मो अशस्तिर्मा नो विदद्वृजिना द्वेष्या या ॥६॥  
 तिस्रो देवीर्महि नः शर्म यच्छत प्रजायै नस्तन्वे यच्च पुष्टम् ।  
 मा हास्महि प्रजया मा तनूभिर्मा रधाम द्विषते सोम राजन् ॥७॥  
 उरुव्याचा नो महिषः शर्म यच्छत्वस्मिन् हवे पुरुहूतः पुरुक्षु ।  
 स नः प्रजायै हर्यश्व मृडेन्द्र मा नो रीरिषो मा परा दाः ॥८॥  
 धाता विधाता भुवनस्य यस्पतिर्देवः सविताभिमातिषाहः ।  
 आदित्या रुद्रा अश्विनोभा देवाः पान्तु यजमानं निर्ऋथात् ॥९॥  
 ये नः सपत्ना अप ते भवन्त्विन्द्राग्निभ्यामव बाधामह एनान् ।  
 आदित्या रुद्रा उपरिस्पृशो नो उग्रं चेतारमधिराजमक्रत ॥१०॥  
 अर्वाञ्चमिन्द्रममुतो हवामहे यो गोजिद्धनजिदश्वजिद्यः ।  
 इमं नो यज्ञं विहवे शृणोत्वस्माकमभूर्हर्यश्व मेदी ॥११॥

### 5.4

यो गिरिष्वजायथा वीरुधां बलवत्तमः ।  
 कुष्ठेहि तक्मनाशन तक्मानं नाशयन् इतः ॥१॥  
 सुपर्णसुवने गिरौ जातं हिमवतस्परि ।

धनैरभि श्रुत्वा यन्ति विदुर्हि तक्मनाशनम् ॥२॥  
 अश्वत्थो देवसदनस्तृतीयस्यामितो दिवि ।  
 तत्रामृतस्य चक्षणं देवाः कुष्ठमवन्वत ॥३॥  
 हिरण्ययी नौरचरद्विरण्यबन्धना दिवि ।  
 तत्रामृतस्य पुष्पं देवाः कुष्ठमवन्वत ॥४॥  
 हिरण्ययाः पन्थान आसन्न अरित्राणि हिरण्यया ।  
 नावो हिरण्ययीरासन् याभिः कुष्ठं निरावहन् ॥५॥  
 इमं मे कुष्ठं पूरुषं तमा वह तं निष्कुरु ।  
 तमु मे अगदं कृधि ॥६॥  
 देवैभ्यो अधि जातोऽसि सोमस्यासि सखा हितः ।  
 स प्राणाय व्यानाय चक्षुषे मे अस्मै मूड ॥७॥  
 उदङ्जातो हिमवतः स प्राच्यां नीयसे जनम् ।  
 तत्र कुष्ठस्य नामान्युत्तमानि वि भेजिरे ॥८॥  
 उत्तमो नाम कुष्ठस्युत्तमो नाम ते पिता ।  
 यक्ष्मं च सर्वं नाशय तक्मानं चारसं कृधि ॥९॥  
 शीर्षामयमुपहत्यामक्ष्योस्तन्वो रपः ।  
 कुष्ठस्तत्सर्वं निष्करद्वैवं समह वृष्ण्यम् ॥१०॥

5.5

रात्री माता नभः पितार्यमा ते पितामहः ।  
 सिलाची नाम वा असि सा देवानामसि स्वसा ॥१॥  
 यस्त्वा पिबति जीवति त्रायसे पुरुषं त्वम् ।  
 भर्त्री हि शश्वतामसि जनानां च न्यञ्चनी ॥२॥  
 वृक्षंवृक्षमा रोहसि वृष्ण्यन्तीव कन्यला ।  
 जयन्ती प्रत्यातिष्ठन्ती स्पर्णी नाम वा असि ॥३॥  
 यद्दण्डेन यदिष्वा यद्दारुर्हरसा कृतम् ।  
 तस्य त्वमसि निष्कृतिः सेमं निष्कृधि पूरुषम् ॥४॥  
 भद्रात्प्लक्षान् निस्तिष्ठस्यश्वत्थात्खदिराद्भवात् ।  
 भद्रान् न्यग्रोधात्पर्णात्सा न एहारुन्धति ॥५॥  
 हिरण्यवर्णं सुभगे सूर्यवर्णं वपुष्टमे ।  
 रुतं गच्छासि निष्कृते निष्कृतिर्नाम वा असि ॥६॥  
 हिरण्यवर्णं सुभगे शुष्मे लोमशवक्षने ।  
 अपामसि स्वसा लाक्षे वातो हात्मा बभूव ते ॥७॥  
 सिलाची नाम कानीनोऽजबभ्रु पिता तव ।  
 अश्वो यमस्य यः श्यावस्तस्य हास्नास्युक्षिता ॥८॥  
 अश्वस्यास्नः संपतिता सा वृक्षामभि सिष्यदे ।  
 सरा पतत्रिणी भूत्वा सा न एहारुन्धति ॥९॥

5.6

ब्रह्म जज्ञानं प्रथमं पुरस्ताद्वि सीमतः सुरुचो वेन आवः ।  
 स बुध्या उपमा अस्य विष्ठाः सतश्च योनिमसतश्च वि वः ॥१॥  
 अनाप्ता ये वः प्रथमा यानि कर्माणि चक्रिरे ।  
 वीरान् नो अत्र मा दभन् तद्द एतत्पुरो दधे ॥२॥  
 सहस्रधार एव ते समस्वरन् दिवो नाके मधुजिह्वा असश्वतः ।  
 तस्य स्पशो न नि मिषन्ति भूर्णयः पदेपदे पाशिनः सन्ति सेतवे ॥३॥  
 पर्यु षु प्र धन्वा वाजसातये परि वृत्राणि सक्षणिः ।  
 द्विषस्तदध्यर्णवेनेयसे सनिस्रसो नामासि त्रयोदशो मास इन्द्रस्य गृहः ॥४॥  
 न्वेतेनारात्सीरसौ स्वाहा ।  
 तिग्मायुधौ तिग्महेती सुशेवौ सोमारुद्राविह सु मृडतं नः ॥५॥  
 अवैतेनारात्सीरसौ स्वाहा ।  
 तिग्मायुधौ तिग्महेती सुशेवौ सोमारुद्राविह सु मृडतं नः ॥६॥  
 अपैतेनारात्सीरसौ स्वाहा ।  
 तिग्मायुधौ तिग्महेती सुशेवौ सोमारुद्राविह सु मृडतं नः ॥७॥  
 मुमुक्तमस्मान् दुरितादवद्याज्जुषेथां यज्ञममृतमस्मासु धत्तम् ॥८॥  
 चक्षुषो हेते मनसो हेते ब्रह्मणो हेते तपसश्च हेते ।  
 मेन्या मेनिरस्यमेनयस्ते सन्तु येऽस्मामभ्यघायन्ति ॥९॥  
 योऽस्मांश्चक्षुषा मनसा चित्याकृत्या च यो अघायुरभिदासात् ।  
 त्वं तान् अग्ने मेन्यामेनीन् कृणु स्वाहा ॥१०॥  
 इन्द्रस्य गृहोऽसि ।  
 तं त्वा प्र पद्ये तं त्वा प्र विशामि सर्वगुः सर्वपूरुषः सर्वात्मा सर्वतनूः सह यन् मेऽस्ति तेन ॥११॥  
 इन्द्रस्य शर्मासि ।  
 तं त्वा प्र पद्ये तं त्वा प्र विशामि सर्वगुः सर्वपूरुषः सर्वात्मा सर्वतनूः सह यन् मेऽस्ति तेन ॥१२॥  
 इन्द्रस्य वर्मासि ।  
 तं त्वा प्र पद्ये तं त्वा प्र विशामि सर्वगुः सर्वपूरुषः सर्वात्मा सर्वतनूः सह यन् मेऽस्ति तेन ॥१३॥

इन्द्रस्य वरूथमसि ।

तं त्वा प्र पद्ये तं त्वा प्र विशामि सर्वगुः सर्वपूरुषः सर्वात्मा सर्वतनूः सह यन् मेऽस्ति तेन ॥१४॥

5.7

आ नो भर मा परि ष्टा अराते मा नो रक्षीर्दक्षिणां नीयमानाम् ।

नमो वीत्साया असमृद्धये नमो अस्त्वरातये ॥१॥

यमराते पुरोधत्से पुरुषं परिरापिणम् ।

नमस्ते तस्मै कृष्णो मा वनिं व्यथयीर्मम ॥२॥

प्र णो वनिर्देवकृता दिवा नक्तं च कल्पताम् ।

अरातिमनुप्रेमो वयं नमो अस्त्वरातये ॥३॥

सरस्वतीमनुमतिं भगं यन्तो हवामहे ।

वाचं जुष्टां मधुमतीमवादिषं देवानां देवहृतिषु ॥४॥

यं याचाम्यहं वाचा सरस्वत्या मनोयुजा ।

श्रद्धा तमद्य विन्दतु दत्ता सोमेन बभ्रुणा ॥५॥

मा वनिं मा वाचं नो वीत्सीरुभाविन्द्राग्नी आ भरतां नो वसूनि ।

सर्वे नो अद्य दित्सन्तोऽरातिं प्रति हर्यत ॥६॥

परोऽपेह्यसमृद्धे वि ते हेतिं नयामसि ।

वेद त्वाहं निमीवन्तीं नितुदन्तीमराते ॥७॥

उत नग्ना बोभुवती स्वप्रया सचसे जनम् ।

अराते चित्तं वीत्सन्त्याकृतिं पुरुषस्य च ॥८॥

या महती महोन्माना विश्वा आशा व्यानशे ।

तस्यै हिरण्यकेश्यै निऋत्या अकरं नमः ॥९॥

हिरण्यवर्णा सुभगा हिरण्यकशिपुर्मही ।

तस्यै हिरण्यद्रापयेऽरात्या अकरं नमः ॥१०॥

5.8

वैकङ्कतेनेध्मेन देवेभ्य आज्यं वह ।

अग्ने तामिह मादय सर्व आ यन्तु मे हवम् ॥१॥

इन्द्रा याहि मे हवमिदं करिष्यामि तच्छृणु ।

इम ऐन्द्रा अतिसरा आकृतिं सं नमन्तु मे ।

तेभिः शकेम वीर्यं जातवेदस्तनूवशिन् ॥२॥

यदसावमुतो देवा अदेवः संश्रिकीर्षति ।

मा तस्याग्निर्हव्यं वाक्षीद्धवं देवा अस्य मोप गुर्ममैव हवमेतन ॥३॥

अति धावतातिसरा इन्द्रस्य वचसा हत ।

अविं वृक इव मथ्नीत स वो जीवन् मा मोचि प्राणमस्यापि नह्यत ॥४॥

यममी पुरोदधिरे ब्रह्माणमपभूतये ।

इन्द्र स ते अधस्पदं तं प्रत्यस्यामि मृत्यवे ॥५॥

यदि प्रेयुर्देवपुरा ब्रह्म वर्माणि चक्रिरे ।

तनूपानं परिपाणं कृण्वाना यदुपोचिरे सर्वं तदरसं कृधि ॥६॥

यान् असावतिसरांश्चकार कृणवच्च यान् ।

त्वं तान् इन्द्र वृत्रहन् प्रतीचः पुनरा कृधि यथामुं तृणहां जनम् ॥७॥

यथेन्द्र उद्वाचनं लब्ध्वा चक्रे अधस्पदम् ।

कृण्वेऽहमधरान् तथा अमूञ्छश्वतीभ्यः समाभ्यः ॥८॥

अत्रैनान् इन्द्र वृत्रहन् उग्रो मर्मणि विध्य ।

अत्रैवैनान् अभि तिष्ठेन्द्र मेद्यहं तव ।

अनु त्वेन्द्रा रभामहे स्याम सुमतौ तव ॥९॥

5.9

दिवे स्वाहा ॥१॥

पृथिव्यै स्वाहा ॥२॥

अन्तरिक्षाय स्वाहा ॥३॥

अन्तरिक्षाय स्वाहा ॥४॥

दिवे स्वाहा ॥५॥

पृथिव्यै स्वाहा ॥६॥

सूर्यो मे चक्षुर्वातः प्राणोऽन्तरिक्षमात्मा पृथिवी शरीरम् ।

अस्तुतो नामाहमयमस्मि स आत्मानं नि दधे द्यावापृथिवीभ्यां गोपीधाय ॥७॥

उदायुरुद्धलमुत्कृतमुत्कृत्यामुन् मनीषामुदिन्द्रियम् ।

आयुष्कृदायुष्पत्नी स्वधावन्तौ गोपा मे स्तं गोपायतं मा ।

आत्मसदो मे स्तं मा मा हिंसिष्टम् ॥८॥

5.10

अशमवर्म मेऽसि यो मा प्राच्या दिशोऽघायुरभिदासात् ।

एतत्स ऋछात् ॥१॥

अशमवर्म मेऽसि यो मा दक्षिणाया दिशोऽघायुरभिदासात् ।

एतत्स ऋछात्॥२॥  
 अश्ववर्म मेऽसि यो मा प्रतीच्या दिशोऽघायुरभिदासात्।  
 एतत्स ऋछात्॥३॥  
 अश्ववर्म मेऽसि यो मोदीच्या दिशोऽघायुरभिदासात्।  
 एतत्स ऋछात्॥४॥  
 अश्ववर्म मेऽसि यो मा ध्रुवाया दिशोऽघायुरभिदासात्।  
 एतत्स ऋछात्॥५॥  
 अश्ववर्म मेऽसि यो मोर्ध्वाया दिशोऽघायुरभिदासात्।  
 एतत्स ऋछात्॥६॥  
 अश्ववर्म मेऽसि यो मा दिशामन्तर्देशेभ्योऽघायुरभिदासात्।  
 एतत्स ऋछात्॥७॥  
 बृहता मन उप ह्वये मातरिश्वना प्राणापानौ ।  
 सूर्याच्चक्षुरन्तरिक्षाच्छ्रोत्रं पृथिव्याः शरीरम् ।  
 सरस्वत्या वाचमुप ह्वयामहे मनोयुजा ॥८॥

#### 5.11

कथं महे असुरायान्ब्रवीरिह कथं पित्रे हरये त्वेषनुम्णः ।  
 पृश्निं वरुण दक्षिणां ददावान् पुनर्मघ त्वं मनसाचिकित्सीः ॥१॥  
 न कामेन पुनर्मघो भवामि सं चक्षे कं पृश्निमेतामुपाजे ।  
 केन नु त्वमथर्वन् काव्येन केन जातेनासि जातवेदाः ॥२॥  
 सत्यमहं गभीरः काव्येन सत्यं जातेनास्मि जातवेदाः ।  
 न मे दासो नार्यो महित्वा व्रतं मीमाय यदहं धरिष्ये ॥३॥  
 न त्वदन्यः कवितरो न मेधया धीरतरो वरुण स्वधावन् ।  
 त्वं ता विश्वा भुवनानि वेत्थ स चिन् नु त्वज्जनो मायी बिभाय ॥४॥  
 त्वं ह्यङ्ग वरुण स्वधावन् विश्वा वेत्थ जनिम सुप्रणीते ।  
 किं रजस एना परो अन्यदस्त्येना किं परेणावरममुर ॥५॥  
 एकं रजस एना परो अन्यदस्त्येना पर एकेन दुर्णशं चिदर्वाक् ।  
 तत्ते विद्वान् वरुण प्र ब्रवीम्यधोवचसः पणयो भवन्तु नीचैर्दासा उप सर्पन्तु भूमिम् ॥६॥  
 त्वं ह्यङ्ग वरुण ब्रवीषि पुनर्मघेष्ववद्यानि भूरि ।  
 मो षु पर्णीरभ्येतावतो भून् मा त्वा वोचन् अराधसं जनासः ॥७॥  
 मा मा वोचन् अराधसं जनासः पुनस्ते पृश्निं जरितर्ददामि ।  
 स्तोत्रं मे विश्वमा याहि शचीभिरन्तर्विश्वासु मानुषीषु दिक्षु ॥८॥  
 आ ते स्तोत्राण्युद्यतानि यन्त्वन्तर्विश्वासु मानुषीषु दिक्षु ।  
 देहि नु मे यन् मे अदत्तो असि युज्यो मे सप्तपदः सखासि ॥९॥  
 समा नौ बन्धुवरुण समा जा वेदाहं तद्यन् नावेषा समा जा ।  
 ददामि तद्यत्ते अदत्तो अस्मि युज्यस्ते सप्तपदः सखासि ॥१०॥  
 देवो देवाय गूणते वयोधा विप्रो विप्राय स्तुवते सुमेधाः ।  
 अजीजनो हि वरुण स्वधावन् अथर्वाणं पितरं देवबन्धुम् ।  
 तस्मा उ राधः कृणुहि सुप्रशस्तं सखा नो असि परमं च बन्धुः ॥११॥

#### 5.12

समिद्धो अद्य मनुषो दूरोणे देवो देवान् यजसि जातवेदः ।  
 आ च वह मित्रमहश्चिकित्वान् त्वं दूतः कविरसि प्रचेताः ॥१॥  
 तनूनपात्पथ ऋतस्य यानान् मध्वा समञ्जन्त्स्वदया सुजिह्व ।  
 मन्मानि धीभिरुत यज्ञमन्धन् देवत्रा च कृणुह्यध्वरं नः ॥२॥  
 आजुह्वान ईड्यो बन्द्यश्वा याहाग्ने वसुभिः सजोषाः ।  
 त्वं देवानामसि यह्व होता स एनान् यक्षीषितो यजीयान् ॥३॥  
 प्राचीनं बर्हिः प्रदिशा पृथिव्या वस्तोरस्या वृज्यते अग्रे अह्वाम् ।  
 व्यु प्रथते वितरं वरीयो देवेभ्यो अदितये स्योनम् ॥४॥  
 व्यचस्वतीरुर्विया वि श्रयन्तां पतिभ्यो न जनयः शुम्भमानाः ।  
 देवीर्द्वारो बृहतीर्विश्वमिन्वा देवेभ्यो भवत सुप्रायणाः ॥५॥  
 आ सुष्वयन्ती यजते उपाके उषासानक्ता सदतां नि योनौ ।  
 दिव्ये योषणे बृहती सुरुवमे अधि श्रियं शुक्रपिशं दधाने ॥६॥  
 दैव्या होतारा प्रथमा सुवाचा मिमाना यज्ञं मनुषो यजध्वै ।  
 प्रचोदयन्ता विदथेषु कारू प्राचीनं ज्योतिः प्रदिशा दिशन्ता ॥७॥  
 आ नो यज्ञं भारती तूयमेत्विडा मनुष्वदिह चेतयन्ती ।  
 तिस्रो देवीर्बर्हिरिदं स्योनं सरस्वतीः स्वपसः सदन्ताम् ॥८॥  
 य इमे द्यावापृथिवी जनित्री रूपैरपिशद्भवानि विश्वा ।  
 तमद्य होतरिषितो यजीयान् देवं त्वष्टारमिह यक्षि विद्वान् ॥९॥  
 उपावसूज त्मन्या समञ्जन् देवानां पाथ ऋतुथा हवीषि ।  
 वनस्पतिः शमिता देवो अग्निः स्वदन्तु हव्यं मधुना घृतेन ॥१०॥  
 सद्यो जातो व्यमिमीत यज्ञमग्निर्देवानामभवत्पुरोगाः ।  
 अस्य होतुः प्रशिष्युतस्य वाचि स्वाहाकृतं हविरदन्तु देवाः ॥११॥

5.13

ददिर्हि मह्यं वरुणो दिवः कविर्वचोभिरुग्रैर्नि रिणामि ते विषम् ।  
खातमखातमुत् सक्तमग्रभमिरेव धन्वन् नि जजास ते विषम् ॥१॥  
यत्ते अपोदकं विषं तत्त एतास्वग्रभम् ।  
गृह्णामि ते मध्यममुत्तमं रसमुतावमं भियसा नेशदादु ते ॥२॥  
वृषा मे रवो नभसा न तन्यतुरुग्रेण ते वचसा बाध आदु ते ।  
अहं तमस्य नृभिरग्रभं रसं तमस इव ज्योतिरुदेतु सूर्यः ॥३॥  
चक्षुषा ते चक्षुर्हन्मि विषेण हन्मि ते विषम् ।  
अहं म्रियस्व मा जीवीः प्रत्यगभ्येतु त्वा विषम् ॥४॥  
कैरात पृश्न उपतृण्य बभ्र आ मे शृणुतासिता अलीकाः ।  
मा मे सख्युः स्तामानमपि छाताश्रावयन्तो नि विषे रमध्वम् ॥५॥  
असितस्य तैमातस्य बभ्रोरपोदकस्य च ।  
सात्रासाहस्याहं मन्योरव ज्यामिव धन्वनो वि मुञ्चामि रथामिव ॥६॥  
आलिगी च विलिगी च पिता च मता च ।  
विद्म वः सर्वतो बन्ध्वरसाः किं करिष्यथ ॥७॥  
उरुगूलाया दुहिता जाता दास्यसिक्न्या ।  
प्रतङ्कं दद्रुषीणां सर्वासामरसं विषम् ॥८॥  
कर्णा श्वावित्तदब्रवीद्विरेरवचरन्तिका ।  
याः काश्चेमाः खनित्रिमास्तासामरसतमं विषम् ॥९॥  
ताबुवं न ताबुवं न घेत्त्वमसि ताबुवम् ।  
ताबुवेनारसं विषम् ॥१०॥  
तस्तुवं न तस्तुवं न घेत्त्वमसि तस्तुवम् ।  
तस्तुवेनारसं विषम् ॥११॥

5.14

सुपर्णस्त्वान्वविन्दत्सूकरस्त्वाखनन् नसा ।  
दिप्सौषधे त्वं दिप्सन्तमव कृत्याकृतं जहि ॥१॥  
अव जहि यातुधानान् अव कृत्याकृतं जहि ।  
अथो यो अस्मान् दिप्सति तमु त्वं जह्यौषधे ॥२॥  
रिश्यस्येव परीशासं परिकृत्य परि त्वचः ।  
कृत्यां कृत्याकृते देवा निष्कमिव प्रति मुञ्चत ॥३॥  
पुनः कृत्यां कृत्याकृते हस्तगृह्य परा णय ।  
समक्षमस्मा आ धेहि यथा कृत्याकृतं हनत् ॥४॥  
कृत्याः सन्तु कृत्याकृते शपथः शपथीयते ।  
सुखो रथ इव वर्ततां कृत्या कृत्याकृतं पुनः ॥५॥  
यदि स्त्री यदि वा पुमान् कृत्यां चकार पाप्मने ।  
तामु तस्मै नयामस्यश्चमिवाश्वाभिधान्या ॥६॥  
यदि वासि देवकृता यदि वा पुरुषैः कृता ।  
तां त्वा पुनर्णयामसीन्द्रेण सयुजा वयम् ॥७॥  
अग्ने पृतनाषाट्पृतनाः सहस्व ।  
पुनः कृत्यां कृत्याकृते प्रतिहरणेन हरामसि ॥८॥  
कृतव्यधनि विध्य तं यश्चकार तमिज्जहि ।  
न त्वामचक्रुषे वयं वधाय सं शिशीमहि ॥९॥  
पुत्र इव पितरं गच्छ स्वज इवाभिष्टितो दश ।  
बन्धमिवावक्रामी गच्छ कृत्ये कृत्याकृतं पुनः ॥१०॥  
उदेणीव वारण्यभिस्कन्दं मृगीव ।  
कृत्या कर्तारमुच्छतु ॥११॥  
इष्वा ऋजीयः पततु द्यावापृथिवी तं प्रति ।  
सा तं मृगमिव गृह्णातु कृत्या कृत्याकृतं पुनः ॥१२॥  
अग्निरिवैतु प्रतिकूलमनुकूलमिवोदकम् ।  
सुखो रथ इव वर्ततां कृत्या कृत्याकृतं पुनः ॥१३॥

5.15

एका च मे दश च मेऽपवत्कार ओषधे ।  
ऋतजात ऋतावरि मधु मे मधुला करः ॥१॥  
द्वे च मे विंशतिश्च मेऽपवत्कार ओषधे ।  
ऋतजात ऋतावरि मधु मे मधुला करः ॥२॥  
तिस्रश्च मे त्रिंशच्च मेऽपवत्कार ओषधे ।  
ऋतजात ऋतावरि मधु मे मधुला करः ॥३॥  
चतस्रश्च मे चत्वारिंशच्च मेऽपवत्कार ओषधे ।  
ऋतजात ऋतावरि मधु मे मधुला करः ॥४॥  
पञ्च च मे पञ्चाशच्च मेऽपवत्कार ओषधे ।  
ऋतजात ऋतावरि मधु मे मधुला करः ॥५॥  
षट्च मे षष्टिश्च मेऽपवत्कार ओषधे ।

ऋतजात ऋतावरि मधु मे मधुला करः ॥६॥  
 सप्त च मे सप्ततिश्च मेऽपवत्कार ओषधे ।  
 ऋतजात ऋतावरि मधु मे मधुला करः ॥७॥  
 अष्ट च मेऽशीतिश्च मेऽपवत्कार ओषधे ।  
 ऋतजात ऋतावरि मधु मे मधुला करः ॥८॥  
 नव च मे नवतिश्च मेऽपवत्कार ओषधे ।  
 ऋतजात ऋतावरि मधु मे मधुला करः ॥९॥  
 दश च मे शतं च मेऽपवत्कार ओषधे ।  
 ऋतजात ऋतावरि मधु मे मधुला करः ॥१०॥  
 शतं च मे सहस्रं चापवत्कार ओषधे ।  
 ऋतजात ऋतावरि मधु मे मधुला करः ॥११॥

5.16

यद्येकवृषोऽसि सृजारसोऽसि ॥१॥  
 यदि द्विवृषोऽसि सृजारसोऽसि ॥२॥  
 यदि त्रिवृषोऽसि सृजारसोऽसि ॥३॥  
 यदि चतुर्वृषोऽसि सृजारसोऽसि ॥४॥  
 यदि पञ्चवृषोऽसि सृजारसोऽसि ॥५॥  
 यदि षड्वृषोऽसि सृजारसोऽसि ॥६॥  
 यदि सप्तवृषोऽसि सृजारसोऽसि ॥७॥  
 यद्यष्टवृषोऽसि सृजारसोऽसि ॥८॥  
 यदि नववृषोऽसि सृजारसोऽसि ॥९॥  
 यदि दशवृषोऽसि सृजारसोऽसि ॥१०॥  
 यद्येकादशोऽसि सोऽपोदकोऽसि ॥११॥

5.17

तेऽवदन् प्रथमा ब्रह्मकिल्बिषेऽकूपारः सलिलो मातरिश्वा ।  
 वीडुहरास्तप उग्रं मयोभूरापो देवीः प्रथमजा ऋतस्य ॥१॥  
 सोमो राजा प्रथमो ब्रह्मजायां पुनः प्रायच्छदहणीयमानः ।  
 अन्वर्तिता वरुणो मित्र आसीदग्निर्होता हस्तगृह्या निनाय ॥२॥  
 हस्तेनैव ग्राह्य आधिरस्या ब्रह्मजायेति चेदवोचत् ।  
 न दूताय प्रहेया तस्थ एषा तथा राष्ट्रं गुपितं क्षत्रियस्य ॥३॥  
 यामाहुस्तारकैषा विकेशीति दुच्छुनां ग्राममवपद्यमानाम् ।  
 सा ब्रह्मजाया वि दुनोति राष्ट्रं यत्र प्रापादि शश उल्कुषीमान् ॥४॥  
 ब्रह्मचारी चरति वेविषद्विषः स देवानां भवत्येकमङ्गम् ।  
 तेन जायामन्वविन्दद्बृहस्पतिः सोमेन नीतां जुह्वं न देवाः ॥५॥  
 देवा वा एतस्यामवदन्त पूर्वे सप्तऋषयस्तपसा ये निषेदुः ।  
 भीमा जाया ब्राह्मणस्यापनीता दुर्धा दधाति परमे व्योमन् ॥६॥  
 ये गर्भा अवपद्यन्ते जगद्यच्चापलुप्यते ।  
 वीरा ये तृह्यन्ते मिथो ब्रह्मजाया हिनस्ति तान् ॥७॥  
 उत यत्पतयो दश स्त्रियाः पूर्वे अब्राह्मणाः ।  
 ब्रह्मा चेद्धस्तमग्रहीत्स एव पतिरेकधा ॥८॥  
 ब्राह्मण एव पतिर्न राजन्यो न वैश्यः ।  
 तत्सूर्यः प्रब्रुवन् एति पञ्चभ्यो मानवेभ्यः ॥९॥  
 पुनर्व देवा अददुः पुनर्मनुष्या अददुः ।  
 राजानः सत्यं गृह्णाना ब्रह्मजायां पुनर्ददुः ॥१०॥  
 पुनर्दाय ब्रह्मजायां कृत्वा देवैर्निकिल्बिषम् ।  
 ऊर्जं पृथिव्या भक्तवोरुगायमुपासते ॥११॥  
 नास्य जाया शतवाही कल्याणी तल्पमा शये ।  
 यस्मिन् राष्ट्रे निरुध्यते ब्रह्मजायाचित्या ॥१२॥  
 न विकर्णः पृथुशिरास्तस्मिन् वेश्मनि जायते ।  
 यस्मिन् राष्ट्रे निरुध्यते ब्रह्मजायाचित्या ॥१३॥  
 नास्य क्षत्ता निष्कग्रीवः सूनानामेत्यग्रतः ।  
 यस्मिन् राष्ट्रे निरुध्यते ब्रह्मजायाचित्या ॥१४॥  
 नास्य श्वेतः कृष्णकर्णो धुरि युक्तो महीयते ।  
 यस्मिन् राष्ट्रे निरुध्यते ब्रह्मजायाचित्या ॥१५॥  
 नास्य क्षेत्रे पुष्करिणी नाण्डीकं जायते बिसम् ।  
 यस्मिन् राष्ट्रे निरुध्यते ब्रह्मजायाचित्या ॥१६॥  
 नास्मै पृथ्विं वि दुहन्ति येऽस्या दोहमुपासते ।  
 यस्मिन् राष्ट्रे निरुध्यते ब्रह्मजायाचित्या ॥१७॥  
 नास्य धेनुः कल्याणी नानड्वान्त्सहते धुरम् ।  
 विजानियत्र ब्रह्मणो रात्रिं वसति पापया ॥१८॥

5.18

नैतां ते देवा अददुस्तुभ्यं नृपते अत्तवे ।  
 मा ब्राह्मणस्य राजन्यं गां जिघत्सो अनाद्याम् ॥१॥  
 अक्षद्रुग्धो राजन्यः पाप आत्मपराजितः ।  
 स ब्राह्मणस्य गामद्यादद्य जीवानि मा श्वः ॥२॥  
 आविष्टिताघविषा पृदाकूरिव चर्मणा ।  
 सा ब्राह्मणस्य राजन्यं तृष्टैषा गौरनाद्या ॥३॥  
 निर्वै क्षत्रं नयति हन्ति वर्चोऽग्निरिवारब्धो वि दूनोति सर्वम् ।  
 यो ब्राह्मणं मन्यते अन्नमेव स विषस्य पिबति तैमातस्य ॥४॥  
 य एनं हन्ति मूढं मन्यमानो देवपीयुर्धनकामो न चित्तात् ।  
 सं तस्येन्द्रो हृदयेऽग्निमिन्धे उभे एनं द्विष्टो नभसी चरन्तम् ॥५॥  
 न ब्राह्मणो हिंसितव्योऽग्निः प्रियतनोरिव ।  
 सोमो ह्यस्य दायाद इन्द्रो अस्याभिशस्तिपाः ॥६॥  
 शतापाष्ठां नि गिरति तां न शक्नोति निःखिदम् ।  
 अन्नं यो ब्रह्मणां मत्वः स्वाद्वद्भीति मन्यते ॥७॥  
 जिह्वा ज्या भवति कुल्मलं वाङ्नाडीका दन्तास्तपसाभिदिग्धाः ।  
 तेभिर्ब्रह्मा विध्यति देवपीयून् हृद्बलैर्धनुर्भिर्देवजूतैः ॥८॥  
 तीक्ष्णेषु ब्राह्मणा हेतिमन्तो यामस्यन्ति शरव्यां न सा मृषा ।  
 अनुहाय तपसा मन्युना चोत दुरादव भिन्दन्त्येनम् ॥९॥  
 ये सहस्रमराजन् आसन् दशशता उत ।  
 ते ब्राह्मणस्य गां जग्ध्वा वैतहव्याः पराभवन् ॥१०॥  
 गौरैव तान् हन्यमाना वैतहव्यामवातिरत् ।  
 ये केसरप्राबन्धायाश्चरमाजामपेचिरन् ॥११॥  
 एकशतं ता जनता या भूमिर्व्यधुनत ।  
 प्रजां हिंसित्वा ब्राह्मणीमसंभवं पराभवन् ॥१२॥  
 देवपीयुश्चरति मर्त्येषु गरगीर्णो भवत्यस्थिभूयान् ।  
 यो ब्राह्मणं देवबन्धुं हिनस्ति न स पितृयाणमप्येति लोकम् ॥१३॥  
 अग्निर्वै नः पदवायः सोमो दायाद उच्यते ।  
 हन्ताभिशस्तेन्द्रस्तथा तद्वेधसो विदुः ॥१४॥  
 इषुरिव दिग्धा नृपते पृदाकूरिव गोपते ।  
 सा ब्राह्मणस्येषुघोरं तया विध्यति पीयतः ॥१५॥

5.19

अतिमात्रमवर्धन्त नोदिव दिवमस्पृशन् ।  
 भृगुं हिंसित्वा सूञ्जया वैतहव्याः पराभवन् ॥१॥  
 ये बृहत्सामानमाङ्गिरसमार्षयन् ब्राह्मणं जनाः ।  
 पेट्वस्तेषामुभयादमविस्तोकान्यावयत् ॥२॥  
 ये ब्राह्मणं प्रत्यधीवन् ये वास्मिञ्छुल्कमीषिरे ।  
 अस्नस्ते मध्ये कुल्यायाः केशान् खादन्त आसते ॥३॥  
 ब्रह्मगवी पच्यमाना यावत्साभि विजङ्गहे ।  
 तेजो राष्ट्रस्य निर्हन्ति न वीरो जायते वृषा ॥४॥  
 क्रूरमस्या आशसनं तृष्टं पिशितमस्यते ।  
 क्षीरं यदस्याः पीयते तद्वै पितृषु किल्बिषम् ॥५॥  
 उग्रो राजा मन्यमानो ब्राह्मणं यो जिघत्सति ।  
 परा तत्सिच्यते राष्ट्रं ब्राह्मणो यत्र जीयते ॥६॥  
 अष्टापदी चतुरक्षी चतुःश्रोत्रा चतुर्हनुः ।  
 दव्यास्या द्विजिह्वा भूत्वा सा राष्ट्रमव धुनुते ब्रह्मज्यस्य ॥७॥  
 तद्वै राष्ट्रमा स्रवति नावं भिन्नामिवोदकम् ।  
 ब्रह्मणं यत्र हिंसन्ति तद्राष्ट्रं हन्ति दुष्णना ॥८॥  
 तं वृक्षा अप सेधन्ति छायां नो मोप गा इति ।  
 यो ब्राह्मणस्य सद्भनमभि नारद मन्यते ॥९॥  
 विषमेतद्देवकृतं राजा वरुणोऽब्रवीत् ।  
 न ब्राह्मणस्य गां जग्ध्वा रास्त्रे जागार कश्चन ॥१०॥  
 नवैव ता नवतयो या भूमिर्व्यधुनत ।  
 प्रजां हिंसित्वा ब्राह्मणीमसंभवं पराभवन् ॥११॥  
 यां मृतायानुबध्नन्ति कृष्टं पदयोपनीम् ।  
 तद्वै ब्रह्मज्य ते देवा उपस्तरणमब्रुवन् ॥१२॥  
 अश्रूणि कृपमानस्य यानि जीतस्य वावृतुः ।  
 तं वै ब्रह्मज्य ते देवा अपां भागमधारयन् ॥१३॥  
 येन मृतं स्नपयन्ति श्मश्रूणि येनोन्दते ।  
 तं वै ब्रह्मज्य ते देवा अपां भागमधारयन् ॥१४॥  
 न वर्षं मैत्रावरुणं ब्रह्मज्यमभि वर्षति ।  
 नास्मै समितिः कल्पते न मित्रं नयते वशम् ॥१५॥

5.20



उच्चैर्घोषो दुन्दुभिः सत्वनायन् वानस्पत्यः संभृत उसुइयाभिः ।  
 वाचं क्षुण्णवानो दमयन्सपत्नान्त्सिंह इव जेष्यन् अभि तंस्तनीहि ॥१॥  
 सिंह इवास्तानीदद्भवयो विबद्धोऽभिक्रन्दन् ऋषभो वासितामिव ।  
 वृषा त्वं वध्रयस्ते सपत्ना ऐन्द्रस्ते शुष्मो अभिमातिषाहः ॥२॥  
 वृषेव यूथे सहसा विदानो गव्यन् अभि रुव संधनाजित् ।  
 शुचा विध्य हृदयं परेषां हित्वा ग्रामान् प्रच्युता यन्तु शत्रवः ॥३॥  
 संजयन् पृतना ऊर्ध्वमायुर्गृह्णा गृह्णानो बहुधा वि चक्ष्व ।  
 दैवी वाचं दुन्दुभ आ गुरस्व वेधाः शत्रूणामुप भरस्व वेदः ॥४॥  
 दुन्दुभेर्वाचं प्रयतां वदन्तीमाशृण्वती नाथिता घोषबुद्धा ।  
 नारी पुत्रं धावतु हस्तगृह्णामित्री भीता समरे वधानाम् ॥५॥  
 पूर्वो दुन्दुभे प्र वदासि वाचं भूम्याः पृष्ठे वद रोचमानः ।  
 अमित्रसेनामभिजञ्जभानो द्युमद्वद दुन्दुभे सूनृतावत् ॥६॥  
 अन्तरेमे नभसी घोषो अस्तु पृथक्ते ध्वनयो यन्तु शीभम् ।  
 अभि क्रन्द स्तनयोत्पिपानः श्लोककृन् मित्रतूर्याय स्वर्धी ॥७॥  
 धीभिः कृतः प्र वदाति वाचमुद्धर्षय सत्वनामायुधानि ।  
 इन्द्रमेदी सत्वनो नि ह्वयस्व मित्रैरमित्रामव जङ्घनीहि ॥८॥  
 संक्रन्दनः प्रवदो धृष्णुषेणः प्रवेदकृद्बहुधा ग्रामघोषी ।  
 श्रियो वन्वनो वयुनानि विद्वान् कीर्ति बहुभ्यो वि हर द्विराजे ॥९॥  
 श्रेयःकेतो वसुजित्सहीयान्त्संग्रामजित्संशितो ब्रह्मणासि ।  
 अंशून् इव ग्रावाधिषवणे अद्रिर्गव्यन् दुन्दुभेऽधि नृत्य वेदः ॥१०॥  
 शत्रूषाणीषादभिमातिषाहो गवेषणः सहमान उद्भित् ।  
 वाग्वीव मन्त्रं प्र भरस्व वाचं सांग्रामजित्यायेषमुद्देह ॥११॥  
 अच्युतच्युत्समदो गमिष्ठो मृधो जेता पुरएतायोध्यः ।  
 इन्द्रेण गुप्तो विदधा निचिक्यद्दृह्योतनो द्विषतां याहि शीभम् ॥१२॥

5.21

विहृदयं वैमनस्यं वदामित्रेषु दुन्दुभे ।  
 विद्वेषं कश्मशं भयममित्रेषु नि दध्मस्यव एनान् दुन्दुभे जहि ॥१॥  
 उद्वेपमाना मनसा चक्षुषा हृदयेन च ।  
 धावन्तु बिभ्यतोऽमित्राः प्रत्रासेनाज्ये हुते ॥२॥

वानस्पत्यः संभृत उस्त्रियाभिर्विश्वगोत्र्यः ।  
 प्रत्रासममित्रेभ्यो वदाज्येनाभिघारितः ॥३॥  
 यथा मृगाः संविजन्त आरण्याः पुरुषादधि ।  
 एव त्वं दुन्दुभेऽमित्रान् अभि क्रन्द प्र त्रासयाथो चित्तानि मोहय ॥४॥  
 यथा वृकादजावयो धावन्ति बहु बिभ्यतीः ।  
 एव त्वं दुन्दुभेऽमित्रान् अभि क्रन्द प्र त्रासयाथो चित्तानि मोहय ॥५॥  
 यथा श्येनात्पतत्रिणः संविजन्ते अहर्दिवि सिंहस्य स्तनथोर्यथा ।  
 एव त्वं दुन्दुभेऽमित्रान् अभि क्रन्द प्र त्रासयाथो चित्तानि मोहय ॥६॥  
 परामित्रान् दुन्दुभिना हरिणस्याजिनेन च ।  
 सर्वे देवा अतित्रसन् ये संग्रामस्येषते ॥७॥  
 यैरिन्द्रः प्रक्रीडते पद्भोषैश्छायया सह ।  
 तैरमित्रास्त्रसन्तु नोऽमी ये यन्त्यनीकशः ॥८॥  
 ज्याघोषा दुन्दुभयोऽभि क्रोशन्तु या दिशः ।  
 सेनाः पराजिता यतीरमित्राणामनीकशः ॥९॥  
 आदित्य चक्षुरा दत्स्व मरीचयोऽनु धावत ।  
 पत्सङ्गिनीरा सजन्तु विगते बाहुवीर्ये ॥१०॥  
 यूयमुग्रा मरुतः पृश्निमातर इन्द्रेण युजा प्र मनीत शत्रून् ।  
 सोमो राजा वरुणो राजा महादेव उत मृत्युरिन्द्रः ॥११॥  
 एता देवसेनाः सूर्यकेतवः सचेतसः ।  
 अमित्रान् नो जयन्तु स्वाहा ॥१२॥

5.22

अग्निस्तक्मानमप बाधतामितः सोमो ग्रावा वरुणः पूतदक्षाः ।  
 वेदिर्बर्हिः समिधः शोशुचाना अप द्वेषांस्यमुया भवन्तु ॥१॥  
 अयं यो विश्वान् हरितान् कृणोष्युच्छोचयन् अग्निरिवाभिदुन्वन् ।  
 अथा हि तक्मन् अरसो हि भूया अथा न्यङ्ङधरान् वा परेहि ॥२॥  
 यः परुषः पारुषेयोऽवध्वंस इवारुणः ।  
 तक्मानं विश्वधावीर्याधराञ्चं परा सुवा ॥३॥  
 अधराञ्चं प्र हिणोमि नमः कृत्वा तक्मने ।  
 शकम्भरस्य मुष्टिहा पुनरेतु महावृषान् ॥४॥  
 ओको अस्य मूजवन्त ओको अस्य महावृषाः ।  
 यावज्जातस्तक्मस्तावान् असि बल्हिकेषु न्योचरः ॥५॥  
 तक्मन् व्याल वि गद व्यङ्ग भूरि यावय ।

दासीं निष्टक्वरीमिच्छ तां वज्रेण समर्पय ॥६॥  
 तक्मन् मूजवतो गच्छ बल्हिकान् वा परस्तराम् ।  
 शूद्रामिच्छ प्रफर्व्य तां तक्मन् वीव धूनुहि ॥७॥  
 महावृषान् मूजवतो बन्ध्वद्धि परेत्य ।  
 प्रैतानि तक्मने ब्रूमो अन्यक्षेत्राणि वा इमा ॥८॥  
 अन्यक्षेत्रे न रमसे वशी सन् मृडयासि नः ।  
 अभूदु प्रार्थस्तक्मा स गमिष्यति बल्हिकान् ॥९॥  
 यत्त्वं शीतोऽथो रूरः सह कासावेपयः ।  
 भीमास्ते तक्मन् हेतयस्ताभिः स्म परि वृङ्ग्धि नः ॥१०॥  
 मा स्मैतान्त्सखीन् कुरुथा बलासं कासमुद्युगम् ।  
 मा स्मातोऽर्वाङ्गैः पुनस्तत्त्वा तक्मन् उप ब्रुवे ॥११॥  
 तक्मन् भ्रात्रा बलासेन स्वस्रा कासिकया सह ।  
 पाप्मा भ्रातृव्येण सह गच्छामुमरणं जनम् ॥१२॥  
 तृतीयकं वितृतीयं सदन्दिमुत शारदम् ।  
 तक्मानं शीतं रूरं ग्रैष्मं नाशय वाषिकम् ॥१३॥  
 गन्धारिभ्यो मूजवद्भ्योऽङ्गैभ्यो मगधेभ्यः ।  
 प्रैष्यन् जनमिव शेवधिं तक्मानं परि ददासि ॥१४॥

5.23

ओते मे द्यावापृथिवी ओता देवी सरस्वती ।  
 ओतौ म इन्द्रश्चाग्निश्च क्रिमिं जम्भयतामिति ॥१॥  
 अस्येन्द्र कुमारस्य क्रिमीन् धनपते जहि ।  
 हता विश्वा अरातय उग्रेण वचसा मम ॥२॥  
 यो अक्ष्यो परिसर्पति यो नासे परिसर्पति ।  
 दतां यो मध्यं गच्छति तं क्रिमिं जम्भयामसि ॥३॥  
 सरूपौ द्वौ विरूपौ द्वौ कृष्णौ द्वौ रोहितौ द्वौ ।  
 बभ्रुश्च बभ्रुकर्णश्च गुध्रः कोकश्च ते हताः ॥४॥  
 ये क्रिमयः शितिकक्षा ये कृष्णाः शितिबाहवः ।  
 ये के च विश्वरूपास्तान् क्रिमीन् जम्भयामसि ॥५॥  
 उत्पुरस्तात्सूर्य एति विश्वदृष्टो अदृष्टहा ।  
 दृष्टांश्च घ्नन् अदृष्टांश्च सर्वांश्च प्रमृणन् क्रिमीन् ॥६॥  
 येवाषासः कष्कषास एजत्काः शिपवित्नुकाः ।  
 दृष्टश्च हन्यतां क्रिमिरुतादृष्टश्च हन्यताम् ॥७॥  
 हतो येवाषः क्रिमीणां हतो नदनिमोत ।  
 सर्वान् नि मष्मषाकरं दृषदा खल्वामिव ॥८॥  
 त्रिशीर्षाणं त्रिककुदं क्रिमिं सारङ्गमर्जुनम् ।  
 शृणाम्यस्य पृष्टीरपि वृश्चामि यच्छिरः ॥९॥  
 अत्रिवद्धः क्रिमयो हन्मि कण्ववज्जमदग्नित् ।  
 अगस्त्यस्य ब्रह्मणा सं पिनष्यहं क्रिमीन् ॥१०॥  
 हतो राजा क्रिमीणामुतैषां स्थपतिर्हतः ।  
 हतो हतमाता क्रिमिर्हतभ्राता हतस्वसा ॥११॥  
 हतासो अस्य वेशसो हतासः परिवेशसः ।  
 अथो ये क्षुल्लका इव सर्वे ते क्रिमयो हताः ॥१२॥  
 सर्वेषां च क्रिमीणां सर्वासां च क्रिमीनाम् ।  
 भिनदम्यशमना शिरो दहाम्यग्निना मुखम् ॥१३॥

5.24

सविता प्रसवानामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्यामस्यामाकृत्यामस्यामाशिष्यस्यां देवहृत्यां स्वाहा ॥१॥  
 अग्निर्वनस्पतीनामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्यामस्यामाकृत्यामस्यामाशिष्यस्यां देवहृत्यां स्वाहा ॥२॥  
 द्यावापृथिवी दातृणामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्यामस्यामाकृत्यामस्यामाशिष्यस्यां देवहृत्यां स्वाहा ॥३॥  
 वरुणोऽपामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्यामस्यामाकृत्यामस्यामाशिष्यस्यां देवहृत्यां स्वाहा ॥४॥  
 मित्रावरुणो वृष्ट्याधिपतिः तौ मावताम् ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्यामस्यामाकृत्यामस्यामाशिष्यस्यां देवहृत्यां स्वाहा ॥५॥  
 मरुतः पर्वतानामधिपतयस्ते मावन्तु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।

चित्त्वामस्यामाकृत्यामस्यामाशिष्यस्यां देवहृत्यां स्वाहा ॥६॥  
 सोमो वीरुधामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥७॥  
 वायुरन्तरिक्षस्याधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥८॥  
 सूर्यश्चक्षुषामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥९॥  
 चन्द्रमा नक्षत्राणामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१०॥  
 इन्द्रो दिवोऽधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥११॥  
 मरुतां पिता पशुनामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१२॥  
 मृत्युः प्रजानामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१३॥  
 यमः पितृणामधिपतिः स मावतु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१४॥  
 पितरः परे ते मावन्तु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१५॥  
 तता अवरे ते मावन्तु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१६॥  
 ततस्ततामहास्ते मावन्तु ।  
 अस्मिन् ब्रह्मण्यस्मिन् कर्मण्यस्यां पुरोधायामस्यां प्रतिष्ठायामस्याम् ।  
 चित्त्वामस्यामाकृत्यामस्यामाशिष्यस्यां देवहृत्यां स्वाहा ॥१७॥

5.25

पर्वताद्विवो योनेरङ्गादङ्गात्समाभूतम् ।  
 शेषो गर्भस्य रेतोधाः सरौ पर्णमिवा दधत् ॥१॥  
 यथेयं पृथिवी मही भूतानां गर्भमादधे ।  
 एवा दधामि ते गर्भं तस्मै त्वामवसे हुवे ॥२॥  
 गर्भं धेहि सिनीवालि गर्भं धेहि सरस्वति ।  
 गर्भं ते अश्विनोभा धत्तां पुष्करस्रजा ॥३॥  
 गर्भं ते मित्रावरुणौ गर्भं देवो बृहस्पतिः ।  
 गर्भं त इन्द्रश्चाग्निश्च गर्भं धाता दधातु ते ॥४॥  
 विष्णुर्योनिं कल्पयतु त्वष्टा रूपाणि पिशतु ।  
 आ सिञ्चतु प्रजापतिर्धाता गर्भं दधातु ते ॥५॥  
 यद्वेद राजा वरुणो यद्वा देवी सरस्वती ।  
 यदिन्द्रो वृत्रहा वेद तद्गर्भकरणं पिब ॥६॥  
 गर्भो अस्योषधीनां गर्भो वनस्पतीनाम् ।  
 गर्भो विश्वस्य भूतस्य सो अग्ने गर्भमेह धाः ॥७॥  
 अधि स्कन्द वीरयस्व गर्भमा धेहि योन्याम् ।  
 वृषासि वृष्ण्यावन् प्रजायै त्वा नयामसि ॥८॥  
 वि जिहीष्व बार्हत्सामे गर्भस्ते योनिमा शयाम् ।  
 अदुष्टे देवाः पुत्रं सोमपा उभयाविनम् ॥९॥  
 धातः श्रेष्ठेन रूपेणास्या नार्या गवीन्योः ।  
 पुमांसं पुत्रमा धेहि दशमे मासि सूतवे ॥१०॥  
 त्वष्टः श्रेष्ठेन रूपेणास्या नार्या गवीन्योः ।  
 पुमांसं पुत्रमा धेहि दशमे मासि सूतवे ॥११॥  
 संवितः श्रेष्ठेन रूपेणास्या नार्या गवीन्योः ।  
 पुमांसं पुत्रमा धेहि दशमे मासि सूतवे ॥१२॥  
 प्रजापते श्रेष्ठेन रूपेणास्या नार्या गवीन्योः ।  
 पुमांसं पुत्रमा धेहि दशमे मासि सूतवे ॥१३॥

5.26

यजूषि यज्ञे समिधः स्वाहाग्निः प्रविद्वान् इह वो युनक्तु ॥१॥  
 युनक्तु देवः सविता प्रजानन् अस्मिन् यज्ञे महिषः स्वाहा ॥२॥  
 इन्द्र उक्थामदान्यस्मिन् यज्ञे प्रविद्वान् युनक्तु सुयुजः स्वाहा ॥३॥  
 प्रैषा यज्ञे निविदः स्वाहा शिष्टाः पत्नीभिर्वहतेह युक्ताः ॥४॥  
 छन्दांसि यज्ञे मरुतः स्वाहा मातेव पुत्रं पिपृतेह युक्ताः ॥५॥  
 एयमगन् बर्हिषा प्रोक्षणीभिर्यज्ञं तन्वानादितिः स्वाहा ॥६॥  
 विष्णुर्युनक्तु बहुधा तपांस्यस्मिन् यज्ञे सुयुजः स्वाहा ॥७॥  
 त्वष्टा युनक्तु बहुधा नु रूपा अस्मिन् यज्ञे युनक्तु सुयुजः स्वाहा ॥८॥  
 भगो युनक्त्वाशिषो न्वस्मा अस्मिन् यज्ञे प्रविद्वान् युनक्तु सुयुजः स्वाहा ॥९॥  
 सोमो युनक्तु बहुधा पयांस्यस्मिन् यज्ञे सुयुजः स्वाहा ॥१०॥  
 इन्द्रो युनक्तु बहुधा पयांस्यस्मिन् यज्ञे सुयुजः स्वाहा ॥११॥  
 अश्विना ब्रह्मणा यातमर्वाञ्चौ वषट्कारेण यज्ञं वर्धयन्तौ ।  
 बृहस्पते ब्रह्मणा याह्वर्वाड्यज्ञो अयं स्वरिदं यजमानाय स्वाहा ॥१२॥

5.27

ऊर्ध्वा अस्य समिधो भवन्त्यूर्ध्वा शुक्रा शोचीष्यग्नेः ।  
 द्युमत्तमा सुप्रतीकः ससूनस्तनूनपादसुरो भूरिपाणिः ॥१॥  
 देवो देवेषु देवः पथो अनक्ति मध्वा घृतेन ॥२॥  
 मध्वा यज्ञं नक्षति प्रैणानो नराशंसो अग्निः सुकृदेवः सविता विश्ववारः ॥३॥  
 अछायमेति शवसा घृता चिदीदानो वह्निर्मसा ॥४॥  
 अग्निः सुचो अध्वरेषु प्रयक्षु स यक्षदस्य महिमानमग्नेः ॥५॥  
 तरी मन्द्रासु प्रयक्षु वसवश्चातिष्ठन् वसुधातरश्च ॥६॥  
 द्वारो देवीरन्वस्य विश्वे व्रतं रक्षन्ति विश्वहा ॥७॥  
 उरुव्यचसाग्नेर्धाम्ना पत्यमाने ।  
 आ सुष्वयन्ती यजते उपाके उषासानक्तेमं यज्ञमवतामध्वरं नः ॥८॥  
 देवा होतार ऊर्ध्वमध्वरं नोऽग्नेर्जिह्वयाभि गृनत गृनता नः स्विष्टये ।  
 तिस्रो देवीर्बहिरिदं सदन्तामिडा सरस्वती मही भारती गृणाना ॥९॥  
 तन् नस्तुरीपमद्भुतं पुरुक्षु ।  
 देव त्वष्टा रायस्पोष वि ष्य नाभिमस्य ॥१०॥  
 वनस्पतेऽव सृजा रराणः ।  
 त्मना देवेभ्यो अग्निर्हव्यं शमिता स्वदयतु ॥११॥  
 अग्ने स्वाहा कृणुहि जातवेदः ।  
 इन्द्राय यज्ञं विश्वे देवा हविरिदं जुषन्ताम् ॥१२॥

5.28

नव प्राणान् नवभिः सं मिमीते दीर्घायुत्वाय शतशारदाय ।  
 हरिते त्रीणि रजते त्रीण्ययसि त्रीणि तपसाविष्टितानि ॥१॥  
 अग्निः सूर्यश्चन्द्रमा भूमिरापो द्यौरन्तरिक्षं प्रदिशो दिशश्च ।  
 आर्तवा ऋतुभिः संविदाना अनेन मा त्रिवृता पारयन्तु ॥२॥  
 त्रयः पोषास्त्रिवृति श्रयन्तामनक्तु पूषा पयसा घृतेन ।  
 अन्नस्य भूमा पुरुषस्य भूमा भूमा पशूनां त इह श्रयन्ताम् ॥३॥  
 इममादित्या वसुना समुक्षतेमग्ने वर्धय ववृधानः ।  
 इममिन्द्र सं सृज वीर्येणास्मिन् त्रिवृच्छ्रयतां पोषयिष्णु ॥४॥  
 भूमिष्टवा पातु हरितेन विश्वभृदग्निः पिपृत्वयसा सजोषाः ।  
 वीरुद्धिष्टे अर्जुनं संविदानं दक्षं दधातु सुमनस्यमानम् ॥५॥  
 त्रेधा जातं जन्मनेदं हिरण्यमग्नेरेकं प्रियतमं बभूव सोमस्यैकं हिंसितस्य परापतत् ।  
 अपामेकं वेधसां रेत आहुस्तत्ते हिरण्यं त्रिवृदस्त्वायुषे ॥६॥  
 त्र्यायुषं जमदग्नेः कश्यपस्य त्र्यायुषम् ।  
 त्रेधामृतस्य चक्षणं त्रीण्यार्युषि तेऽकरम् ॥७॥  
 त्रयः सुपर्णास्त्रिवृता यदायन् एकाक्षरमभिसंभय शक्राः ।  
 प्रत्यौहन् मृत्युममृतेन साकमन्तर्दधाना दुरितानि विश्वा ॥८॥  
 दिवस्त्वा पातु हरितं मध्यान्त्वा पात्वर्जुनम् ।  
 भूम्या अयस्मयं पातु प्रागाद्देवपुरा अयम् ॥९॥  
 इमास्तिस्रो देवपुरास्तास्त्वा रक्षन्तु सर्वतः ।  
 तास्त्वं बिभ्रद्दर्चस्व्युत्तरो द्विषतां भव ॥१०॥  
 पुरं देवानाममृतं हिरण्यं य आबेधे प्रथमो देवो अग्रे ।  
 तस्मै नमो दश प्राचीः कृणोम्यनु मन्यतां त्रिवृदाबधे मे ॥११॥  
 आ त्वा चृतत्वर्थमा पूषा बृहस्पतिः ।  
 अहर्जातस्य यन् नाम तेन त्वाति चृतामसि ॥१२॥  
 ऋतुभिष्ट्वार्तवैरायुषे वर्चसे त्वा ।  
 संवत्सरस्य तेजसा तेन संहनु कृणमसि ॥१३॥  
 घृतादुल्लुप्तं मधुना समक्तं भूमिर्दृहमच्युतं पारयिष्णु ।  
 भिन्दत्सपत्नान् अधरांश्च कृण्वदा मा रोह महते सोभगाय ॥१४॥

5.29

पुरस्ताद्युक्तो वह जातवेदोऽग्ने विद्धि क्रियमाणं यथेदम् ।  
त्वं भिषग्भेषजस्यासि कर्ता त्वया गामश्वं पुरुषं सनेम ॥१॥  
तथा तदग्ने कृणु जातवेदो विश्वेभिर्देवैः सह संविदानः ।  
यो नो दिदेव यतमो जघास यथा सो अस्य परिधिष्पताति ॥२॥  
यथा सो अस्य परिधिष्पताति तथा तदग्ने कृणु जातवेदः ।  
विश्वेभिर्देवैर्सह संविदानः ॥३॥  
अक्षयौ नि विध्य हृदयं नि विध्य जिह्वां नि तृन्द्धि प्र दतो मृणीहि ।  
पिशाचो अस्य यतमो जघासाग्ने यविष्ठ प्रति शृणीहि ॥४॥  
यदस्य हृतं विहृतं यत्पराभृतमात्मनो जग्धं यतमत्पिशाचैः ।  
तदग्ने विद्वान् पुनरा भर त्वं शरीरे मांसमसुमेरयामः ॥५॥  
आमे सुपक्वे शबले विपक्वे यो मा पिशाचो अशने ददम्भ ।  
तदात्मना प्रजया पिशाचा वि यातयन्तामगदोऽयमस्तु ॥६॥  
क्षीरे मा मन्थे यतमो ददम्भाकृष्टपच्ये अशने धान्ये यः ।  
तदात्मना प्रजया पिशाचा वि यातयन्तामगदोऽयमस्तु ॥७॥  
अपां मा पाने यतमो ददम्भ क्रव्याद्यातूनां शयने शयानम् ।  
तदात्मना प्रजया पिशाचा वि यातयन्तामगदोऽयमस्तु ॥८॥  
दिवा मा नक्तं यतमो ददम्भ क्रव्याद्यातूनां शयने शयानम् ।  
तदात्मना प्रजया पिशाचा वि यातयन्तामगदोऽयमस्तु ॥९॥  
क्रव्यादमग्ने रुधिरं पिशाचं मनोहनं जहि जातवेदः ।  
तमिन्द्रो वाजी वज्रेण हन्तु छिनत्तु सोमः शिरो अस्य धृष्णुः ॥१०॥  
सनादग्ने मृणसि यातुधानान् न त्वा रक्षांसि पृतनासु जिग्म्युः ।  
सहमूरान् अनु दह क्रव्यादो मा ते हेत्या मुक्षत दैव्यायाः ॥११॥  
समाहर जातवेदो यद्भृतं यत्पराभृतम् ।  
गात्राप्यस्य वर्धन्तामंशुरिवा प्यायतामयम् ॥१२॥  
सोमस्येव जातवेदो अशुरा प्यायतामयम् ।  
अग्ने विरिञ्चिनं मेध्यमयक्ष्मं कृणु जीवतु ॥१३॥  
एतास्ते अग्ने समिधः पिशाचजम्भनीः ।  
तास्त्वं जुषस्व प्रति चैना गृहाण जातवेदः ॥१४॥  
तार्षाधीरग्ने समिधः प्रति गृह्णाह्यर्चिषा ।  
जहातु क्रव्याद्रूपं यो अस्य मांसं जिहीर्षति ॥१५॥

5.30

आवतस्त आवतः परावतस्त आवतः ।  
इहैव भव मा नु गा मा पूर्वान् अनु गाः पितृन् असुं बध्नामि ते दृढम् ॥१॥  
यत्त्वाभिचेरुः पुरुषः स्वो यदरणो जनः ।  
उन्मोचनप्रमोचने उभे वाचा वदामि ते ॥२॥  
यद्द्रोहिथ शेषिषे स्त्रियै पुंसे अचित्त्या ।  
उन्मोचनप्रमोचने उभे वाचा वदामि ते ॥३॥  
यतेनसो मातृकृताच्छेषे पितृकृताच्च यत् ।  
उन्मोचनप्रमोचने उभे वाचा वदामि ते ॥४॥  
यत्ते माता यत्ते पिता जमिभ्रता च सर्जतः ।  
प्रत्यक्सेवस्व भेषजं जरदष्टिं कृणोमि त्वा ॥५॥  
इहैधि पुरुष सर्वेण मनसा सह ।  
दूतौ यमस्य मानु गा अधि जीवपुरा इहि ॥६॥  
अनुहृतः पुनरेहि विद्वान् उदयनं पथः ।  
आरोहणमाक्रमणं जीवतो जीवतोऽयनम् ॥७॥  
मा बिभेर्न मरिष्यसि जरदष्टिं कृणोमि त्वा ।  
निरवोचमहं यक्षममङ्गेभ्यो अङ्गज्वरं तव ॥८॥  
अङ्गभेदो अङ्गज्वरो यश्च ते हृदयामयः ।  
यक्ष्मः श्येन इव प्रापत्तद्वचा साढः परस्तराम् ॥९॥  
ऋषी बोधप्रतीबोधावस्वप्नो यश्च जागृविः ।  
तौ ते प्राणस्य गोप्तारौ दिवा नक्तं च जागृताम् ॥१०॥  
अयमग्निरुपसद्य इह सूर्य उदेतु ते ।  
उदेहि मृत्योर्गम्भीरात्कृष्णाच्चित्तमसस्परि ॥११॥  
नमो यमाय नमो अस्तु मृत्यवे नमः पितृभ्य उत ये नयन्ति ।  
उत्पारणस्य यो वेद तमग्निं पुरो दधेऽस्मा अरिष्टतातये ॥१२॥  
ऐतु प्राण ऐतु मन ऐतु चक्षुरथो बलम् ।  
शरीरमस्य सं विदां तत्पदभ्यां प्रति तिष्ठतु ॥१३॥  
प्राणेनाग्ने चक्षुषा सं सृजेमं समीरय तन्वा सं बलेन ।  
वेत्थामृतस्य मा नु गान् मा नु भूमिगृहो भूवत् ॥१४॥  
मा ते प्राण उप दसन् मो अपानोऽपि धायि ते ।  
सूर्यस्त्वाधिपतिर्मृत्योरुदायच्छतु रश्मिभिः ॥१५॥  
इयमन्तर्वदति जिह्वा बद्धा पनिष्पदा ।

त्वया यक्ष्मं निरवोचं शतं रोपीश्च तक्मनः ॥१६॥  
अयं लोकः प्रियतमो देवानामपराजितः ।  
यस्मै त्वमिह मृत्यवे दिष्टः पुरुष जज्ञिषे ।  
स च त्वानु ह्वयामसि मा पुरा जरसो मृथाः ॥१७॥

5.31

यां ते चक्रुरामे पात्रे यां चक्रुर्मिश्रधान्ये ।  
आमे मांसे कृत्यां यां चक्रुः पुनः प्रति हरामि ताम् ॥१॥  
यां ते चक्रुः कृकवाकावजे वा यां कुरीरिणि ।  
अव्यां ते कृत्यां यां चक्रुः पुनः प्रति हरामि ताम् ॥२॥  
यां ते चक्रुरेकशफे पशूनामुभयादति ।  
गर्दभे कृत्यां यां चक्रुः पुनः प्रति हरामि ताम् ॥३॥  
यां ते चक्रुरमूलायां वलगं वा नराच्याम् ।  
क्षेत्रे ते कृत्यां यां चक्रुः पुनः प्रति हरामि ताम् ॥४॥  
यां ते चक्रुर्गार्हपत्ये पूर्वाग्नावुत दुश्चितः ।  
शालायां कृत्यां यां चक्रुः पुनः प्रति हरामि ताम् ॥५॥  
यां ते चक्रुः सभायां यां चक्रुरधिदेवने ।  
अक्षेषु कृत्यां यां चक्रुः पुनः प्रति हरामि ताम् ॥६॥  
यां ते चक्रुः सेनायां यां चक्रुरिष्वायुधे ।  
दुन्दुभौ कृत्यां यां चक्रुः पुनः प्रति हरामि ताम् ॥७॥  
यां ते कृत्यां कूपेऽवदधुः श्मशाने वा निचख्नुः ।  
सद्मनि कृत्यां यां चक्रुः पुनः प्रति हरामि ताम् ॥८॥  
यां ते चक्रुः पुरुषास्थे अग्नौ संकसुके च याम् ।  
म्रोकं निर्दाहं क्रव्यादं पुनः प्रति हरामि ताम् ॥९॥  
अपथेना जभारैनां तां पथेतः प्र हिण्मसि ।  
अधीरो मर्याधीरेभ्यः सं जभाराचित्या ॥१०॥  
यश्चकार न शशाक कर्तुं शश्रे पादमङ्गुरिम् ।  
चकार भद्रमस्मभ्यमभगो भगवद्भ्यः ॥११॥  
कृत्याकृतं वलगिनं मूलिनं शपथेय्यम् ।  
इन्द्रस्तं हन्तु महता वधेनाग्निर्विध्यत्वस्तया ॥१२॥

6.1

दोषो गाय बृहद्गाय द्युमद्धेहि ।  
आथर्वण स्तुहि देवं सवितारम् ॥१॥  
तमु ह्युहि यो अन्तः सिन्धौ सूनुः ।  
सत्यस्य युवानमद्रोघवाचं सुशेवम् ॥२॥  
स घा नो देवः सविता साविषदमृतानि भूरि ।  
उभे सुष्टुती सुगातवे ॥३॥

6.2

इन्द्राय सोममृत्विजः सुनोता च धावत ।  
स्तोतुर्यो वचः शृणवद्ध्रवं च मे ॥१॥  
आ यं विशन्तीन्दवो वयो न वृक्षमन्धसः ।  
विरिषिन् वि मृधो जहि रक्षस्विनीः ॥२॥  
सुनोता सोमपावने सोममिन्द्राय वज्रिणे ।  
युवा जेतेशानः स पुरुष्टुतः ॥३॥

6.3

पातं न इन्द्रापूषणादितिः पान्तु मरुतः ।  
अपां नपात्सिन्धवः सप्त पातन पातु नो विष्णुरुत द्यौः ॥१॥  
पातां नो ह्यावापृथिवी अभिष्टये पातु ग्रावा पातु सोमो नो अंहसः ।  
पातु नो देवी सुभगा सरस्वती पात्वग्निः शिवा ये अस्य पायवः ॥२॥  
पातां नो देवाश्विना शुभस्पती उषासानक्तोत न उरुष्यताम् ।  
अपां नपादभिहुती गयस्य चिद्देव त्वष्टर्वर्धय सर्वतातये ॥३॥

6.4

त्वष्टा मे दैव्यं वचः पर्जन्यो ब्रह्मणस्पतिः ।  
पुत्रैर्भ्रातृभिरदितिर्नु पातु नो दुष्टरं त्रायमाणं सहः ॥१॥  
अंशो भगो वरुणो मित्रो अयमादितिः पान्तु मरुतः ।  
अप तस्य द्वेषो गमेदभिहुतो यावयच्छत्रुमन्तितम् ॥२॥  
धिष्ये समश्विना प्रावतं न उरुष्या ण उरुज्मन् अप्रयुच्छन् ।  
द्यौष्पितर्यावय दुच्छुना या ॥३॥

6.5

उदेनमुत्तरं नयाग्ने घृतेनाहुत ।  
समेनं वर्चसा सृज प्रजया च बहुं कृधि ॥१॥  
इन्द्रेमं प्रतरं कृधि सजातानामसद्वशी ।  
रायस्पोषेण सं सृज जीवातवे जरसे नय ॥२॥  
यस्य कृण्मो हविर्गृहे तमग्ने वर्धया त्वम् ।  
तस्मै सोमो अधि ब्रवदयं च ब्रह्मणस्पतिः ॥३॥

6.6  
योऽस्मान् ब्रह्मणस्पतेऽदेवो अभिमन्यते ।  
सर्वं तं रन्धयासि मे यजमानाय सुन्वते ॥१॥  
यो नः सोम सुशंसिनो दुःशंस आदिदेशति ।  
वज्रेणास्य मुखे जहि स संपिष्टो अपायति ॥२॥  
यो नः सोमाभिदासति सनाभिर्यश्च निष्ट्यः ।  
अप तस्य बलं तिर महीव द्यौर्वधत्मना ॥३॥

6.7  
येन सोमादितिः पथा मित्रा वा यन्त्यद्बुहः ।  
तेना नोऽवसा गहि ॥१॥  
येन सोम साहन्त्यासुरान् रन्धयासि नः ।  
तेना नो अधि वोचत ॥२॥  
येन देवा असुराणामोजांस्यवृणीध्वम् ।  
तेना नः शर्म यच्छत ॥३॥

6.8  
यथा वृक्षं लिबुजा समन्तं परिष्वजे ।  
एवा परि ष्वजस्व मां यथा मां कामिन्यसो यथा मन् नापगा असः ॥१॥  
यथा सुपर्णः प्रपतन् पक्षौ निहन्ति भूम्याम् ।  
एवा नि हन्मि ते मनो यथा मां कामिन्यसो यथा मन् नापगा असः ॥२॥  
यथेमे द्यावापृथिवी सद्यः पर्येति सूर्यः ।  
एवा पर्येमि ते मनो यथा मां कामिन्यसो यथा मन् नापगा असः ॥३॥

6.9  
वाञ्छ मे तन्वं पादौ वाञ्छाक्ष्यौ वाञ्छ सक्थ्यौ ।  
अक्ष्यौ वृषण्यन्त्याः केशा मां ते कामेन शुष्यन्तु ॥१॥  
मम त्वा दोषणिश्रिषं कृणोमि हृदयश्रिषम् ।  
यथा मम क्रतावसो मम चित्तमुपायसि ॥२॥  
यासां नाभिरारेहणं हृदि संवननं कृतं गावो घृतस्य मातरोऽमूं सं वानयन्तु मे ॥३॥

6.10  
पृथिव्यै श्रोत्राय वनस्पतिभ्योऽग्नयेऽधिपतये स्वाहा ॥१॥  
प्राणायान्तरिक्षाय वयोभ्यो वायवेऽधिपतये स्वाहा ॥२॥  
दिवे चक्षुषे नक्षत्रेभ्यः सूर्यायाधिपतये स्वाहा ॥३॥

6.11  
शमीमश्वत्थ आरूढस्तत्र पुंसुवनं कृतम् ।  
तद्वै पुत्रस्य वेदनं तत्स्त्रीष्वा भरामसि ॥१॥  
पुंसि वै रेतो भवति तत्स्त्रियामनु षिच्यते ।  
तद्वै पुत्रस्य वेदनं तत्प्रजापतिरब्रवीत् ॥२॥  
प्रजापतिरनुमतिः सिनीवात्यचीकूपत् ।  
स्त्रैषूयमन्यत्र दधत्पुमांसमु दधतिह ॥३॥

6.12  
परि द्यामिव सूर्योऽहीनां जनिमागमम् ।  
रात्री जगदिवान्यद्भ्रंसात्तेना ते वारये विषम् ॥१॥  
यद्ब्रह्मभिर्यदृषिभिर्यद्वैर्विदितं पुरा ।  
यद्भूतं भव्यमासन्वत्तेना ते वारये विषम् ॥२॥  
मध्वा पृञ्चे नद्यः पर्वता गिरयो मधु ।  
मधु परुष्णी शीपाला शमास्ने अस्तु शं हृदे ॥३॥

6.13  
नमो देववधेभ्यो नमो राजवधेभ्यः ।  
अथो ये विश्यानां वधास्तेभ्यो मृत्यो नमोऽस्तु ते ॥१॥  
नमस्ते अधिवाकाय परावाकाय ते नमः ।

सुमत्यै मृत्यो ते नमो दुर्मत्यै ते इदं नमः ॥२॥  
नमस्ते यातुधानेभ्यो नमस्ते भेषजेभ्यः ।  
नमस्ते मृत्यो मूलेभ्यो ब्राह्मणेभ्य इदं नमः ॥३॥

6.14

अस्थिसंसं परुसंसमास्थितं हृदयामयम् ।  
बलासं सर्वं नाशयाङ्गेषा यश्च पर्वसु ॥१॥  
निर्बलासं बलासिनः क्षिणोमि मुष्करं यथा ।  
छिनदम्यस्य बन्धनं मूलमुर्वावा इव ॥२॥  
निर्बलासेतः प्र पताशुङ्गः शिशुको यथा ।  
अथो इत इव हायनोऽप द्राह्यवीरहा ॥३॥

6.15

उत्तमो अस्योषधीनां तव वृक्षा उपस्तयः ।  
उपस्तिरस्तु सोऽस्माकं यो अस्मामभिदासति ॥१॥  
सबन्धुश्चासबन्धुश्च यो अस्मामभिदासति ।  
तेषां सा वृक्षाणामिवाहं भूयासमुत्तमः ॥२॥  
यथा सोम ओषधीनामुत्तमो हविषां कृतः ।  
तलाशा वृक्षाणामिवाहं भूयासमुत्तमः ॥३॥

6.16

आबयो अनाबयो रसस्त उग्र आबयो ।  
आ ते करम्भमद्गसि ॥१॥  
विहङ्गो नाम ते पिता मदावती नाम ते माता ।  
स हिन त्वमसि यस्त्वमात्मानमावयः ॥२॥  
तौविलिकेऽवेलयावायमैलब ऐलयीत् ।  
बभ्रुश्च बभ्रुकर्णश्चापेहि निराल ॥३॥  
अलसालासि पूर्व सिलाञ्जालास्युत्तरा ।  
नीलागलसाल ॥४॥

6.17

यथेयं पृथिवी मही भूतानां गर्भमादधे ।  
एवा ते ध्रियतां गर्भो अनु सूतुं सवितवे ॥१॥

यथेयं पृथिवी मही दाधारेमान् वनस्पतीन् ।  
एवा ते ध्रियतां गर्भो अनु सूतुं सवितवे ॥२॥  
यथेयं पृथिवी मही दाधार पर्वतान् गिरीन् ।  
एवा ते ध्रियतां गर्भो अनु सूतुं सवितवे ॥३॥  
यथेयं पृथिवी मही दाधार विष्टितं जगत् ।  
एवा ते ध्रियतां गर्भो अनु सूतुं सवितवे ॥४॥

6.18

ईर्ष्याया ध्राजिं प्रथमां प्रथमस्या उतापराम् ।  
अग्निं हृदय्यं शोकं तं ते निर्वापयामसि ॥१॥  
यथा भूमिर्मृतमना मृतान् मृतमनस्तरा ।  
यथोत ममृषो मन एवेष्योर्मृतं मनः ॥२॥  
अदो यत्ते हृदि श्रितं मनस्कं पतयिष्णुकम् ।  
ततस्त ईर्ष्यां मुञ्चामि निरूष्माणं दूतेरिव ॥३॥

6.19

पुनन्तु मा देवजनाः पुनन्तु मनवो धिया ।  
पुनन्तु विश्वा भूतानि पवमानः पुनातु मा ॥१॥  
पवमानः पुनातु मा क्रत्वे दक्षाय जीवसे ।  
अथो अरिष्टतातये ॥२॥  
उभाभ्यां देव सवितः पवित्रेण सवेन च ।  
अस्मान् पुनीहि चक्षसे ॥३॥

6.20

अग्नेरिवास्य दहत एति शुष्मिण उतेव मत्तो विलपन् अपायति ।  
अन्यमस्मदिच्छतु कं चिद्व्रतस्तपुर्वधाय नमो अस्तु तक्मने ॥१॥  
नमो रुद्राय नमो अस्तु तक्मने नमो राज्ञे वरुणाय त्विषीमते ।  
नमो दिवे नमः पृथिव्यै नम ओषधीभ्यः ॥२॥  
अयं यो अभिशोचयिष्णुर्विश्वा रूपाणि हरिता कृणोषि ।



तस्मै तेऽरुणाय बभ्रवे नमः कृणोमि वन्याय तक्मने ॥३॥

6.21

इमा यास्तिस्रः पृथिवीस्तासां ह भूमिरुत्तमा ।  
तासामधि त्वचो अहं भेषजं समु जग्रभम् ॥१॥  
श्रेष्ठमसि भेषजानां वसिष्ठं वीरुधानाम् ।  
सोमो भग इव यामेषु देवेषु वरुणो यथा ॥२॥  
रेवतीरनाधुषः सिषासवः सिषासथ ।  
उत स्थ केशदृग्णीरथो ह केशवर्धनीः ॥३॥

6.22

कृष्णं नियानं हरयः सुपर्णा अपो वसाना दिवमुत्पतन्ति ।  
त आववृत्रन्त्सदनादृतस्यादिद्वृतेन पृथिवीं व्यूढुः ॥१॥  
पयस्वतीः कृणुथाप ओषधीः शिवा यदेजथा मरुतो रुक्मवक्षसः ।  
ऊर्जं च तत्र सुमतिं च पिन्वत यत्रा नरो मरुतः सिञ्चथा मधु ॥२॥  
उदप्रुतो मरुतस्तामियर्त वृष्टिर्या विश्वा निवतस्पृणाति ।  
एजातिं ग्लहा कन्येव तुन्नैरं तुन्दाना पत्येव जाया ॥३॥

6.23

ससुषीस्तदपसो दिवा नक्तं च ससुषीः ।  
वरेण्यक्रतुरहमपो देवीरुप ह्वये ॥१॥  
ओता आपः कर्मण्या मुञ्चन्त्वितः प्रणीतये ।  
सद्यः कृण्वन्त्वेतवे ॥२॥  
देवस्य सवितुः सवे कर्म कृण्वन्तु मानुषाः ।  
शं नो भवन्त्वप ओषधीः शिवाः ॥३॥

6.24

हिमवतः प्र स्रवन्ति सिन्धौ समह सङ्गमः ।  
आपो ह मह्यं तद्देवीर्ददन् हृद्योतभेषजम् ॥१॥  
यन् मे अक्षयोरदिद्योत पाष्ण्याः प्रपदोश्च यत् ।  
आपस्तत्सर्वं निष्करन् भिषजां सुभिषक्तमाः ॥२॥  
सिन्धुपत्नीः सिन्धुराज्ञीः सर्वा या नद्य स्थन ।  
दत्त नस्तस्य भेषजं तेना वो भुनजामहै ॥३॥

6.25

पञ्च च याः पञ्चाशच्च संयन्ति मन्या अभि ।  
इतस्ताः सर्वा नश्यन्तु वाका अपचितामिव ॥१॥  
सप्त च याः सप्ततिश्च संयन्ति ग्रैव्या अभि ।  
इतस्ताः सर्वा नश्यन्तु वाका अपचितामिव ॥२॥  
नव च या नवतिश्च संयन्ति स्कन्ध्या अभि ।  
इतस्ताः सर्वा नश्यन्तु वाका अपचितामिव ॥३॥

6.26

अव मा पाप्मन्सुज वशी सन् मृदयासि नः ।  
आ मा भद्रस्य लोके पाप्मन् धेह्यविहुतम् ॥१॥

यो नः पाप्मन् न जहासि तमु त्वा जहिमो वयम् ।  
पथामनु व्यावर्तनेऽन्यं पाप्मानु पद्यताम् ॥२॥  
अन्यत्रास्मन् न्युच्यतु सहस्राक्षो अमर्त्यः ।  
यं द्वेषाम तमृच्छतु यमु द्विष्मस्तमिज्जहि ॥३॥

6.27

देवाः कपोत इषितो यदिच्छन् दूतो निर्ऋत्या इदमाजगाम ।  
तस्मा अर्चाम कृणवाम निष्कृतिं शं नो अस्तु द्विपदे शं चतुष्पदे ॥१॥  
शिवः कपोत इषितो नो अस्त्वनगा देवाः शकुनो गृहं नः ।  
अग्निर्हि विप्रो जुषतां हविर्नः परि हेतिः पक्षिणी नो वृणक्तु ॥२॥  
हेतिः पक्षिणी न दभात्यस्मान् आष्ट्री पदं कृणुते अग्निधाने ।  
शिवो गोभ्य उत पुरुषेभ्यो नो अस्तु मा नो देवा इह हिंसीत्कपोत ॥३॥

6.28

ऋचा कपोतं नुदत प्रणोदमिषं मदन्तः परि गां नयामः ।  
संलोभयन्तो दुरिता पदानि हित्वा न ऊर्जं प्र पदात्पथिष्ठः ॥१॥  
परीमेऽग्निमर्षत परीमे गामनेषत ।

देवेष्वक्रत श्रवः क इमामा दधर्षति ॥२॥  
यः प्रथमः प्रवतमाससाद बहुभ्यः पन्थामनुपस्पशानः ।  
योऽस्येशे द्विपदो यश्चतुष्पदस्तस्मै यमाय नमो अस्तु मृत्यवे ॥३॥

6.29

अमून् हेतिः पतत्रिणी न्येतु यदुलूको वदति मोघमेतत् ।  
यद्वा कपोत पदमग्नौ कृणाति ॥१॥  
यो ते दूतौ निर्ऋत इदमेतोऽप्रहितौ प्रहितौ वा गृहं नः ।  
कपोतोलूकाभ्यामपदं तदस्तु ॥२॥  
अवैरहत्यायेदमा पपत्यात्सुवीरताया इदमा ससद्यात् ।  
पराडेव परा वद पराचीमनु संवतम् ।  
यथा यमस्य त्वा गृहेऽसं प्रतिचाकशान् आभूकं प्रतिचाकशान् ॥३॥

6.30

देवा इमं मधुना संयुतं यवं सरस्वत्यामधि मणावचर्कृषुः ।  
इन्द्र आसीत्सीरपतिः शतक्रतुः कीनाशा आसन् मरुतः सुदानवः ॥१॥  
यस्ते मदोऽवकेशो विकेशो येनाभिहस्यं पुरुषं कृणोषि ।  
आरात्त्वदन्या वनानि वृक्षि त्वं शमि शतवल्शा वि रोह ॥२॥  
बृहत्पलाशे सुभगे वर्षवृद्ध ऋतावरि ।  
मातेव पुत्रेभ्यो मृड केशेभ्यः शमि ॥३॥

6.31

आयं गौः पृश्निक्रमीदसदन् मातरं पुरः ।  
पितरं च प्रयन्त्स्वः ॥१॥  
अन्तश्चरति रोचना अस्य प्राणादपानतः ।  
व्यख्यन् महिषः स्वः ॥२॥  
त्रिंशद्धामा वि राजति वाक्पतङ्गो अशिश्नियत् ।  
प्रति वस्तोरहर्द्युभिः ॥३॥

6.32

अन्तर्दवि जुहुत स्वेतद्यातुधानक्षयणं घृतेन ।  
आराद्रक्षांसि प्रति दह त्वमग्ने न नो गृहाणामुप तीतपासि ॥१॥  
रुद्रो वो ग्रीवा अशरैत्पिशाचाः पृष्टीर्वोऽपि शृणातु यातुधानाः ।  
वीरुद्रो विश्वतोवीर्या यमेन समजीगमत् ॥२॥  
अभयं मित्रावरुणाविहास्तु नोऽर्चिषात्त्रिणो नुदतं प्रतीचः ।  
मा ज्ञातारं मा प्रतिष्ठां विदन्त मिथो विघ्नाना उप यन्तु मृत्युम् ॥३॥

6.33

यस्येदमा रजो युजस्तुजे जना नवं स्वः ।  
इन्द्रस्य रन्त्यं बृहत् ॥१॥  
नाधृष आ दधृषते धृषाणो धृषितः शवः ।  
पुरा यथा व्यथिः श्रव इन्द्रस्य नाधृषे शवः ॥२॥  
स नो ददातु तां रयिमुरं पिशङ्गसदृशम् ।  
इन्द्रः पतिस्तुविष्टमो जनेष्वा ॥३॥

6.34

प्राग्नये वाचमीरय वृषभाय क्षितीनाम् ।  
स नः पर्षदति द्विषः ॥१॥  
यो रक्षांसि निजूर्वत्यग्निस्तिग्मेन शोचिषा ।  
स नः पर्षदति द्विषः ॥२॥  
यः परस्याः परावतस्तिरो धन्वातिरोचते ।  
स नः पर्षदति द्विषः ॥३॥  
यो विश्वाभि विपश्यति भुवना सं च पश्यति ।  
स नः पर्षदति द्विषः ॥४॥  
यो अस्य पारे रजसः शुक्रो अग्निरजायत ।  
स नः पर्षदति द्विषः ॥५॥

6.35

वैश्वानरो न ऊतय आ प्र यातु परावतः ।  
अग्निर्नः सुष्टीरुप ॥१॥  
वैश्वानरो न आगमदिमं यज्ञं सजूरुप ।  
अग्निरुक्थेष्वंहसु ॥२॥  
वैश्वानरोऽङ्गिरसां स्तोममुक्थं च चाकूपत् ।  
ऐषु द्युमं स्वर्यमत् ॥३॥

6.36

ऋतावानं वैश्वानरमृतस्य ज्योतिषस्पतिम् ।  
अजस्रं घर्ममीमहे ॥१॥  
स विश्वा प्रति चाकूप ऋतूरुत्सृजते वशी ।  
यज्ञस्य वय उत्तिरन् ॥२॥  
अग्निः परेषु धामसु कामो भूतस्य भव्यस्य ।  
सम्रादेको वि राजति ॥३॥

6.37

उप प्रागात्सहस्राक्षो युक्त्वा शपथो रथम् ।  
शप्तारमन्विच्छन् मम वृक इवाविमतो गृहम् ॥१॥  
परि णो वृङ्गिणे शपथ हृदमग्निरिवा दहन् ।  
शप्तारमत्र नो जहि दिवो वृक्षमिवाशनिः ॥२॥  
यो नः शपादशपतः शपतो यश्च नः शपात् ।  
शुने पेट्रमिवावक्षामं तं प्रत्यस्यामि मृत्यवे ॥३॥

6.38

सिंहे व्याघ्र उत या पृदाकौ त्विषिरग्नौ ब्राह्मणे सूर्ये या ।  
इन्द्रं या देवी सुभगा जजान सा न ऐतु वर्चसा संविदाना ॥१॥

या हस्तिनि द्वीपिनि या हिरण्ये त्विषिरप्सु गोषु या पुरुषेषु ।  
इन्द्रं या देवी सुभगा जजान सा न ऐतु वर्चसा संविदाना ॥२॥  
रथे अक्षेष्णुषभस्य वाजे वाते पर्जन्ये वरुणस्य शुष्मे ।  
इन्द्रं या देवी सुभगा जजान सा न ऐतु वर्चसा संविदाना ॥३॥  
राजन्ये दुन्दुभावायतायामश्वस्य वाजे पुरुषस्य मायौ ।  
इन्द्रं या देवी सुभगा जजान सा न ऐतु वर्चसा संविदाना ॥४॥

6.39

यशो हविर्वर्धतामिन्द्रजुतं सहस्रवीर्यं सुभूतं सहस्कृतम् ।  
प्रसस्रणामनु दीर्घाय चक्षसे हविष्मन्तं मा वर्धय ज्येष्ठतातये ॥१॥  
अछा न इन्द्रं यशसं यशोभिर्यशस्विनं नमसाना विधेम ।  
स नो रास्व राष्ट्रमिन्द्रजुतं तस्य ते रातौ यशसः स्याम ॥२॥

यशा इन्द्रो यशा अग्निर्यशाः सोमो अजायत ।  
यशा विश्वस्य भूतस्य अहमस्मि यशस्तमः ॥३॥

6.40

अभयं द्यावापृथिवी इहास्तु नोऽभयं सोमः सविता नः कृणोतु ।  
अभयं नोऽस्तूर्वन्तरिक्षं सप्तऋषीणां च हविषाभयं नो अस्तु ॥१॥  
अस्मै ग्रामाय प्रदिशश्चतस्र ऊर्जं सुभूतं स्वस्ति सविता नः कृणोतु ।  
अशात्र्विन्द्रो अभयं नः कृणोत्वन्यत्र राज्ञामाभि यातु मन्युः ॥२॥  
अनमित्रं नो अधरादनमित्रं न उत्तरात् ।  
इन्द्रानमित्रं नः पश्चादनमित्रं पुरस्कृधि ॥३॥

6.41

मनसे चेतसे धिय आकूतय उत चित्तये ।  
मत्तै श्रुताय चक्षसे विधेम हविषा वयम् ॥१॥  
अपानाय व्यानाय प्राणाय भूरिधायसे ।  
सरस्वत्या उरुव्यचे विधेम हविषा वयम् ॥२॥  
मा नो हासिष्पुर्ऋषयो दैव्या ये तनूपा ये नस्तन्वस्तनूजाः ।  
अमर्त्या मर्त्यामभि नः सचध्वमायुर्धत्त प्रतरं जीवसे नः ॥३॥

6.42

अव ज्यामिव धन्वनो मन्युं तनोमि ते हृदः ।  
यथा संमनसौ भूत्वा सखायाविव सचावहै ॥१॥  
सखायाविव सचावहा अव मन्युं तनोमि ते ।  
अधस्ते अश्मनो मन्युमुपास्यामसि यो गुरुः ॥२॥

अभि तिष्ठामि ते मन्युं पाष्य्या प्रपदेन च ।  
यथावशो न वादिषो मम चित्तमुपायसि ॥३॥

6.43

अयं दर्भो विमन्युकः स्वाय चारणाय च ।

मन्योर्विमन्युकस्यायं मन्युशमन उच्यते ॥१॥  
अयं यो भूरिमूलः समुद्रमवतिष्ठति ।  
दर्भः पृथिव्या उत्थितो मन्युशमन उच्यते ॥२॥  
वि ते हनव्यां शरणि वि ते मुख्यां नयामसि ।  
यथावशो न वादिषो मम चित्तमुपायसि ॥३॥

6.44

अस्थादृयौरस्थात्पृथिव्यस्थाद्विश्वमिदं जगत् ।  
अस्थुर्वृक्षा ऊर्ध्वस्वप्नास्तिष्ठाद्रोगो अयं तव ॥१॥  
शतं या भेषजानि ते सहस्रं संगतानि च ।  
श्रेष्ठमास्त्रावभेषजं वसिष्ठं रोगनाशनम् ॥२॥  
रुद्रस्य मूत्रमस्यमृतस्य नाभिः ।  
विषाणकां नाम वा असि पितृणां मूलादुत्थिता वातीकृतनाशनी ॥३॥

6.45

परोऽपेहि मनस्पाप किमशस्तानि शंससि ।  
परेहि न त्वा कामये वृक्षां वनानि सं चर गृहेषु गोषु मे मनः ॥१॥  
अवशसा निःशसा यत्पराशसोपारिम जाग्रतो यत्स्वपन्तः ।  
अग्निर्विश्वान्यप दुष्कृतान्यजुष्टान्यारे अस्मद्घातु ॥२॥  
यदिन्द्र ब्रह्मणस्पतेऽपि मूषा चरामसि ।  
प्रचेता न आङ्गिरसो दुरितात्पात्वहसः ॥३॥

6.46

यो न जीवोऽसि न मृतो देवानाममृतगर्भोऽसि स्वप्न ।  
वरुणानी ते माता यमः पिताररुर्नामासि ॥१॥  
विद्म ते स्वप्न जनित्रं देवजामीनां पुत्रोऽसि यमस्य करणः ।  
अन्तकोऽसि मृत्युरसि तं त्वा स्वप्न तथा सं विद्म स नः स्वप्न दुष्वज्यात्पाहि ॥२॥  
यथा कलां यथा शफं यथर्णं संनयन्ति ।  
एवा दुष्वज्यं सर्वं द्विषते सं नयामसि ॥३॥

6.47

अग्निः प्रातःसवने पात्वस्मान् वैश्वानरो विश्वकृद्विश्वशंभूः ।  
स नः पावको द्रविणे दधात्वायुष्मन्तः सहभक्षाः स्याम ॥१॥  
विश्वे देवा मरुत इन्द्रो अस्मान् अस्मिन् द्वितीये सवने न जह्युः ।  
आयुष्मन्तः प्रियमेषां वदन्तो वयं देवानां सुमतौ स्याम ॥२॥  
इदं तृतीयं सवनं कवीनामृतेन ये चमसमैरयन्त ।  
ते सौधन्वनाः स्वरानशानाः स्विष्टिं नो अभि वस्यो नयन्तु ॥३॥

6.48

श्येनोऽसि गायत्रच्छन्दा अनु त्वा रभे ।  
स्वस्ति मा सं वहास्य यज्ञस्योदृचि स्वाहा ॥१॥  
ऋभुरसि जगच्छन्दा अनु त्वा रभे ।  
स्वस्ति मा सं वहास्य यज्ञस्योदृचि स्वाहा ॥२॥  
वृषासि त्रिष्टुप्छन्दा अनु त्वा रभे ।  
स्वस्ति मा सं वहास्य यज्ञस्योदृचि स्वाहा ॥३॥

6.49

नहि ते अग्ने तन्वः क्रूरमानंश मर्त्यः ।  
कपिर्बभस्ति तेजनं स्वं जरायु गौरिव ॥१॥  
मेष इव वै सं च वि चोर्वच्यसे यदुत्तरद्रावुपरश्च खादतः ।  
शीर्ष्णां शिरोऽप्ससाप्सो अर्दयन् अंशून् बभस्ति हरितेभिरासभिः ॥२॥  
सुपर्णा वाचमक्रतोप दृव्याखरे कृष्णा इषिरा अनर्तिषुः ।  
नि यन् नियन्ति उपरस्य निष्कृतिं पुरू रेतो दधिरे सूर्यश्रितः ॥३॥

6.50

हतं तर्दं समडकमाखुमश्विना छिन्तं शिरो अपि पृष्टीः शृणीतम् ।  
यवान् नेददान् अपि नह्यतं मुखमथाभयं कृणुतं धान्याय ॥१॥  
तर्दं है पतङ्गं है जभ्य हा उपक्वस ।  
ब्रह्मैवासास्थितं हविरनदन्त इमान् यवान् अहिंसन्तो अपोदित ॥२॥  
तर्दापते वघापते तृष्टजम्भा आ शृणोत मे ।  
य आरण्या व्यद्वरा ये के च स्थ व्यद्वरास्तान्त्सर्वान् जम्भयामसि ॥३॥

6.51

वायोः पूतः पवित्रेण प्रत्यङ्सोमो अति द्रुतः ।

इन्द्रस्य युजः सखा ॥१॥  
आपो अस्मान् मातरः सूदयन्तु घृतेन नो घृतप्वः पुनन्तु ।  
विश्वं हि रिप्रं प्रवहन्ति देवीरुदिदाभ्यः शुचिरा पूत एमि ॥२॥  
यत्किं चेदं वरुण दैव्ये जनेऽभिद्रोहं मनुष्याश्चरन्ति ।  
अचित्त्वा चेत्तव धर्मं युयोपिम मा नस्तस्मादेनसो देव रीरिषः ॥३॥

6.52  
उत्सूर्यो दिव एति पुरो रक्षांसि निजूर्वन् ।  
आदित्यः पर्वतेभ्यो विश्वदृष्टो अदृष्टहा ॥१॥  
नि गावो गोष्ठे असदन् नि मृगासो अविक्षत ।  
न्यूर्मयो नदीनं न्यदृष्टा अलिप्सत ॥२॥  
आयुर्ददं विपश्चितं श्रुतां कण्वस्य वीरुधम् ।  
आभारिषं विश्वभेषजीमस्यादृष्टान् नि शमयत् ॥३॥

6.53  
द्यौश्च म इदं पृथिवी च प्रचेतसौ शुक्रो बृहन् दक्षिणया पिपर्तु ।  
अनु स्वधा चिकितां सोमो अग्निर्वायुर्नः पातु सविता भगश्च ॥१॥  
पुनः प्राणः पुनरात्मा न ऐतु पुनश्चक्षुः पुनरसुर्न ऐतु ।  
वैश्वानरो नो अदब्धस्तनूपा अन्तस्तिष्ठाति दुरितानि विश्वा ॥२॥  
सं वर्चसा पयसा सं तनूभिरगन्महि मनसा सं शिवेन ।  
त्वष्टा नो अत्र वरीयः कृणोत्वनु नो मार्ष्टु तन्वो यद्विरिष्टम् ॥३॥

6.54  
इदं तद्युज उत्तरमिन्द्रं शुभाम्यष्टये ।  
अस्य क्षत्रं श्रियं महीं वृष्टिरिव वर्धया तृणम् ॥१॥  
अस्मै क्षत्रमग्नीषोमावस्मै धारयतं रयिम् ।  
इमं राष्ट्रस्याभीवर्गे कृणुतं युज उत्तरम् ॥२॥  
सबन्धुश्चासबन्धुश्च यो अस्मां अभिदासति ।  
सर्वं तं रन्धयासि मे यजमानाय सुन्वते ॥३॥

6.55  
ये पन्थानो बहवो देवयाना अन्तरा द्यावापृथिवी संचरन्ति ।  
तेषामज्यानिं यतमो वहाति तस्मै मा देवाः परि दत्तेह सर्वे ॥१॥  
ग्रीष्मो हेमन्तः शिशिरो वसन्तः शरद्वर्षाः स्विते नो दधात ।  
आ नो गोषु भजता प्रजायां निवात इद्दः शरणे स्याम ॥२॥  
इदावत्सराय परिवत्सराय संवत्सराय कृणुता बृहन् नमः ।  
तेषां वयं सुमतौ यज्ञियानामपि भद्रे सौ मनसं स्याम ॥३॥

6.56  
मा नो देवा अहिर्वधीत्सतोकान्त्सहपुरुषान् ।  
सम्यतं न वि ष्परद्व्यात्तं न सं यमन् नमो देवजनेभ्यः ।  
नमोऽस्त्वसिताय नमस्तिरश्चिराजये ।  
स्वजाय बभ्रवे नमो नमो देवजनेभ्यः ॥२॥  
सं ते हन्मि दता दतः समु ते हन्वा हनू ।  
सं ते जिह्वया जिह्वां सं वास्नाह आस्यम् ॥३॥

6.57  
इदमिद्वा उ भेषजमिदं रुद्रस्य भेषजम् ।  
येनेषुमेकतेजनां शतशल्यामपब्रवत् ॥१॥  
जालाषेणाभि षिञ्चत जालाषेणोप सिञ्चत ।  
जालाषमुग्रं भेषजं तेन नो मृड जीवसे ॥२॥  
शं च नो मयश्च नो मा च नः किं चनाममत् ।  
क्षमा रपो विश्वं नो अस्तु भेषजं सर्वं नो अस्तु भेषजम् ॥३॥

6.58  
यशसं मेन्द्रो मघवान् कृणोतु यशसं द्यावापृथिवी उभे इमे ।  
यशसं मा देवः सविता कृणोतु प्रियो दातुर्दक्षिणाया इह स्याम् ॥१॥  
यथेन्द्रो द्यावापृथिव्योर्यशस्वान् यथाप ओषधीषु यशस्वतीः ।  
एवा विश्वेषु देवेषु वयं सर्वेषु यशसः स्याम ॥२॥  
यशा इन्द्रो यशा अग्निर्यशाः सोमो अजायत ।  
यशा विश्वस्य भूतस्याहमस्मि यशस्तमः ॥३॥

6.59

अनडुद्भ्यस्त्वं प्रथमं धेनुभ्यस्त्वमरुन्धति ।  
अधेनवे वयसे शर्म यच्छ चतुष्पदे ॥१॥  
शर्म यच्छत्वोषधिः सह देवीररुन्धती ।  
करत्पयस्वन्तं गोष्ठमयक्षमामुत पूरुषान् ॥२॥  
विश्वरूपां सुभगामछावदामि जीवलाम् ।  
सा नो रुद्रस्यास्तां हेति दूरं नयतु गौभ्यः ॥३॥

6.6

अयमा यात्यर्यमा पुरस्ताद्विषितस्तुपः ।  
अस्या इच्छन्न अगुवै पतिमुत जायामजानये ॥१॥  
अश्रमदियमर्यमन् अन्यासां समनं यती ।  
अङ्गो न्वर्यमन् अस्या अन्याः समनमायति ॥२॥  
धाता दाधार पृथिवीं धाता द्यामुत सूर्यम् ।  
धातास्या अगुवै पतिं दधातु प्रतिकाम्यम् ॥३॥

6.61

मह्यमापो मधुमदेरयन्तां मह्यं सूरौ अभरज्ज्योतिषे कम् ।  
मह्यं देवा उत विश्वे तपोजा मह्यं देवः सविता व्यचो धात् ॥१॥

अहं विवेच पृथिवीमुत द्यामहमृतूरजनयं सप्त साकम् ।  
अहं सत्यमनृतं यद्वदाम्यहं देवीं परि वाचं विशश्च ॥२॥  
अहं जजान पृथिवीमुत द्यामहमृतूरजनयं सप्त सिन्धून् ।  
अहं सत्वमनृतं यद्वदामि यो अग्नीषोमावजुषे सखाया ॥३॥

6.62

वैश्वानरो रश्मिभिर्नः पुनातु वातः प्राणेनेषिरो नभोभिः ।  
द्यावापृथिवी पयसा पयस्वती ऋतावरी यज्ञिये न पुनीताम् ॥१॥  
वैश्वानरीं सून्तामा रभध्वं यस्या आशास्तन्वो वीतपृष्ठाः ।  
तया गूणन्तः सधमादेषु वयं स्याम पतयो रयीनाम् ॥२॥  
वैश्वानरीं वर्चस आ रभध्वं शुद्धा भवन्तः शुचयः पावकाः ।  
इहेडया सधमादं मदन्तो ज्योक्पश्येम सूर्यमुच्चरन्तम् ॥३॥

6.63

यत्ते देवी निर्ऋतिराबबन्ध दाम ग्रीवास्वविमोक्यं यत् ।  
तत्ते वि ष्याम्यायुषे वर्चसे बलायादोमदमन्नमद्धि प्रसूतः ॥१॥  
नमोऽस्तु ते निर्ऋते तिग्मतेजोऽयस्मयान् वि चृता बन्धपाशान् ।  
यमो मह्यं पुनरित्त्वां ददाति तस्मै यमाय नमो अस्तु मृत्यवे ॥२॥  
अयस्मये द्रुपदे बेधिष इहाभिहितो मृत्युभिर्यो सहस्रम् ।  
यमेन त्वं पितृभिः संविदान उत्तमं नाकमधि रोहयेमम् ॥३॥  
संसमिद्युवसे वृषन्न अग्ने विश्वान्यर्य आ ।  
इडस्पदे समिध्यसे स नो वसून्या भर ॥४॥

6.64

सं जानीध्वं सं पृच्यध्वं सं वो मनांसि जानताम् ।  
देवा भागं यथा पूर्वं संजानाना उपासते ॥१॥  
समानो मन्त्रः समितिः समानी समानं व्रतं सह चित्तमेषाम् ।  
समानेन वो हविषा जुहीमि समानं चेतो अभिसंविशध्वम् ॥२॥  
समानी व आकूतिः समाना हृदयानि वः ।  
समानमस्तु वो मनः यथा वः सुसहासति ॥३॥

6.65

अव मन्युरवायताव बाहू मनोयुजा ।  
पराशर त्वं तेषां पराञ्चं शुष्ममर्दयाधा नो रयिमा कृधि ॥१॥  
निर्हस्तेभ्यो नैर्हस्तं यं देवाः शरुमस्यथ ।  
वृश्चामि शत्रूणां बाहून् अनेन हविषाऽहम् ॥२॥  
इन्द्रश्चकार प्रथमं नैर्हस्तमसुरेभ्यः ।  
जयन्तु सत्वानो मम स्थिरेणेन्द्रेण मेदिना ॥३॥

6.66

निर्हस्तः शत्रुरभिदासन्न अस्तु ये सेनाभिर्युधमायन्त्यस्मान् ।  
समर्पयेन्द्र महता वधेन द्रात्वेषामघहारो विविद्धः ॥१॥

आतन्वाना आयच्छन्तोऽस्यन्तो ये च धावथ ।  
निर्हस्ताः शत्रवः स्थनेन्द्रो वोऽद्य पराशरीत् ॥२॥  
निर्हस्ताः सन्तु शत्रवोऽङ्गैषां म्लापयामसि ।  
अथैषामिन्द्र वेदांसि शतशो वि भजामहै ॥३॥

6.67

परि वर्तमानि सर्वत इन्द्रः पूषा च सस्रतुः ।  
मुह्यन्त्वद्यामूः सेना अमित्राणां परस्तराम् ॥१॥  
मूढा अमित्राश्चरताशीर्षाण इवाहयः ।  
तेषां वो अग्निमूढानामिन्द्रो हन्तु वरंवरम् ॥२॥  
ऐषु नह्य वृषाजिनं हरिणस्य भियं कृधि ।  
पराडमित्र एषत्वर्वाची गौरुपेषतु ॥३॥

6.68

आयमगन्त्सविता क्षुरेणोष्णेन वाय उदकेनेहि ।  
आदित्या रुद्रा वसव उन्दन्तु सचेतसः सोमस्य राज्ञो वपत प्रचेतसः ॥१॥  
अदितिः श्मश्रु वपत्वाप उन्दन्तु वर्चसा ।  
चिकित्सतु प्रजापतिर्दीर्घायुत्वाय चक्षसे ॥२॥  
येनावपत्सविता क्षुरेण सोमस्य राज्ञो वरुणस्य विद्वान् ।  
तेन ब्रह्माणो वपतेदमस्य गोमान् अश्ववान् अयमस्तु प्रजावान् ॥३॥

6.69

गिरावरगराटेषु हिरन्ये गोषु यद्यशः ।  
सुरायां सिच्यमानायां कीलाले मधु तन् मयि ॥१॥  
अश्विना सारघेण मा मधुनाङ्क्तं शुभस्पती ।  
यथा भर्गस्वतीं वाचमावदानि जनान् ॥२॥  
मयि वर्चो अथो यशोऽथो यज्ञस्य यत्पयः ।  
तन् मयि प्रजापतिर्दिवि द्यामिव दृहतु ॥३॥

6.70

यथा मांसं यथा सुरा यथाक्षा अधिदेवने ।  
यथा पुंसो वृषण्यत स्त्रियां निहन्यते मनः ।  
एवा ते अघ्न्ये मनोऽधि वत्से नि हन्यताम् ॥१॥  
यथा हस्ती हस्तिन्याः पदेन पदमुद्युजे ।  
यथा पुंसो वृषण्यत स्त्रियां निहन्यते मनः ।  
एवा ते अघ्न्ये मनोऽधि वत्से नि हन्यताम् ॥२॥  
यथा प्रधिर्यथोपधिर्यथा नभ्यं प्रधावधि ।  
यथा पुंसो वृषण्यत स्त्रियां निहन्यते मनः ।  
एवा ते अघ्न्ये मनोऽधि वत्से नि हन्यताम् ॥३॥

6.71

यदन्नमद्भि बहुधा विरूपं हिरण्यमश्वमुत गामजामविवम् ।  
यदेव किं च प्रतिजग्रहाहमग्निष्टद्धोता सुहुतं कृणोतु ॥१॥  
यन् मा हुतमहुतमाजगाम दत्तं पितृभिरनुमतं मनुष्यैः ।  
यस्मान् मे मन उदिव रारजीत्यग्निष्टद्धोता सुहुतं कृणोतु ॥२॥  
यदन्नमदम्यन्तेन देवा दास्यन् अदास्यन् उत संगृणामि ।  
वैश्वानरस्य महतो महिम्ना शिवं मह्यं मधुमदस्त्वन्नम् ॥३॥

6.72

यथासितः प्रथयते वशामनु वपूषि कृण्वन् असुरस्य मायया ।  
एवा ते शेषः सहसायमकोऽङ्गैनाङ्गं संसमके कृणोतु ॥१॥  
यथा पसस्तायादरं वातेन स्थूलभं कृतम् ।  
यावत्परस्वतः पसस्तावत्ते वर्धतां पसः ॥२॥  
यावदङ्गीनं पारस्वतं हास्तिनं गार्दभं च यत् ।  
यावदश्वस्य वाजिनस्तावत्ते वर्धतां पसः ॥३॥

6.73

एह यातु वरुणः सोमो अग्निर्वृहस्पतिर्वसुभिरेह यातु ।  
अस्य श्रियमुपसंयात सर्व उग्रस्य चेतुः संमनसः सजाताः ॥१॥

यो वः शुष्मो हृदयेष्वन्तराकूतिर्या वो मनसि प्रविष्टा ।  
तान्त्सीवयामि हविषा घृतेन मयि सजाता रमतिर्वो अस्तु ॥२॥  
इहैव स्त माप याताध्यस्मत्पूषा परस्तादपथं वः कृणोतु ।

वास्तोष्पतिरनु वो जोहवीतु मयि सजाता रमतिः वो अस्तु ॥३॥

6.74

सं वः पृच्यन्तां तन्वः सं मनांसि समु ब्रता ।  
सं वोऽयं ब्रह्मणस्पतिर्भगः सं वो अजीगमत् ॥१॥  
सम्ज्ञपनं वो मनसोऽथो सम्ज्ञपनं हृदः ।  
अथो भगस्य यच्छ्रान्तं तेन संज्ञपयामि वः ॥२॥  
यथादित्या वसुभिः सम्बभूवुर्मरुद्भिरुग्रा अहणीयमानाः ।  
एवा त्रिणामन् अहणीयमान इमान् जनान्त्संमनसस्कृधीह ॥३॥

6.75

निरमुं नुद ओकसः सपत्नो यः पृतन्यति ।  
नैर्बाध्येन हविषेन्द्र एनं पराशरीत् ॥१॥  
परमां तं परावतमिन्द्रो नुदतु वृत्रहा ।  
यतो न पुनरायति शश्वतीभ्यः समाभ्यः ॥२॥  
एतु तिस्रः परावत एतु पञ्च जनामति ।  
एतु तिस्रोऽति रोचना यतो न पुनरायति ।  
शश्वतीभ्यः समाभ्यो यावत्सूर्यो असद्वि ॥३॥

6.76

य एनं परिषीदन्ति समादधति चक्षसे ।  
संप्रेद्धो अग्निर्जिह्वाभिरुदेतु हृदयादधि ॥१॥

अग्नेः साम्तपनस्याहमायुषे पदमा रभे ।  
अद्भ्यतिर्यस्य पश्यति धूममुद्यन्तमास्यतः ॥२॥  
यो अस्य समिधं वेद क्षत्रियेण समाहिताम् ।  
नाभिह्वारे पदं नि दधाति स मृत्यवे ॥३॥  
नैनं घ्नन्ति पर्यायिणो न सन्नामव गच्छति ।  
अग्नेर्यः क्षत्रियो विद्वान् नाम गृह्णाति आयुषे ॥४॥

6.77

अस्थाद्दयौरस्थात्पृथिव्यस्थाद्विश्वमिदं जगत् ।  
आस्थाने पर्वता अस्थु स्थान्यश्चामतिष्ठिपम् ॥१॥  
य उदानत्परायणं य उदानण्णायनम् ।  
आवर्तनं निवर्तनं यो गोपा अपि तं हुवे ॥२॥  
जातवेदो नि वर्तय शतं ते सन्त्वावृतः ।  
सहस्रं त उपावृतस्ताभिर्नः पुनरा कृधि ॥३॥

6.78

तेन भूतेन हविषायमा प्यायतां पुनः ।  
जायां यामस्मा आवाक्षुस्तां रसेनाभि वर्धताम् ॥१॥  
अभि वर्धतां पयसाभि राष्ट्रेण वर्धताम् ।  
रथ्या सहस्रवर्चसेमौ स्तामनुपक्षितौ ॥२॥  
त्वष्टा जायामजनयत्त्वष्टास्यै त्वां पतिम् ।  
त्वष्टा सहस्रमायुषि दीर्घमायुः कृणोतु वाम् ॥३॥

6.79

अयं नो नभसस्पतिः संस्फानो अभि रक्षतु ।  
असमार्तिं गृहेषु नः ॥१॥  
त्वं नो नभसस्पते ऊर्जं गृहेषु धारय ।  
आ पुष्टमेत्वा वसु ॥२॥  
देव संस्फान सहस्रापोषस्येशिषे ।  
तस्य नो रास्व तस्य नो धेहि तस्य ते भक्तिवाम्सः स्याम ॥३॥

6.80

अन्तरिक्षेण पतति विश्वा भूतावचाकशत् ।  
शुनो दिव्यस्य यन् महस्तेनां ते हविषा विधेम ॥१॥  
ये त्रयः कालकाञ्जा दिवि देवा इव श्रिताः ।  
तान्त्सर्वान् अह्व ऊतयेऽस्मा अरिष्टतातये ॥२॥  
अप्सु ते जन्म दिवि ते सधस्थं समुद्रे अन्तर्महिमा ते पृथिव्याम् ।  
शुनो दिव्यस्य यन् महस्तेनां ते हविषा विधेम ॥३॥

6.81



यन्तासि यच्छसे हस्तावप रक्षांसि सेधसि ।  
प्रजां धनं च गृह्णानः परिहस्तो अभूदयम् ॥१॥  
परिहस्त वि धारय योनिं गर्भाय धातवे ।  
मयदि पुत्रमा धेहि तं त्वमा गमयागमे ॥२॥  
यं परिहस्तमबिभरदितिः पुत्रकाम्या ।  
त्वष्टा तमस्या आ बध्नाद्यथा पुत्रं जनाद् ॥३॥

6.82

आगच्छत आगतस्य नाम गृह्णाम्यायतः ।  
इन्द्रस्य वृत्रघ्नो वन्वे वासवस्य शतक्रतोः ॥१॥

येन सूर्या सावित्रीमश्विनोहतुः पथा ।  
तेन मामब्रवीद्भगो जायामा वहतादिति ॥२॥  
यस्तेऽङ्कुशो वसुदानो बृहन्न इन्द्र हिरण्ययः ।  
तेना जनियते जायां मह्यं धेहि शचीपते ॥३॥

6.83

अपचितः प्र पतत सुपर्णो वसतेरिव ।  
सूर्यः कृणोतु भेषजं चन्द्रमा वोऽपोच्छतु ॥१॥  
एन्येका श्येन्येका कृष्णैका रोहिणी द्वे ।  
सर्वसामग्रभं नामावीरघ्नीरपेतन ॥२॥  
असूतिका रामायण्यपचित्प्र पतिष्यति ।  
ग्लौरितः प्र पतिष्यति स गलुन्तो नशिष्यति ॥३॥

वीहि स्वामाहुतिं जुषानो मनसा स्वाहा मनसा यदिदं जुहोमि ॥४॥

6.84

यस्यास्त आसनि घोरे जुहोम्येषां बद्धानामवसर्जनाय कम् ।  
भूमिरिति त्वाभिप्रमन्वते जना निर्ऋतिरिति त्वाहं परि वेद सर्वतः ॥१॥  
भूते हविष्मती भवैष ते भागो यो अस्मासु ।  
मुञ्चेमान् अमून् एनसः स्वाहा ॥२॥  
एवो ष्वस्मन् निर्ऋतेऽनेहा त्वमयस्मयान् वि चृता बन्धपाशान् ।  
यमो मह्यं पुनरित्त्वां ददाति तस्मै यमाय नमो अस्तु मृत्यवे ॥३॥  
अयस्मये द्रुपदे बेधिष इहाभिहितो मृत्युभिर्ये सहस्रम् ।  
यमेन त्वं पितृभिः संविदान उत्तमं नाकमधि रोहयेमम् ॥४॥

6.85

वरणो वारयाता अयं देवो वनस्पतिः ।  
यक्ष्मो यो अस्मिन् आविष्टस्तमु देवा अवीवरन् ॥१॥  
इन्द्रस्य वचसा वयं मित्रस्य वरुणस्य च ।  
देवानां सर्वेषां वाचा यक्ष्मं ते वारयामहे ॥२॥  
यथा वृत्र इमा आपस्तस्तम्भ विश्वधा यतीः ।  
एवा ते अग्निना यक्ष्मं वैश्वानरेण वारये ॥३॥

6.86

वृषेन्द्रस्य वृषा दिवो वृसा पृथिव्या अयम् ।  
वृषा विश्वस्य भूतस्य त्वमेकवृषो भव ॥१॥  
समुद्र ईशे स्रवतामग्निः पृथिव्या वशी ।  
चन्द्रमा नक्षत्राणामीशे त्वमेकवृषो भव ॥२॥  
सम्राडस्यसुराणां ककुन् मनुष्यानाम् ।  
देवानामर्धभागसि त्वमेकवृषो भव ॥३॥

6.87

आ त्वाहार्षमन्तरभूर्ध्रुवस्तिष्ठाविचाचलत् ।  
विशस्त्वा सर्वा वाञ्छन्तु मा त्वद्राष्ट्रमधि भ्रशत् ॥१॥  
इहैवैधि माप च्योष्ठाः पर्वत इवाविचाचलत् ।  
इन्द्र इवेह ध्रुवस्तिष्ठेह राष्ट्रमु धारय ॥२॥  
इन्द्र एतमदीधरत्ध्रुवं ध्रुवेण हविषा ।  
तस्मै सोमो अधि ब्रवदयं च ब्रह्मणस्पतिः ॥३॥

6.88

ध्रुवा द्यौरध्रुवा पृथिवी ध्रुवं विश्वमिदं जगत् ।  
ध्रुवासः पर्वता इमे ध्रुवा राजा विशामयम् ॥१॥  
ध्रुवं ते राजा वरुणो ध्रुवं देवो बृहस्पतिः ।

ध्रुवं त इन्द्रश्चाग्निश्च राष्ट्रं धारयतां ध्रुवम् ॥२॥  
ध्रुवोऽच्युतः प्र मृणीहि शत्रून् छत्रूयतोऽधरान् पादयस्व ।  
सर्वा दिशः संमनसः सग्रीचीर्ध्रुवाय ते समितिः कल्पतामिह ॥३॥

6.89

इदं यत्प्रेण्यः शिरो दत्तं सोमेन वृष्ण्यम् ।  
ततः परि प्रजातेन हार्दिं ते शोचयामसि ॥१॥  
शोचयामसि ते हार्दिं शोचयामसि ते मनः ।  
वातं धूम इव सध्यङ्गामेवान्वेतु ये मनः ॥२॥  
मह्यं त्वा मित्रावरुणौ मह्यं देवी सरस्वती ।  
मह्यं त्वा मध्यं भूम्या उभावन्तौ समस्यताम् ॥३॥

6.9

यां ते रुद्र इषुमास्यदङ्गेभ्यो हृदयाय च ।  
इदं तामद्य त्वद्वयं विषूचीं वि वृहामसि ॥१॥  
यास्ते शतं धमनयोऽङ्गान्यनु विष्ठिताः ।  
तासां ते सर्वासां वयं निर्विषाणि ह्वयामसि ॥२॥  
नमस्ते रुद्रास्यते नमः प्रतिहितायै ।  
नमो विसृज्यमानायै नमो निपतितायै ॥३॥

6.91

इमं यवमष्टायोगैः षष्टोगैर्भिरचर्कृषुः ।  
तेना ते तन्वो रपोऽपाचीनमप व्यये ॥१॥  
न्यग्वातो वाति न्यक्तपति सूर्यः ।  
नीचीनमघ्न्या दुहे न्यग्भवतु ते रपः ॥२॥  
आप इद्वा उ भेषजीरापो अमीवचातनीः ।  
आपो विश्वस्य भेषजीस्तास्ते कृण्वन्तु भेषजम् ॥३॥

6.92

वातरंहा भव वाजिन् युजमान इन्द्रस्य याहि प्रसवे मनोजवाः ।  
युञ्जन्तु त्वा मरुतो विश्ववेदस आ ते त्वस्ता पत्सु जवं दधातु ॥१॥  
जवस्ते अर्वन् निहितो गुहा यः श्येने वाते उत योऽचरत्परीतः ।  
तेन त्वं वाजिन् बलवान् बलेनाजिं जय समने परयिष्णुः ॥२॥  
तनूष्टे वाजिन् तन्वं नयन्ती वाममस्मभ्यं धावतु शर्म तुभ्यम् ।  
अहुतो महो धरुणाय देवो दिवीव ज्योतिः स्वमा मिमीयात् ॥३॥

6.93

यमो मृत्युरघमारो निर्ऋथो बभ्रुः शर्वोऽस्ता नीलशिखण्डः ।  
देवजनाः सेनयोत्तस्थिवांसस्ते अस्माकं परि वृञ्जन्तु वीरान् ॥१॥  
मनसा होमैर्हरसा घृतेन शर्वायास्त्र उत राज्ञे भवाय ।  
नमस्येभ्यो नम एभ्यः कृणोम्यन्यत्रास्मदघविषा नयन्तु ॥२॥  
त्रायध्वं नो अघविषाभ्यो वधाद्विश्वे देवा मरुतो विश्ववेदसः ।  
अग्नीषोमा वरुणः पूतदक्षा वातापर्जन्ययोः सुमतौ स्याम ॥३॥

6.94

सं वो मनांसि सं व्रता समाकृतीर्नमामसि ।  
अमी ये विव्रता स्थन तान् वः सं नमयामसि ॥१॥  
अहं गृभ्णामि मनसा मनांसि मम चित्तमनु चित्तेभिरेत ।  
मम वशेषु हृदयानि वः कृणोमि मम यातमनुवर्तमान एत ॥२॥  
ओते मे द्यावापृथिवी ओता देवी सरस्वती ।  
ओतौ म इन्द्रश्चाग्निश्च धर्वास्मेदं सरस्वति ॥३॥

6.95

अश्वत्थो देवसदनस्तृतीयस्यामितो दिवि ।  
तत्रामृतस्य चक्षणं देवाः कुष्ठमवन्वत ॥१॥  
हिरण्ययी नौरचरद्विरण्यबन्धना दिवि ।  
तत्रामृतस्य पुष्पं देवाः कुष्ठमवन्वत ॥२॥  
गर्भो अस्योषधीनां गर्भो हिमवतामुत ।  
गर्भो विश्वस्य भूतस्येमं मे अगदं कृधि ॥३॥

6.96

या ओषधयः सोमराज्ञीर्बह्वीः शतविचक्षणाः ।  
बृहस्पतिप्रसूतास्ता नो मुञ्चन्त्वंहसः ॥१॥

मुञ्चन्तु मा शपथ्यादथो वरुण्यादुत ।  
अथो यमस्य पड्वीशाद्विश्वस्माद्देवकिल्बिषात् ॥२॥  
यच्चक्षुषा मनसा यच्च वाचोपारिम जाग्रतो यत्स्वपन्तः ।  
सोमस्तानि स्वधया नः पुनातु ॥३॥

6.97

अभिभूर्यज्ञो अभिभूरग्निरभिभूः सोमो अभिभूरिन्द्रः ।  
अभ्यहं विश्वाः पृतना यथासान्येवा विधेमाग्निहोत्रा इदं हविः ॥१॥

स्वधास्तु मित्रावरुणा विपश्चिता प्रजावत्क्षत्रं मधुनेह पिन्वतम् ।  
बाधेथां दूरं निर्ऋतिं पराचैः कृतं चिदेनः प्र मुमुक्तमस्मत् ॥२॥  
इमं वीरमनु हर्षध्वमुग्रमिन्द्रं सखायो अनु सं रभध्वम् ।  
ग्रामजितं गोजितं वज्रबाहुं जयन्तमज्म प्रमृणन्तमोजसा ॥३॥

6.98

इन्द्रो जयाति न परा जयाता अधिराजो राजसु राजयातै ।  
चर्कृत्य ईड्यो वन्द्यश्चोपसद्यो नमस्शभवेह ॥१॥  
त्वमिन्द्राधिराजः श्रवस्युस्त्वं भूरभिभूतिर्जनानाम् ।  
त्वं दैवीर्विश इमा वि राजायुष्मत्क्षत्रमजरं ते अस्तु ॥२॥  
प्राच्या दिशस्त्वमिन्द्रासि राजातोदीच्या दिशो वृत्रहन् छत्रुहोऽसि ।  
यत्र यन्ति स्रोत्यास्तज्जितं ते दक्षिणतो वृषभ एषि हव्यः ॥३॥

6.99

अभि त्वेन्द्र वरिमतः पुरा त्वांह्रणाद्भुवे ।  
ह्वयाम्युग्रं चेतारं पुरुणामानमेकजम् ॥१॥  
यो अद्य सेन्यो वधो जिघांसन् न उदीरते ।  
इन्द्रस्य तत्र बाहु समन्तं परि दद्मः ॥२॥  
परि दद्म इन्द्रस्य बाहु समन्तं त्रातुस्त्रायतां नः ।  
देव सवितः सोम राजन्त्सुमनसं मा कृणु स्वस्तये ॥३॥

6.100

देवा अदुः सूर्यो द्यौरदात्पृथिव्यदात् ।  
तिस्रः सरस्वातिरदुः सचित्ता विषदूषणम् ॥१॥  
यद्वो देवा उपजीका आसिञ्चन् धन्वन्युदकम् ।  
तेन देवप्रसूतेनेदं दूषयता विषम् ॥२॥  
असुराणां दुहितासि सा देवानामसि स्वसा ।  
दिवस्पृथिव्याः संभूता सा चकर्थारसं विषम् ॥३॥

6.101

आ वृषायस्व श्वसिहि वर्धस्व प्रथयस्व च ।  
यथाङ्गं वर्धतां शेषस्तेन योषितमिज्जहि ॥१॥  
येन कृषं वाजयन्ति येन हिन्वन्त्यातुरम् ।  
तेनास्य ब्रह्मणस्पते धनुरिवा तानया पसः ॥२॥  
आहं तनोमि ते पसो अधि ज्यामिव धन्वनि ।  
क्रमस्व ऋष इव रोहितमनवग्लायता सदा ॥३॥

6.102

यथायं वाहो अश्विना समैति सं च वर्तते ।  
एवा मामभि ते मनः समैतु सं च वर्तताम् ॥१॥  
आहं खिदामि ते मनो राजाश्वः पृष्ट्यामिव ।  
रेष्मच्छिन्नं यथा तृणं मयि ते वेष्टतां मनः ॥२॥  
आञ्जनस्य मद्दुघस्य कुष्ठस्य नलदस्य च ।  
तुरो भगस्य हस्ताभ्यामनुरोधनमुद्गरे ॥३॥

6.103

संदानं वो बृहस्पतिः संदानं सविता करत् ।  
संदानं मित्रो अर्यमा संदानं भगो अश्विना ॥१॥  
सं परमान्त्समवमान् अथो सं द्यामि मध्यमान् ।  
इन्द्रस्तान् पर्यहार्दाम्ना तान् अग्ने सं द्या त्वम् ॥२॥  
अमी ये युधमारयन्ति केतून् कृत्वानीकशः ।  
इन्द्रस्तान् पर्यहार्दाम्ना तान् अग्ने सं द्या त्वम् ॥३॥

6.104

आदानेन संदानेनामित्रान् आ द्यामसि ।

अपाना ये चैषां प्राणा असुनासून्त्समच्छिदन् ॥१॥  
इदमादानमकरं तपसेन्द्रेण संशितम् ।  
अमित्रा येऽत्र नः सन्ति तान् अग्न आ द्या त्वम् ॥२॥  
ऐनान् द्यतामिन्द्राग्नी सोमो राजा च मेदिनौ ।  
इन्द्रो मरुत्वान् आदानममित्रेभ्यः कृणोतु नः ॥३॥

6.105

यथा मनो मनस्केतैः परापतत्याशुमत् ।  
एवा त्वं कासे प्र पत मनसोऽनु प्रवाय्यम् ॥१॥  
यथा बाणः सुसंशितः परापतत्याशुमत् ।  
एवा त्वं कासे प्र पत पृथिव्या अनु संवतम् ॥२॥  
यथा सूर्यस्य रश्मयः परापतन्त्याशुमत् ।  
एवा त्वं कासे प्र पत समुद्रस्यानु विक्षरम् ॥३॥

6.106

आयने ते परायणे दूर्वा रोहन्तु पुष्पिणीः ।  
उत्सो वा तत्र जायतां हृदो वा पुण्डरीकवान् ॥१॥  
अपामिदं न्ययनं समुद्रस्य निवेशनम् ।  
मध्ये हृदस्य नो गृहाः पराचीना मुखा कृधि ॥२॥  
हिमस्य त्वा जरायुणा शाले परि व्ययामसि ।  
शीतहृदा हि नो भुवोऽग्निष्कृणोतु भेषजम् ॥३॥

6.107

विश्वजित्त्रायमाणायै मा परि देहि ।  
त्रायमाणे द्विपाच्च सर्वं नो रक्ष चतुष्पाड्यच्च नः स्वम् ॥१॥  
त्रायमाणे विश्वजिते मा परि देहि ।  
विश्वजिद्विपाच्च सर्वं नो रक्ष चतुष्पाड्यच्च नः स्वम् ॥२॥  
विश्वजित्कल्याण्यै मा परि देहि ।  
कल्याणि द्विपाच्च सर्वं नो रक्ष चतुष्पाड्यच्च नः स्वम् ॥३॥  
कल्याणि सर्वविदे मा परि देहि ।  
सर्वविद्विपाच्च सर्वं नो रक्ष चतुष्पाड्यच्च नः स्वम् ॥४॥

6.108

त्वं नो मेधे प्रथमा गोभिरश्वेभिरा गहि ।  
त्वं सूर्यस्य रश्मिभिस्त्वं नो असि यज्ञिया ॥१॥  
मेधामहं प्रथमां ब्रह्मण्वतीं ब्रह्मजुतामृषिष्टुताम् ।  
प्रपीतां ब्रह्मचारिभिर्देवानामवसे हुवे ॥२॥  
यां मेधामभवो विदुर्यां मेधामसुरा विदुः ।  
ऋषयो भद्रां मेधां यां विदुस्तां मय्या वेशयामसि ॥३॥  
यामृषयो भूतकृतो मेधां मेधाविनो विदुः ।  
तया मामद्य मेधयान् मेधाविनं कृणु ॥४॥  
मेधां सायं मेधां प्रातर्मेधां मध्यन्दिनं परि ।  
मेधां सूर्यस्य रश्मिभिर्वचसा वेशयामहे ॥५॥

6.109

पिप्पली क्षिप्तभेषज्युतातिविद्धभेषजी ।  
तां देवाः समकल्पयन् इयं जीवितवा अलम् ॥१॥  
पिप्पल्यः समवदन्तायतीर्जनादधि ।  
यं जीवमश्रवामहै न स रिष्याति पूरुषः ॥२॥  
असुरास्त्वा न्यखनन् देवास्त्वोदवपन् पुनः ।  
वातीकृतस्य भेषजीमथो क्षिप्तस्य भेषजीम् ॥३॥

6.110

प्रत्नो हि कमीड्यो अध्वरेषु सनाच्च होता नव्यश्च सत्सि ।  
स्वां चाग्ने तन्वं पिप्रायस्वास्मभ्यं च सौभगमा यजस्व ॥१॥  
ज्येष्ठघ्न्यां जातो विचतोर्यमस्य मूलबर्हणात्परि पाह्नोन्म ।  
अत्येनं नेषद्वरितानि विश्वा दीर्घायुत्वाय शतशारदाय ॥२॥  
व्याघ्रेऽह्न्यर्जनिष्ठ वीरो नक्षत्रजा जायमानः सुवीरः ।  
स मा वधीत्पितरं वर्धमानो मा मातरं प्र मिनीज्जनित्रीम् ॥३॥

6.111

इमं मे अग्ने पुरुषं मुमुग्ध्ययं यो बद्धः सुयतो लालपीति ।  
अतोऽधि ते कृणवद्भागधेयं यदानुन्मदितोऽसति ॥१॥  
अग्निष्टे नि शमयतु यदि ते मन उद्युतम् ।

कृणोमि विद्वान् भेषजं यथानुन्मदितोऽससि ॥२॥  
दैवैनासादुन्मदितमुन्मत्तं रक्षसस्परि ।  
कृणोमि विद्वान् भेषजं यदानुन्मदितोऽसति ॥३॥  
पुनस्त्वा दुरप्सरसः पुनरिन्द्रः पुनर्भगः ।  
पुनस्त्वा दुर्विश्वे देवा यथानुन्मदितोऽससि ॥४॥

6.112  
मा ज्येष्ठं वधीदयमग्न एषां मूलबर्हणात्परि पाह्येनम् ।  
स ग्राह्याः पाशान् वि चृत प्रजानन् तुभ्यं देवा अनु जानन्तु विश्वे ॥१॥  
उन् मुञ्च पाशांस्त्वमग्न एषां त्रयस्त्रिभिरुत्सिता येभिरासन् ।  
स ग्राह्याः पाशान् वि चृत प्रजानन् पितापुत्रौ मातरं मुञ्च सर्वान् ॥२॥  
येभिः पाशैः परिवित्तो विबद्धोऽङ्गेअङ्ग आर्पित उत्सितश्च ।  
वि ते मुच्यन्तं विमुचो हि सन्ति भ्रूणघ्नि पूषन् दुरितानि मृक्ष्व ॥३॥

6.113  
त्रिते देवा अमृजतैतदेनस्त्रित एनन् मनुष्येषु ममृजे ।  
ततो यदि त्वा ग्राहिरानशे तां ते देवा ब्रह्मणा नाशयन्तु ॥१॥  
मरीचीर्धुमान् प्र विशानु पाप्मन् उदारान् गच्छोत वा नीहारान् ।  
नदीनं फेनामनु तान् वि नश्य भ्रूणघ्नि पूषन् दुरितानि मृक्ष्व ॥२॥  
द्वादशधा निहितं त्रितस्यापमृष्टं मनुष्यैरसानि ।  
ततो यदि त्वा ग्राहिरानशे तां ते देवा ब्रह्मणा नाशयन्तु ॥३॥

6.114  
यद्देवा देवहेडनं देवासश्चकृम वयम् ।  
आदित्यास्तस्मान् नो युयमृतस्य ऋतेन मुञ्चत ॥१॥  
ऋतस्य ऋतेनादित्या यजत्रा मुञ्चतेह नः ।  
यज्ञं यद्यज्ञवाहसः शिक्षन्तो नोपशेकिम ॥२॥  
मेदस्वता यजमानाः सुचाज्यानि जुह्वतः ।  
अकामा विश्वे वो देवाः शिक्षन्तो नोप शेकिम ॥३॥

6.115  
यद्विद्वान्सो यदविद्वान्स एनांसि चकृमा वयम् ।  
यूयं नस्तस्मान् मुञ्चत विश्वे देवाः सजोषसः ॥१॥  
यदि जाग्रद्यदि स्वपन् एन एनस्योऽकरम् ।  
भूतं मा तस्माद्भ्रव्यं च द्रुपदादिव मुञ्चताम् ॥२॥  
द्रुपदादिव मुमुचानः स्विन्नः स्नात्वा मलादिव ।  
पूतं पवित्रेणैवाज्यं विश्वे शुम्भन्तु मैनसः ॥३॥

6.116  
यद्यामं चक्रुर्निखनन्तो अग्रे कार्षीवणा अन्नविदो न विद्यया ।  
वैवस्वते राजनि तज्जुहोम्यथ यज्ञियं मधुमदस्तु नोऽन्नम् ॥१॥  
वैवस्वतः कृणवद्भागधेयं मधुभागी मधुना सं सृजाति ।  
मातुर्यदिन इषितं न आगन् यद्वा पिताऽपराद्धो जिहीदे ॥२॥  
यदीदं मातुर्यदि पितुर्नः परि भ्रातुः पुत्राच्चेतस एन आगन् ।  
यावन्तो अस्मान् पितरः सचन्ते तेषां सर्वेषां शिवो अस्तु मन्युः ॥३॥

6.117  
अपमित्यमप्रतीत्तं यदस्मि यमस्य येन बलिना चरामि ।  
इदं तदग्ने अनृणो भवामि त्वं पाशान् विचृतं वेत्थ सर्वान् ॥१॥  
इहैव सन्तः प्रति दद्म एनज्जीवा जीवैभ्यो नि हराम एनत् ।  
अपमित्य धान्यं यज्जघसाहमिदं तदग्ने अनृणो भवामि ॥२॥  
अनृणा अस्मिन् अनृणाः परस्मिन् तृतीये लोके अनृणाः स्याम ।  
ये देवयानाः पितृयाणश्च लोकाः सर्वान् पथो अनृणा आ क्षियेम ॥३॥

6.118  
यद्धस्ताभ्यां चकृम किल्बिषाण्यक्षाणां गन्तुमुपलिप्समानाः ।  
उग्रपश्ये उग्रजितौ तदद्याप्सरसावनु दत्तामृणं नः ॥१॥  
उग्रपश्ये राष्ट्रभृत्किल्बिषाणि यदक्षवृत्तमनु दत्तं न एतत् ।  
ऋणान् नो न ऋणमेत्समानो यमस्य लोके अधिरज्जुरायत् ॥२॥  
यस्मा ऋणं यस्य जायामुपैमि यं याचमानो अभ्यैमि देवाः ।  
ते वाचं वादिषुर्मोत्तरां मद्देवपत्नी अप्सरसावधीतम् ॥३॥

6.119  
यददीव्यन् ऋणमहं कृणोम्यदास्यन् अग्ने उत संगृणामि ।

वैश्वानरो नो अधिपा वसिष्ठ उदिन् नयाति सुकृतस्य लोकम् ॥१॥  
 वैश्वानराय प्रति वेदयामि यदि ऋणं संगरो देवतासु ।  
 स एतान् पाशान् विचृतं वेद सर्वान् अथ पक्वेन सह सं भवेम ॥२॥  
 वैश्वानरः पविता मा पुनातु यत्संगरमभिधावाम्याशाम् ।  
 अनाजानन् मनसा याचमानो यत्त्रैनो अप तत्सुवामि ॥३॥

6.120

यदन्तरिक्षं पृथिवीमुत द्यां यन् मातरं पितरं वा जिहिंसिम ।  
 अयं तस्माद्गार्हपत्यो नो अग्निरुदिन् नयाति सुकृतस्य लोकम् ॥१॥  
 भूमिर्मातादितिर्नो जनित्रं भ्रातान्तरिक्षमभिशस्त्या नः ।  
 द्यौरनः पिता पित्र्याच्छं भवाति जामिमृत्वा माव पत्सि लोकात् ॥२॥  
 यत्रा सुहार्दः सुकृतो मदन्ति विहाय रोगं तन्वः स्वायाः ।  
 अश्लोना अङ्गैरहुताः स्वर्गे तत्र पश्येम पितरौ च पुत्रान् ॥३॥

6.121

विषाणा पाशान् वि ष्याध्यस्मद्य उत्तमा अधमा वारुणा ये ।  
 दुष्वप्यं दुरितं नि ष्वास्मदथ गच्छेम सुकृतस्य लोकम् ॥१॥  
 यद्दारुणि बध्यसे यच्च रज्ज्वां यद्द्रुम्यां बध्यसे यच्च वाचा ।  
 अयं तस्माद्गार्हपत्यो नो अग्निरुदिन् नयाति सुकृतस्य लोकम् ॥२॥  
 उदगातां भगवती विचृतौ नाम तारके ।  
 प्रेहामृतस्य यच्छतां प्रेतु बद्धकमोचनम् ॥३॥  
 वि जिहीष्व लोकं कृणु बन्धान् मुञ्चासि बद्धकम् ।  
 योन्या इव प्रच्युतो गर्भः पथः सर्वामनु क्षिय ॥४॥

6.122

एतं भागं परि ददामि विद्वान् विश्वकर्मन् प्रथमजा ऋतस्य ।  
 अस्माभिर्दत्तं जरसः परस्तादच्छिन्नं तन्तुमनु सं तरेम ॥१॥  
 ततं तन्तुमन्वेके तरन्ति येषां दत्तं पित्र्यमायनेन ।  
 अबन्ध्वेके ददतः प्रयच्छन्तो दातुं चेच्छिक्षान्त्स स्वर्ग एव ॥२॥  
 अन्वारभेथामनुसंरभेथामेतं लोकं श्रद्धधानाः सचन्ते ।  
 यद्वां पक्वं परिविष्टमग्नौ तस्य गुप्तये दम्पती सं श्रयेथाम् ॥३॥  
 यज्ञं यन्तं मनसा बृहन्तमन्वारोहामि तपसा सयोनिः ।  
 उपहृता अग्ने जरसः परस्तात्तृतीये नाके सधमार्द मदेम ॥४॥  
 शुद्धाः पूता योषितो यज्ञिया इमा ब्रह्मणां हस्तेषु प्रपृथक्सादयामि ।  
 यत्काम इदमभिषिञ्चामि वोऽहमिन्द्रो मरुत्वान्त्स ददातु तन् मे ॥५॥

6.123

एतं सधस्थाः परि वो ददामि यं शेवधिमावहाज्जातवेदः ।  
 अन्वागन्ता यजमानः स्वस्ति तं स्म जानीत परमे व्योमन् ॥१॥  
 जानीत स्मैनं परमे व्योमन् देवाः सधस्था विद लोकमत्र ।  
 अन्वागन्ता यजमानः स्वस्तीष्टापूर्तं स्म कृणुताविरस्मै ॥२॥  
 देवाः पितरः पितरो देवाः ।  
 यो अस्मि सो अस्मि ॥३॥  
 स पचामि स ददामि ।  
 स यजे स दत्तान् मा यूषम् ॥४॥  
 नाके राजन् प्रति तिष्ठ तत्रैतत्प्रति तिष्ठतु ।  
 विद्धि पूर्तस्य नो राजन्त्स देव सुमना भव ॥५॥

6.124

दिवो नु मां बृहतो अन्तरिक्षादपां स्तोको अभ्यपत्तद्रसेन ।  
 समिन्द्रियेन पयसाहमग्ने छन्दोभिर्यज्ञैः सुकृतां कृतेन ॥१॥  
 यदि वृक्षादभ्यपत्तत्फलं तद्यदन्तरिक्षात्स उ वायुरेव ।  
 यत्रास्पृक्षत्तन्वो यच्च वासस आपो नुदन्तु निर्ऋतिं पराचैः ॥२॥  
 अभ्यञ्जनं सुरभि सा समृद्धिर्हिरण्यं वर्चस्तदु पुत्रिममेव ।  
 सर्वा पवित्रा वितताध्यस्मत्तन् मा तारीन् निर्ऋतिर्मो अरातिः ॥३॥

6.125

वनस्पते वीड्वङ्गो हि भूया अस्मत्सखा प्रतरणः सुवीरः ।  
 गोभिः संनद्धो असि वीडयस्वास्थाता ते जयतु जेतवानि ॥१॥  
 दिवस्पृथिव्याः पर्योज उद्धृतं वनस्पतिभ्यः पर्याभृतं सहः ।  
 अपामोज्मानं परि गोभिरावृतमिन्द्रस्य वज्रं हविषा रथं यज ॥२॥  
 इन्द्रस्यौजो मरुतामनीकं मित्रस्य गर्भो वरुणस्य नाभिः ।  
 स इमां नो हव्यदातिं जुषाणो देव रथ प्रति हव्या गृभाय ॥३॥

6.126

उप श्वासय पृथिवीमुत दं पुरुत्रा ते वन्वतां विष्टितं जगत् ।  
स दुन्दुभे सजूरिन्द्रेण देवैर्दूराद्दवीयो अप सेध शत्रून् ॥१॥  
आ क्रन्दय बलमोजो न आ धा अभि ष्टन दुरिता बाधमानः ।  
अप सेध दुन्दुभे दुष्टनामित इन्द्रस्य मुष्टिरसि वीडयस्व ॥२॥  
प्रामूं जयाभोमं जयन्तु केतुमहुन्दुभिर्वावदीतु ।  
समश्वपर्णाः पतन्तु नो नरोऽस्माकमिन्द्र रथिनो जयन्तु ॥३॥

6.127

विद्रधस्य बलासस्य लोहितस्य वनस्पते ।  
विसल्पकस्यौषधे मोच्छिषः पिशितं चन ॥१॥  
यौ ते बलास तिष्ठतः कक्षे मुष्कावपश्रितौ ।  
वेदाहं तस्य भेषजं चीपुद्गरभिक्षणम् ॥२॥  
यो अङ्ग्यो यः कर्ण्यो यो अक्ष्योर्विसल्पकः ।  
वि वृहामो विसल्पकं विद्रधं हृदयामयम् ।  
परा तमजातं यक्षमधराञ्चं सुवामसि ॥३॥

6.128

शकधूमं नक्षत्राणि यद्राजानमकुर्वत ।  
भद्राहमस्मै प्रायच्छन् इदं राष्ट्रमसादिति ॥१॥  
भद्राहं नो मध्यंदिने भद्राहं सायमस्तु नः ।  
भद्राहं नो अह्नां प्राता रात्री भद्राहमस्तु नः ॥२॥  
अहोरात्राभ्यां नक्षत्रेभ्यः सुर्याचन्द्रमसाभ्याम् ।  
भद्राहमस्मभ्यं राजन् छकधूम त्वं कृधि ॥३॥  
यो नो भद्राहमकरः सायं नक्तमथो दिवा ।  
तस्मै ते नक्षत्रराज शकधूम सदा नमः ॥४॥

6.129

भगेन मा शांशपेन साकमिन्द्रेण मेदिना ।  
कृणोमि भगिनं माप द्रान्त्वरातयः ॥१॥  
येन वृक्षामभ्यभवो भगेन वर्चसा सह ।  
तेन मा भगिनं कृण्वप द्रान्त्वरातयः ॥२॥  
यो अन्धो यः पुनःसरो भगो वृक्षेष्वहितः ।  
तेन मा भगिनं कृण्वप द्रान्त्वरातयः ॥३॥

6.130

रथजितां राथजितेयीनामप्सरसामयं स्मरः ।  
देवाः प्र हिणुत स्मरमसौ मामनु शोचतु ॥१॥  
असौ मे स्मरतादिति प्रियो मे स्मरतादिति ।  
देवाः प्र हिणुत स्मरमसौ मामनु शोचतु ॥२॥  
यथा मम स्मरादसौ नामुष्याहं कदा चन ।  
देवाः प्र हिणुत स्मरमसौ मामनु शोचतु ॥३॥  
उन् मादयत मरुत उदन्तरिक्ष मादय ।  
अग्न उन् मादया त्वमसौ मामनु शोचतु ॥४॥

6.131

नि शीर्षतो नि पत्तत आध्यो नि तिरामि ते ।  
देवाः प्र हिणुत स्मरमसौ मामनु शोचतु ॥१॥  
अनुमतेऽन्विदं मन्यस्वाकुते समिदं नमः ।  
देवाः प्र हिणुत स्मरमसौ मामनु शोचतु ॥२॥  
यद्वावसि त्रियोजनं पञ्चयोजनमाश्विनम् ।  
ततस्त्वं पुनरायसि पुत्राणां नो असः पिता ॥३॥

6.132

यं देवाः स्मरमसिञ्चन् अप्स्वन्तः शोशुचानं सहाध्या ।  
तं ते तपामि वरुणस्य धर्मणा ॥१॥  
यं विश्वे देवाः स्मरमसिञ्चन् अप्स्वन्तः शोशुचानं सहाध्या ।  
तं ते तपामि वरुणस्य धर्मणा ॥२॥  
यमिन्द्राणी स्मरमसिञ्चदप्स्वन्तः शोशुचानं सहाध्या ।  
तं ते तपामि वरुणस्य धर्मणा ॥३॥  
यमिन्द्राग्नी स्मरमसिञ्चतामप्स्वन्तः शोशुचानं सहाध्या ।  
तं ते तपामि वरुणस्य धर्मणा ॥४॥  
यं मित्रावरुणौ स्मरमसिञ्चतामप्स्वन्तः शोशुचानं सहाध्या ।  
तं ते तपामि वरुणस्य धर्मणा ॥५॥

6.133

य इमां देवो मेखलामाबन्ध यः संननाह य उ नो युयोज ।  
यस्य देवस्य प्रशिषा चरामः स पारमिछात्स उ नो वि मुञ्चात् ॥१॥  
आहुतास्यभिहुत ऋषीणामस्यायुधम् ।  
पूर्वा व्रतस्य प्राश्रती वीरघ्नी भव मेखले ॥२॥  
मृत्योरहं ब्रह्मचारी यदस्मि निर्याचन् भूतात्पुरुषं यमाय ।  
तमहं ब्रह्मणा तपसा श्रमेणानयैनं मेखलया सिनामि ॥३॥  
श्रद्धाया दुहिता तपसोऽधि जाता स्वसा ऋषीणां भूतकृतां बभूव ।  
सा नो मेखले मतिमा धेहि मेधामथो नो धेहि तप इन्द्रियं च ॥४॥  
यां त्वा पूर्वं भूतकृत ऋषयः परिबेधिरे ।  
सा त्वं परि ष्वजस्व मां दीर्घायुत्वाय मेखले ॥५॥

6.134

अयं वज्रस्तर्पयतामृतस्यावास्य राष्ट्रमप हन्तु जीवितम् ।  
शृणातु ग्रीवाः प्र शृणातूष्णिहा वृत्रस्येव शचीपतिः ॥१॥  
अधरोऽधर उत्तरेभ्यो गूढः पृथिव्या मोत्सृपत् ।  
वज्रेणावहतः शयाम् ॥२॥  
यो जिनाति तमन्विच्छ यो जिनाति तमिज्जहि ।  
जिनतो वज्र त्वं सीमन्तमन्वञ्चमनु पातय ॥३॥

6.135

यदश्रामि बलं कुर्व इत्थं वज्रमा ददे ।  
स्कन्धान् अमुष्य शातयन् वृत्रस्येव शचीपतिः ॥१॥  
यत्पिबामि सं पिबामि समुद्र इव संपिबः ।  
प्राणान् अमुष्य संपाय सं पिबामो अमुं वयम् ॥२॥  
यद्गिरामि सं गिरामि समुद्र इव संगिरः ।  
प्राणान् अमुष्य संगीर्यं सं गिरामो अमुं वयम् ॥३॥

6.136

देवी देव्यामधि जाता पृथिव्यामस्योषधे ।  
तां त्वा नितन्नि केशेभ्यो दृहणाय खनामसि ॥१॥  
दृह प्रत्नान् जनयाजातान् जातान् उ वर्षीयसस्कृधि ॥२॥  
यस्ते केशोऽवपट्टते समूलो यश्च वृश्चते ।  
इदं तं विश्वभेषज्याभि षिञ्चामि वीरुधा ॥३॥

6.137

यां जमदग्निरखनदुहित्रे केशवर्धनीम् ।  
तां वीतहव्य आभरदसितस्य गृहेभ्यः ॥१॥  
अभीशुना मेया आसन् व्यामेनानुमेयाः ।  
केशा नडा इव वर्धन्तां शीर्ष्णस्ते असिताः परि ॥२॥  
दृह मूलमाग्रं यच्छ वि मध्यं यामयोषधे ।  
केशा नडा इव वर्धन्तां शीर्ष्णस्ते असिताः परि ॥३॥

6.138

त्वं वीरुधां श्रेष्ठतमाभिश्चुतास्योषधे ।  
इमं मे अद्य पुरुषं क्लीबमोपशिनं कृधि ॥१॥  
क्लीबं कृध्योपशिनमथो कुरीरिणं कृधि ।  
अथास्येन्द्रो ग्रावभ्यामुभे भिनत्त्वाण्ड्यौ ॥२॥  
क्लीब क्लीबं त्वाकरं वध्ने वधिं त्वाकरमरसारसं त्वाकरम् ।  
कुरीरमस्य शीर्ष्णि कुम्बं चाधिनिदध्मसि ॥३॥  
ये ते नाद्यौ देवकृते ययोस्तिष्ठति वृष्ण्यम् ।  
ते ते भिनद्धि शम्ययामुष्या अधि मुष्कयोः ॥४॥  
यथा नडं कशिपुने स्त्रियो भिन्दन्त्यश्मना ।  
एवा भिनद्धि ते शेषोऽमुष्या अधि मुष्कयोः ॥५॥

6.139

न्यस्तिका रुरोहित सुभगंकरणी मम ।  
शतं तव प्रतानास्त्रयस्त्रिशन् नितानाः ॥  
तया सहस्रपर्ण्या हृदयं शोषयामि ते ॥१॥  
शुष्यतु मयि ते हृदयमथो शुष्यत्वास्यम् ।  
अथो नि शुष्य मां कामेनाथो शुष्कास्या चर ॥२॥  
संवननी समुष्पला बभ्रु कल्याणि सं नुद ।  
अमुं च मां च सं नुद समानं हृदयं कृधि ॥३॥



यथोदकमपपुषोऽपशुष्यत्यास्यम् ।  
एवा नि शुष्य मां कामेनाथो शुष्कास्या चर ॥४॥  
यथा नकुलो विच्छिद्य संदधात्यहिं पुनः ।  
एवा कामस्य विच्छिन्नं सं धेहि वीर्यावति ॥५॥

6.140  
यौ व्याघ्रावररूधौ जिघत्सतः पितरं मातरं च ।  
तौ दन्तं ब्रह्मणस्पते शिवौ कृणु जातवेदः ॥१॥  
व्रीहिमतं यवमत्तमथो माषमथो तिलम् ।  
एष वां भागो निहितो रत्नधेयाय दन्तौ मा हिंसिष्टं पितरं मातरं च ॥२॥  
उपहृतौ सयुजौ स्योनौ दन्तौ सुमङ्गलौ ।  
अन्यत्र वां घोरं तन्वः परैतु दन्तौ मा हिंसिष्टं पितरं मातरं च ॥३॥

6.141  
वायुरेनाः समाकरत्वष्टा पोषाय ध्रियताम् ।  
इन्द्र आभ्यो अधि ब्रवद्द्रो भूम्ने चिकित्सतु ॥१॥  
लोहितेन स्वधितिना मिथुनं कर्णयोः कृधि ।  
अकर्तामश्विना लक्ष्म तदस्तु प्रजया बहु ॥२॥  
यथा चक्रुर्देवासुरा यथा मनुष्या उत ।  
एवा सहस्रपोषाय कृणुतं लक्ष्माश्विना ॥३॥

6.142  
उच्छ्रयस्व बहुर्भव स्वेन महसा यव ।  
मृणीहि विश्वा पात्राणि मा त्वा दिव्याशनिर्वधीत् ॥१॥  
आशृण्वन्तं यवं देवं यत्र त्वाछावदामसि ।  
तदुच्छ्रयस्व द्यौरिव समुद्र इवैध्यक्षितः ॥२॥  
अक्षितास्त उपसदोऽक्षिताः सन्तु राशयः ।  
पृणन्तो अक्षिताः सन्त्वत्तारः सन्त्वक्षिताः ॥३॥

7.1  
धीती वा ये अनयन् वाचो अग्रं मनसा वा येऽवदन् ऋतानि ।  
तृतीयेन ब्रह्मणा वावृधानास्तुरीयेणामन्वत नाम धेनोः ॥१॥  
स वेद पुत्रः पितरं स मातरं स सनुर्भुवत्स भुवत्पुनर्मघः ।  
स द्यामौर्णादन्तरिक्षं स्वः स इदं विश्वमभवत्स आभरत् ॥२॥

7.2  
अथर्वाणं पितरं देवबन्धुं मातुर्गर्भं पितुरसुं युवानम् ।  
य इमं यज्ञं मनसा चिकेत प्र णो वीचस्तमिहेह ब्रवः ॥१॥

7.3  
अया विष्ठा जनयन् कर्वराणि स हि घृणिरुर्वराय गातुः ।  
स प्रत्युदैद्धरुणं मध्वो अग्रं स्वया तन्वा तन्वमैरयत ॥१॥

7.4  
एकया च दशभिश्च सुहृते द्वाभ्यामिष्टये विंशत्या च ।  
तिसृभिश्च वहसे त्रिंशता च वियुग्भिर्वाय इह ता वि मुञ्च ॥१॥

7.5  
यज्ञेन यज्ञमयजन्त देवास्तानि धर्माणि प्रथमान्यासन् ।  
ते ह नाकं महिमानः सचन्त यत्र पूर्वं साध्याः सन्ति देवाः ॥१॥  
यज्ञो बभूव स आ बभूव स प्र जज्ञे स उ वावृधे पुनः ।  
स देवानामधिपतिर्बभूव सो अस्मासु द्रविणमा दधातु ॥२॥  
यद्देवा देवान् हविषाऽयजन्तामर्त्यान् मनसा मर्त्येन ।  
मदेम तत्र परमे व्योमन् पश्येम तदुदितौ सूर्यस्य ॥३॥  
यत्पुरुषेण हविषा यज्ञं देवा अतन्वत ।  
अस्ति नु तस्मादोजीयो यद्विहव्येनेजिरे ॥४॥  
मुग्धा देवा उत शुनाऽयजन्तो गोरङ्गैः पुरुधाऽयजन्त ।  
य इमं यज्ञं मनसा चिकेत प्र णो वीचस्तमिहेह ब्रवः ॥५॥

7.6  
अदितिर्द्यौरदितिरन्तरिक्षमदितिर्माता स पिता स पुत्रः ।  
विश्वे देवा अदितिर्पञ्च जना अदितिर्जातमदितिर्जनित्वम् ॥१॥  
महीमू षु मातरं सुव्रतानामृतस्य पत्नीमवसे हवामहे ।

तुविक्षत्रामजरन्तीमूर्च्छीं सुशर्माणमदितिं सुप्रणीतिम् ॥२॥  
सुत्रामाणं पृथिवीं द्यामनेहसं सुशर्माणमदितिं सुप्रणीतिम् ।  
दैवीं नावं स्वरित्रामनागसो अस्रवन्तीमा रुहेमा स्वस्तये ॥१॥  
वाजस्य नु प्रसवे मातरं महीमदितिं नाम वचसा करामहे ।  
यस्या उपस्थ उर्वन्तरिक्षं सा नः शर्म त्रिवरूथं नि यच्छात् ॥२॥

7.7

दितेः पुत्राणामदितेरकारिषमव देवानां बृहतामनर्मणाम् ।  
तेषां हि धाम गभिषक्समुद्रियं नैनान् नमसा परो अस्ति कश्चन ॥१॥

7.8

भद्रादधि श्रेयः प्रेहि बृहस्पतिः पुरएता ते अस्तु ।  
अथेममस्या वर आ पृथिव्या आरिशत्रुं कृणुहि सर्ववीरम् ॥१॥

7.9

प्रपथे पथामजनिष्ट पूषा प्रपथे दिवः प्रपथे पृथिव्याः ।  
उभे अभि प्रियतमे सधस्थे आ च परा च चरति प्रजानन् ॥१॥  
पूषेमा आशा अनु वेद सर्वाः सो अस्माँ अभयतमेन नेषत् ।  
स्वस्तिदा आघृणिः सर्ववीरोऽप्रयुच्छन् पुर एतु प्रजानन् ॥२॥  
पूषन् तव व्रतं वयं न रिष्येम कदा चन ।  
स्तोतारस्त इह स्मसि ॥३॥  
परि पूषा परस्ताद्धस्तं दधातु दक्षिणम् ।  
पुनर्नो नष्टमाजतु सं नष्टेन गमेमहि ॥४॥

7.10

यस्ते स्तनः शशयुर्यो मयोभूर्यः सुम्नयुः सुहवो यः सुदत्रः ।  
येन विश्वा पुष्यसि वार्याणि सरस्वति तमिह धातवे कः ॥१॥

7.11

यस्ते पृथु स्तनयित्नुयं ऋष्वो दैवः केतुर्विश्वमाभूषतीदम् ।  
मा नो वधीर्विद्युता देव सस्यं मोत वधी रश्मिभिः सूर्यस्य ॥१॥

7.12

सभा च मा समितिश्चावतां प्रजापतेर्दुहितरौ संविदाने ।  
येना संगच्छा उप मा स शिक्षाच्चारु वदानि पितरः संगतेषु ॥१॥  
विद्म ते सभे नाम नरिष्ठा नाम वा असि ।  
ये ते के च सभासदस्ते मे सन्तु सवाचसः ॥२॥  
एषामहं समासीनानां वर्चो विज्ञानमा ददे ।  
अस्याः सर्वस्याः संसदो मामिन्द्र भगिनं कृणु ॥३॥  
यद्धो मनः परागतं यद्धृद्धमिह वेह वा ।  
तद्ध आ वर्तयामसि मयि वो रमतां मनः ॥४॥

7.13

यथा सूर्यो नक्षत्राणामुद्यंस्तेजांस्याददे ।  
एवा स्त्रीणां च पुंसां च द्विषतां वर्च आ ददे ॥१॥  
यावन्तो मा सपत्नानामायन्तं प्रतिपश्यथ ।  
उद्यन्त्सूर्य इव सुप्तानां द्विषतां वर्च आ ददे ॥२॥

7.14

अभि त्यं देवं सवितारमोण्योः कविक्रतुम् ।  
अर्चामि सत्यसवं रत्नधामभि प्रियं मतिम् ॥१॥  
उर्ध्वा यस्यामतिर्भा अदिद्युतत्सवीमनि ।  
हिरण्यपाणिरमिमीत सुक्रतुः कृपात्स्वः ॥२॥  
सावीर्हि देव प्रथमाय पित्रे वर्ष्माणमस्मै वरिमाणमस्मै ।  
अथास्मभ्यं सवितर्वार्याणि दिवोदिव आ सुवा भूरि पश्वः ॥३॥  
दमूना देवः सविता वरेण्यो दधद्रत्नं पितृभ्य आयूंषि ।  
पिबात्सोमं ममददेनमिष्टे परिज्मा चित्क्रमते अस्य धर्मणि ॥४॥

7.15

तां सवितः सत्यसवां सुचित्रामाहं वृणे सुमतिं विश्ववाराम् ।  
यामस्य कण्वो अदुहत्प्रपीनां सहस्रधारां महिषो भगाय ॥१॥

7.16

बृहस्पते सवितर्वर्धयैनं ज्योतयैनं महते सौभगाय ।  
संशितं चित्संतरं सं शिशाधि विश्व एनमनु मदन्तु देवाः ॥१॥

7.17

धाता दधातु नो रयिमीशानो जगतस्पतिः ।  
स नः पूर्णेन यच्छतु ॥१॥  
धाता दधातु दाशुषे प्राचीं जीवातुमक्षिताम् ।  
वयं देवस्य धीमहि सुमतिं विश्वराधसः ॥२॥  
धाता विश्वा वार्या दधातु प्रजाकामाय दाशुषे दुरोणे ।  
तस्मै देवा अमृतं सं व्ययन्तु विश्वे देवा अदितिः सजोषाः ॥३॥  
धाता रातिः सवितेदं जुषन्तां प्रजापतिर्निधिपतिर्नो अग्निः ।  
त्वष्टा विष्णुः प्रजया संरराणो यजमानाय द्रविणं दधातु ॥४॥

7.18

प्र नभस्व पृथिवि भिन्द्रीदं दिव्यं नभः ।  
उदनो दिव्यस्य नो धातरीशानो वि ष्या दृतिम् ॥१॥  
न घ्नस्तताप न हिमो जघान प्र नभतां पृथिवी जीरदानुः ।  
आपश्चिदस्मै घृतमित्क्षरन्ति यत्र सोमः सदमित्त्र भद्रम् ॥२॥

7.19

प्रजापतिर्जनयति प्रजा इमा धाता दधातु सुमनस्यमानः ।  
संजानानाः संमनसः सयोनयो मयि पुष्टं पुष्टपतिर्दधातु ॥१॥

7.20

अन्वद्य नोऽनुमतिर्यज्ञं देवेषु मन्यताम् ।  
अग्निश्च हव्यवाहनो भवतां दाशुषे मम ॥१॥  
अन्विदनुमते त्वं मंससे शं च नस्कृधि ।  
जुषस्व हव्यमाहुतं प्रजां देवि ररास्व नः ॥२॥  
अनु मन्यतामनुमन्यमानः प्रजावन्तं रयिमक्षीयमाणम् ।  
तस्य वयं हेडासि मापि भूम सुमृडीके अस्य सुमतौ स्याम ॥३॥  
यत्ते नाम सुहवं सुप्रणीतेऽनुमते अनुमतं सुदानु ।  
तेना नो यज्ञं पिपृहि विश्ववारे रयिं नो धेहि सुभगे सुवीरम् ॥४॥  
एमं यज्ञमनुमतिर्जगाम सुक्षेत्रतायै सुवीरतायै सुजातम् ।  
भद्रा ह्यस्याः प्रमतिर्बभूव सेमं यज्ञमवतु देवगोपा ॥५॥  
अनुमतिः सर्वमिदं बभूव यत्तिष्ठति चरति यदु च विश्वमेजति ।  
तस्यास्ते देवि सुमतौ स्यामानुमते अनु हि मंससे नः ॥६॥

7.21

समेत विश्वे वचसा पतिं दिव एको विभूरतिधिर्जनानाम् ।  
स पूर्व्यो नूतनमाविवासत्तं वर्तनिरनु वावृत एकमित्युरु ॥१॥

7.22

अयं सहस्रमा नो दृशे कवीनां मतिर्ज्योतिर्विधर्मणि ॥१॥  
ब्रध्नः समीचीरुषसः समैरयन् ।  
अरेपसः सचेतसः स्वसरे मन्युमत्तमाश्रिते गोः ॥२॥

7.23

दौष्वप्यं दौर्जीवित्यं रक्षो अभ्वमराय्यः ।  
दुर्णाम्नीः सर्वा दुर्वाचस्ता अस्मन् नाशयामसि ॥१॥

7.24

यन् न इन्द्रो अखनद्यदग्निर्विश्वे देवा मरुतो यत्स्वर्काः ।  
तदस्मभ्यं सविता सत्यधर्मा प्रजापतिरनुमतिर्नि यच्छात् ॥१॥

7.25

ययोरोजसा स्कभिता रजांसि यौ वीर्यैर्वीरतमा शविष्ठा ।  
यौ पत्येते अप्रतीतौ सहोभिर्विष्णुमगन् वरुणं पूर्वहृतिः ॥१॥  
यस्येदं प्रदिशि यद्विरोचते प्र चानति वि च चष्टे शचीभिः ।  
पुरा देवस्य धर्मणा सहोभिर्विष्णुमगन् वरुणं पूर्वहृतिः ॥२॥

7.26

विष्णोर्नु कं प्रा वोचं वीर्याणि यः पार्थिवानि विममे रजांसि ।  
यो अस्कभायदुत्तरं सधस्थं विचक्रमाणस्त्रेधोरुगायः ॥१॥  
प्र तद्विष्णु स्तवते वीर्याणि मृगो न भीमः कुचरो गिरिष्ठाः ।

परावत आ जगम्यात्परस्याः ॥२॥  
 यस्योरुषु त्रिषु विक्रमनेष्वधिक्षियन्ति भुवनानि विश्वा ।  
 उरु विष्णो वि क्रमस्वोरु क्षयाय नस्कृधि ।  
 घृतं घृतयोने पिब प्रप्र यज्ञपतिं तिर ॥३॥  
 इदं विष्णुर्वि चक्रमे त्रेधा नि दधे पदा ।  
 समूढमस्य पंसुरे ॥४॥  
 त्रीणि पदा वि चक्रमे विष्णुर्गोपा अदाभ्यः ।  
 इतो धर्माणि धारयन् ॥५॥  
 विष्णोः कर्माणि पश्यत यतो व्रतानि पस्पशे ।  
 इन्द्रस्य युज्यः सखा ॥६॥  
 तद्विष्णोः परमं पदं सदा पश्यन्ति सूरयः ।  
 दिवीव चक्षुराततम् ॥७॥  
 दिवो विष्ण उत पृथिव्या महो विष्ण उरोरन्तरिक्षात् ।  
 हस्तौ पृणस्व बहुभिर्वसव्यैराप्रयच्छ दक्षिणादोत सव्यात् ॥८॥

7.27  
 इडैवास्मामनु वस्तां व्रतेन यस्याः पदे पुनते देवयन्तः ।  
 घृतपदी शक्वरी सोमपृष्ठोप यज्ञमस्थित वैश्वदेवी ॥१॥

7.28  
 वेदः स्वस्तिर्द्रघणः स्वस्तिः परशुर्वेदिः परशुर्नः स्वस्ति ।  
 हविष्कृतो यज्ञिया यज्ञकामास्ते देवासो यज्ञमिमं जुषन्ताम् ॥१॥

7.29  
 अग्नाविष्णू महि तद्वां महित्वं पाथो घृतस्य गुह्यस्य नाम ।  
 दमेदमे सप्त रत्ना दधानौ प्रति वां जिह्वा घृतमा चरण्यात् ॥१॥  
 अग्नाविष्णू महि धाम प्रियं वां वीथो घृतस्य गुह्या जुषाणौ ।  
 दमेदमे सुष्टुत्या वावृधानौ प्रति वां जिह्वा घृतमुच्चरण्यात् ॥२॥

7.30  
 स्वाक्तं मे द्यावापृथिवी स्वाक्तं मित्रो अकरयम् ।  
 स्वाक्तं मे ब्रह्मणस्पतिः स्वाक्तं सविता करत् ॥१॥

7.31  
 इन्द्रोतिभिर्बहुलाभिर्नो अद्य यावच्छ्रेष्ठाभिर्मघवन् छूर जिन्व ।  
 यो नो द्वेष्यधर सस्पदीष्ट यमु द्विष्मस्तमु प्राणो जहातु ॥१॥

7.32  
 उप प्रियं पनिप्रतं युवानमाहुतीवृधम् ।  
 अगन्म बिभ्रतो नमो दीर्घमायुः कृणोतु मे ॥१॥

7.33  
 सं मा सिञ्चन्तु मरुतः सं पूषा सं बृहस्पतिः ।  
 सं मायमग्निः सिञ्चतु प्रजया च धनेन च दीर्घमायुः कृणोतु मे ॥१॥

7.34  
 अग्ने जातान् प्र णुदा मे सपत्नान् प्रत्यजातान् जातवेदो नुदस्व ।  
 अधस्पदं कृणुष्व ये पृतन्यवोऽनागसस्ते वयमदितये स्याम ॥१॥

7.35  
 प्रान्यान्त्सपत्नान्त्सहसा सहस्व प्रत्यजातान् जातवेदो नुदस्व ।  
 इदं राष्ट्रं पिपृहि सौभगाय विश्व एनमनु मदन्तु देवाः ॥१॥  
 इमा यास्ते शतं हिराः सहस्रं धमनीरुत ।  
 तासां ते सर्वसामहमशमना बिलमप्यधाम् ॥२॥  
 परं योनेरवरं ते कृणोमि मा त्वा प्रजाभि भून् मोत सूतुः ।  
 अस्वं त्वाप्रजसं कृणोम्यश्मानं ते अपिधानं कृणोमि ॥३॥

7.36  
 अक्षयौ नौ मधुसंकाशे अनीकं नौ समञ्जनम् ।  
 अन्तः कृष्णुष्व मां हृदि मन इन् नौ सहासति ॥१॥

7.37  
 अभि त्वा मनुजातेन दधामि मम वाससा ।  
 याथाऽसो मम केवलो नान्यासां कीर्तयाश्चन ॥१॥

7.38

इदं खनामि भेषजं मां पश्यमभिरोरुदम् ।  
परायतो निवर्तनमायतः प्रतिनन्दनम् ॥१॥  
येना निचक्र आसुरीन्द्रं देवेभ्यस्परि ।  
तेना नि कुर्वे त्वामहं यथा तेऽसानि सुप्रिया ॥२॥  
प्रतीची सोममसि प्रतीची उत सूर्यम् ।  
प्रतीची विश्वान् देवान् तां त्वाछावदामसि ॥३॥  
अहं वदामि नेत्त्वं सभायामह त्वं वद ।  
ममेदसस्त्वं केवलो नान्यासां कीर्तयाश्चन ॥४॥  
यदि वासि तिरोजनं यदि वा नद्यस्तिरः ।  
इयं ह मह्यं त्वामोषधिर्बद्धेव न्यानयत् ॥५॥

7.39

दिव्यं सुपर्णं पयसं बृहन्तमपां गर्भं वृषभमोषधीनाम् ।  
अभीपतो वृष्ट्या तर्पयन्तमा नो गोष्ठे रयिष्ठां स्थापयाति ॥१॥

7.40

यस्य व्रतं पशवो यन्ति सर्वे यस्य व्रत उपतिष्ठन्त आपः ।  
यस्य व्रते पुष्टपतिर्निविष्टस्तं सरस्वन्तमवसे हवामहे ॥१॥

आ प्रत्यञ्चं दाशुषे दाश्वंसं सरस्वन्तं पुष्टपतिं रयिष्ठाम् ।  
रायस्पोषं श्रवस्युं वसाना इह सदनं रयीणाम् ॥२॥

7.41

अति धन्वान्यत्यपस्ततर्द श्येनो नृचक्षा अवसानदर्शः ।  
तरन् विश्वान्यवरा रजंसीन्द्रेण सख्या शिव आ जगम्यात् ॥१॥  
श्येनो नृचक्षा दिव्यः सुपर्णः सहस्रपाच्छतयोनिर्वयोधाः ।  
स नो नि यछाद्भसु यत्पराभृतमस्माकमस्तु पितृषु स्वधावत् ॥२॥

7.42

सोमारुद्रा वि वृहतं विषूचीममीवा या नो गयमाविवेश ।  
बाधेथां दूरं निर्र्हेति पराचैः कृतं चिदेनः प्र मुमुक्तमस्मत् ॥१॥  
सोमारुद्रा युवमेतान्यस्मद्विश्वा तनूषु भेषजानि धत्तम् ।  
अव स्यतं मुञ्चतं यन् नो असत्तनूषु बद्धं कृतमेनो अस्मत् ॥२॥

7.43

शिवास्त एका अशिवास्त एकाः सर्वा बिभर्षिं सुमनस्यमानः ।  
तिस्रो वाचो निहिता अन्तरस्मिन् तासामेका वि पपातानु घोषम् ॥१॥

7.44

उभा जिग्यथुर्न परा जयेथे न परा जिग्ये कतरश्चनैनयोः ।  
इन्द्रश्च विष्णो यदपस्पृधेथां त्रेधा सहस्रं वि तदैरयेथाम् ॥१॥

7.45

जनाद्विश्वजनीनात्सिन्धुतस्पर्याभृतम् ।  
दूरान्त्वा मन्य उद्भूतमोष्याया नाम भेषजम् ॥१॥  
अग्नेरिवास्य दहतां दावस्य दहतः पृथक् ।  
एतामेतस्येष्यामुद्राग्निमिव शमय ॥१॥

7.46

सिनीवालि पृथुष्टुके या देवानामसि स्वसा ।  
जुषस्व हव्यमाहुतं प्रजां देवि दिदिद्धि नः ॥१॥  
या सुबाहुः स्वङ्गुरिः सुषुमा बहुसूवरी ।  
तस्यै विश्पत्न्यै हविः सिनीवालयै जुहोतन ॥२॥  
या विश्पत्नीन्द्रमसि प्रतीची सहस्रस्तुकाभियन्ती देवी ।  
विष्णोः पत्नि तुभ्यं राता हवींषि पतिं देवि राधसे चोदयस्व ॥३॥

7.47

कुहूं देवीं सुकृतं विद्वानापसमस्मिन् यज्ञे सुहवा जोहवीमि ।  
सा नो रयिं विश्ववारं नि यछाद्ददातु वीरं शतदायमुक्थ्यम् ॥१॥  
कुहूर्देवानाममृतस्य पत्नी हव्या नो अस्य हविषो जुषेत ।  
शृणोतु यज्ञमुशती नो अद्य रायस्पोषं चिकितुषी दधातु ॥२॥

7.48

राकामहं सुहवा सुष्टुती हुवे शृणोतु नः सुभगा बोधतु त्मना ।  
सीव्यत्वपः सूच्याच्छिद्यमानया ददातु वीरं शतदायमुक्थ्यम् ॥१॥  
यास्ते राके सुमतयः सुपेशसो याभिर्ददासि दाशुषे वसूनि ।  
ताभिर्नो अद्य सुमना उपागहि सहस्रापोषं सुभगे रराणा ॥२॥

7.49

देवानां पत्नीरुशतीरवन्तु नः प्रावन्तु नस्तुजये वाजसातये ।  
याः पार्थिवासो या अपामपि व्रते ता नो देवीः सुहवाः शर्म यच्छन्तु ॥१॥  
उत ग्ना व्यन्तु देवपत्नीरिन्द्राण्यग्नाय्यश्विनी राट् ।  
आ रोदसी वरुनानी शृणोतु व्यन्तु देवीर्य ऋतुर्जनीनाम् ॥२॥

7.50

यथा वृक्षमशनिर्विश्वाहा हन्त्यप्रति ।  
एवाहमद्य कितवान् अक्षैर्बध्यासमप्रति ॥१॥  
तुराणामतुराणां विशामवर्जुषीणाम् ।  
समैतु विश्वतो भगो अन्तर्हस्तं कृतं मम ॥२॥  
ईडे अग्निं स्वावसुं नमोभिरिह प्रसक्तो वि चयत्कृतं नः ।  
रथैरिव प्र भरे वाजयद्भिः प्रदक्षिणं मरुतां स्तोममृध्याम् ॥३॥  
वयं जयेम त्वया युजा वृतमस्माकमंशमुदव भरेभरे ।  
अस्मभ्यमिन्द्र वरीयः सुगं कृधि प्र शत्रूणां मघवन् वृष्ण्या रुज ॥४॥  
अजैषं त्वा संलिखितमजैषमुत संरुधम् ।  
अविं वृको यथा मथदेवा मथ्नामि ते कृतम् ॥५॥  
उत प्रहामतिदीवा जयति कृतमिव श्वघ्नीं वि चिनोति काले ।  
यो देवकामो न धनं रुणद्धि समित्तं रायः सृजति स्वधाभिः ॥६॥  
गोभिष्टरेमामतिं दुरेवां यवेन वा क्षुधं पुरुहूत विश्वे ।  
वयं राजसु प्रथमा धनान्यरिष्टासो वृजनीभिर्जयेम ॥७॥  
कृतं मे दक्षिणे हस्ते जयो मे सव्य आहितः ।  
गोजिद्ध्यासमश्वजिद्धनंजयो हिरण्यजित् ॥८॥  
अक्षाः फलवतीं ह्युवं दत्त गां क्षीरिणीमिव ।  
सं मा कृतस्य धारया धनुः स्नाव्नेव नह्यत ॥९॥

7.51

बृहस्पतिर्नः परि पातु पश्चादुतोत्तरस्मादधरादघयोः ।  
इन्द्रः पुरस्तादुत मध्यतो नः सखा सखिभ्यो वरीयः कृणोतु ॥१॥

7.52

संज्ञानं नः स्वेभिः संज्ञानमरणेभिः ।  
संज्ञानमश्विना युवमिहास्मासु नि यच्छतम् ॥१॥  
सं जानामहै मनसा सं चिकित्वा मा युष्महि मनसा दैव्येन ।  
मा घोषा उत्स्थुर्बहुले विनिर्हते मेषुः पप्तदिन्द्रस्याहन्यागते ॥२॥

7.53

अमुत्रभूयादधि यद्यमस्य बृहस्पते अभिशस्तेरमुञ्चः ।  
प्रत्यौहतामश्विना मृत्युमस्मद्देवानामग्ने भिषजा शचीभिः ॥१॥  
सं क्रामतं मा जहीतं शरीरं प्राणापानौ ते सयुजाविह स्ताम् ।  
शतं जीव शरदो वर्धमानोऽग्निष्टे गोपा अधिपा वसिष्ठः ॥२॥  
आयुर्यत्ते अतिहितं पराचैरपानः प्राणः पुनरा ताविताम् ।  
अग्निष्टदाहानिर्ऋतेरुपस्थात्तदात्मनि पुनरा वेशयामि ते ॥३॥  
मेमं प्राणो हासीन् मो अपानोऽवहाय परा गात् ।  
सप्तर्षिभ्य एनं परि ददामि ते एनं स्वस्ति जरसे वहन्तु ॥४॥  
प्र विषतं प्राणापानावनड्वाहाविव व्रजम् ।  
अयं जरिम्नः शेवधिरिष्ट इह वर्धताम् ॥५॥  
आ ते प्राणं सुवामसि परा यक्षं सुवामि ते ।  
आयुर्नो विश्वतो दधदयमग्निर्विण्यः ॥६॥  
उद्धयं तमसस्परि रोहन्तो नाकमुत्तमम् ।  
देवं देवत्रा सूर्यमगन्म ज्योतिरुत्तमम् ॥७॥

7.54

ऋचं साम यजामहे याभ्यां कर्माणि कुर्वते ।  
एते सदसि राजतो यज्ञं देवेषु यच्छतः ॥१॥  
ऋचं साम यदप्राक्षं हविरोजो यजुर्बलम् ।  
एष मा तस्मान् मा हिंसीद्वेदः पृष्टः शचीपते ॥१॥

7.55

ये ते पन्थानोऽव दिवो येभिर्विश्वमैरयः ।  
तेभिः सुम्नया धेहि नो वसो ॥२॥

7.56

तिरश्चिराजेरसितात्पृदाकोः परि संभृतम् ।  
तत्कडकपर्वणो विषमियं वीरुदनीनशत् ॥१॥  
इयं वीरुन् मधुजाता मधुशुन् मधुला मधूः ।  
सा विहुतस्य भेषज्यथो मशकजम्भनी ॥२॥  
यतो दष्टं यतो धीतं ततस्ते निर्ह्वयामसि ।  
अर्भस्य तृप्रदंशिनो मशकस्यारसं विषम् ॥३॥  
अयं यो वक्रो विपरुर्व्यङ्गो मुखानि वक्रा वृजिना कृणोषि ।  
तानि त्वं ब्रह्मणस्पते इषीकामिव सं नमः ॥४॥  
अरसस्य शर्कोटस्य नीचीनस्योपसर्पतः ।  
विषं ह्यस्यादिष्यथो एनमजीजभम् ॥५॥  
न ते बाह्वोर्बलमस्ते न शीर्षे नोत मध्यतः ।  
अथ किं पापयाऽमुया पुच्छे बिभर्ष्यर्भकम् ॥६॥  
अदन्ति त्वा पिपीलिका वि वृश्चन्ति मयूर्यः ।  
सर्वे भल ब्रवाथ शार्कोटमरसं विषम् ॥७॥  
य उभाभ्यां प्रहरसि पुच्छेन चास्येन च ।  
आस्ये न ते विषं किमु ते पुच्छधावसत् ॥८॥

7.57

यदाशसा वदतो मे विचुक्षुभे यद्याचमानस्य चरतो जनामनु ।  
यदात्मनि तन्वो मे विरिष्टं सरस्वती तदा पृणद्धृतेन ॥१॥  
सप्त क्षरन्ति सिशवे मरुत्वते पित्रे पुत्रासो अप्यवीवृतन् ऋतानि ।  
उभे इदस्योभे अस्य राजत उभे यतेते उभे अस्य पुष्यतः ॥२॥

7.58

इन्द्रावरुणा सुतपाविमं सुतं सोमं पिबतं मद्यं धृतव्रतौ ।  
युवो रथो अध्वरो देववीतये प्रति स्वसरमुप यातु पीतये ॥१॥  
इन्द्रावरुणा मधुमत्तमस्य वृष्णः सोमस्य वृष्णा वृषेथाम् ।  
इदं वामन्धः परिषिक्तमासद्यास्मिन् बर्हिषि मादयेथाम् ॥२॥

7.59

यो नः शपादशपतः शपतो यश्च नः शपात् ।  
वृक्ष इव विद्युता हत आ मूलादनु शुष्यतु ॥१॥

7.60

ऊर्जं बिभ्रद्वसुवनिः सुमेधा अघोरेण चक्षुषा मित्रियेण ।  
गृहान् ऐमि सुमना वन्दमानो रमध्वं मा बिभीत मत् ॥१॥  
इमे गृहा मयोभुव ऊर्जस्वन्तः पयस्वन्तः ।  
पूर्णा वामेन तिष्ठन्तस्ते नो जानन्त्वायतः ॥२॥  
येषामध्येति प्रवसन् येषु सौमनसो बहुः ।  
गृहान् उप ह्वयामहे ते नो जानन्त्वायतः ॥३॥  
उपहृता भूरिधनाः सखायः स्वादुसंमुदः ।  
अक्षुध्या अतृष्या स्त गृहा मास्मद्विभीतन ॥४॥  
उपहृता इह गाव उपहृता अजावयः ।  
अथो अन्नस्य कीलाल उपहृतो गृहेषु ॥५॥  
सूनृतावन्तः सुभगा इरावन्तो हसामुदाः ।  
अतृष्या अक्षुध्या स्त गृहा मास्मद्विभीतन ॥६॥  
इहैव स्त मानु गात विश्वा रूपाणि पुष्यत ।  
ऐष्यामि भद्रेणा सह भूयांसो भवता मया ॥७॥

7.61

यदग्ने तपसा तप उपतप्यामहे तपः ।  
प्रियाः श्रुतस्य भूयास्मायुष्मन्तः सुमेधसः ॥१॥  
अग्ने तपस्तप्यामह उप तप्यामहे तपः ।  
श्रुतानि शृण्वन्तः वयमायुष्मन्तः सुमेधसः ॥२॥

7.62

अयमग्निः सत्पतिर्वृद्धवृष्णो रथीव पत्नीन् अजयत्पुरोहितः ।  
नाभा पृथिव्यां निहितो दविद्युतदधस्पदं कृणुतां ये पृतन्यवः ॥१॥

7.63

पूतनाजितं सहमानमग्निमुक्थ्यैर्हवामहे परमात्सधस्थात् ।  
स नः पर्षदति दुर्गाणि विश्वा क्षामदेवोऽति दुरितान्यग्निः ॥१॥

7.64

इदं यत्कृष्णः शकुनिरभिनिष्पतन्न अपीपतत् ।  
आपो मा तस्मात्सर्वस्माद्दुरितात्पान्त्वंहसः ॥१॥  
इदं यत्कृष्णः शकुनिरवामृक्षन् निर्ऋते ते मुखेन ।  
अग्निर्मा तस्मादेनसो गार्हपत्यः प्र मुञ्चतु ॥२॥

7.65

प्रतीचीनफलो हि त्वमपामार्ग रुरोहिथ ।  
सर्वान् मच्छपथामधि वरीयो यवया इतः ॥१॥  
यद्दुष्कृतं यच्छमलं यद्वा चेरिम पापया ।  
त्वया तद्विश्वतोमुखापामार्गाप मृज्महे ॥२॥  
श्यावदता कुनखिना बण्डेन यत्सहासिम ।  
अपामार्ग त्वया वयं सर्वं तदप मृज्महे ॥३॥

7.66

यद्यन्तरिक्षे यदि वात आस यदि वृक्षेषु यदि वोलपेषु ।  
यदश्रवन् पशव उद्यमानं तद्ब्राह्मणं पुनरस्मान् उपैतु ॥१॥

7.67

पुनर्मत्विन्द्रियं पुनरात्मा द्रविणं ब्राह्मणं च ।  
पुनरग्नयो धिष्ण्या यथास्थाम कल्पयन्तामिहैव ॥१॥

7.68

सरस्वति व्रतेषु ते दिव्येषु देवि धामसु ।  
जुषस्व हव्यमाहुतं प्रजां देवि ररास्व नः ॥१॥  
इदं ते हव्यं घृतवत्सरस्वतीदं पितृणां हविरास्यं यत् ।  
इमानि त उदिता शन्तमानि तेभिर्वयं मधुमन्तः स्याम ॥२॥  
शिवा नः शंतमा भव सुमृडीका सरस्वति ।  
मा ते युयोम संदृशः ॥१॥

7.69

शं नो वातो वातु शं नस्तपतु सूर्यः ।  
अहानि शं भवन्तु नः शं रात्री प्रति धीयताम् ।  
शमुषा नो व्युच्छतु ॥१॥

7.70

यत्किं चासौ मनसा यच्च वाचा यज्ञैर्जुहोति हविषा यजुषा ।  
तन् मृत्युना निर्ऋतिः संविदाना पुरा सत्यादाहुतिं हन्त्वस्य ॥१॥  
यातुधाना निर्ऋतिरादु रक्षस्ते अस्य घन्त्वन्तेन सत्यम् ।  
इन्द्रोषिता देवा आजमस्य मथन्तु मा तत्सं पादि यदसौ जुहोति ॥२॥  
अजिराधिराजौ श्येनौ संपातिनाविव ।  
आज्यं पूतन्यतो हतां यो नः कश्चाभ्यघायति ॥३॥  
अपाञ्चौ त उभौ बाहू अपि नह्याम्यास्यम् ।  
अग्नेर्देवस्य मन्युना तेन तेऽवधिषं हविः ॥४॥  
अपि नह्यामि ते बाहू अपि नह्याम्यास्यम् ।  
अग्नेर्घोरस्य मन्युना तेनऽवधिषं हविः ॥५॥

7.71

परि त्वाग्ने पुरं वयं विप्रं सहस्य धीमहि ।  
धृषद्वर्णं दिवोदेवे हन्तारं भङ्गुरावतः ॥१॥

7.72

उत्तिष्ठताव पश्यतेन्द्रस्य भागमृत्वियम् ।  
यदि श्रातं जुहोतन यद्यश्रातं ममत्तन ॥१॥  
श्रातं हविरो ष्विन्द्र प्र याहि जगाम सूरो अध्वनो वि मध्यम् ।  
परि त्वासते निधिभिः सखायः कुलपा न ब्राजपतिं चरन्तम् ॥२॥  
श्रातं मन्य ऊधनि श्रातमग्नौ सुशृतं मन्ये तदृतं नवीयः ।  
माध्यन्दिनस्य सवनस्य दध्नः पिबेन्द्र वज्रिन् पुरुकृज्जुषाणः ॥१॥

7.73



समिद्धो अग्निर्वृषणा रथी दिवस्तप्तो घर्मो दुह्यते वामिषे मधु ।  
 वयं हि वां पुरुदमासो अश्विना हवामहे सधमादेषु कारवः ॥१॥  
 समिद्धो अग्निरश्विना तप्तो वां घर्म आ गतम् ।  
 दुह्यन्ते नूनं वृषणेह धेनवो दस्ना मदन्ति वेधसः ॥२॥  
 इवाहाकृतः शुचिर्देवेषु यज्ञो यो अश्विनोश्चमसो देवपानः ।  
 तमु विश्वे अमृतासो जुषाणा गन्धर्वस्य प्रत्यास्ना रिहन्ति ॥३॥  
 यदुस्त्रियास्वाहुतं घृतं पयोऽयं स वामश्विना भाग आ गतम् ।  
 माध्वी धर्तारा विदथस्य सत्पती तप्तं घर्मं पिबतं दिवः ॥४॥  
 तप्तो वां घर्मो नक्षतु स्वहोता प्र वामध्वर्युश्चरतु पयस्वान् ।  
 मधोर्दुधस्याश्विना तनाया वीतं पातं पयस उस्त्रियायाः ॥५॥  
 उप द्रव पयसा गोधुगोषमा घर्मं सिञ्च पय उस्त्रियायाः ।  
 वि नाकमख्यत्सविता वरेण्योऽनुप्रयाणमुषसो वि राजति ॥६॥  
 उप ह्वये सुदुघां धेनुमेतां सुहस्तो गोधुगुत दोहदेनाम् ।  
 श्रेष्ठं सवं सविता साविषन् नोऽभीद्धो घर्मस्तदु षु प्र वोचत् ॥७॥  
 हिङ्कृण्वती वसुपत्नी वसूनां वत्समिच्छन्ती मनसा न्यागन् ।  
 दुहामश्विभ्यां पयो अघ्न्येयं सा वर्धतां महते सौभगाय ॥८॥  
 जुष्टो दमूना अतिथिर्दुरोण इमं नो यज्ञमुप याहि विद्वान् ।  
 विश्वा अग्ने अभियुजो विहत्य शत्रूयतामा भरा भोजनानि ॥९॥  
 अग्ने शर्ध महते सौभगाय तव द्युम्नान्युत्तमानि सन्तु ।  
 सं जास्पत्यं सुयममा कृणुष्व शत्रूयतामभि तिष्ठा महांसि ॥१०॥  
 सूयवसाद्भगवती हि भूया अधा वयं भगवन्तः स्याम ।  
 अद्धि तृणमघ्न्ये विश्वदानीं पिब शुद्धमुदकमाचरन्ती ॥११॥

7.74

अपचितां लोहिनीनां कृष्णा मातेति शुश्रुम ।  
 मूनेर्देवस्य मूलेन सर्वा विध्यामि ता अहम् ॥१॥  
 विध्याम्यासां प्रथमां विध्यामि उत मध्यमाम् ।  
 इदं जघन्यामासामा छिनन्नि स्तुकामिव ॥२॥  
 त्वाष्ट्रेणाहं वचसा वि त ईर्ष्यामिमीमदम् ।  
 अथो यो मन्युष्टे पते तमु ते शमयामसि ॥३॥  
 व्रतेन त्वं व्रतपते समक्तो विश्वाहा सुमना दीदिहीह ।  
 तं त्वा वयं जातवेदः समिद्धं प्रजावन्त उप सदेम सर्वे ॥४॥

7.75

प्रजावतीः सूयवसे रुशन्तीः शुद्धा अपः सुप्रपाणे पिबन्तीः ।  
 मा व स्तेन ईशत माघशंसः परि वो रुद्रस्य हेतिर्वृणक्तु ॥१॥  
 पदज्ञा स्थ रमतयः संहिता विश्वनाम्नीः ।  
 उप मा देवीर्देवेभिरेत ।  
 इमं गोष्ठमिदं सदो घृतेनास्मान्त्समुक्षत ॥२॥

7.76

आ सुस्रसः सुस्रसो असतीभ्यो असत्तराः ।  
 सेहोररसतरा हवणाद्विक्लेदीयसीः ॥१॥  
 या ग्रैव्या अपचितोऽथो या उपपक्ष्याः ।  
 विजाम्नि या अपचितः स्वयंस्रसः ॥२॥  
 यः कीकसाः प्रशृणाति तलीद्यमवतिष्ठति ।  
 निर्हास्तं सर्वं जायान्यं यः कश्च ककुदि श्रितः ॥३॥  
 पक्षी जायान्यः पतति स आ विशति पूरुषम् ।  
 तदक्षितस्य भेषजमुभयोः सुक्षतस्य च ॥४॥  
 विद्म वै ते जायान्य जानं यतो जायान्य जायसे ।  
 कथं ह तत्र त्वं हनो यस्य कृण्मो हविर्गृहे ॥५॥  
 धृषत्पिब कलशे सोममिन्द्र वृत्रहा शूर समरे वसूनाम् ।  
 माध्यन्दिने सवन आ वृषस्व रयिष्ठानो रयिमस्मासु धेहि ॥६॥

7.77

सांतपना इदं हविर्मरुतस्तज्जुजुष्टन ।  
 अस्माकोती रिशादसः ॥१॥  
 यो नो मर्तो मरुतो दुर्हणायुस्तिरश्वितानि वसवो जिघांसति ।  
 द्रुहः पाशान् प्रति मुञ्चतां सस्तपिष्ठेन तपसा हन्तना तम् ॥२॥  
 सम्वत्सरीणा मरुतः स्वर्का उरुक्षयाः सगणा मानुषासः ।  
 ते अस्मत्पाशान् प्र मुञ्चन्त्वेनसस्सांतपना मत्सरा मादयिष्णवः ॥३॥

7.78

वि ते मुञ्चामि रशनां वि योक्त्रं वि नियोजनम् ।  
इहैव त्वमजस्र एध्यग्ने ॥१॥  
अस्मै क्षत्राणि धारयन्तमग्ने युनज्मि त्वा ब्रह्मणा दैव्येन ।  
दीदिह्यस्मभ्यं द्रविणेह भद्रं प्रेमं वोचो हविर्दा देवतासु ॥२॥

7.79

यत्ते देवा अकृण्वन् भागधेयममावास्ये संवसन्तो महित्वा ।  
तेना नो यज्ञं पिपृहि विश्ववारे रयिं नो धेहि सुभगे सुवीरम् ॥१॥  
अहमेवास्म्यमावास्या मामा वसन्ति सुकृतो मयीमे ।  
मयि देवा उभये साद्याश्चेन्द्रज्येष्ठाः समगच्छन्त सर्वे ॥२॥  
आगन् रात्री सङ्गमनी वसूनामूर्जं पुष्टं वस्वावेशयन्ती ।  
अमावास्यायै हविष विधेमोर्जं दुहाना पयसा न आगन् ॥३॥  
अमावास्ये न त्वदेतान्यन्यो विश्वा रूपाणि परिभूर्जजान ।  
यत्कामास्ते जुहुमस्तन् नो अस्तु वयं स्याम पतयो रयिणाम् ॥४॥

7.80

पूर्णा पश्चादुत पूर्णा पुरस्तादुन्मध्यतः पौर्णमासी जिगाय ।  
तस्यां देवैः संवसन्तो महित्वा नाकस्य पृष्ठे समिषा मदेम ॥१॥  
वृषभं वाजिनं वयं पौर्णमासं यजामहे ।  
स नो ददात्वक्षितां रयिमनुपदस्वतीम् ॥२॥  
प्रजापते न त्वदेतान्यन्यो विश्वा रूपाणि परिभूर्जजान ।  
यत्कामास्ते जुहुमस्तन् नो अस्तु वयं स्याम पतयो रयीणाम् ॥३॥  
पौर्णमासी प्रथमा यज्ञियासीदह्नां रात्रीणामतिशर्वरेषु ।  
ये त्वां यज्ञैर्यज्ञिये अर्धयन्त्यमी ते नाके सुकृतः प्रविष्टाः ॥४॥

7.81

पूर्वापरं चरतो मययैतौ शिशु क्रीडन्तौ परि यातोऽर्णवम् ।  
विश्वान्यो भुवना विचष्ट ऋतूरन्यो विदधज्जायसे नवः ॥१॥  
नवोनवो भवसि जायमानोऽह्नां केतुरुषसामेष्यग्रम् ।  
भागं देवेभ्यो वि दधास्यायन् प्र चन्द्रमस्तिरसे धीर्घमायुः ॥२॥  
सोमस्याम्शो युधां पतेऽनूनो नाम वा असि ।  
अनूनं दर्श मा कृधि प्रजया च धनेन च ॥३॥  
दर्शाऽसि दर्शतोऽसि समग्राऽसि समन्तः ।  
समग्रः समन्तो भूयासं गोभिरश्वैः प्रजया पशुभिर्गृहैर्धनेन ॥४॥  
योऽस्मान् द्वेष्टि यं वयं द्विष्मस्तस्य त्वं प्राणेना प्यायस्व ।  
आ वयं प्यासिषीमहि गोभिरश्वैः प्रजया पशुभिर्गृहैर्धनेन ॥५॥  
यं देवा अंशुमाप्याययन्ति यमक्षितमक्षिता भक्षयन्ति ।  
तेनास्मान् इन्द्रो वरुणो बृहस्पतिरा प्याययन्तु भुवनस्य गोपाः ॥६॥

7.82

अभ्यर्चत सुष्टुतिं गव्यमाजिमस्मासु भद्रा द्रविणानि धत्त ।  
इमं यज्ञं नयत देवता नो घृतस्य धारा मधुमत्पवन्ताम् ॥१॥  
मय्यग्रे अग्निं गृह्णामि सह क्षत्रेण वर्चसा बलेन ।  
मयि प्रजां मय्यायुर्दधामि स्वाहा मय्यग्निम् ॥२॥  
इहैवाग्ने अर्धधारया रयिं मा त्वा नि क्रन् पूर्वचित्ता निकारिणः ।  
क्षत्रेणाग्ने सुयममस्तु तुभ्यमुपसत्ता वर्धतां ते अनिष्टृतः ॥३॥  
अन्वग्निरुषसामग्रमख्यदन्वहानि प्रथमो जातवेदाः ।  
अनु सूर्य उषसो अनु रश्मीन् अनु द्यावापृथिवी आ विवेश ॥४॥  
प्रत्यग्निरुषसामग्रमख्यत्प्रति अहानि प्रथमो जातवेदाः ।  
प्रति सूर्यस्य पुरुधा च रश्मीन् प्रति द्यावापृथिवी आ ततान ॥५॥  
घृतं ते अग्ने दिव्ये सधस्थे घृतेन त्वां मनुरद्या समिन्धे ।  
घृतं ते देवीर्नप्त्य आ वहन्तु घृतं तुभ्यं दुहतां गावो अग्ने ॥६॥

7.83

अप्सु ते राजन् वरुण गृहो हिरण्ययो मितः ।  
ततो धृतव्रतो राजा सर्वा धामानि मुञ्चतु ॥१॥  
दाम्नोदाम्नो राजन् इतो वरुण मुञ्च नः ।  
यदापो अघ्न्या इति वरुणेति यदूचिम ततो वरुण मुञ्च नः ॥२॥  
उदुत्तमं वरुण पाशमस्मदवाधमं वि मध्यमं श्रथाय ।  
अथा वयमादित्य व्रते तवानागसो अदितये स्याम ॥३॥  
प्रास्मत्याशान् वरुण मुञ्च सर्वान् य उत्तमा अधमा वारुणा ये ।  
दुष्वज्यं दुरितं नि प्वास्मदथ गळेम सुकृतस्य लोकम् ॥४॥

7.84

अनाधृष्यो जातवेदा अमर्त्यो विराडग्ने क्षत्रभृद्दीदिहीह ।  
विश्वा अमीवाः प्रमुञ्चन् मानुषीभिः शिवाभिरद्य परि पाहि नो गयम् ॥१॥  
इन्द्र क्षत्रमभि वाममोजोऽजायथा वृषभ चर्षणीनाम् ।  
अपानुदो जनममित्रयन्तमुरुं देवेभ्यो अकृणोरु लोकम् ॥२॥  
मृगो न भीमः कुचरो गिरिष्ठाः परावत आ जगम्यात्परस्याः ।  
सृकं संशाय पविमिन्द्र तिग्मं वि शत्रून् ताढि वि मृधो नुदस्व ॥३॥

7.85  
त्यम् षु वाजिनं देवजूतं सहोवानं तरुतारं रथानाम् ।  
अरिष्टनीमं पृतनाजिमाशुं स्वस्तये ताक्षर्यमिहा हुवेम ॥१॥

7.86  
त्रातारमिन्द्रमवितारमिन्द्रं हवेहवे सुहवं शूरमिन्द्रम् ।  
हुवे नु शक्रं पुरुहूतमिन्द्रं स्वस्ति न इन्द्रो मघवान् कृणोतु ॥१॥

7.87  
यो अग्नौ रुद्रो यो अप्स्वन्तर्य ओषधीर्वीरुध आविवेश ।  
य इमाविश्वा भुवनानि चाकूपे तस्मै रुद्राय नमो अस्त्वग्नये ॥१॥

7.88  
अपेह्यरिरस्यरिर्वा असि विषे विषमपृक्था विषमिद्धा अपृक्थाः ।  
अहिमेवाभ्यपेहि तं जहि ॥१॥

7.89  
अपो दिव्या अचायिषं रसेन समपृक्षमहि ।  
पयस्वान् अग्न आगमं तं मा सं सृज वर्चसा ॥१॥  
सं माग्ने वर्चसा सृज सं प्रजया समायुषा ।  
विद्युर्मै अस्य देवा इन्द्रो विद्यात्सह ऋषिभिः ॥२॥  
इदमापः प्र वहतावद्यं च मलं च यत् ।  
यच्चाभिदुद्रोहानृतं यच्च शेषे अभीरुणम् ॥३॥  
एधोऽस्येधिषीय समिदसि समेधिषीय ।  
तेजोऽसि तेजो मयि धेहि ॥४॥

7.90  
अपि वृश्च पुराणवद्व्रततेरिव गुष्पितम् ।  
ओजो दासस्य दम्भय ॥१॥  
वयं तदस्य सम्भृतं वस्विन्द्रेण वि भजामहै ।  
म्लापयामि भ्रजः शिभ्रं वरुणस्य व्रतेन ते ॥२॥  
यथा शेषो अपायतै स्त्रीषु चासदनावयाः ।  
अवस्थस्य वनदीवतः शाङ्कुरस्य नितोदिनः ।  
यदाततमव तत्तनु यदुत्तं नि तत्तनु ॥३॥

7.91  
इन्द्रः सुत्रामा स्ववामवोभिः सुमृडीको भवतु विश्ववेदाः ।  
बाधतां द्वेषो अभयं नः कृणोतु सुवीर्यस्य पतयः स्याम ॥१॥

7.92  
स सुत्रामा स्ववामिन्द्रो अस्मदाराच्चिह्वेषः सनुतर्युयोतु ।  
तस्य वयं सुमतौ यज्ञियस्यापि भद्रे सौमनसे स्याम ॥१॥

7.93  
इन्द्रेण मन्युना वयमभि ष्याम पृतन्यतः ।  
घ्नन्तो वृत्राण्यप्रति ॥१॥

7.94  
ध्रुवं ध्रुवेण हविषाव सोमं नयामसि ।  
यथा न इन्द्रः केवलीर्विशः संमनसस्करत् ॥१॥

7.95  
उदस्य श्यावौ विथुरौ गृध्रौ घ्यामिव पेततुः ।  
उच्छोचनप्रशोचनवस्योच्छोचनौ हृदः ॥१॥  
अहमेनावुदतिष्ठिपं गावौ श्रान्तसदाविव ।  
कुर्कुराविव कूजन्तावुदवन्तौ वृकाविव ॥२॥  
आतोदिनौ नितोदिनावथो संतोदिनावुत ।

अपि नह्याम्यस्य मेढ्रं य इतः स्त्री पुमान् जभार ॥३॥

7.96

असदन् गावः सदनेऽपत्तद्वसति वयः ।  
आस्थाने पर्वता अस्थुः स्थाम्नि वृक्कावतिष्ठिपम् ॥१॥

7.97

यदद्य त्वा प्रयति यज्ञे अस्मिन् होतश्चिकित्वन् अवृणीमहीह ।  
ध्रुवमयो ध्रुवमुता शविष्ठैप्रविद्वान् यज्ञमुप याहि सोमम् ॥१॥  
समिन्द्र नो मनसा नेष गोभिः सं सूरिभिर्हरिवन्त्सं स्वस्त्या ।  
सं ब्रह्मणा देवहितं यदस्ति सं देवानां सुमतौ यज्ञियानाम् ॥२॥  
यान् आवह उशतो देव देवांस्तान् प्रेरय स्वे अग्ने सधस्थे ।  
जक्षिवांसः पपिवांसो मधून्यस्मै धत्त वसवो वसूनि ॥३॥  
सुगा वो देवाः सदना अकर्म य आजग्म सवने मा जुषाणाः ।  
वहमाना भरमाणाः स्वा वसूनि वसुं घर्म दिवमा रोहतानु ॥४॥  
यज्ञ यज्ञं गच्छ यज्ञपतिं गच्छ ।  
स्वां योनिं गच्छ स्वाहा ॥५॥  
एष ते यज्ञो यज्ञपते सहसूक्तवाकः ।  
सुवीर्यः स्वाहा ॥६॥  
वषड्धुतेभ्यो वषड्हुतेभ्यः ।  
देवा गातुविदो गातुं वित्त्वा गातुमित ॥७॥  
मनसस्पत इमं नो दिवि देवेषु यज्ञम् ।  
स्वाहा दिवि स्वाहा पृथिव्यां स्वाहान्तरिक्षे स्वाहा वाते धां स्वाहा ॥८॥

7.98

सं बर्हिरक्तं हविषा घृतेन समिन्द्रेण वसुना सं मरुद्भिः ।  
सं देवैर्विश्वदेवेभिरक्तमिन्द्रं गच्छतु हविः स्वाहा ॥१॥

7.99

परि स्तुणीहि परि धेहि वेदिं मा जामिं मोषीरमुया शयानाम् ।  
होतृषदने हरितं हिरण्ययं निष्का एते यजमानस्य लोके ॥१॥

7.100

पर्यावर्ते दुष्वज्यात्पापात्स्वज्यादभूत्याः ।  
ब्रह्माहमन्तरं कृण्वे परा स्वप्नमुखाः शुचः ॥१॥

7.101

यत्स्वप्ने अन्नमश्रामि न प्रातरधिगम्यते ।  
सर्वं तदस्तु मे शिवं नहि तद्दृष्यते दिवा ॥१॥

7.102

नमस्कृत्य द्यावापृथिवीभ्यामन्तरिक्षाय मृत्यवे ।  
मेक्षाम्यूर्ध्वस्तिष्ठन् मा मा हिंसिषुरीश्वराः ॥१॥

7.103

को अस्या नो द्रुहोऽवद्यवत्या उन् नेष्यति क्षत्रियो वस्य इच्छन् ।  
को यज्ञकामः क उ पूर्तिकामः को देवेषु वनुते दीर्घमायुः ॥१॥

7.104

कः पृश्निं धेनुं वरुणेन दत्तामथर्वने सुदुघां नित्यवत्साम् ।  
बृहस्पतिना सख्यं जुषणो यथावशं तन्वः कल्पयाति ॥१॥

7.105

अपक्रामन् पौरुषेयाद्वृणानो दैव्यं वचः ।  
प्रणीतीरभ्यावर्तस्व विश्वेभिः सखिभिः सह ॥१॥

7.106

यदस्मृति चकृम किं चिदग्न उपारिम चरणे जातवेदः ।  
ततः पाहि त्वं नः प्रचेतः शुभे सखिभ्यो अमृतत्वमस्तु नः ॥१॥

7.107

अव दिवस्तारयन्ति सप्त सूर्यस्य रश्मयः ।  
आपः समुद्रिया धारास्ताश्ल्यमसिस्रसन् ॥१॥

7.108

यो न स्तायद्विप्सति यो न आविः स्वो विद्वान् अरणो वा नो अग्ने ।  
प्रतीच्येत्त्वरणी दत्वती तान् मैषामग्ने वास्तु भून् मो अपत्यम् ॥१॥  
यो नः सुप्तान् जाग्रतो वाभिदासात्तिष्ठतो वा चरतो जातवेदः ।  
वैनरेण सयुजा सजोषास्तान् प्रतीचो निर्दह जातवेदः ॥२॥

7.109

इदमुग्राय बभ्रवे नमो यो अक्षेषु तनूवशी ।  
घृतेन कलिं शिक्षामि स नो मृडातीदृशे ॥१॥  
घृतमप्सराभ्यो वह त्वमग्ने पांसून् अक्षेभ्यः सिकता अपश्च ।  
यथाभागं हव्यदालिं जुषाणा मदन्ति देवा उभयानि हव्या ॥२॥  
अप्सरसः सधमादं मदन्ति हविर्धानमन्तरा सूर्यं च ।  
ता मे हस्तौ सं सृजन्तु घृतेन सपत्नं मे कितवं रन्धयन्तु ॥३॥  
आदिनवं प्रतिदीप्ते घृतेनास्मामभि क्षर ।  
वृक्षमिवाशन्या जहि यो अस्मान् प्रतिदीव्यति ॥४॥  
यो नो ह्युवे धनमिदं चकार यो अक्षाणां ग्लहनं शेषणं च ।  
स नो देवो हविरिदं जुषाणो गन्धर्वेभिः सधमादं मदेम ॥५॥  
संवसव इति वो नामर्धयमृगंपश्या राष्ट्रभृतो ह्यक्षाः ।  
तेभ्यो व इन्दवो हविषा विधेम वयं स्याम पतयो रयीणाम् ॥६॥  
देवान् यन् नाथितो हुवे ब्रह्मचर्यं यदूषिम ।  
अक्षान् यद्वभून् आलभे ते नो मृडन्त्वीदृशे ॥७॥

7.110

अग्न इन्द्रश्च दाशुषे हतो वृत्राण्यप्रति ।  
उभा हि वृत्रहन्तमा ॥१॥  
याभ्यामजयन्त्स्वरग्र एव यावातस्थतुर्भुवनानि विश्वा ।  
प्र चर्षणीवृषणा वज्रबाहू अग्निमिन्द्रं वृत्रहणा हुवेऽहम् ॥२॥  
उप त्वा देवो अग्रमीच्चमसेन बृहस्पतिः ।  
इन्द्र गीर्भिर्न आ विश यजमानाय सुन्वते ॥३॥

7.111

इन्द्रस्य कुक्षिरसि सोमधान आत्मा देवानामुत मानुषाणाम् ।  
इह प्रजा जनय यास्त आसु या अन्यत्रेह तास्ते रमन्ताम् ॥१॥

7.112

शुम्भनी द्यावापृथिवी अन्तिसुम्ने महिब्रते ।  
आपः सप्त सुसुवुर्देवीस्ता नो मुञ्चन्त्वंहसः ॥१॥  
मुञ्चन्तु मा शपथ्यादथो वरुण्यादुत ।  
अथो यमस्य पड्वीशाद्विश्वस्माद्देवकिल्बिषात् ॥२॥

7.113

तृष्टिके तृष्टवन्दन उदमूं छिन्धि तृष्टिके ।  
यथा कृतद्विष्टासोऽमुष्मं शेष्यावते ॥१॥  
तृष्टासि तृष्टिका विषा विषातक्यसि ।  
परिवृक्ता यथासस्यृषभस्य वशेव ॥२॥

7.114

आ ते ददे वक्षणाभ्य आ तेऽहं हृदयाद्दे ।  
आ ते मुखस्य सङ्काशात्सर्वं ते वर्च आ ददे ॥१॥  
प्रेतो यन्तु व्याध्यः प्रानुध्याः प्रो अशस्तयः ।  
अग्नी रक्षस्विनीर्हन्तु सोमो हन्तु दुरस्यतीः ॥२॥

7.115

प्र पतेतः पापि लक्ष्मि नश्येतः प्रामुतः पत ।  
अयस्मयेनाङ्केन द्विषते त्वा सजामसि ॥१॥  
या मा लक्ष्मीः पतयालूरजुष्टाभिचस्कन्द वन्दनेव वृक्षम् ।  
अन्यत्रास्मत्सवितस्तामितो धा हिरण्यहस्तो वसु नो रराणः ॥२॥  
एकशतं लक्ष्म्यो मर्त्यस्य साकं तन्वा जनुषोऽधि जाताः ।  
तासां पापिष्ठा निरितः प्र हिष्मः शिवा अस्मभ्यं जातवेदो नियच्छ ॥३॥  
एता एना व्याकरं खिले गा विष्टिता इव ।  
रमन्तां पुण्या लक्ष्मीर्याः पापीस्ता अनीनशम् ॥४॥

7.116

नमो रूराय च्यवनाय नोदनाय धृष्णवे ।  
नमः शीताय पूर्वकामकृत्वने ॥१॥

यो अन्येद्युरुभयद्युरभ्येतीमं मण्डूकम् ।  
अभ्येत्वव्रतः ॥२॥

7.117

आ मन्द्रैरिन्द्र हरिभिर्याहि मयूररोमभिः ।  
मा त्वा के चिद्धि यमन् विं न पाशिनोऽति धन्वेव तामिहि ॥१॥

7.118

मर्माणि ते वर्मणा छादयामि सोमस्त्वा राजामृतेनानु वस्ताम् ।  
उरोर्वरीयो वरुणस्ते कृणोतु जयन्तं त्वानु देवा मदन्तु ॥१॥

8.1

अन्तकाय मृत्यवे नमः प्राणा अपाना इह ते रमन्ताम् ।  
इहायमस्तु पुरुषः सहासुना सूर्यस्य भागे अमृतस्य लोके ॥१॥  
उदेनं भगो अग्रभीदुदेनं सोमो अंशुमान् ।  
उदेनं मरुतो देवा उदिन्द्राग्नी स्वस्तये ॥२॥  
इह तेऽसुरिह प्राण इहायुरिह ते मनः ।  
उत्त्वा निर्ऋत्याः पाशेभ्यो दैव्या वचा भ्रामसि ॥३॥  
उत्क्रामातः पुरुष माव पत्था मृत्योः पड्वीषमवमुञ्चमानः ।  
मा छित्था अस्माल्लोकादग्नेः सूर्यस्य संदृशः ॥४॥  
तुभ्यं वातः पवतां मातरिश्वा तुभ्यं वर्षन्त्वमृतान्यापः ।  
सूर्यस्ते तन्वे शं तपाति त्वां मृत्युर्दयतां मा प्र मेष्ठाः ॥५॥  
उद्यानं ते पुरुष नावयानं जीवातु ते दक्षतातिं कृनोमि ।  
आ हि रोहेमममृतं सुखं रथमथ जिर्विर्विदथमा वदासि ॥६॥  
मा ते मनस्तत्र गान् मा तिरो भून् मा जीवेभ्यः प्र मदो मानु गाः पितृन् ।  
विश्वे देवा अभि रक्षन्तु त्वेह ॥७॥  
मा गतानामा दीधीथा ये नयन्ति परावतम् ।  
आ रोह तमसो ज्योतिरेह्या ते हस्तौ रभामहे ॥८॥  
श्यामश्च त्वा मा शबलश्च प्रेषितौ यमस्य यौ पथिरक्षी श्वानौ ।  
अर्वाडेहि मा वि दीध्यो मात्र तिष्ठः पराङ्गनाः ॥९॥  
मैतं पन्थामनु गा भीम एष येन पूर्वं नेयथ तं ब्रवीमि ।  
तम एतत्पुरुष मा प्र पत्था भयं परस्तादभयं ते अर्वाक् ॥१०॥ {१}  
रक्षन्तु त्वानयो ये अप्स्वन्ता रक्षतु त्वा मनुष्या यमिन्धते ।  
वैश्वानरो रक्षतु जातवेदा दिव्यस्त्वा मा प्र धाग्विद्युता सह ॥११॥  
मा त्वा क्रव्यादभि मंस्तारात्संकसुकाच्चर रक्षतु त्वा द्यौ रक्षतु ।  
पृथिवी सूर्यश्च त्वा रक्षतां चन्द्रमाश्च ।  
अन्तरिक्षं रक्षतु देवहेत्याः ॥१२॥  
बोधश्च त्वा प्रतिबोधश्च रक्षतामस्वप्नश्च त्वानवद्राणश्च रक्षताम् ।  
गोपायंश्च त्वा जागृविश्च रक्षताम् ॥१३॥  
ते त्वा रक्षन्तु ते त्वा गोपायन्तु तेभ्यो नमस्तेभ्यः स्वाहा ॥१४॥  
जीवेभ्यस्त्वा समुदे वायुरिन्द्रो धाता दधातु सविता त्रायमाणः ।  
मा त्वा प्राणो बलं हासीदसुं तेऽनु ह्वयामसि ॥१५॥  
मा त्वा जम्भः संहनुर्मा तमो विदन् मा जिह्वा बर्हिस्प्रमयुः कथा स्याः ।  
उत्त्वादित्या वसवो भरन्तूदिन्द्राग्नी स्वस्तये ॥१६॥  
उत्त्वा द्यौरुत्पृथिव्युत्प्रजापतिरग्रभीत् ।  
उत्त्वा मृत्योरोषधयः सोमराज्ञीरपीपरन् ॥१७॥  
अयं देवा इहैवास्त्वयं मामुत्र गादितः ।  
इमं सहस्रवीर्येण मृत्योरुत्पारयामसि ॥१८॥  
उत्त्वा मृत्योरपीपरं सं धमन्तु वयोधसः ।  
मा त्वा व्यस्तकेश्यो मा त्वाघरुदो रुदन् ॥१९॥  
आहार्षमविदं त्वा पुनरागाः पुनर्णवः ।  
सर्वाङ्ग सर्वं ते चक्षुः सर्वमायुश्च तेऽविदम् ॥२०॥  
व्यवात्ते ज्योतिरभूदप त्वत्तमो अक्रमीत् ।  
अप त्वन् मृत्युं निर्ऋतिमप यक्षं नि दध्मसि ॥२१॥ {२}

8.2

आ रभस्वेमाममृतस्य श्रुष्टिमच्छिद्यमाना जरदष्टिरस्तु ते ।  
असुं त आयुः पुनरा भ्रामि रजस्तमो मोप गा मा प्र मेष्ठाः ॥१॥

जीवतां ज्योतिरभ्येह्यर्वाडा त्वा हरामि शतशारदाय ।  
अवमुञ्चन् मृत्युपाशान् अशस्तिं द्राघीय आयुः प्रतरं ते दधामि ॥२॥  
वातात्ते प्रानमविदं सूर्याच्चक्षुरहं तव ।  
यत्ते मनस्त्वयि तद्धारयामि सं वित्स्वाङ्गैर्वद जिह्वयालपन् ॥३॥  
प्राणेन त्वा द्विपदां चतुष्पदामग्निमिव जातमभि सं धमामि ।  
नमस्ते मृत्यो चक्षुषे नमः प्राणाय तेऽकरम् ॥४॥  
अयं जीवतु मा मृतेमं समीरयामसि ।  
कृणोम्यस्मै भेषजं मृत्यो मा पुरुषं वधीः ॥५॥  
जीवलां नधारिषां जीवन्तीमोषधीमहम् ।  
त्रायमाणां सहमानां सहस्वतीमिह हुवेऽस्मा अरिष्टतातये ॥६॥  
अधि ब्रूहि मा रभथाः सृजेमं तवैव सन्त्सर्वहायाः इहास्तु ।  
भवाशर्वो मूढतं शर्म यच्छतमपसिध्य दुरितं धत्तमायुः ॥७॥  
अस्मै मृत्यो अधि ब्रूहीमं दयस्वोदितोऽयमेतु ।  
अरिष्टः सर्वाङ्गः सुश्रुज्जरसा शतहायन आत्मना भुजमश्रुताम् ॥८॥  
देवानां हेतिः परि त्वा वृणक्तु पारयामि त्वा रजस उक्त्वा मृत्योरपीपरम् ।  
आरादग्निं क्रव्यादं निरूहं जीवातवे ते परिधिं दधामि ॥९॥  
यत्ते नियानं रजसं मृत्यो अनवधर्षम् ।  
पथ इमं तस्माद्रक्षन्तो ब्रह्मास्मै वर्म कृण्मसि ॥१०॥ {३}  
कृणोमि ते प्राणापानौ जरां मृत्युं दीर्घमायुः स्वस्ति ।  
वैवस्वतेन प्रहितान् यमदूतांश्चरतोऽप सेधामि सर्वान् ॥११॥  
आरादरातिं निर्ऋतिं परो ग्राहिं क्रव्यादः पिशाचान् ।  
रक्षो यत्सर्वं दुर्भूतं तत्तम इवाप हन्मसि ॥१२॥  
अग्नेष्ट प्रानममृतादायुष्मतो वन्वे जातवेदसः ।  
यथा न रिष्या अमृतः सजूरसस्तत्ते कृणोमि तदु ते समृध्यताम् ॥१३॥  
शिवे ते स्तां द्यावापृथिवी असंतापे अभिश्रियौ ।  
शं ते सूर्य आ तपतु शं वातो वातु ते हृदे ।  
शिवा अभि क्षरन्तु त्वापो दिव्याः पयस्वतीः ॥१४॥  
शिवास्ते सन्त्वोषधय उक्त्वाहार्षमधरस्या उत्तरां पृथिवीमभि ।  
तत्र त्वादित्यौ रक्षतां सूर्याचन्द्रमसावुभा ॥१५॥  
यत्ते वासः परिधानं यां नीविं कृणुषे त्वम् ।  
शिवं ते तन्वे तत्कृण्मः संस्पर्शोऽद्रूक्ष्णमस्तु ते ॥१६॥  
यत्क्षुरेण मर्चयता सुतेजसा वप्ता वपसि केशश्मश्रु ।  
शुभं मुखं मा न आयुः प्र मोषीः ॥१७॥  
शिवौ ते स्तां व्रीहियवावबलासावदोमधौ ।  
एतौ यक्ष्मं वि बाधेते एतौ मुञ्चतो अंहसः ॥१८॥  
यदश्रासि यत्पिबसि धान्यं कृष्याः पयः ।  
यदाद्यं यदनाद्यं सर्वं ते अन्नमविषं कृणोमि ॥१९॥  
अह्ने च त्वा रात्रये चोभाभ्यां परि दद्मसि ।  
अरायेभ्यो जिघत्सुभ्य इमं मे परि रक्षत ॥२०॥ {४}  
शतं तेऽयुतं हायनान् द्वे युगे त्रीणि चत्वारि कृण्मः ।  
इन्द्राग्नी विश्वे देवास्तेऽनु मन्यन्तामहणीयमानाः ॥२१॥  
शरदे त्वा हेमन्ताय वसन्ताय ग्रीष्माय परि दद्मसि ।  
वर्षाणि तुभ्यं स्योनानि येषु वर्धन्त ओषधीः ॥२२॥  
मृत्युरीशे द्विपदां मृत्युरीशे चतुष्पदाम् ।  
तस्मात्त्वां मृत्योर्गोपतेरुद्धारामि स मा बिभेः ॥२३॥  
सोऽरिष्ट न मरिष्यसि न मरिष्यसि मा बिभेः ।  
न वै तत्र म्रियन्ते नो यन्ति अधमं तमः ॥२४॥  
सर्वो वै तत्र जीवति गौरश्वः पुरुषः पशुः ।  
यत्रेदं ब्रह्म क्रियते परिधिर्जीवनाय कम् ॥२५॥  
परि त्वा पातु समानेभ्योऽभिचारात्सबन्धुभ्यः ।  
अमग्निर्भवामृतोऽतिजीवो मा ते हासिषुरसवः शरीरम् ॥२६॥  
ये मृत्यव एकशतं या नाष्ट्रा अतितायाः ।  
मुञ्चन्तु तस्मात्त्वां देवा अग्नेर्वैश्वानरादधि ॥२७॥  
अग्नेः शरीरमसि पारयिष्णु रक्षोहासि सपत्नहा ।  
अथो अमीवचातनः पूतुद्गनाम भेषजम् ॥२८॥ {५}

8.3

रक्षोहणं वाजिनमा जिघर्मि मित्रं प्रथिष्ठमुप यामि शर्म ।  
शिशानो अग्निः क्रतुभिः समिद्धः स नो दिवा स रिषः पातु नक्तम् ॥१॥  
अयोदंष्ट्रो अर्चिषा यातुधानान् उप स्पृश जातवेदः समिद्धः ।  
आ जिह्वया मूरदेवान् रभस्व क्रव्यादो वृष्ट्वापि धत्स्वासन् ॥२॥  
उभोभयाविन् उप धेहि दंष्ट्रौ हिंसः शिशानोऽवरं परं च ।  
उतान्तरिक्षे परि याहाग्ने जम्भैः सं धेह्याभि यातुधानान् ॥३॥

अग्ने त्वचं यातुधानस्य भिन्धि हिंसाशनिर्हरसा हन्त्वेनम् ।  
 प्र पर्वाणि जातवेदः शृणीहि क्रव्यात्क्रविष्णुर्वि चिनोत्वेनम् ॥४॥  
 यत्रेदानीं पश्यसि जातवेदस्तिष्ठन्तमग्न उत वा चरन्तम् ।  
 उतान्तरिक्षे पतन्तं यातुधानं तमस्ता विध्य शर्वा शिशानः ॥५॥  
 यज्ञैरिषुः संनममानो अग्ने इवाचा शल्यामशनिभिर्दिहानः ।  
 ताभिर्विध्य हृदये यातुधानान् प्रतीचो बाहून् प्रति भङ्ग्येषाम् ॥६॥  
 उतारब्धान्त्स्पृनुहि जातवेद उतारेभाणामृष्टिभिर्यातुधानान् ।  
 अग्ने पूर्वं नि जहि शोशुचान आमादः क्ष्विङ्कास्तमदन्त्वेनीः ॥७॥  
 इह प्र ब्रूहि यतमः सो अग्ने यातुधानो य इदं कृणोति ।  
 तमा रभस्व समिधा यविष्ठ नृचक्षसश्चक्षुषे रन्धयैनम् ॥८॥  
 तीक्ष्णोनाग्ने चक्षुषा रक्ष यज्ञं प्राञ्चं वसुभ्यः प्र णय प्रचेतः ।  
 हिंस्रं रक्षांस्यभि शोशुचानं मा त्वा दभन् यातुधाना नृचक्षः ॥९॥  
 नृचक्षा रक्षः परि पश्य विक्षु तस्य त्रीणि प्रति शृणीह्यग्रा ।  
 तस्याग्ने पृष्ठीर्हरसा शृणीहि त्रेधा मूलं यातुधानस्य वृश्च ॥१०॥ {६}  
 त्रिर्यातुधानः प्रसितिं त एत्वृतं यो अग्ने अनृतेन हन्ति ।  
 तमर्चिषा स्फूर्जयन् जातवेदः समक्षमेनं गृणते नि युङ्ग्धि ॥११॥  
 यदग्ने अद्य मिथुना शपातो यद्वाचस्तृष्टं जनयन्त रेभाः ।  
 मन्योर्मनसः शरव्या जायते या तया विध्य हृदये यातुधानान् ॥१२॥  
 परा शृणीहि तपसा यातुधानान् पराग्ने रक्षो हरसा शृणीहि ।  
 परार्चिषा मूरदेवान् छृणीहि परासुतृपः शोशुचतः शृणीहि ॥१३॥  
 पराद्य देवा वृजिनं शृणन्तु प्रत्यग्नं शपथा यन्तु सृष्टाः ।  
 वाचास्तेनं शरव ऋच्छन्तु मर्मन् विश्वस्यैतु प्रसितिं यातुधानः ॥१४॥  
 यः पौरुषेयेण क्रविषा समङ्क्ते यो अश्व्येन पशुना यातुधानः ।  
 यो अधन्याया भरति क्षीरमग्ने तेषां शीर्षाणि हरसापि वृश्च ॥१५॥  
 विषं गवां यातुधाना भरन्तामा वृश्चन्तामदितये दुरेवाः ।  
 परैणान् देवः सविता ददातु परा भागमोषधीनां जयन्ताम् ॥१६॥  
 संवत्सरीणं पय उस्त्रियायास्तस्य माशीद्यातुधानो नृचक्षः ।  
 पीयूषमग्ने यतमस्तिप्सात्तं प्रत्यञ्चमर्चिषा विध्य मर्मणि ॥१७॥  
 सनादग्ने मृणसि यातुधानान् न त्वा रक्षांसि पृतनासु जिग्युः ।  
 सहमूरान् अनु दह क्रव्यादो मा ते हेत्या मुक्षत दैव्यायाः ॥१८॥  
 त्वं नो अग्ने अधरादुदक्तस्त्वं पश्चादुत रक्षा पुरस्तात् ।  
 प्रति त्वे ते अजरासस्तपिष्ठा अघशंसं शोशुचतो दहन्तु ॥१९॥  
 पश्चात्पुरस्तादधरादुतीतरात्कविः काव्येन परि पाह्यग्ने ।  
 सखा सखायमजरो जरिम्ने अग्ने मर्ताममर्त्यस्त्वं नः ॥२०॥ {७}  
 तदग्ने चक्षुः प्रति धेहि रेभे शफारुजो येन पश्यसि यातुधानान् ।  
 अथर्ववज्ज्योतिषा दैव्येन सत्यं धूर्वन्तमचितं न्योष ॥२१॥  
 परि त्वाग्ने पुरं वयं विप्रं सहस्य धीमहि ।  
 धृषद्वर्णं दिवेदिवे हन्तारं भङ्गुरावतः ॥२२॥  
 विषेण भङ्गुरावतः प्रति स्म रक्षसो जहि ।  
 अग्ने तिग्मेन शोचिषा तपुरग्राभिरर्चिभिः ॥२३॥  
 वि ज्योतिषा बृहता भात्यग्निराविर्विश्वानि कृणुते महित्वा ।  
 प्रादेवीर्मायाः सहते दुरेवाः शिशीते शृङ्गे रक्षोभ्यो विनिक्षे ॥२४॥  
 ये ते शृङ्गे अजरे जातवेदस्तिग्महेती ब्रह्मसंशिते ।  
 ताभ्यां दुर्हार्दमभिदासन्तं किमीदिनम् ।  
 प्रत्यञ्चमर्चिषा जातवेदो वि निक्ष्व ॥२५॥  
 अग्नी रक्षांसि सेधति शुक्रशोचिरमर्त्यः ।  
 शुचिः पावक ईड्यः ॥२६॥ {८}

8.4

इन्द्रासोमा तपतं रक्ष उब्जतं न्यर्पयतं वृषणा तमोवृधः ।  
 परा शृणीतमचितो न्योषतं हतं नुदेथां नि शिशीतमत्त्रिणः ॥१॥  
 इन्द्रासोमा समघशंसमभ्यघं तपुर्पयस्तु चरुरग्निमामिव ।  
 ब्रह्मद्विषे क्रव्यादे घोरचक्षसे द्वेषो धत्तमनवायं किमीदिने ॥२॥  
 इन्द्रासोमा दुष्कृतो वत्रे अन्तरनारम्भणे तमसि प्र विध्यतम् ।  
 यतो नैषां पुनरेकश्चनोदयत्तद्वागस्तु सहसे मन्युमच्छवः ॥३॥  
 इन्द्रासोमा वर्तयतं दिवो वधं सं पृथिव्या अघशंसाय तर्हणम् ।  
 उत्तक्षतं स्वर्यं पर्वतेभ्यो येन रक्षो वावृधानं निजुर्वथः ॥४॥  
 इन्द्रासोमा वर्तयतं दिवस्पर्यग्निपतेभिर्युवमश्महन्मभिः ।  
 तपुर्वधेभिरजरेभिरत्त्रिणो नि पशानि विध्यतं यन्तु निस्वरम् ॥५॥  
 इन्द्रासोमा परि वां भूतु विश्वत इयं मतिः कक्षयाश्वेव वाजिना ।  
 यां वां होत्रां परिहिनीमि मेधयेमा ब्रह्माणि नृपती इव जिन्वतम् ॥६॥  
 प्रति स्मरेथां तुजयद्विरेवैर्हतं द्रुहो रक्षसो भङ्गुरावतः ।  
 इन्द्रासोमा दुष्कृते मा सुगं भूद्यो मा कदा चिदभिदासति द्रुहः ॥७॥  
 यो मा पाकेन मनसा चरन्तमाभिचष्टे अनृतेभिर्वचोभिः ।



आप इव काशिना समुभीता असन्न अस्त्वसतः इन्द्र वक्ता ॥८॥  
 ये पाकशंसं विहरन्त एवैर्ये वा भद्रं दूषयन्ति स्वधाभिः ।  
 अहये वा तान् प्रददातु सोम आ वा दधातु निर्ऋतेरुपष्टे ॥९॥  
 यो नो रसं दिप्सति पित्वो अग्ने अश्वानां गवां यस्तनूनाम् ।  
 रिपु स्तेन स्तेयकृद्भ्रमेतु नि ष हीयतां तन्वा तना च ॥१०॥ {११}  
 परः सो अस्तु तन्वा तना च तिस्रः पृथिवीरथो अस्तु विश्वाः ।  
 प्रति शुष्यतु यशो अस्य देवा यो मा दिवा दिप्सति यश्च नक्तम् ॥११॥  
 सुविज्ञानं चिकितुषे जनाय सच्चासच्च वचसी पस्पृधाते ।  
 तस्योर्यत्सत्यं यतरदृजीयस्तदित्सोमोऽवति हन्त्यासत् ॥१२॥  
 न वा उ सोमो वृजिनं हिनोति न क्षत्रियं मिथुया धारयन्तम् ।  
 हन्ति रक्षो हन्त्यासद्ददन्तमुभाविन्द्रस्य प्रसितौ शयाते ॥१३॥  
 यदि वाहमनूतदेवो अस्मि मोघं वा देवामप्यूहे अग्ने ।  
 किमस्मभ्यं जातवेदो हृणीषे द्रोघवाचस्ते निर्ऋथं सचन्ताम् ॥१४॥  
 अद्या मुरीय यदि यातुधानो अस्मि यदि वायुस्ततप पुरुषस्य ।  
 अधा स वीरैदशभिर्वि यूया यो मा मोघं यातुधानेत्याह ॥१५॥  
 यो मायातुं यातुधानेत्याह यो वा रक्षाः शिचिरस्मीत्याह ।  
 इन्द्रस्तं हन्तु महता वधेन विश्वस्य जन्तोरधमस्पदीष्ट ॥१६॥  
 प्र या जिगाति खर्गलेव नक्तमप द्रुहुस्तन्वंश गूहमाना ।  
 वव्रमनन्तमव सा पदीष्टिअ ग्रावाणो घन्तु रक्षस उपब्दैः ॥१७॥  
 वि तिष्ठध्वं मरुतो विक्ष्विच्छत गृभायत रक्षसः सं पिनष्टन् ।  
 वयो ये भूत्वा पतयन्ति नक्तभिर्ये वा रिपो दधिरे देवे अध्वरे ॥१८॥  
 प्र वर्तय दिवोऽश्मानमिन्द्र सोमशितं मघवन्त्सं शिशाधि ।  
 प्राक्तो अपाक्तो अधरादुदक्तोऽभि जहि रक्षसः पर्वतेन ॥१९॥  
 एत उ त्ये पतयन्ति श्वयातव इन्द्र दिप्सन्ति दिप्सवोऽदाभ्यम् ।  
 शिशिती त्वाः पिशुनेभ्यो वधं नूनं सृजदशनिं यातुमद्भ्यः ॥२०॥ {१०}  
 इन्द्रो यातूनामभवत्पराशरो हविर्मथीनामभ्याविवासताम् ।  
 अभीदु शक्रः परशुर्यथा वनं पात्रेव भिन्दन्त्सत एतु रक्षसः ॥२१॥  
 उलूकयातुं शुशुलूकयातुं जहि श्वयातुमुत कोकयातुम् ।  
 सुपर्णयातुमुत गृध्रयातुं दूषदेव प्र मृण रक्ष इन्द्र ॥२२॥  
 मा नो रक्षो अभि नड्यातुमावदपोच्छन्तु मिथुना ये किमीदिनः ।  
 पृथिवी नः पार्थिवात्पात्वंहसोऽन्तरिक्षं दिव्यात्पात्वस्मान् ॥२३॥  
 इन्द्र जहि पुमांसं यातुधानमुत स्त्रियं मायया शाशदानाम् ।  
 विग्रीवासो मूरदेवा ऋदन्तु मा ते दृशन्त्सूर्यमुच्चरन्तम् ॥२४॥  
 प्रति चक्ष्व वि चक्ष्वेन्द्रश्च सोम जागृतम् ।  
 रक्षोभ्यो वधमस्यतमशनिं यातुमद्भ्यः ॥२५॥ {११}

8.5

अयं प्रतिसरो मणिर्वीरो वीराय बध्यते ।  
 वीर्यवान्त्सपत्नहा शूरवीरः परिपाणः सुमङ्गलः ॥१॥  
 अयं मणिः सपत्नहा सुवीरः सहस्वान् वाजी सहमान उग्रः ।  
 प्रत्यक्कृत्या दूषयन् एति वीरः ॥२॥  
 अनेनेन्द्रो मणिना वृत्रमहन् अनेनासुरान् पराभावयन् मनीषी ।  
 अनेनाजयद्दयावापृथिवी उभे इमे अनेनाजयत्प्रदिशश्चतस्रः ॥३॥  
 अयं स्राक्त्यो मणिः प्रतीवर्तः प्रतिसरः ।  
 ओजस्वान् विमृधो वशी सो अस्मान् पातु सर्वतः ॥४॥  
 तदग्निराह तदु सोम आह बृहस्पतिः सविता तदिन्द्रः ।  
 ते मे देवाः पुरोहिताः प्रतीचीः कृत्याः प्रतिसरैरजन्तु ॥५॥  
 अन्तर्दधे द्यावापृथिवी उताहरुत सूर्यम् ।  
 ते मे देवाः पुरोहिताः प्रतीचीः कृत्याः प्रतिसरैरजन्तु ॥६॥  
 ये स्राक्त्यं मणिं जना वर्माणि कृण्वते ।  
 सूर्य इव दिवमारुह्य वि कृत्या बाधते वशी ॥७॥  
 स्राक्त्येन मणिना ऋषिणेव मनीषिणा ।  
 अजैषं सर्वाः पूतना वि मृधो हन्मि रक्षसः ॥८॥  
 याः कृत्या आङ्गिरसीर्याः कृत्या आसुरीर्याः ।  
 कृत्याः स्वयंकृता या उ चान्येभिराभृताः ।  
 उभयीस्ताः परा यन्तु परावतो नवर्ति नाव्या अति ॥९॥  
 अस्मै मणिं वर्म बध्नन्तु देवा इन्द्रो विष्णुः सविता रुद्रो अग्निः ।  
 प्रजापतिः परमेष्ठी विराड्वैश्वानर ऋषयश्च सर्वे ॥१०॥ {१२}  
 उत्तमो अस्योषधीनामनड्वान् जगतामिव व्याघ्रः श्वपदामिव ।  
 यमैछामाविदाम तं प्रतिस्पाशनमन्तितम् ॥११॥  
 स इद्व्याघ्रो भवत्यथो सिंहो अथो वृषा ।  
 अथो सपत्नकर्शनो यो बिभर्तीमं मणिम् ॥१२॥  
 नैनं घन्त्यप्सरसो न गन्धर्वा न मर्त्याः ।

सर्वा दिशो वि राजति यो बिभर्तीमं मणिम् ॥१३॥  
 कश्यपस्त्वामसृजत कश्यपस्त्वा समैरयत्।  
 अबिभस्त्वेन्द्रो मानुषे बिभ्रत्संश्रेषिणेऽजयत्।  
 मणिं सहस्रवीर्यं वर्म देवा अकृण्वत ॥१४॥  
 यस्त्वा कृत्याभिर्यस्त्वा दीक्षाभिर्यज्ञैर्यस्त्वा जिघांसति ।  
 प्रत्यक्त्वमिन्द्र तं जहि वज्रेण शतपर्वणा ॥१५॥  
 अयमिद्वै प्रतीवर्त ओजस्वान् संजयो मणिः ।  
 प्रजां धनं च रक्षतु परिपाणः सुमङ्गलः ॥१६॥  
 असपत्नं नो अधरादसपत्नं न उत्तरात्।  
 इन्द्रासपत्नं नः पश्चाज्ज्योतिः शूर पुरस्कृधि ॥१७॥  
 वर्म मे द्यावापृथिवी वर्माहर्वर्म सूर्यः ।  
 वर्म म इन्द्रश्चाग्निश्च वर्म धाता दधातु मे ॥१८॥  
 ऐन्द्राग्नं वर्म बहुलं यदुग्रं विश्वे देवा नातिविध्यन्ति सर्वे ।  
 तन् मे तन्वं त्रायतां सर्वतो बृहदायुष्मां जरदष्टिर्यथासानि ॥१९॥  
 आ मारुक्षदेवमणिर्मह्या अरिष्टतातये ।  
 इमं मेथिमभिसंविशध्वं तनूपानं त्रिवरूथमोजसे ॥२०॥  
 अस्मिन् इन्द्रो नि दधातु नृम्णमिमं देवासो अभिसंविशध्वम् ।  
 दीर्घायुत्वाय शतशारदायायुष्मान् जरदष्टिर्यथासत् ॥२१॥  
 स्वस्तिदा विशां पतिर्वृत्रहा विमृधो वशी ।  
 इन्द्रो बध्नातु ते मणिं जिगीवामपराजितः ।  
 सोमपा अभयङ्करो वृषा ।

8.6

यौ ते मातोन्ममार्ज जातायाः पतिवेदनौ ।  
 दुर्णामा तत्र मा गृधदलिंश उत वत्सपः ॥१॥  
 पलालानुपलालौ शर्कुं कोकं मलिम्लुचं पलीजकम् ।  
 आश्रेषं वत्रिवाससमृक्षग्रीवं प्रमीलिनम् ॥२॥  
 मा सं वृतो मोप सृप ऊरू माव सृपोऽन्तरा ।  
 कृणोम्यस्यै भेषजं बजं दुर्णामचातनम् ॥३॥  
 दुर्णामा च सुनामा चोभा सम्वृतमिच्छतः ।  
 अरायान् अप हन्मः सुनामा स्त्रैणमिच्छताम् ॥४॥  
 यः कृष्णः केश्यसुर स्तम्बज उत तुण्डिकः ।  
 अरायान् अस्या मुष्काभ्यां भंससोऽप हन्मसि ॥५॥  
 अनुजिघ्रं प्रमृशन्तं क्रव्यादमुत रेरिहम् ।  
 अरायां छवकिष्किणो बजः पिङ्गो अनीनशत् ॥६॥  
 यस्त्वा स्वप्ने निपद्यते भ्राता भूत्वा पितेव च ।  
 बजस्तान्त्सहतामितः क्लीबरूपांस्तिरीटिनः ॥७॥  
 यस्त्वा स्वपन्तीं त्सरति यस्त्वा दिप्सति जाग्रतीम् ।  
 छायामिव प्र तान्त्सूर्यः परिक्रामन् अनीनशत् ॥८॥  
 यः कृणोति मृतवत्सामवतोकामिमां स्त्रियम् ।  
 तमोषधे त्वं नाशयास्याः कमलमज्जिवम् ॥९॥  
 ये शालाः परिनृत्यन्ति सायं गर्दभनादिनः ।  
 कुसूला ये च कुक्षिलाः ककुभाः करुमाः सिमाः ।  
 तान् ओषधे त्वं गन्धेन विषुचीनान् वि नाशय ॥१०॥ {१४}  
 ये कुकुन्धाः कुकिरभाः कृत्तीर्दृशीनि बिभ्रति ।  
 क्लीबा इव प्रनृत्यन्तो वने ये कुर्वते घोषं तान् इतो नाशयामसि ॥११॥  
 ये सूर्यं न तितिक्षन्त आतपन्तममुं दिवः ।  
 अरायान् बस्तवासिनो दुर्गन्धील्लोहितास्यान् मककान् नाशयामसि ॥१२॥  
 य आत्मानमतिमात्रमंस आधाय बिभ्रति ।  
 स्त्रीणां श्रोणिप्रतोदिन इन्द्र रक्षांसि नाशय ॥१३॥  
 ये पूर्वं बध्वो यन्ति हस्ते शृङ्गानि बिभ्रतः ।  
 आपाकेस्थाः प्रहासिन स्तम्बे ये कुर्वते ज्योतिस्तान् इतो नाशयामसि ॥१४॥  
 येषां पश्चात्प्रपदानि पुरः पाष्णीः पुरो मुखा ।  
 खलजाः शकधूमजा उरुण्डा ये च मट्टमटाः कुम्भमुष्का अयाशवः ।  
 तान् अस्या ब्रह्मणस्पते प्रतीबोधेन नाशय ॥१५॥  
 पर्यस्ताक्षा अप्रचङ्कशा अस्त्रैणाः सन्तु पण्डगाः ।  
 अव भेषज पादय य इमां संविवृत्सत्यपतिः स्वपतिं स्त्रियम् ॥१६॥  
 उद्धर्षिणं मुनिकेशं जम्भयन्तं मरीमृशम् ।  
 उपेषन्तमुदुम्बलं तुण्डेलमुत शालुडम् ।  
 पदा प्र विध्य पाष्ण्यां स्थालीं गौरिव स्पन्दना ॥१७॥  
 यस्ते गर्भं प्रतिमृशाज्जातं वा मारयाति ते ।  
 पिङ्गस्तमुग्रधन्वा कृणोतु हृदयाविधम् ॥१८॥  
 ये अर्मा जतान् मारयन्ति सूतिका अनुशरते ।

स्त्रीभागान् पिङ्गो गन्धर्वान् वातो अभ्रमिवाजतु ॥१९॥  
 परिसृष्टं धरयतु यद्धितं माव पादि तत् ।  
 गर्भं त उग्रौ रक्षतां भेषजौ नीविभार्यौ ॥२०॥ {१५}  
 पवीनसात्तङ्गल्वाच्छायकादुत नग्नकात् ।  
 प्रजायै पत्ये त्वा पिङ्गः परि पातु किमीदिनः ॥२१॥  
 द्यास्याच्चतुरक्षात्पञ्चपदादनङ्गुरेः ।  
 वृन्तादभि प्रसर्पतः परि पाहि वरीवृतात् ॥२२॥  
 य आमं मांसमदन्ति पौरुषेयं च ये क्रविः ।  
 गर्भान् खादन्ति केशवास्तान् इतो नाशयामसि ॥२३॥  
 ये सूर्यात्परिसर्पन्ति स्नुषेव श्वशुरादधि ।  
 बजश्च तेषां पिङ्गश्च हृदयेऽधि नि विध्यताम् ॥२४॥  
 पिङ्ग रक्ष जायमानं मा पुमांसं स्त्रियं क्रन् ।  
 आण्डादो गर्भान् मा दभन् बाधस्वेतः किमीदिनः ॥२५॥  
 अप्रजास्त्वं मार्तवत्समाद्रोदमघमावयम् ।  
 वृक्षादिव स्रजं कृत्वाप्रिये प्रति मुञ्च तत् ॥२६॥ {१६}

8.7

या बभ्रवो याश्च शुक्रा रोहिणीरुत पृश्नयः ।  
 असिक्नीः कृष्णा ओषधीः सर्वा अछावदामसि ॥१॥  
 त्रायन्तामिमं पुरुसं यक्ष्माहेवेषितादधि ।  
 यासां द्यौः पिता पृथिवी माता समुद्रो मूलं वीरुधां बभूव ॥२॥  
 आपो अग्रं दिव्या ओषधयः ।  
 तास्ते यक्षमेनस्यमङ्गादङ्गादनीनशन् ॥३॥  
 प्रस्तृणती स्तम्बिनीरेकशुङ्गाः प्रतन्वतीरोषधीरा वदामि ।  
 अंशुमतीः कण्डिनीर्या विशाखा ह्वयामि ते वीरुधो वैश्वदेवीरुग्राः पुरुषजीवनीः ॥४॥  
 यद्गः सहः सहमाना वीर्यं यच्च वो बलम् ।  
 तेनेममस्माद्यक्ष्मात्पुरुषं मुञ्चतौषधीरथो कृणोमि भेषजम् ॥५॥  
 जीवलां नधारिषां जीवन्तीमोषधीमहम् ।  
 अरुन्धतीमुन्नयन्तीं पुष्पां मधुमतीमिह हुवेऽस्मा अरिष्टतातये ॥६॥  
 इहा यन्तु प्रचेतसो मेदिनीर्वचसो मम ।  
 यथेमं पारयामसि पुरुषं दुरितादधि ॥७॥  
 अग्नेर्घासो अपां गर्भो या रोहन्ति पुनर्णवाः ।  
 ध्रुवाः सहस्रनाम्नीर्भेषजीः सन्त्वाभृताः ॥८॥  
 अवकोल्बा उदकात्मान ओषधयः ।  
 व्यृषन्तु दुरितं तीक्ष्णशृङ्ग्यः ॥९॥  
 उन्मुञ्चन्तीर्विवरुणा उग्रा या विषदूषणीः ।  
 अथो बलासनाशनीः कृत्यादूषणीश्च यास्ता इहा यन्त्वोषधीः ॥१०॥ {१७}  
 अपक्रीताः सहीयसीर्वीरुधो या अभिष्टुताः ।  
 त्रायन्तामस्मिन् ग्रामे गामश्वं पुरुषं पशुम् ॥११॥  
 मधुमन् मूलं मधुमदग्रमासां मधुमन् मध्यं वीरुधां बभूव ।  
 मधुमत्पर्णं मधुमत्पुष्पमासां मधोः सम्भक्ता अमृतस्य भक्षो घृतमन्नं दुहतां गोपुरोगवम् ॥१२॥  
 यावतीः कियतीश्चमाः पृथिव्यामध्योषधीः ।  
 ता मा सहस्रपर्ण्यो मृत्योर्मुञ्चन्त्वंहसः ॥१३॥  
 वैयाघ्रो मणिर्वीरुधां त्रायमानोऽभिशस्तिपाः ।  
 अमीवाः सर्वा रक्षांस्यप हन्त्वधि दूरमस्मत् ॥१४॥  
 सिंहस्येव स्तनथोः सं विजन्तेऽग्नेरिव विजन्ते आभृताभ्यः ।  
 गवां यक्ष्मः पुरुषाणां वीरुद्धिरतिनुत्तो नाव्या एतु स्रोत्याः ॥१५॥  
 मुमुचाना ओषधयोऽग्नेर्वैश्वानरादधि ।  
 भूमिं संतन्वतीरित यासां राजा वनस्पतिः ॥१६॥  
 या रोहन्त्याङ्गिरसीः पर्वतेषु समेषु च ।  
 ता नः पयस्वतीः शिवा ओषधीः सन्तु शं हृदे ॥१७॥  
 याश्चाहं वेद वीरुधो याश्च पश्यामि चक्षुषा ।  
 अज्ञाता जानीमश्च या यासु विद्य च संभृतम् ॥१८॥  
 सर्वाः समग्रा ओषधीर्बोधन्तु वचसो मम ।  
 यथेमं पारयामसि पुरुषं दुरितादधि ॥१९॥  
 अश्वत्थो दर्भो वीरुधां सोमो राजामृतं हविः ।  
 व्रीहिर्यवश्च भेषजौ दिवसि पुत्रावमर्त्यौ ॥२०॥ {१८}  
 उज्जिहीध्वे स्तनयत्यभिक्रन्दत्योषधीः ।  
 यदा वः पृश्निमातरः पर्जन्यो रेतसावति ॥२१॥  
 तस्यामृतस्यमं बलं पुरुषं पययामसि ।  
 अथो कृणोमि भेषजं यथासच्छतहायनः ॥२२॥  
 वराहो वेद वीरुधं नकुलो वेद भेषजीम् ।  
 सर्पा गन्धर्वा या विदुस्ता अस्मा अवसे हुवे ॥२३॥  
 याः सुपर्णा आङ्गिरसीर्दिव्या या रघतो विदुः ।

वयांसि हंसा या विदुर्यास्व सर्वे पतत्रिणः ।  
 मृगा या विदुरोषधीस्ता अस्मा अवसे हुवे ॥२४॥  
 यावतीनामोषधीनां गावः प्राश्रन्त्यघ्न्या यवतीनामजावयः ।  
 तावतीस्तुभ्यमोषधीः शर्म यच्छन्त्वाभृताः ॥२५॥  
 यावतीषु मनुष्या भेषजं भिषजो विदुः ।  
 तावतीर्विश्वभेषजीरा भ्रामि त्वामभि ॥२६॥  
 पुष्पवतीः प्रसूमतीः फलिनीरफला उत ।  
 संमातर इव दुहामस्मा अरिष्टतातये ॥२७॥  
 उत्त्वाहार्षं पञ्चशलादथो दशशलादुत ।  
 अथो यमस्य पङ्क्तीशाद्विश्वस्माद्देवकिल्बिषात् ॥२८॥ {१९}

8.8

इन्द्रो मन्थतु मन्थिता शक्रः शूरः पुरंदरः ।  
 यथा हनाम सेना अमित्राणां सहस्रशः ॥१॥  
 पूतिरज्जुरुपध्मानी पूति सेनां कृणोत्वमूम् ।  
 धूममग्निं परादृश्यामित्रा हृत्स्वा दधतां भयम् ॥२॥  
 अमून् अश्वत्थ निः शृणीहि खादामून् खदिराजिरम् ।  
 ताजद्भङ्ग इव भजन्तां हन्त्वेनान् वधको वधैः ॥३॥  
 परुषान् अमून् परुषाह्वः कृणोतु हन्त्वेनान् वधको वधैः ।  
 क्षिप्रं शर इव भजन्तां बृहज्जालेन संदिताः ॥४॥  
 अन्तरिक्षं जालमासीज्जालदण्डा दिशो महीः ।  
 तेनाभिधाय दस्यूनां शक्रः सेनामपावपत् ॥५॥  
 बृहद्धि जालं बृहतः शक्रस्य वाजिनीवतः ।  
 तेन शत्रून् अभि सर्वान् न्युब्ज यथा न मुच्याते कतमश्चनैषाम् ॥६॥  
 बृहत्ते जालं बृहत इन्द्र शूर सहस्रार्घस्य शतवीर्यस्य ।  
 तेन शतं सहस्रमयुतं न्यबुदं जघान शक्रो दस्यूनामभिधाय सेनया ॥७॥  
 अयं लोको जालमासीच्छक्रस्य महतो महान् ।  
 तेनाहमिन्द्रजालेनामूंस्तमसाभि दधामि सर्वान् ॥८॥  
 सेदिरुग्रा व्युद्धिरार्तिश्चानपवाचना ।  
 श्रमस्तन्त्रीश्च मोहश्च तैरमून् अभि दधामि सर्वान् ॥९॥  
 मृत्यवेऽमून् प्र यच्छामि मृत्युपाशैरमी सिताः ।  
 मृत्योर्ये अघला दूतास्तेभ्य एनान् प्रति नयामि बद्ध्वा ॥१०॥ {२०}  
 नयतामून् मृत्युदूता यमदूता अपोम्भत ।  
 परःसहस्रा हन्यन्तां तृणद्वेनान् मृत्यं भवस्य ॥११॥  
 साध्या एकं जालदण्डमुद्यत्य यन्त्योजसा ।  
 रुद्रा एकं वसव एकमादित्यैरेक उद्यतः ॥१२॥  
 विश्वे देवाः उपरिष्ठादुब्जन्तो यन्त्वोजसा ।  
 मध्येन घ्नन्तो यन्तु सेनामङ्गिरसो महीम् ॥१३॥  
 वनस्पतीन् वानस्पत्यान् ओषधीरुत वीरुधः ।  
 द्विपाच्चतुष्पादिष्णामि यथा सेनाममूं हनन् ॥१४॥  
 गन्धर्वाप्सरसः सर्पान् देवान् पुण्यजनान् पितृन् ।  
 दृष्टान् अदृष्टान् इष्णामि यथा सेनाममूं हनन् ॥१५॥  
 इम उप्ता मृत्युपाशा यान् आक्रम्य न मुच्यसे ।  
 अमुष्या हन्तु सेनाया इदं कूटं सहस्रशः ॥१६॥  
 घर्मः समिद्धो अग्निनायं होमः सहस्रहः ।  
 भवश्च पृश्निबाहुश्च शर्व सेनाममूं हतम् ॥१७॥  
 मृत्योराषमा पद्यन्तां क्षुधं सेदिं वधं भयम् ।  
 इन्द्रश्चाक्षुजालाभ्यां शर्व सेनाममूं हतम् ॥१८॥  
 पराजिताः प्र त्रसतामित्रा नुत्ता धावत ब्रह्मणा ।  
 बृहस्पतिप्रनुत्तानां मामीषां मोचि कश्चन ॥१९॥  
 अव पद्यन्तामेषामायुधानि मा शकन् प्रतिधामिषुम् ।  
 अथैषां बहु बिभ्यतामिषवः घ्नन्तु मर्मणि ॥२०॥  
 सं क्रोशतामेनान् द्यावापृथिवी समन्तरिक्षं सह देवताभिः ।  
 मा ज्ञातारं मा प्रतिष्ठां विदन्त मिथो विघ्नाना उप यन्तु मृत्युम् ॥२१॥  
 दिशश्चतस्रोऽश्वतर्यो देवरथस्य पुरोडाशाः शफा अन्तरिक्षमुद्धिः ।  
 द्यावापृथिवी पक्षसी ऋतवोऽभीशवोऽन्तर्देशाः किम्करा वाक्परिरथ्यम् ॥२२॥  
 संवत्सरो रथः परिवत्सरो रथोपस्थो विराडीषाग्नी रथमुखम् ।  
 इन्द्रः सव्यष्ठाश्चन्द्रमाः सारथिः ॥२३॥  
 इतो जयेतो वि जय सं जय जय स्वाहा ।  
 इमे जयन्तु परामी जयन्तां स्वाहैभ्यो दुराहामीभ्यः ।  
 नीललोहितेनामून् अभ्यवतनोमि ॥२४॥ {२१}

8.9

कुतस्तौ जातौ कतमः सो अर्धः कस्माल्लोकात्कतमस्याः पृथिव्याः ।

वत्सौ विराजः सलिलादुदैतां तौ त्वा पृष्ठामि कतरेण दुग्धा ॥१॥  
 यो अक्रन्दयत्सलिलं महित्वा योनिं कृत्वा त्रिभुजं शयानः ।  
 वत्सः कामदुग्धो विराजः स गुहा चक्रं तन्वः पराचैः ॥२॥  
 यानि त्रीणि बृहन्ति येषां चतुर्थं वियुनक्ति वाचम् ।  
 ब्रह्मैतद्विद्यात्तपसा विपश्चिद्यस्मिन् एकं युज्यते यस्मिन् एकम् ॥३॥  
 बृहतः परि सामानि षष्ठात्पञ्चाधि निर्मिता ।  
 बृहद्बृहत्या निर्मितं कुतोऽधि बृहती मिता ॥४॥  
 बृहती परि मात्राया मातुर्मात्राधि निर्मिता ।  
 माया ह जज्ञे मायाया मायाया मातली परि ॥५॥  
 वैश्वानरस्य प्रतिमोपरि द्यौर्यावद्रोदसी विबबाधे अग्निः ।  
 ततः षष्ठादामुतो यन्ति स्तोमा उदितो यन्त्यभि षष्ठमह्नः ॥६॥  
 षट्त्वा पृष्ठाम ऋषयः कश्यपेमे त्वं हि युक्तं युयुक्षे योग्यं च ।  
 विराजमाहुर्ब्रह्मणः पितरं तां नो वि धेहि यतिधा सखिभ्यः ॥७॥  
 यां प्रच्युतामनु यज्ञाः प्रच्यवन्त उपतिष्ठन्त उपतिष्ठमानाम् ।  
 यस्या व्रते प्रसवे यक्षमेजति सा विराटृषयः परमे व्योमन् ॥८॥  
 अप्राणैति प्राणेन प्राणतीनां विराट्स्वराजमभ्येति पश्चात् ।  
 विश्वं मृशन्तीमभिरूपां विराजं पश्यन्ति त्वे न त्वे पश्यन्त्येनाम् ॥९॥  
 को विराजो मिथुनत्वं प्र वेद क ऋतून् क उ कल्पमस्याः ।  
 क्रमान् को अस्याः कतिधा विदुग्धान् को अस्या धाम कतिधा व्युष्टीः ॥१०॥ {२२}  
 इयमेव सा या प्रथमा व्यौच्छदास्वितरासु चरति प्रविष्टा ।  
 महान्तो अस्यां महिमानी अन्तर्वधूर्जिगाय नवगज्जनित्री ॥११॥  
 छन्दःपक्षे उषसा पेपिशाने समानं योनिमनु सं चरेमे ।  
 सूर्यपत्नी सं चरतः प्रजानती केतुमती अजरे भूरिरेतसा ॥१२॥  
 ऋतस्य पन्थामनु तिस्र आगुस्त्रयो घर्मा अनु रेत आगुः ।  
 प्रजामेका जिन्वत्यूर्जमेका राष्ट्रमेका रक्षति देवयूनाम् ॥१३॥  
 अग्नीषोमावदधुर्या तुरीयासीद्यज्ञस्य पक्षावृषयः कल्पयन्तः ।  
 गायत्रीं त्रिष्टुभं जगतीमनुष्टुभं बृहदकीं यजमानाय स्वराभरन्तीम् ॥१४॥  
 पञ्च व्युष्टीरनु पञ्च दोहा गां पञ्चनाम्नीमृतवोऽनु पञ्च ।  
 पञ्च दिशः पञ्चदशेन कृप्तास्ता एकमूर्ध्नीरभि लोकमेकम् ॥१५॥  
 षट्जाता भूता प्रथमजा ऋतस्य षट् सामानि षटहं वहन्ति ।  
 षट्योगं सीरमनु सामसाम षटाहुर्द्यावापृथिवीः षटुर्वीः ॥१६॥  
 षडाहुः शीतान् षडु मास उष्णान् ऋतुं नो ब्रूत यतमोऽतिरिक्तः ।  
 सप्त सुपर्णाः कवयो नि षेदुः सप्त छन्दांस्यनु सप्त दीक्षाः ॥१७॥  
 सप्त होमाः समिधो ह सप्त मधूनि सप्त ऋतवो ह सप्त ।  
 सप्ताज्यानि परि भूतमायन् ताः सप्तगुधा इति शुश्रुमा वयम् ॥१८॥  
 सप्त छन्दांसि चतुरुरत्तराण्यन्यो अन्यस्मिन् अध्यापितानि ।  
 कथं स्तोमाः प्रति तिष्ठन्ति तेषु तानि स्तोमेषु कथमार्पितानि ॥१९॥  
 कथं गायत्री त्रिवृतं व्याप कथं त्रिष्टुप्पञ्चदशेन कल्पते ।  
 त्रयस्त्रिंशेन जगती कथमनुष्टुप्कथमेकविंशः ॥२०॥ {२३}  
 अष्ट जाता भूता प्रथमजा ऋतस्याष्टेन्द्र ऋत्विजो दैव्या ये ।  
 अष्टयोनिरदितिरष्टपुत्रास्तमीं रात्रिमभि हव्यमेति ॥२१॥  
 इत्थं श्रेयो मन्यमानेदमागमं युष्माकं सख्ये अहमस्मि शेवा ।  
 समानजन्मा क्रतुरस्ति वः शिवः स वः सर्वाः सं चरति प्रजानन् ॥२२॥  
 अष्टेन्द्रस्य षड्यमस्य ऋषीणां सप्त सप्तधा ।  
 अपो मनुष्यान् ओषधीस्तामु पञ्चानु सेचिरे ॥२३॥  
 केवलीन्द्राय दुदुहे हि गुष्टिविशं पीयूषं प्रथमं दुहाना ।  
 अथातर्पयच्चतुरश्रतुर्धा देवान् मनुष्यान्सुरान् उत ऋषीन् ॥२४॥  
 को नु गौः क एकऋषिः किमु धाम का आशिषः ।  
 यक्षं पृथिव्यामेकवृदेकर्तुः कतमो नु सः ॥२५॥  
 एको गौरेक एकऋषिरेकं धामैकधाशिषः ।  
 यक्षं पृथिव्यामेकवृदेकर्तुर्नाति रिच्यते ॥२६॥ {२४}

8.10

विराड्वा इदमग्र आसीत्तस्या जातायाः सर्वमभिभेदियमेवेदं भविष्यतीति ॥१॥  
 सोदक्रामत्सा गार्हपत्ये न्यक्रामत् ।  
 गृहमेधी गृहपतिर्भवति य एवं वेद ॥२॥  
 सोदक्रामत्साहवनीये न्यक्रामत् ।  
 यन्त्यस्य देवा देवहृतिं प्रियो देवानां भवति य एवं वेद ॥३॥  
 सोदक्रामत्सा दक्षिणाग्नौ न्यक्रामत् ।  
 यज्ञतो दक्षिणीयो वासतेयो भवति य एवं वेद ॥४॥  
 सोदक्रामत्सा सभायां न्यक्रामत् ।  
 यन्त्यस्य सभां सभ्यो भवति य एवं वेद ॥५॥  
 सोदक्रामत्सा समितौ न्यक्रामत् ।  
 यन्त्यस्य समितिं सामित्यो भवति य एवं वेद ॥६॥

सोदक्रामत्सामन्त्रणे न्यक्रामत्।

यन्त्यस्यामन्त्रणामामन्त्रणीयो भवति य एवं वेद ॥७॥ {२५}

सोदक्रामत्सान्तरिक्षे चतुर्धा विक्रान्तातिष्ठत्॥८॥

तां देवमनुष्या अब्रुवन् इयमेव तद्देद यदुभय उपजीवेमेमामुप ह्वयामहा इति ॥९॥

तामुपाह्वयन्त ॥१०॥

ऊर्जे एहि स्वध एहि सूनूत एहीरावत्येहीति ॥११॥

तस्या इन्द्रो वत्स आसीद्गायत्र्यभिधान्यभ्रमूधः ॥१२॥

बृहच्च रथंतरं च द्वौ स्तनावास्तां यज्ञायज्ञियं च वामदेव्यं च द्वौ ॥१३॥

ओषधीरेव रथंतरेण देवा अदुहन् व्यचो बृहता ॥१४॥

अपो वामदेव्येन यज्ञं यज्ञायज्ञियेन ॥१५॥

ओषधीरेवास्यै रथंतरं दुहे व्यचो बृहत्॥१६॥

अपो वामदेव्यं यज्ञं यज्ञायज्ञियं य वेद ॥१७॥ {२६}

(8.12)

सोदक्रामत्सा वनस्पतीन् आगच्छतां वनस्पतयोऽघ्नत सा संवत्सरे समभवत्।

तस्माद्वनस्पतीनां संवत्सरे वृक्णमपि रोहति वृश्चतेऽस्याप्रियो भ्रातृव्यो य एवं वेद ॥१८॥

सोदक्रामत्सा पितृन् आगच्छतां पितरोऽघ्नत सा मासि समभवत्।

तस्मात्पितृभ्यो मास्युपमास्यं ददति प्र पितृयाणं पन्थां जानाति य एवं वेद ॥१९॥

सोदक्रामत्सा देवान् आगच्छतां देवा अघ्नत सार्धमासे समभवत्।

तस्माद्देवैभ्योऽर्धमासे वषट्कुर्वन्ति प्र देवयानं पन्थां जानाति य एवं वेद ॥२०॥

सोदक्रामत्सा मनुष्यान् आगच्छतां मनुष्या अघ्नत सा सद्यः समभवत्।

तस्मान् मनुष्येभ्य उभयद्वयुप हरन्त्युपास्य गृहे हरन्ति य एवं वेद ॥२१॥ {२७}

(8.13)

सोदक्रामत्सासुरान् आगच्छतामसुरा उपाह्वयन्त माय एहीति ।

तस्या विरोचनः प्राहादिर्वत्स आसीदयस्पात्रं पात्रम् ।

तां द्विमूर्धात्व्योऽधोक्तां मायामेवाधोक् ।

तां मायामसुरा उप जीवन्त्युपजीवनीयो भवति य एवं वेद ॥२२॥

सोदक्रामत्सा पितृन् आगच्छतां पितर उपाह्वयन्त स्वध एहीति ।

तस्या यमो राजा वत्स आसीद्भ्रजतपात्रं पात्रम् ।

तामन्तको मार्त्यवोऽधोक्तां स्वधामेवाधोक् ।

तां स्वधां पितर उप जीवन्त्युपजीवनीयो भवति य एवं वेद ॥२३॥

सोदक्रामत्सा मनुष्यान् आगच्छतां मनुष्या उपाह्वयन्तेरावत्येहीति ।

तस्या मनुर्वैवस्वतो वत्स आसीत्पृथिवी पात्रम् ।

तां पृथी वैन्योऽधोक्तां कृषिं च सस्यं चाधोक् ।

ते स्वधां कृषिं च सस्यं च मनुष्या उप जीवन्ति कृष्टराधिरुपजीवनीयो भवति य एवं वेद ॥२४॥

सोदक्रामत्सा सप्तऋषीन् आगच्छतां सप्तऋषय उपाह्वयन्त ब्रह्मण्वत्येहीति ।

तस्याः सोमो राजा वत्स आसीच्छन्दः पात्रम् ।

तां बृहस्पतिराङ्गिरसोऽधोक्तां ब्रह्म च तपश्चाधोक् ।

तद्ब्रह्म च तपश्च सप्तऋषय उप जीवन्ति ब्रह्मवर्चस्युपजीवनीयो भवति य एवं वेद ॥२५॥ {२८}

(8.14)

सोदक्रामत्सा देवान् आगच्छतां देवा उपाह्वयन्तोर्ज एहीति ।

तस्या इन्द्रो वत्स आसीच्चमसः पात्रम् ।

तां देवः सविताधोक्तामूर्जामेवाधोक् ।

तामूर्जा देवा उप जीवन्त्युपजीवनीयो भवति य एवं वेद ॥२६॥

सोदक्रामत्सा गन्धर्वाप्सरस आगच्छतां गन्धर्वाप्सरस उपाह्वयन्त पुण्यगन्ध एहीति ।

तस्याश्चित्ररथः सौर्यवर्चसो वत्स आसीत्पुष्करपर्णं पात्रम् ।

तां वसुरुचिः सौर्यवर्चसोऽधोक्तां पुण्यमेव गन्धमधोक् ।

तं पुण्यं गन्धं गन्धर्वाप्सरस उप जीवन्ति पुण्यगन्धिरुपजीवनीयो भवति य एवं वेद ॥२७॥

सोदक्रामत्सेतरजनान् आगच्छतामितरजना उपाह्वयन्त तिरोध एहीति ।

तस्याः कुबेरो वैश्रवणो वत्स आसीदामपात्रं पात्रम् ।

तां रजतनाभिः कबेरकोऽधोक्तां तिरोधामेवाधोक् ।

तां तिरोधामतिरजना पितर उप जीवन्ति तिरो धत्ते सर्वं पाप्मानमुपजीवनीयो भवति य एवं वेद ॥२८॥

सोदक्रामत्सा सर्पान् आगच्छतां सर्पा उपाह्वयन्त विषवत्येहीति ।

तस्यास्तक्षको वैशलेयो वत्स आसीदलाबुपात्रं पात्रम् ।

तां धृतराष्ट्र ऐरावतोऽधोक्तां विषमेवाधोक् ।

तद्विषं सर्पा उप जीवन्त्युपजीवनीयो भवति य एवं वेद ॥२९॥ {२९}

तद्यस्मा एवं विदुषेऽलाबुनाभिषिञ्चेत्प्रत्याह्न्यात्॥३०॥

न च प्रत्याह्न्यान् मनसा त्वा प्रत्याहन्मीति प्रत्याह्न्यात्॥३१॥

यत्प्रत्याहन्ति विषमेव तत्प्रत्याहन्ति ॥३२॥

विषमेवास्याप्रियं भ्रातृव्यमनुविषिच्यते य एवं वेद ॥३३॥ {३०}

9.1

दिवस्पृथिव्या अन्तरिक्षात्समुद्रादग्नेर्वतान् मधुकशा हि जज्ञे ।

तां चायित्वामृतं वसानां हृद्भिः प्रजाः प्रति नन्दन्ति सर्वाः ॥१॥

महत्पयो विश्वरूपमस्याः समुद्रस्य त्वोत रेत आहुः ।  
 यत ऐति मधुकशा रराणा तत्प्राणस्तदमृतं निविष्टम् ॥२॥  
 पश्यन्त्यस्याश्चरितं पृथिव्यां पृथङ्गनरो बहुधा मीमांसमानाः ।  
 अग्नेर्वातान् मधुकशा हि जज्ञे मरुतामुग्रा नप्तिः ॥३॥  
 मातादित्यानां दुहिता वसूनां प्राणः प्रजानाममृतस्य नाभिः ।  
 हिरण्यवर्णा मधुकशा घृताची महान् भर्गश्चरति मर्त्येषु ॥४॥  
 मधोः कशामजनयन्त देवास्तस्या गर्भो अभवद्विश्वरूपः ।  
 तं जातं तरुणं पिपतिं माता स जातो विश्वा भुवना वि चष्टे ॥५॥  
 कस्तं प्र वेद क उ तं चिकेत यो अस्या हृदः कलशः सोमधानो अक्षितः ।  
 ब्रह्मा सुमेधाः सो अस्मिन् मदेत ॥६॥  
 स तौ प्र वेद स उ तौ चिकेत यावस्याः स्तनौ सहस्रधारावक्षितौ ।  
 ऊर्जं दुहाते अनपस्फुरन्तौ ॥७॥  
 हिङ्करिक्रती बृहती वयोधा उच्चैर्घोषाभ्येति या व्रतम् ।  
 त्रीन् घर्मान् अभि वावशाना मिमाति मायुं पयते पयोभिः ॥८॥  
 यामापीनामुपसीदन्त्यापः शाक्वरा वृषभा ये स्वराजः ।  
 ते वर्षन्ति ते वर्षयन्ति तद्विदे काममूर्जमापः ॥९॥  
 स्तनयित्नुस्ते वाक्प्रजापते वृषा शुष्मं क्षिपसि भूम्यामधि ।  
 अग्नेर्वातान् मधुकशा हि जज्ञे मरुतामुग्रा नप्तिः ॥१०॥ {१}  
 यथा सोमः प्रातःसवने अश्विनोर्भवति प्रियः ।  
 एवा मे अश्विना वर्च आत्मनि ध्रियताम् ॥११॥  
 यथा सोमो द्वितीये सवन इन्द्राग्न्योर्भवति प्रियः ।  
 एवा म इन्द्राग्नी वर्च आत्मनि ध्रियताम् ॥१२॥  
 यथा सोमस्तृतीये सवन ऋभूणां भवति प्रियः ।  
 एवा म ऋभवो वर्च आत्मनि ध्रियताम् ॥१३॥  
 मधु जनिषीय मधु वंसिषीय ।  
 पयस्वान् अग्न आगमं तं मा सं सृज वर्चसा ॥१४॥  
 सं माग्ने वर्चसा सृज सं प्रजया समायुषा ।  
 विद्युर्मै अस्य देवा इन्द्रो विद्यात्सह ऋषिभिः ॥१५॥  
 यथा मधु मधुकृतः संभरन्ति मधावधि ।  
 एवा मे अश्विना वर्च आत्मनि ध्रियताम् ॥१६॥  
 यथा मक्षाः इदं मधु न्यञ्जन्ति मधावधि ।  
 एवा मे अश्विना वर्चस्तेजो बलमोजश्च ध्रियताम् ॥१७॥  
 यद्विरिषु पर्वतेषु गोष्वश्वेषु यन् मधु ।  
 सुरायां सिच्यमानायां यत्तत्र मधु तन् मयि ॥१८॥  
 अश्विना सारघेण मा मधुनाङ्क्तं शुभस्पती ।  
 यथा वर्चस्वतीं वाचमावदानि जनामनु ॥१९॥  
 स्तनयित्नुस्ते वाक्प्रजापते वृषा शुष्मं क्षिपसि भूम्यां दिवि ।  
 तां पशव उप जीवन्ति सर्वे तेनो सेषमूर्जं पिपतिं ॥२०॥  
 पृथिवी दण्डोऽन्तरिक्षं गर्भो द्यौः कशा विद्युत्प्रकशो हिरण्ययो बिन्दुः ॥२१॥  
 यो वै कशायाः सप्त मधूनि वेद मधुमान् भवति ।  
 ब्राह्मणश्च राजा च धेनुश्चानड्वांश्च व्रीहिश्च यवश्च मधु सप्तमम् ॥२२॥  
 मधुमान् भवति मधुमदस्याहार्यं भवति ।  
 मधुमतो लोकान् जयति य एवं वेद ॥२३॥  
 यद्विध्रे स्तनयति प्रजापतिरेव तत्प्रजाभ्यः प्रादुर्भवति ।  
 तस्मात्प्राचीनोपवीतस्तिष्ठे प्रजापतेऽनु मा बुध्यस्वेति ।  
 अन्वेनं प्रजा अनु प्रजापतिर्बुध्यते य एवं वेद ॥२४॥ {२}

## 9.2

सपत्नहनमृषभं घृतेन कामं शिक्षामि हविषाज्येन ।  
 नीचैः सपत्नान् मम पादय त्वमभिष्टुतो महता वीर्येण ॥१॥  
 यन् मे मनसो न प्रियं चक्षुषो यन् मे बभस्ति नाभिनन्दति ।  
 तदुष्वप्यं प्रति मूञ्चामि सपत्ने कामं स्तुत्वोदहं भिदेयम् ॥२॥  
 दुष्वप्यं काम दुरितं च कमाप्रजस्तामस्वगतामवर्तिम् ।  
 उग्र ईशानः प्रति मुञ्च तस्मिन् यो अस्मभ्यमहूरणा चिकित्सात् ॥३॥  
 नुदस्व काम प्र णुदस्व कामावर्तिं यन्तु मम ये सपत्नाः ।  
 तेषां नुत्तानामधमा तमांस्यग्ने वास्तूनि निर्दह त्वम् ॥४॥  
 सा ते काम दुहिता धेनुरुच्यते यामाहुर्वाचं कवयो विराजम् ।  
 तथा सपत्नान् परि वृङ्गिधि ये मम पर्येनान् प्राणः पशवो जीवनं वृणक्तु ॥५॥  
 कामस्येन्द्रस्य वरुणस्य राज्ञो विष्णोर्बलेन सवितुः सवेन ।  
 अग्नेर्होत्रेण प्र णुदे सपत्नां छम्बीव नावमुदकेषु धीरः ॥६॥  
 अथ्यक्षो वाजी मम काम उग्रः कृणोतु मह्यमसपत्नमेव ।  
 विश्वे देवा मम नाथं भवन्तु सर्वे देवा हवमा यन्तु म इमम् ॥७॥  
 इदमाज्यं घृतवज्जुषाणाः कामज्येष्ठा इह मादयध्वम् ।  
 कृण्वन्तो मह्यमसपत्नमेव ॥८॥

इन्द्राग्नी काम सरथं हि भूत्वा नीचैः सपत्नान् मम पादयाथः ।  
 तेषां पन्नानामधमा तमांस्यग्ने वास्तून्यनुनिर्दह त्वम् ॥९॥  
 जहि त्वं काम मम ये सपत्ना अन्धा तमांस्यव पादयैनान् ।  
 निरिन्द्रिया अरसाः सन्तु सर्वे मा ते जीविषुः कतमच्चनाहः ॥१०॥ {३}  
 अवधीत्कामो मम ये सपत्ना उरुं लोकमकरन् मह्यमेधतुम् ।  
 मह्यं नमन्तां प्रदिशश्चतस्रो मह्यं षडुर्वीर्घृतमा वहन्तु ॥११॥  
 तेऽधराञ्चः प्र प्लवन्तां छिन्ना नौरिव बन्धनात् ।  
 न सायकप्रणुत्तानां पुनरस्ति निवर्तनम् ॥१२॥  
 अग्निर्यव इन्द्रो यवः सोमो यवः ।  
 यवयावानो देवा यवयन्त्वेनम् ॥१३॥  
 असर्ववीरश्चरतु प्रणुत्तो द्वेष्यो मित्रानां परिवर्ग्यः स्वानाम् ।  
 उत पृथिव्यामव स्यन्ति विद्युत् उग्रो वो देवः प्र मृणत्सपत्नान् ॥१४॥  
 च्युता चेयं बृहत्यच्युता च विद्युद्धिभर्ति स्तनयित्वंश्च सर्वान् ।  
 उद्यन् आदित्यो द्रविणेन तेजसा नीचैः सपत्नान् नुदतां मे सहस्वान् ॥१५॥  
 यत्ते काम शर्म त्रिवरूथमुद्दु ब्रह्म वर्म विततमनतिव्याध्यं कृतम् ।  
 तेन सपत्नान् परि वृङ्गिथे ये मम पर्येनान् प्राणः पशवो जीवनं वृणक्तु ॥१६॥  
 येन देवा असुरान् प्राणुदन्त येनेन्द्रो दस्यून् अधमं तमो निनाय ।  
 तेन त्वं काम मम ये सपत्नास्तान् अस्माल्लोकात्प्र णुदस्व दूरम् ॥१७॥  
 यथा देवा असुरान् प्राणुदन्त यथेन्द्रो दस्यून् अधमं तमो बबाधे ।  
 तथा त्वं काम मम ये सपत्नास्तान् अस्माल्लोकात्प्र णुदस्व दूरम् ॥१८॥  
 कामो जज्ञे प्रथमो नैनं देवा आपुः पितरो न मर्त्याः ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥१९॥  
 यावती द्यावापृथिवी वरिम्णा यावदापः सिष्यदुर्यावदग्निः ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥२०॥ {४}  
 यावतीर्दिशः प्रदिशो विषूचीर्यावतीराशा अभिचक्षणा दिवः ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥२१॥  
 यावतीर्भृङ्गा जत्वः कुरुरवो यावतीर्वघा वृक्षसर्प्यो बभूवुः ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥२२॥  
 ज्यायान् निमिषतोऽसि तिष्ठतो ज्यायान्त्समुद्रादसि काम मन्यो ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥२३॥  
 न वै वातश्चन काममाप्नोति नाग्निः सूर्यो नीत चन्द्रमाः ।  
 ततस्त्वमसि ज्यायान् विश्वहा महांस्तस्मै ते काम नम इत्कृणोमि ॥२४॥  
 यास्ते शिवास्तन्वः काम भद्रा याभिः सत्यं भवति यद्वृणेषे ।  
 ताभिष्ट्वमस्मामभिसंविशस्वान्यत्र पापीरप वेशया धियः ॥२५॥ {५}

### 9.3

उपमितां प्रतिमितामथो परिमितामुत् ।  
 शालाया विश्ववाराया नद्धानि वि चृतामसि ॥१॥  
 यत्ते नद्धं विश्ववारे पाशो ग्रन्थिश्च यः कृतः ।  
 बृहस्पतिरिवाहं बलं वाचा वि संसयामि तत् ॥२॥  
 आ ययाम सं बबर्हं ग्रन्थीश्चकार ते दृढान् ।  
 परूंषि विद्वां छस्तेवेन्द्रेण वि चृतामसि ॥३॥  
 वंशानां ते नहनानां प्राणाहस्य तृणस्य च ।  
 पक्षाणां विश्ववारे ते नद्धानि वि चृतामसि ॥४॥  
 संदंशानां पलदानां परिष्वज्जल्यस्य च ।  
 इदं मानस्य पत्न्या नद्धानि वि चृतामसि ॥५॥  
 यानि तेऽन्तः शिक्वान्याबेधू रण्याय कम् ।  
 प्र ते तानि चृतामसि शिवा मानस्य पत्नि न उद्धिता तन्वे भव ॥६॥  
 हविर्धानमग्निशालं पत्नीनां सदनं सदः ।  
 सदो देवानामसि देवि शाले ॥७॥  
 अक्षुमोपशं विततं सहस्राक्षं विषूवति ।  
 अवनद्धमभिहितं ब्रह्मणा वि चृतामसि ॥८॥  
 यस्त्वा शाले प्रतिगृह्णाति येन चासि मिता त्वम् ।  
 उभौ मानस्य पत्नि तौ जीवतां जरदष्टी ॥९॥  
 अमुत्रैनमा गच्छताद्दृढा नद्धा परिष्कृता ।  
 यस्यास्ते विचृतामस्यङ्गमङ्गं परुष्परुः ॥१०॥ {६}  
 यस्त्वा शाले निमिमाय संजभार वनस्पतीन् ।  
 प्रजायै चक्रे त्वा शाले परमेष्ठी प्रजापतिः ॥११॥  
 नमस्तस्मै नमो दात्रे शालापतये च कृष्णः ।  
 नमोऽग्नये प्रचरते पुरुषाय च ते नमः ॥१२॥  
 गोभ्यो अश्वेभ्यो नमो यच्छालायां विजायते ।  
 विजावति प्रजावति वि ते पाशांश्चृतामसि ॥१३॥  
 अग्निमन्तश्छादयसि पुरुषान् पशुभिः सह ।  
 विजावति प्रजावति वि ते पाशांश्चृतामसि ॥१४॥



अन्तरा द्यां च पृथिवीं च यदव्यचस्तेन शालां प्रति गृह्णामि त इमाम् ।  
 यदन्तरिक्षं रजसां विमानं तत्कृण्वेऽहमुदरं शेवधिभ्यः ।  
 तेन शालां प्रति गृह्णामि तस्मै ॥१५॥  
 ऊर्जस्वती पयस्वती पृथिव्यां निमिता मिता ।  
 विश्वान्नं बिभ्रती शाले मा हिंसीः प्रतिगृह्णतः ॥१६॥  
 तृणैरावृता पलदान् वसाना रात्रीव शाला जगतो निवेशनी ।  
 मिता पृथिव्यां तिष्ठसि हस्तिनीव पट्वती ॥१७॥  
 इटस्य ते वि चृत्याम्यपिनद्धमपोर्णवन् ।  
 वरुणेन समुब्जितां मित्रः प्रातव्युब्जतु ॥१८॥  
 ब्रह्मणा शालां निमितां कविभिर्निमितां मिताम् ।  
 इन्द्राग्नी रक्षतां शालाममृतौ सोम्यं सदः ॥१९॥  
 कुलायेऽधि कुलायं कोशं कोशः समुब्जितः ।  
 तत्र मर्तो वि जायते यस्माद्विश्वं प्रजायते ॥२०॥ {७}  
 या द्विपक्षा चतुष्पक्षा षट्पक्षा या निमीयते ।  
 अष्टापक्षां दशपक्षां शालां मानस्य पत्नीमग्निर्गर्भ इवा शये ॥२१॥  
 प्रतीचीं त्वा प्रतीचीनः शाले प्रैम्यहिंसतीम् ।  
 अग्निर्हान्तरापश्च ऋतस्य प्रथमा द्वाः ॥२२॥  
 इमा आपः प्र भराम्ययक्ष्मा यक्ष्मनाशनीः ।  
 गृहान् उप प्र सीदाम्यमृतेन सहाग्निना ॥२३॥  
 मा नः पाशं प्रति मुचो गुरुर्भारो लघुर्भव ।  
 वधूमिव त्वा शाले यत्रकामं भरामसि ॥२४॥  
 प्राच्या दिशः शालाया नमो महिम्ने स्वाहा देवेभ्यः स्वाहोभ्यः ॥२५॥  
 दक्षिणाया दिशः शालाया नमो महिम्ने स्वाहा देवेभ्यः स्वाहोभ्यः ॥२६॥  
 प्रतीच्या दिशः शालाया नमो महिम्ने स्वाहा देवेभ्यः स्वाहोभ्यः ॥२७॥  
 उदीच्या दिशः शालाया नमो महिम्ने स्वाहा देवेभ्यः स्वाहोभ्यः ॥२८॥  
 ध्रुवाया दिशः शालाया नमो महिम्ने स्वाहा देवेभ्यः स्वाहोभ्यः ॥२९॥  
 ऊर्ध्वाया दिशः शालाया नमो महिम्ने स्वाहा देवेभ्यः स्वाहोभ्यः ॥३०॥  
 दिशोदिशः शालाया नमो महिम्ने स्वाहा देवेभ्यः स्वाहोभ्यः ॥३१॥ {८}

9.4

साहस्रस्त्वेष ऋषभः पयस्वान् विश्वा रूपाणि वक्षणासु बिभ्रत् ।  
 भद्रं दात्रे यजमानाय शीक्षन् बार्हस्पत्य उस्त्रियस्तन्तुमातान् ॥१॥  
 अपां यो अग्ने प्रतिमा बभूव प्रभूः सर्वस्मै पृथिवीव देवी ।  
 पिता वत्सानां पतिरघ्न्यानां साहस्रं पोषे अपि नः कृणोतु ॥२॥  
 पुमान् अन्तर्वान्त्स्थविरः पयस्वान् वसोः कबन्धमृषभो बिभर्ति ।  
 तमिन्द्राय पथिभिर्देवयानैर्हुतमग्निर्वहतु जातवेदाः ॥३॥  
 पिता वत्सानां पतिरघ्न्यानामथो पिता महतां गर्गराणाम् ।  
 वत्सो जरायु प्रतिधुक्पीयूष आमिक्षा घृतं तद्वस्य रेतः ॥४॥  
 देवानां भाग उपनाह एषोऽपां रस ओषधीनां घृतस्य ।  
 सोमस्य भक्षमवृणीत शक्रो बृहन् अद्रिरभवद्यच्छरीरम् ॥५॥  
 सोमेन पूर्णं कलशं बिभर्षि त्वस्ता रुपाणां जनिता पशूनाम् ।  
 शिवास्ते सन्तु प्रजन्व इह या इमा न्यस्मभ्यं स्वधिते यच्छ या अमूः ॥६॥  
 आजं बिभर्ति घृतमस्य रेतः साहस्रः पोषस्तमु यज्ञमाहुः ।  
 इन्द्रस्य रूपमृषभो वसानः सो अस्मान् देवाः शिव ऐतु दत्तः ॥७॥  
 इन्द्रस्यौजो वरुणस्य बाहू अश्विनोरंसौ मरुतामियं ककुत् ।  
 बृहस्पतिं संभृतमेतमाहुर्धु धीरासः कवयो ये मनीषिणः ॥८॥  
 दैवीर्विशः पयस्वान् आ तनोषि त्वामिन्द्रं त्वां सरस्वन्तमाहुः ।  
 सहस्रं स एकमुखा ददाति यो ब्राह्मण ऋषभमाजुहोति ॥९॥  
 बृहस्पतिः सविता ते वयो दधौ त्वष्टुर्वायोः पर्यात्मा त आभूतः ।  
 अन्तरिक्षे मनसा त्वा जुहोमि बर्हिष्टे द्यावापृथिवी उभे स्ताम् ॥१०॥ {९}  
 य इन्द्र इव देवेषु गोष्वेति विवावदत् ।  
 तस्य ऋषभस्याङ्गानि ब्रह्मा सं स्तौतु भद्रया ॥११॥  
 पार्श्वे आस्तामनुमत्या भगस्यास्तामनूवृजौ ।  
 अष्टीवन्तावब्रवीन् मित्रो ममैतौ केवलाविति ॥१२॥  
 भसदासीदादित्यानां श्रोणी आस्तां बृहस्पतेः ।  
 पुच्छं वातस्य देवस्य तेन धूनोत्योषधीः ॥१३॥  
 गुदा आसन्त्सिनीवाल्याः सूर्यायास्त्वचमब्रुवन् ।  
 उत्थातुरब्रुवन् पद ऋषभं यदकल्पयन् ॥१४॥  
 क्रोड आसीज्जामिशंसस्य सोमस्य क्लशो धृतः ।  
 देवाः संगत्य यत्सर्वं ऋषभं व्यकल्पयन् ॥१५॥  
 ते कुष्ठिकाः सरमायै कुर्मभ्यो अदधुः शफान् ।  
 ऊबध्यमस्य कीतेभ्यः श्ववर्तेभ्यो अधारयन् ॥१६॥  
 शृङ्गाभ्यां रक्ष ऋषत्यवर्ति हन्ति चक्षुषा ।  
 शृणोति भद्रं कर्णाभ्यां गवां यः पतिरघ्न्यः ॥१७॥

शतयाजं स यजते नैनं दुन्वन्त्यग्नयः ।  
 जिन्वन्ति विश्वे तं देवा यो ब्राह्मण ऋषभमाजुहोति ॥१८॥  
 ब्राह्मणेभ्य ऋषभं दत्त्वा वरीयः कृणुते मनः ।  
 पुष्टिं सो अघ्न्यानां स्वे गोष्ठेऽव पश्यते ॥१९॥  
 गावः सन्तु प्रजाः सन्त्वथो अस्तु तनूबलम् ।  
 तत्सर्वमनु मन्यन्तां देवा ऋषभदायिने ॥२०॥  
 अयं पिपान इन्द्र इद्रयिं दधातु चेतनीम् ।  
 अयं धेनुं सुदुघां नित्यवत्सां वशं दुहां विपश्चितं परो दिवः ॥२१॥  
 पिशङ्गरूपो नभसो वयोधा ऐन्द्रः शुष्मो विश्वरूपो न आगन् ।  
 आयुरस्मभ्यं दधत्प्रजां च रायश्च पोषैरभि नः सचताम् ॥२२॥  
 उपेहोपपर्वनास्मिन् गोष्ठ उप पूञ्च नः ।  
 उप ऋषभस्य यद्रेत उपेन्द्र तव वीर्यम् ॥२३॥  
 एतं वो युवानं प्रति दध्मो अत्र तेन क्रीडन्तीश्वरत वशामनु ।  
 मा नो हासिष्ट जनुषा सुभागा रायश्च पोषैरभि नः सचध्वम् ॥२४॥ {१०}

9.5

आ नयैतमा रभस्व सुकृतां लोकमपि गच्छतु प्रजानन् ।  
 तीर्त्वा तमांसि बहुधा महान्त्यजो नाकमा क्रमतां तृतीयम् ॥१॥  
 इन्द्राय भागं परि त्वा नयाम्यस्मिन् यज्ञे यजमानाय सूरिम् ।  
 ये नो द्विषन्त्यनु तान् रभस्वानागसो यजमानस्य वीराः ॥२॥  
 प्र पदोऽव नेनिग्धि दुश्चरितं यच्चचार शुद्धैः शफैरा क्रमतां प्रजानन् ।  
 तीर्त्वा तमांसि बहुधा विपश्यन् अजो नाकमा क्रमतां तृतीयम् ॥३॥  
 अनुच्छ्य श्यामेन त्वचमेतां विशस्तयथापर्वसिना माभि मंस्थाः ।  
 माभि द्रुहः परशः कल्पयैनं तृतीये नाके अधि वि श्रयैनम् ॥४॥  
 ऋचा कुम्भीमध्यग्नौ श्रयाम्या सिञ्चोदकमव धेहोनम् ।  
 पर्याधत्ताग्निना शमितारः शृतो गच्छतु सुकृतां यत्र लोकः ॥५॥  
 उत्क्रामातः परि चेदतप्तस्तप्ताच्चरोरधि नाकं तृतीयम् ।  
 अग्नेरग्निरधि सं बभूविथ ज्योतिष्मन्तमभि लोकं जयैतम् ॥६॥  
 अजो अग्निरजमु ज्योतिराहरजं जीवता ब्रह्मणे देयमाहुः ।  
 अजस्तमांस्यप हन्ति दूरमस्मिल्लोके श्रद्धधानेन दत्तः ॥७॥  
 पञ्चौदनः पञ्चधा वि क्रमतामाक्रंस्यमानस्त्रीणि ज्योतींषि ।  
 ईजानानां सुकृतां प्रेहि मध्यं तृतीये नाके अधि वि श्रयस्व ॥८॥  
 अजा रोह सुकृतां यत्र लोकः शरभो न चत्तोऽति दुर्गान्येषः ।  
 पञ्चौदनो ब्रह्मणे दीयमानः स दातारं तृप्त्या तर्पयाति ॥९॥  
 अजस्त्रिनाके त्रिदिवे त्रिपृष्ठे नाकस्य पृष्ठे ददिवांसं दधाति ।  
 पञ्चौदनो ब्रह्मणे दीयमानो विश्वरूपा धेनुः कामदुघास्येका ॥१०॥ {११}  
 एतद्धो ज्योतिः पितरस्तृतीयं पञ्चौदनं ब्रह्मणेऽजं ददाति ।  
 अजस्तमांस्यप हन्ति दूरमस्मिल्लोके श्रद्धधानेन दत्तः ॥११॥  
 ईजानानां सुकृतां लोकमीप्सन् पञ्चौदनं ब्रह्मणेऽजं ददाति ।  
 स व्याप्तिमाभि लोकं जयैतं शिवोऽस्मभ्यं प्रतिगृहीतो अस्तु ॥१२॥  
 अजो ह्यग्नेरजनिष्ट शोकाद्विप्रो विप्रस्य सहसो विपश्चित् ।  
 इष्टं पूतमभिपूर्तं वषट्कृतं तद्देवा ऋतुशः कल्पयन्तु ॥१३॥  
 अमोतं वासो दद्याद्धिरण्यमपि दक्षिणाम् ।  
 तथा लोकान्त्समाप्नोति ये दिव्या ये च पार्थिवाः ॥१४॥  
 एतास्त्वाजोप यन्तु धाराः सोम्या देवीर्घृतपृष्ठा मधुश्रुतः ।  
 स्तभान् पृथिवीमूत द्यां नाकस्य पृष्ठेऽधि सप्तरश्मो ॥१५॥  
 अजोऽस्यज स्वर्गोऽसि त्वया लोकमङ्गिरसः प्राजानन् ।  
 तं लोकं पुण्यं प्र ज्ञेषम् ॥१६॥  
 येना सहस्रं वहसि येनाग्ने सर्ववेदसम् ।  
 तेनेमं यज्ञं नो वह स्वर्देवेषु गन्तवे ॥१७॥  
 अजः पक्वः स्वर्गं लोके दधाति पञ्चौदनो निर्ऋतिं बाधमानः ।  
 तेन लोकान्सूर्यवतो जयेम ॥१८॥  
 यं ब्राह्मणे निदधे यं च विक्षु या विप्रुष ओदनानामजस्य ।  
 सर्वं तदग्ने सुकृतस्य लोके जानीतान् नः संगमने पथीनाम् ॥१९॥  
 अजो वा इदमग्ने व्यक्रमत तस्योर इयमभवद्द्यूः पृष्टिहम् ।  
 अन्तरिक्षं मध्यं दिशः पार्श्वं समुद्रौ कुक्षी ॥२०॥ {१२}  
 सत्यं च र्तं च चक्षुषी विश्वं सत्यं श्रद्धा प्राणो विराट्शिरः ।  
 एष वा अपरिमितो यज्ञो यदजः पञ्चौदनः ॥२१॥  
 अपरिमितमेव यज्ञमाप्नोत्यपरिमितं लोकमव रुन्दे ।  
 योऽजं पञ्चौदनं दक्षिणाज्योतिषं ददाति ॥२२॥  
 नास्यास्थीनि भिन्द्यान् न मज्जो निर्धयेत् ।  
 सर्वमेनं समादायेदमिदं प्र वेशयेत् ॥२३॥  
 इदमिदमेवास्य रूपं भवति तेनैतं सं गमयति ।  
 इषं मह ऊर्जमस्मै दुहे योऽजं पञ्चौदनं दक्षिणाज्योतिषं ददाति ॥२४॥

पञ्च रुक्मा पञ्च नवानि वस्त्रा पञ्चास्मै धेनवः कामदुघा भवन्ति ।  
 योऽजं पञ्चौदनं दक्षिणाज्योतिषं ददाति ॥२५॥  
 पञ्च रुक्मा ज्योतिरस्मै भवन्ति वर्म वासांसि तन्वे भवन्ति ।  
 स्वर्गं लोकमश्नुते योऽजं पञ्चौदनं दक्षिणाज्योतिषं ददाति ॥२६॥  
 या पूर्वं पतिं वित्त्वाऽथान्यं विन्दतेऽपरम् ।  
 पञ्चौदनं च तावजं ददाती न वि योषतः ॥२७॥  
 समानलोको भवति पुनर्भुवापरः पतिः ।  
 योऽजं पञ्चौदनं दक्षिणाज्योतिषं ददाति ॥२८॥  
 अनुपूर्ववत्सां धेनुमनड्वाहमुपबर्हणम् ।  
 वासां हिरण्यं दत्त्वा ते यन्ति दिवमुत्तमाम् ॥२९॥  
 आत्मानं पितरं पुत्रं पौत्रं पितामहम् ।  
 जायां जनित्रीं मातरं ये प्रियास्तान् उप ह्वये ॥३०॥ {१३}  
 यो वै नैदाघं नाम तु वेद ।  
 एष वै नैदाघो नाम तुर्यदजः पञ्चौदनः ।  
 निरेवाप्रियस्य भ्रातृव्यस्य श्रियं दहति भवत्यात्मना ।  
 यो वै कुर्वन्तं नाम तु वेद ।  
 कुर्वतीकुर्वतीमेवाप्रियस्य भ्रातृव्यस्य श्रियमा दत्ते ।  
 एष वै कुर्वन् नाम तुर्यदजः पञ्चौदनः ।  
 यो वै संयन्तं नाम तु वेद ।  
 संयतीसंयतीमेवाप्रियस्य भ्रातृव्यस्य श्रियमा दत्ते ।  
 एष वै संयन् नाम तुर्यदजः पञ्चौदनः ।  
 यो वै पिन्वन्तं नाम तु वेद ।  
 पिन्वतीपिन्वतीमेवाप्रियस्य भ्रातृव्यस्य श्रियमा दत्ते ।  
 एष वै पिन्वन् नाम तुर्यदजः पञ्चौदनः ।  
 यो वा उद्यन्तं नाम तु वेद ।  
 उद्यतीुद्यतीमेवाप्रियस्य भ्रातृव्यस्य श्रियमा दत्ते ।  
 एष वा उद्यन् नाम तुर्यदजः पञ्चौदनः ।  
 यो वा अभिभूवं नाम तु वेद ।  
 अभिभवन्तीमभिभवन्तीमेवाप्रियस्य भ्रातृव्यस्य श्रियमा दत्ते ।  
 एष वा अभिभूनाम तुर्यदजः पञ्चौदनः ।  
 अजं च पचत पञ्च चौदनान् ।  
 सर्वा दिशः संमनसः सध्रीचीः सान्तर्देशाः प्रति गृह्णन्तु त एतम् ॥३७॥  
 तास्ते रक्षन्तु तव तुभ्यमेतं ताभ्य आज्यं हविरिदं जुहोमि ॥३८॥ {१४}

9.6

यो विद्यादब्रह्म प्रत्यक्षं परंषि यस्य संभारा ऋचो यस्यानूक्यम् ॥१॥  
 सामानि यस्य लोमानि यजुर्हृदयमुच्यते परिस्तरणमिद्धविः ॥२॥  
 यद्वा अतिथिपतिरतिथीन् प्रतिपश्यति देवयजनं प्रेक्षते ॥३॥  
 यदभिवदति दीक्षामुपैति यदुदकं याचत्यपः प्र णयति ॥४॥  
 या एव यज्ञ आपः प्रणीयन्ते ता एव ताः ॥५॥  
 यत्तर्पणमाहरन्ति य एवाग्नीषोमीयः पशुर्बध्यते स एव सः ॥६॥  
 यदावसथान् कल्पयन्ति सदोहविधानान्येव तत्कल्पयन्ति ॥७॥  
 यदुपस्तृणन्ति बहिरिव तत् ॥८॥  
 यदुपरिशयनमाहरन्ति स्वर्गमेव तेन लोकमव रुन्द्रे ॥९॥  
 यत्कशिपूपबर्हणमाहरन्ति परिधय एव ते ॥१०॥  
 यदाज्जनाभ्यञ्जनमाहरन्त्याज्यमेव तत् ॥११॥  
 यत्पुरा परिवेषात्स्वादमाहरन्ति पुरोडाशावेव तौ ॥१२॥  
 यदशनकृतं ह्वयन्ति हविष्कृतमेव तद्ध्वयन्ति ॥१३॥  
 ये व्रीहयो यवा निरुप्यन्तेऽश्व एव ते ॥१४॥  
 यान्युलूखलमुसलानि ग्रावाण एव ते ॥१५॥  
 शूर्पं पवित्रं तुषा ऋजीषाभिषवणीरापः ॥१६॥  
 सुगदर्विर्नेक्षणमायवनं द्रोणकलशाः कुम्भ्यो वायव्यानि पात्राणीयमेव कृष्णाजिनम् ॥१७॥ {१५}  
 यजमानब्राह्मणं वा एतदतिथिपतिः कुरुते यदाहार्याणि प्रेक्षत इदं भूयाः इदाः इति ॥१८॥  
 यदाह भूय उद्धरेति प्राणमेव तेन वर्षीयांसं कुरुते ॥१९॥  
 उप हरति हवींष्या सादयति ॥२०॥  
 तेषामासन्नानामतिथिरात्मन् जुहोति ॥२१॥  
 सूचा हस्तेन प्राणे यूपे सुक्कारेण वषट्कारेण ॥२२॥  
 एते वै प्रियाश्चाप्रियाश्च त्विजः स्वर्गं लोकं गमयन्ति यदतिथयः ॥२३॥  
 स य एवं विद्वान् न द्विषन् अश्रीयान् न द्विषतोऽन्नमश्रीयान् न मीमांसितस्य न मीमांसमानस्य ॥२४॥  
 सर्वो वा एष जग्धपाप्मा यस्यान्नमश्नन्ति ॥२५॥  
 सर्वो वा एसोऽजग्धपाप्मा यस्यान्नं नाश्नन्ति ॥२६॥  
 सर्वदा वा एष युक्तग्रावार्द्रपवित्रो वितताध्वर आहृतयज्ञक्रतुर्य उपहरति ॥२७॥  
 प्राजापत्यो वा एतस्य यज्ञो विततो य उपहरति ॥२८॥

प्रजापतेर्वा एष विक्रमान् अनुविक्रमते य उपहरति ॥२९॥  
 योऽतिथीनां स आहवनीयो यो वेश्मनि स गार्हपत्यो यस्मिन् पचन्ति स दक्षिणाग्निः ॥३०॥ {१६}  
 इष्टं च वा एष पूर्तं च गृहाणामश्नाति यः पूर्वोऽतिथेरश्नाति ॥३१॥  
 पयश्च वा एष रसं च गृहाणामश्नाति यः पूर्वोऽतिथेरश्नाति ॥३२॥  
 ऊर्जा च वा एष स्फार्तिं च गृहाणामश्नाति यः पूर्वोऽतिथेरश्नाति ॥३३॥  
 प्रजां वा एष पशूंश्च गृहाणामश्नाति यः पूर्वोऽतिथेरश्नाति ॥३४॥  
 कीर्तिं वा एष यशश्च गृहाणामश्नाति यः पूर्वोऽतिथेरश्नाति ॥३५॥  
 श्रियं वा एष संविदं च गृहाणामश्नाति यः पूर्वोऽतिथेरश्नाति ॥३६॥  
 एष वा अतिथिर्यच्छ्रोत्रियस्तस्मात्पूर्वो नाश्रीयात् ॥३७॥  
 अशितावत्यतिथावश्रीयाद्यज्ञस्य सात्मत्वाय यज्ञस्याविच्छेदाय तद्ब्रतम् ॥३८॥  
 एतद्वा उ स्वादीयो यदधिगवं क्षीरं वा मांसं वा तदेव नाश्रीयात् ॥३९॥ {१७}  
 स य एवं विद्वान् क्षीरमुपसिच्योपहरति ।  
 यावदग्निष्टोमेनेष्ट्वा सुसमृद्धेनावरुद्धे तावदेनेनाव रुद्धे ॥४०॥  
 स य एवं विद्वान्त्सर्पिरुपसिच्योपहरति ।  
 यावदतिरात्रेणैष्ट्वा सुसमृद्धेनावरुद्धे तावदेनेनाव रुद्धे ॥४१॥  
 स य एवं विद्वान् मधूपसिच्योपहरति ।  
 यावदसत्रसद्येनेष्ट्वा सुसमृद्धेनावरुद्धे तावदेनेनाव रुद्धे ॥४२॥  
 स य एवं विद्वान् मांसमुपसिच्योपहरति ।  
 यावद्वादादशाहेनेष्ट्वा सुसमृद्धेनावरुद्धे तावदेनेनाव रुद्धे ॥४३॥  
 स य एवं विद्वान् उदकमुपसिच्योपहरति ।  
 प्रजानां प्रजननाय गच्छति प्रतिष्ठां प्रियः प्रजानां भवति य एवं विद्वान् उपसिच्योपहरति ॥४४॥ {१८}  
 तस्मा उषा हिङ्कृणोति सविता प्र स्तौति ।  
 बृहस्पतिरूर्जयोद्गायति त्वष्टा पुष्ट्या प्रति हरति विश्वे देवा निधनम् ॥२॥  
 निधनं भूत्याः प्रजायाः पशूनां भवति य एवं वेद ॥४५॥  
 तस्मा उद्यन्त्सूर्यो हिङ्कृणोति संगवः प्र स्तौति ।  
 मध्यन्दिन उद्गायत्यपराङ्गः प्रति हरत्यस्तंयन् निधनम् ।  
 निधनं भूत्याः प्रजायाः पशूनां भवति य एवं वेद ॥४६॥  
 तस्मा अभ्रौ भवन् हिङ्कृणोति स्तनयन् प्र स्तौति ।  
 विद्योतमानः प्रति हरति वर्षन् उद्गायत्युद्गलन् निधनम् ।  
 निधनं भूत्याः प्रजायाः पशूनां भवति य एवं वेद ॥४७॥  
 अतिथीन् प्रति पश्यति हिङ्कृणोत्यभि वदति प्र स्तौत्युदकं याचत्युद्गायति ।  
 उप हरति प्रति हरत्युच्छिष्टं निधनम् ।  
 निधनं भूत्याः प्रजायाः पशूनां भवति य एवं वेद ॥४८॥ {१९}  
 यत्क्षत्तारं ह्ययत्या श्रावयत्येव तत् ॥४९॥  
 यत्प्रतिशृणोति प्रत्याश्रावयत्येव तत् ॥५०॥  
 यत्परिवेष्टारः पात्रहस्ताः पूर्वं चापरे च प्रपद्यन्ते चमसाध्वर्यव एव ते ॥५१॥  
 तेषां न कश्चनाहोता ॥५२॥  
 यद्वा अतिथिपतिरतिथीन् परिविष्य गृहान् उपोदैत्यवभृथमेव तद्दुपावैति ॥५३॥  
 यत्सभागयति दक्षिणाः सभागयति यदनुतिष्ठत उदवस्यत्येव तत् ॥५४॥  
 स उपहृतः पृथिव्यां भक्षयत्युपहृतस्तस्मिन् यत्पृथिव्यां विश्वरूपम् ॥५५॥  
 स उपहृतोऽन्तरिक्षे भक्षयत्युपहृतस्तस्मिन् यद्वि वि विश्वरूपम् ॥५६॥  
 स उपहृतो दिवि भक्षयत्युपहृतस्तस्मिन् यद्वि वि विश्वरूपम् ॥५७॥  
 स उपहृतो देवेषु भक्षयत्युपहृतस्तस्मिन् यद्वि वि विश्वरूपम् ॥५८॥  
 स उपहृतो लोकेषु भक्षयत्युपहृतस्तस्मिन् यद्वि वि विश्वरूपम् ॥५९॥  
 स उपहृत उपहृतः ॥६०॥  
 आप्रोतीमं लोकमाप्रोत्यमुम् ॥६१॥  
 ज्योतिष्मतो लोकान् जयति य एवं वेद ॥६२॥ {२०}

9.7

प्रजापतिश्च परमेष्ठी च शुङ्गे इन्द्रः शिरो अग्निर्ललाटं यमः कृकाटम् ॥१॥  
 सोमो राजा मस्तिष्को द्यौरुत्तरहनुः पृथिव्यधरहनुः ॥२॥  
 विद्युज्जिह्वा मरुतो दन्ता रेवतीग्रीवाः कृत्तिका स्कन्धा घर्मो वहः ॥३॥  
 विश्वं वायुः स्वर्गो लोकः कृष्णद्रं विधरणी निवेष्ट्यः ॥४॥  
 श्येनः क्रोतोऽन्तरिक्षं पाजस्यं बृहस्पतिः ककुद्बृहतीः कीकसाः ॥५॥  
 देवानां पत्नीः पृष्टय उपसदः पशवः ॥६॥  
 मित्रश्च वरुणश्चांसौ त्वष्टा चार्यमा च दोषणी महादेवो बाहू ॥७॥  
 इन्द्राणी भसद्वायुः पुच्छं पवमानो बालाः ॥८॥  
 ब्रह्म च क्षत्रं च श्रोणी बलमूरू ॥९॥  
 धाता च सविता चाष्टीवन्तौ जङ्घा गन्धर्वा अप्सरसः कुष्ठिका अदितिः शफाः ॥१०॥  
 चेतो हृदयं यकृन् मेधा व्रतं पुरीतत् ॥११॥  
 क्षुत्कुक्षिरिवा वनिष्ठुः पर्वताः प्लाशयः ॥१२॥  
 क्रोधो वृक्कौ मन्युराण्डौ प्रजा शेषः ॥१३॥  
 नदी सूत्री वर्षस्य पतय स्तना स्तनयित्नु रूधः ॥१४॥  
 विश्वव्यचास्चर्मौषधयो लोमानि नक्षत्राणि रूपम् ॥१५॥

देवजना गुदा मनुष्या आन्त्राण्यत्रा उदरम् ॥१६॥  
 रक्षांसि लोहितमितरजना ऊबध्यम् ॥१७॥  
 अभ्रं पीबो मज्जा निधनम् ॥१८॥  
 अग्निरासीन उत्थितोऽश्विना ॥१९॥  
 इन्द्रः प्राङ्तिष्ठन् दक्षिणा तिष्ठन् यमः ॥२०॥  
 प्रत्यङ्तिष्ठन् धातोदङ्तिष्ठन्त्सविता ॥२१॥  
 तृणानि प्राप्तः सोमो राजा ॥२२॥  
 मित्र ईक्षमाण आवृत्त आनन्दः ॥२३॥  
 युज्यमानो वैश्वदेवो युक्तः प्रजापतिर्विमुक्तः सर्वम् ॥२४॥  
 एतद्वै विश्वरूपं सर्वरूपं गोरूपम् ॥२५॥  
 उपैत विश्वरूपाः सर्वरूपाः पशवस्तिष्ठन्ति य एवं वेद ॥२६॥ {२१}

9.8

शीर्षक्तिं शीर्षमयं कर्णशूलं विलोहितम् ।  
 सर्वं शीर्षन्यं ते रोगं बहिर्निर्मन्त्रयामहे ॥१॥  
 कर्णाभ्यां ते कङ्कूषेभ्यः कर्णशूलं विसल्पकम् ।  
 सर्वं शीर्षन्यं ते रोगं बहिर्निर्मन्त्रयामहे ॥२॥  
 यस्य हेतोः प्रच्यवते यक्ष्मः कर्णतो आस्यतः ।  
 सर्वं शीर्षन्यं ते रोगं बहिर्निर्मन्त्रयामहे ॥३॥  
 यः कृणोति प्रमोतमन्धं कृणोति पूरुषम् ।  
 सर्वं शीर्षन्यं ते रोगं बहिर्निर्मन्त्रयामहे ॥४॥  
 अङ्गभेदमङ्गज्वरं विश्वाङ्ग्यं विसल्पकम् ।  
 सर्वं शीर्षन्यं ते रोगं बहिर्निर्मन्त्रयामहे ॥५॥  
 यस्य भीमः प्रतीकाश उद्वेपयति पूरुषम् ।  
 तवमानं विश्वशारदं बहिर्निर्मन्त्रयामहे ॥६॥  
 य ऊरू अनुसर्पत्यथो एति गवीनिके ।  
 यक्ष्मं ते अन्तरङ्गेभ्यो बहिर्निर्मन्त्रयामहे ॥७॥  
 यदि कामादपकामाद्बुद्धयाज्जायते परि ।  
 हृदो बलासमङ्गेभ्यो बहिर्निर्मन्त्रयामहे ॥८॥  
 हरिमाणं ते अङ्गेभ्योऽप्यामन्तरोदरात् ।  
 यक्ष्मोधामन्तरात्मनो बहिर्निर्मन्त्रयामहे ॥९॥  
 आसो बलासो भवतु मूत्रं भवत्वामयत् ।  
 यक्ष्माणां सर्वेषां विषं निरवोचमहं त्वत् ॥१०॥ {२२}  
 बहिर्बिलं निर्द्रवतु काहाबाहं तवोदरात् ।  
 यक्ष्माणां सर्वेषां विषं निरवोचमहं त्वत् ॥११॥  
 उदरात्ते क्लोमनो नाभ्या हृदयादधि ।  
 यक्ष्माणां सर्वेषां विषं निरवोचमहं त्वत् ॥१२॥  
 याः सीमानं विरुजन्ति मूर्धानं प्रत्यर्षनीः ।  
 अहिसन्तीरनामया निर्द्रवन्तु बहिर्बिलम् ॥१३॥  
 या हृदयमुपर्षन्त्यनुतन्वन्ति कीकसाः ।  
 अहिसन्तीरनामया निर्द्रवन्तु बहिर्बिलम् ॥१४॥  
 याः पार्श्वं उपर्षन्त्यनुनिक्षन्ति पृष्ठीः ।  
 अहिसन्तीरनामया निर्द्रवन्तु बहिर्बिलम् ॥१५॥  
 यास्तिरश्चीः उपर्षन्त्यर्षणीर्वक्षणासु ते ।  
 अहिसन्तीरनामया निर्द्रवन्तु बहिर्बिलम् ॥१६॥  
 या गुदा अनुसर्पन्त्यान्त्राणि मोहयन्ति च ।  
 अहिसन्तीरनामया निर्द्रवन्तु बहिर्बिलम् ॥१७॥  
 या मज्जो निर्धयन्ति परंषि विरुजन्ति च ।  
 अहिसन्तीरनामया निर्द्रवन्तु बहिर्बिलम् ॥१८॥  
 ये अङ्गानि मदयन्ति यक्ष्मासो रोपणास्तव ।  
 यक्ष्माणां सर्वेषां विषं निरवोचमहं त्वत् ॥१९॥  
 विसल्पस्य विद्रधस्य वातीकारस्य वालजेः ।  
 यक्ष्माणां सर्वेषां विषं निरवोचमहं त्वत् ॥२०॥  
 पादाभ्यां ते जानुभ्यां श्रोणिभ्यां परि भंससः ।  
 अनूकादर्षणीरुष्णिहाभ्यः शीर्ष्णो रोगमनीनशम् ॥२१॥  
 सं ते शीर्ष्णः कपालानि हृदयस्य च यो विधुः ।  
 उद्यन् आदित्य रश्मिभिः शीर्ष्णो रोगमनीनशोऽङ्गभेदमशीशमः ॥२२॥ {२३}

9.9

अस्य वामस्य पलितस्य होतुस्तस्य भ्राता मध्यमो अस्त्यश्वः ।9.14  
 तृतीयो भ्राता घृतपृष्ठो अस्यात्रापश्यं विशपतिं सप्तपुत्रम् ॥१॥  
 सप्त युज्जन्ति रथमेकचक्रमेको अश्वो वहति सप्तनामा ।  
 त्रिनाभि चक्रमजरमनर्वं यत्रेमा विश्वा भुवनाधि तस्थुः ॥२॥  
 इमं रथमधि ये सप्त तस्थुः सप्तचक्रं सप्त वहन्त्यश्वः ।

सप्त स्वसारो अभि सं नवन्त यत्र गवां निहिता सप्त नाम ॥३॥  
 को ददर्श प्रथमं जायमानमस्थन्वन्तं यदनस्था बिभर्ति ।  
 भूम्या असुरसृगात्मा क्व स्वित्को विद्वांसमुप गात्रप्रष्टुमेतत् ॥४॥  
 इह ब्रवीतु य ईमङ्ग वेदास्य वामस्य निहितं पदं वेः ।  
 शीर्ष्णः क्षीरं दुहते गावो अस्य वत्रिं वसाना उदकं पदाऽपुः ॥५॥  
 पाकः पृष्ठामि मनसाऽविजानन् देवानामेना निहिता पदानि ।  
 वत्से बष्कयेऽधि सप्त तन्तून् वि तन्निरे कवय ओतवा उ ॥६॥  
 अचिकित्वांस्चिकितुषश्चिदत्र कवीन् पृष्ठामि विद्वानो न विद्वान् ।  
 वि यस्तस्तम्भ षटिमा रजांस्यजस्य रूपे किमपि स्वित्को ॥७॥  
 माता पितरमृत आ बभाजऽधीत्यग्रे मनसा सं हि जग्मे ।  
 सा बीभत्सुर्गर्भरसा निविद्धा नमस्वन्त इदुपवाकमीयुः ॥८॥  
 युक्ता मातासिद्धुरि दक्षिणाया अतिष्ठद्गर्भो वृजनीष्वन्तः ।  
 अमीमेद्वत्सो अनु गामपश्यद्विश्वरूप्यं त्रिषु योगनेषु ॥९॥  
 तिस्रो मत्सूत्रीन् पितृन् बिभ्रदेक उर्ध्वस्तस्थौ नेमव ग्लापयन्त ।  
 मन्त्रयन्ते दिवो अमुष्य पृष्ठे विश्वविदो वाचमविश्वविज्ञाम् ॥१०॥ {२४}  
 पञ्चारे चक्रे परिवर्तमाने यस्मिन् आतस्थुर्भुवनानि विश्वा ।  
 तस्य नाक्षस्तप्यते भूरिभारः सनादेव न छिद्यते सनाभिः ॥११॥  
 पञ्चपादं पितरं द्वादशाकृतिं दिव आहुः परे अर्धे पुरीषिणम् ।  
 अथेमे अन्य उपरे विचक्षणे सप्तचक्रे षडर आहुरपितम् ॥१२॥  
 द्वादशारं नहि तज्जराय वर्वर्ति चक्रं परि द्यामृतस्य ।  
 आ पुत्रा अग्ने मिथुनासो अत्र सप्त शतानि विंशतिश्च तस्थुः ॥१३॥  
 सनेमि चक्रमजरं वि ववृत उत्तानायां दश युक्ता वहन्ति ।  
 सूर्यस्य चक्षु रजसैत्यावृतं यस्मिन् आतस्थुर्भुवनानि विश्वा ॥१४॥  
 स्त्रियः सतीस्तामु मे पुंसः आहुः पश्यदक्षणावन् वि चेतदन्धः ।  
 कविर्यः पुत्रः स ईमा चिकेत यस्ता विजानात्स पितुष्पितासत् ॥१५॥  
 साकंजानां सप्तथमाहुरेकजं षडिद्यमा ऋषयो देवजा इति ।  
 तेषामिष्टानि विहितानि धामश स्थात्रे रेजन्ते विकृतानि रूपशः ॥१६॥  
 अवः परेण पर एना अवरेण पदा वत्सं बिभ्रती गौरुदस्थात् ।  
 सा कद्रीची कं स्वित्को परागात्क्व स्वित्सूते नहि यूथे अस्मिन् ॥१७॥  
 अवः परेण पितरं यो अस्य वेदावः परेण पर एनावरेण ।  
 कवीयमानः क इह प्र वोचद्देवं मनः कुतो अधि प्रजातम् ॥१८॥  
 ये अर्वाञ्चस्तामु पराच आहुर्ये पराञ्चस्तामु अर्वाच आहुः ।  
 इन्द्रश्च या चक्रथुः सोम तानि धुरा न युक्ता रजसो वहन्ति ॥१९॥  
 द्वा सुपर्णा सयुजा सखाया समानं वृक्षं परि ष्वजाते ।  
 तयोरन्यः पिप्पलं स्वाद्वत्त्यनश्नन्न अन्या अभि चाकशीति ॥२०॥  
 यस्मिन् वृक्षे मध्वदः सुपर्णा निविशन्ते सुवते चाधि विश्वे ।  
 तस्य यदाहुः पिप्पलं स्वाद्वग्रे तन् नोन् नशद्यः पितरं न वेद ॥२१॥  
 यत्रा सुपर्णा अमृतस्य भक्षमनिमेषं विदथाभिस्वरन्ति ।  
 एना विश्वस्य भुवनस्य गोपाः स मा धीरः पाकमत्रा विवेश ॥२२॥ {२५}

9.10

यद्गायत्रे अधि गायत्रमाहितं त्रैष्टुभं वा त्रैष्टुभान् निरतक्षत । 9.15  
 यद्वा जगज्जगत्याहितं पदं य इत्तद्विदुस्ते अमृतत्वमानुशुः ॥१॥  
 गायत्रेण प्रति मिमीते अर्कमर्केण साम त्रैष्टुभेन वाकम् ।  
 वाकेन वाकं द्विपदा चतुष्पदाक्षरेण मिमते सप्त वाणीः ॥२॥  
 जगता सिन्धुं दिव्यस्कभायद्रथंतरे सूर्यं पर्यपश्यत् ।  
 गायत्रस्य समिधस्तिस्त्र आहुस्ततो मद्वा प्र रिरिचे महित्वा ॥३॥  
 उप ह्वये सुदुघां धेनुमेतां सुहस्ती गोधुगुत दोहदेनाम् ।  
 श्रेष्ठं सवं सविता साविषन् नोऽभीद्धो घर्मस्तदु षु प्र वोचत् ॥४॥  
 हिङ्कृण्वती वसुपत्नी वसूनां वत्समिच्छन्ती मनसाभ्यागात् ।  
 दुहामांश्चिभ्यां पयो अघ्न्येयं सा वर्धतां महते सौभगाय ॥५॥  
 गौरमीमेदभि वत्सं मिषन्तं मूर्धानं हिङ्कृणोन् मातवा उ ।  
 सूक्वाणं घर्ममभि वावशाना मिमाति मायुं पयते पयोभिः ॥६॥  
 अयं स शिङ्क्ते येन गौरभिवृता मिमाति मयुं ध्वसनावधि श्रिता ।  
 सा चित्तिभिर्नि हि चकार मर्त्यान् विद्युद्भवन्ती प्रति वत्रिमौहत ॥७॥  
 अनच्छये तुरगातु जीवमेजदधुवं मध्य आ पस्त्यानाम् ।  
 जीवो मृतस्य चरति स्वधाभिरमर्त्यो मर्त्येना सयोनः ॥८॥  
 विधुं दद्राणं सलिलस्य पृष्ठे युवानं सन्तं पलितो जगार ।  
 देवस्य पश्य काव्यं महित्वाद्य ममार स ह्यः समान ॥९॥  
 य ई चकार न सो अस्य वेद य ई ददर्श हिरुगिन् नु तस्मात् ।  
 स मातुर्योना परिवीतो अन्तर्बहुप्रजा निर्ऋतिरा विवेश ॥१०॥ {२६}  
 अपश्यं गोपामनिपद्यमानमा च परा च पथिभिश्चरन्तम् ।  
 स सध्रीचीः स विषूचीर्वसान आ वरीवर्ति भुवनेष्वन्तः ॥११॥  
 द्यौर्नः पिता जनिता नाभिरत्र बन्धुर्नो माता पृथिवी महीयम् ।

उत्तानयोश्चम्वोर्योनिरन्तरत्रा पिता दुहितुर्गर्भमाधात् ॥१२॥  
 पृष्ठामि त्वा परमन्तं पृथिव्याः पृष्ठामि वृष्णो अश्वस्य रेतः ।  
 पृष्ठामि विश्वस्य भुवनस्य नाभिं पृष्ठामि वाचः परमं व्योम ॥१३॥  
 इयं वेदिः परो अन्तः पृथिव्या अयं सोमो वृष्णो अश्वस्य रेतः ।  
 अयं यज्ञो विश्वस्य भुवनस्य नाभिर्ब्रह्मायं वाचः परमं व्योम ॥१४॥  
 न वि जानामि यदिवेदमस्मि निण्यः संनद्धो मनसा चरामि ।  
 यदा मागन् प्रथमजा ऋतस्यादिद्वाचो अश्रुवे भागमस्याः ॥१५॥  
 अपाङ्प्राडेति स्वधया गृभीतोऽमर्त्यो मर्त्येना सयोनिः ।  
 ता शश्वन्ता विषूचीना वियन्ता न्यन्यं चिक्युर्न नि चिक्युरन्यम् ॥१६॥  
 सप्तार्धगर्भा भुवनस्य रेतो विष्णोस्तिष्ठन्ति प्रदिशा विधर्माणि ।  
 ते धीतिभिर्मनसा ते विपश्चितः परिभुवः परि भवन्ति विश्वतः ॥१७॥  
 ऋचो अक्षरे परमे व्योमन् यस्मिन् देवा अधि विश्वे निषेदुः ।  
 यस्तन् न वेद किमृचा करिष्यति य इत्तद्विदुस्ते अमी समासते ॥१८॥  
 ऋचः पदं मात्रया कल्पयन्तोऽर्धर्चेन चकृपुर्विश्वमेजत् ।  
 त्रिपाद्ब्रह्म पुरुरूपं वि तष्टे तेन जीवन्ति प्रदिशश्चतस्रः ॥१९॥  
 सूयवसाद्भगवती हि भूया अधा वयं भगवन्तः स्याम ।  
 अद्धि तृणमघ्ये विश्वदानीं पिब शुद्धमुदकमाचरन्ती ॥२०॥ {२७}  
 गौरिन् मिमाय सलिलानि तक्षती एकपदी द्विपदी सा चतुष्पदी ।  
 अष्टापदी नवपदी बभूवुषी सहस्राक्षरा भुवनस्य पङ्क्तिस्तस्याः समुद्रा अधि वि क्षरन्ति ॥२१॥  
 कृष्णं नियानं हरयः सुपर्णा अपो वसाना दिवमुत्पतन्ति ।  
 तमाववृत्रन्तसदनादृतस्यादिद्भुतेन पृथिवीं व्यदुः ॥२२॥  
 अपादेति प्रथमा पद्वतीनां कस्तद्वा मित्रावरुणा चिकेत ।  
 गर्भो भारं भरत्या चिदस्या ऋतं पिपतिं अनृतं नि पाति ॥२३॥  
 विराड्वाग्विराट्पृथिवी विराडन्तरिक्षं विराट्प्रजापतिः ।  
 विराण्मृत्युः साध्यानामधिराजो बभूव तस्य भूतं भव्यं वशे स मे भूतं भव्यं वशे कृणोतु ॥२४॥  
 शकमयं धूममारादपश्यं विषूवता पर एनावरेण ।  
 उक्षाणं पृश्निमपचन्त वीरास्तानि धर्माणि प्रथमान्यासन् ॥२५॥  
 त्रयः केशिन ऋतुथा वि चक्षते संवत्सरे वपत एक एषाम् ।  
 विश्वमन्यो अभिचष्टे शचीभिर्धार्जिरेकस्य ददृशे न रूपम् ॥२६॥  
 चत्वारि वाक्परिमिता पदानि तानि विदुर्ब्राह्मणा ये मनीषिणः ।  
 गुहा त्रीणि निहिता नेङ्गयन्ति तुरीयं वाचो मनुष्या वदन्ति ॥२७॥  
 इन्द्रं मित्रं वरुणमग्निमाहु रथो दिव्यः स सुपर्णो गरुत्मान् ।  
 एकं सद्दिप्रा बहुधा वदन्त्यग्निं यमं मातरिश्वानमाहुः ॥२८॥ {२८}

10.1

यां कल्पयन्ति वहतौ वधूमिव विश्वरूपां हस्तकृतां चिकित्सवः ।  
 सारादेत्वप नुदाम एनाम् ॥१॥  
 शीर्षण्वती नस्वती कर्णिणी कृत्याकृता संभृता विश्वरूपा ।  
 सारादेत्वप नुदाम एनाम् ॥२॥  
 शूद्रकृता राजकृता स्त्रीकृता ब्रह्मभिः कृता ।  
 जाया पत्या नुत्तेव कर्तारं बन्ध्वच्छतु ॥३॥  
 अनयाहमोषध्या सर्वाः कृत्या अदूदुषम् ।  
 यां क्षेत्रे चक्रुर्या गोषु यां वा ते पुरुषेषु ॥४॥  
 अघमस्त्वघकृते शपथः शपथीयते ।  
 प्रत्यक्प्रतिप्रहिण्मो यथा कृत्याकृतं हनत् ॥५॥  
 प्रतीचीन आङ्गिरसोऽध्यक्षो नः पुरोहितः ।  
 प्रतीचीः कृत्या आकृत्यामून् कृत्याकृतो जहि ॥६॥  
 यस्त्वोवाच परेहीति प्रतिकूलमुदाय्यम् ।  
 तं कृत्येऽभिनिवर्तस्व मास्मान् इच्छो अनागसः ॥७॥  
 यस्ते परंरुषि संदधौ रथस्येव भुर्धिया ।  
 तं गच्छ तत्र तेऽयनमज्ञातस्तेऽयं जनः ॥८॥  
 ये त्वा कृत्वालेभिरे विद्वला अभिचारिणः ।  
 शंभ्विदं कृत्यादूषणं प्रतिवर्त्म पुनःसरं तेन त्वा स्नपयामसि ॥९॥  
 यद्दुर्भगां प्रस्नपितां मृतवत्सामुपोयिम ।  
 अपैतु सर्वं मत्पापं द्रविणं मोप तिष्ठतु ॥१०॥ {१}  
 यत्ते पितृभ्यो ददतो यज्ञे वा नाम जगहुः ।  
 संदेश्यात्सर्वस्मात्पापादिमा मुञ्चन्तु त्वीषधीः ॥११॥  
 देवैन्सात्पित्र्यान् नामग्राहात्संदेश्यादभिनिष्कृतात् ।  
 मुञ्चन्तु त्वा वीरुधो वीर्येण ब्रह्मणा ऋग्भिः पयसा ऋषीणाम् ॥१२॥  
 यथा वातश्यावयति भूम्या रेणुमन्तरिक्षाच्चाभ्रम् ।  
 एवा मत्सर्वं दुर्भूतं ब्रह्मनुत्तमपायति ॥१३॥  
 अप क्राम नानदती विनद्धा गर्दभीव ।  
 कर्तृन् नक्षस्वेतो नुत्ता ब्रह्मणा वीर्यावता ॥१४॥

अयं पन्थाः कृत्येति त्वा नयामोऽभिप्रहितां प्रति त्वा प्र हिण्मः ।  
 तेनाभि याहि भञ्जत्यनस्वतीव वाहिनी विश्वरूपा कुरुतिनी ॥१५॥  
 पराक्ते ज्योतिरपथं ते अर्वागन्यत्रास्मदयना कृणुष्व ।  
 परेणेहि नवतिं नाव्या अति दुर्गाः स्रोत्या मां क्षणिष्ठाः परेहि ॥१६॥  
 वात इव वृक्षान् नि मृणीहि पादय मा गामश्वं पुरुषमुच्छिष एषाम् ।  
 कर्तुन् निवृत्येतः कृत्येऽप्रजास्त्वाय बोधय ॥१७॥  
 यां ते बर्हिषि यां श्मशाने क्षेत्रे कृत्यां वलगं वा निचख्नुः ।  
 अग्नौ वा त्वा गार्हपत्येऽभिचेरुः पाकं सन्तं धीरतरा अनागसम् ॥१८॥  
 उपाहृतमनुबुद्धं निखातं वैरं त्सार्यन्वविदाम कर्त्रम् ।  
 तदेतु यत आभूतं तत्राश्व इव वि वर्ततां हन्तु कृत्याकृतः प्रजाम् ॥१९॥  
 स्वायसा असयः सन्ति नो गृहे विद्वा ते कृत्ये यतिधा परंषि ।  
 उत्तिष्ठैव परेहीतोऽज्ञाते किमिहेच्छसि ॥२०॥ {२}  
 ग्रीवास्ते कृत्ये पादौ चापि कत्स्यामि निर्द्रव ।  
 इन्द्राग्नी अस्मान् रक्षतां यौ प्रजानां प्रजावती ॥२१॥  
 सोमो राजाधिपा मृडिता च भूतस्य नः पतयो मृडयन्तु ॥२२॥  
 भवाशर्वावस्यतां पापकृते कृत्याकृते ।  
 दुष्कृते विद्युतं देवहेतिम् ॥२३॥  
 यद्येयथ द्विपदी चतुष्पदी कृत्याकृता संभृता विश्वरूपा ।  
 सेतोऽष्टापदी भृत्वा पुनः परेहि दुच्छुने ॥२४॥  
 अभ्यक्ताक्ता स्वरंकृता सर्वं भरन्ती दुरितं परेहि ।  
 जानीहि कृत्ये कर्तारं दुहितेव पितरं स्वम् ॥२५॥  
 परेहि कृत्ये मा तिष्ठो विद्धस्येव पदं नय ।  
 मृगः स मृगयुस्त्वं न त्वा निकर्तुमर्हति ॥२६॥  
 उत हन्ति पूर्वासिनं प्रत्यादायापर इष्वा ।  
 उत पूर्वस्य निघ्नतो नि हन्त्यपरः प्रति ॥२७॥  
 एतद्धि शृणु मे वचोऽथेहि यत एयथ ।  
 यस्त्वा चकार तं प्रति ॥२८॥  
 अनागोहत्या वै भीमा कृत्ये मा नो गामश्वं पुरुषं वधीः ।  
 यत्रयत्रासि निहिता ततस्त्वोत्थापयामसि पर्णाल्लघीयसी भव ॥२९॥  
 यदि स्थ तमसावृता जालेनभिहिता इव ।  
 सर्वाः संलुप्येतः कृत्याः पुनः कर्त्रे प्र हिण्मसि ॥३०॥  
 कृत्याकृतो वलगिनोऽभिनिष्कारिणः प्रजाम् ।  
 मृणीहि कृत्ये मोच्छिषोऽमून् कृत्याकृतो जहि ॥३१॥  
 यथा सूर्या मुच्यते तमसस्पारि रात्रिं जहात्युषसश्च केतून् ।  
 एवाहं सर्वं दुर्भूतं कर्त्रं कृत्याकृता कृतं हस्तीव रजो दुरितं जहामि ॥३२॥ {३}

10.2

केन पाष्णी आभूते पूरुषस्य केन मांसं संभूतं केन गुल्फौ ।  
 केनाङ्गुलीः पेशनीः केन खानि केनोच्छलङ्खौ मध्यतः कः प्रतिष्ठाम् ॥१॥  
 कस्मान् नु गुल्फावधरावकृण्वन्न अष्टीवन्तावुत्तरौ पूरुषस्य ।  
 जङ्घे निऋत्य न्यदधुः क्व स्विज्जानुनोः संधी क उ तच्चिकेत ॥२॥  
 चतुष्टयं युजते संहितान्तं जानुभ्यामूर्ध्वं शिथिरं कबन्धम् ।  
 श्रोणी यदूरु क उ तज्जजान याभ्यां कुसिन्धं सुदृढं बभूव ॥३॥  
 कति देवाः कतमे त आसन् य उरो ग्रीवाश्रिक्युः पूरुषस्य ।  
 कति स्तनौ व्यदधुः कः कफोदौ कति स्कन्धान् कति पृष्टीरचिन्वन् ॥४॥  
 को अस्य बाहू समभरद्वीर्यां करवादिति ।  
 अंसौ को अस्य तद्देवः कुसिन्धे अध्या दधौ ॥५॥  
 कः सप्त खानि वि ततर्द शीर्षणि कर्णाविमौ नासिके चक्षणी मुखम् ।  
 येषां पुरुत्रा विजयस्य महानि चतुष्पादो द्विपदो यन्ति यामम् ॥६॥  
 हन्वोहि जिह्वामदधात्पुरूचीमधा महीमधि शिश्राय वाचम् ।  
 स आ वरीवर्ति भुवनेष्वन्तरपो वसानः क उ तच्चिकेत ॥७॥  
 मस्तिष्कमस्य यतमो ललाटं ककाटिकां प्रथमो यः कपालम् ।  
 चित्वा चित्यं हन्वोः पूरुषस्य दिवं रुरोह कतमः स देवः ॥८॥  
 प्रियाप्रियाणि बहुला स्वप्नं संबाधतन्द्राः ।  
 आनन्दान् उग्रो नन्दांश्च कस्माद्ब्रह्मति पूरुषः ॥९॥  
 आर्तिरवर्तिर्निर्ऋतिः कुतो नु पूरुषेऽमर्तिः ।  
 राद्धिः समृद्धिरव्युद्धिर्मतिरुदितयः कुतः ॥१०॥ {४}  
 को अस्मिन् आपो व्यदधात्विषूवृतः पुरूवृतः सिन्धुसृत्याय जाताः ।  
 तीव्रा अरुणा लोहिनीस्ताम्रधूम्रा ऊर्ध्वा अवाचीः पूरुषे तिरश्चीः ॥११॥  
 को अस्मिन् रूपमदधात्को महानं च नाम च ।  
 गातुं को अस्मिन् कः केतुं कश्चरित्रानि पूरुषे ॥१२॥  
 को अस्मिन् प्राणमवयत्को अपानं व्यानमु ।  
 समानमस्मिन् को देवोऽधि शिश्राय पूरुषे ॥१३॥  
 को अस्मिन् यज्ञमदधादेको देवोऽधि पूरुषे ।



को अस्मिन्सत्यं कोऽनृतं कुतो मृत्युः कुतोऽमृतम् ॥१४॥  
 को अस्मै वासः पर्यदधात्को अस्यायुरकल्पयत्।  
 बलं को अस्मै प्रायच्छत्को अस्याकल्पयज्जवम् ॥१५॥  
 केनापो अन्वतनुत केनाहरकरोद्भुचे ।  
 उषसं केनान्वैन्द्र केन सायंभवं ददे ॥१६॥  
 को अस्मिन् रेतो न्यदधात्तन्तुरा तायतामिति ।  
 मेधां को अस्मिन् अध्यौहत्को बाणं को नृतो दधौ ॥१७॥  
 केनेमां भूमिमौर्णोत्केन पर्यभवद्विवम् ।  
 केनाभि मत्ता पर्वतान् केन कर्माणि पुरुषः ॥१८॥  
 केन पर्जन्यमन्वेति केन सोमं विचक्षणम् ।  
 केन यज्ञं च श्रद्धां च केनास्मिन् निहितं मनः ॥१९॥  
 केन श्रोत्रियमाप्नोति केनेमं परमेष्ठिनम् ।  
 केनेममग्निं पूरुषः केन संवत्सरं ममे ॥२०॥ {५}  
 ब्रह्म श्रोत्रियमाप्नोति ब्रह्मेमं परमेष्ठिनम् ।  
 ब्रह्मेममग्निं पूरुषो ब्रह्म संवत्सरं ममे ॥२१॥  
 केन देवामनु क्षियति केन दैवजनीर्विशः ।  
 केनेदमन्यन् नक्षत्रं केन सत्क्षत्रमुच्यते ॥२२॥  
 ब्रह्म देवामनु क्षियति ब्रह्म दैवजनीर्विशः ।  
 ब्रह्मेदमन्यन् नक्षत्रं ब्रह्म सत्क्षत्रमुच्यते ॥२३॥  
 केनेयं भूमिर्विहिता केन द्यौरुत्तरा हिता ।  
 केनेदमूर्ध्वं तिर्यक्चान्तरिक्षं व्यचो हितम् ॥२४॥  
 ब्रह्मणा भूमिर्विहिता ब्रह्म द्यौरुत्तरा हिता ।  
 ब्रह्मेदमूर्ध्वं तिर्यक्चान्तरिक्षं व्यचो हितम् ॥२५॥  
 मूर्धानमस्य संसीव्याथर्वा हृदयं च यत्।  
 मस्तिष्कादूर्ध्वः प्रैरयत्पवमानोऽधि शीर्षतः ॥२६॥  
 तद्वा अथर्वणः शिरो देवकोशः समुब्जितः ।  
 तत्प्राणो अभि रक्षति शिरो अन्नमथो मनः ॥२७॥  
 ऊर्ध्वो नु सृष्टाः तिर्यङ्नु सृष्टाः सर्वा दिशः पुरुष आ बभूवाः ।  
 पुरं यो ब्रह्मणो वेद यस्याः पुरुष उच्यते ॥२८॥  
 यो वै तां ब्रह्मणो वेदामृतेनावृतां पुरम् ।  
 तस्मै ब्रह्म च ब्राह्माश्च चक्षुः प्राणं प्रजां ददुः ॥२९॥  
 न वै तं चक्षुर्जहाति न प्राणो जरसः पुरा ।  
 पुरं यो ब्रह्मणो वेद यस्याः पुरुष उच्यते ॥३०॥  
 अष्टाचक्रा नवद्वारा देवानां पूरयोध्या ।  
 तस्यां हिरण्ययः कोशः स्वर्गा ज्योतिषावृतः ॥३१॥  
 तस्मिन् हिरण्यये कोशे त्र्यरे त्रिप्रतिष्ठिते ।  
 तस्मिन् यद्यक्षमात्मन्वत्तद्वै ब्रह्मविदो विदुः ॥३२॥  
 प्रभ्राजमानां हरिणीं यशसा संपरीवृताम् ।  
 पुरं हिरण्ययीं ब्रह्मा विवेशापराजिताम् ॥३३॥ {६}

### 10.3

अयं मे वरणो मणिः सपत्नक्षयणो वृषा ।  
 तेना रभस्व त्वं शत्रून् प्र मृणीहि दुरस्यतः ॥१॥  
 प्रैणान् छृणीहि प्र मृणा रभस्व मणिस्ते अस्तु पुरएता पुरस्तात्।  
 अवारयन्त वरणेन देवा अभ्याचारमसुराणां श्वःश्वः ॥२॥  
 अयं मणिर्वरणो विश्वभेषजः सहस्राक्षो हरितो हिरण्ययः ।  
 स ते शत्रून् अधरान् पादयाति पूर्वस्तान् दभ्नुहि ये त्वा द्विषन्ति ॥३॥  
 अयं ते कृत्यां विततां पौरुषेयादयं भयात्।  
 अयं त्वा सर्वस्मात्पापाद्वरणो वारयिष्यते ॥४॥  
 वरणो वारयाता अयं देवो वनस्पतिः ।  
 यक्ष्मो यो अस्मिन् आविष्टस्तमु देवा अवीवरन् ॥५॥  
 स्वप्नं सुप्त्वा यदि पश्यासि पापं मृगः सृतिं यति धावादजुष्टाम् ।  
 परिक्षवाच्छकुनेः पापवादादयं मणिर्वरणो वारयिष्यते ॥६॥  
 अरात्यास्त्वा निर्ऋत्या अभिचारादथो भयात्।  
 मृत्योरोजीयसो वधाद्वरणो वारयिष्यते ॥७॥  
 यन् मे माता यन् मे पिता भ्रातरो यच्च मे स्वा यदेनश्चकृमा वयम् ।  
 ततो नो वारयिष्यतेऽयं देवो वनस्पतिः ॥८॥  
 वरणेन प्रव्यथिता भ्रातृव्या मे सबन्धवः ।  
 असूर्तं रजो अप्यगुस्ते यन्त्वधमं तमः ॥९॥  
 अरिष्टोऽहमरिष्टगुरायुष्मान्त्सर्वपूरुषः ।  
 तं मायं वरणो मणिः परि पातु दिशोदिशः ॥१०॥ {७}  
 अयं मे वरण उरसि राजा देवो वनस्पतिः ।  
 स मे शत्रून् वि बाधतामिन्द्रो दस्यून् इवासुरान् ॥११॥  
 इमं बिभर्मे वरणमायुष्मान् छतशारदः ।

स मे राष्ट्रं च क्षत्रं च पशून् ओजश्च मे दधत् ॥१२॥  
यथा वातो वनस्पतीन् वृक्षान् भनक्त्योजसा ।  
एवा सपत्नान् मे भङ्गिधे पूर्वान् जातामुतापरान् वरणस्त्वाभि रक्षतु ॥१३॥  
यथा वातश्चाग्निश्च वृक्षान् प्सातो वनस्पतीन् ।  
एवा सपत्नान् मे प्साहि पूर्वान् जातामुतापरान् वरणस्त्वाभि रक्षतु ॥१४॥  
यथा वातेन प्रक्षीणा वृक्षाः शरे न्यर्पिताः ।  
एवा सपत्नांस्त्वं मम प्र क्षिणीहि न्यर्पय ।  
पूर्वान् जातामुतापरान् वरणस्त्वाभि रक्षतु ॥१५॥  
तास्त्वं प्र छिन्द्वि वरण पुरा दिष्टात्पुरायुषः ।  
य एनं पशुषु दिप्सन्ति ये चास्य राष्ट्रदिप्सवः ॥१६॥  
यथा सूर्यो अतिभाति यथास्मिन् तेज आहितम् ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥१७॥  
यथा यशश्चन्द्रमस्यादित्ये च नृचक्षसि ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥१८॥  
यथा यशः पृथिव्यां यथास्मिन् जातवेदसि ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥१९॥  
यथा यशः कन्यायां यथास्मिन्त्संभूते रथे ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२०॥ {८}  
यथा यशः सोमपीथे मधुपर्के यथा यशः ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२१॥  
यथा यशोऽग्निहोत्रे वषट्कारे यथा यशः ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२२॥  
यथा यशो यजमाने यथास्मिन् यज्ञ आहितम् ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२३॥  
यथा यशः प्रजापतौ यथास्मिन् परमेष्ठिनि ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२४॥  
यथा देवेष्वमृतं यथेषु सत्यमाहितम् ।  
एवा मे वरणो मणिः कीर्तिं भूतिं नि यच्छतु ।  
तेजसा मा समुक्षतु यशसा समनक्तु मा ॥२५॥

10.4

इन्द्रस्य प्रथमो रथो देवानामपरो रथो वरुणस्य तृतीय इत् ।  
अहीनामपमा रथ स्थानुमारदथार्थत् ॥१॥  
दर्भः शोचिस्तरूणकमश्वस्य वारः परुषस्य वारः ।  
रथस्य बन्धुरम् ॥२॥  
अव श्वेत पदा जहि पूर्वेण चापरेण च ।  
उदप्लुतमिव दार्वहीनामरसं विषं वारुग्रम् ॥३॥  
अरंघुषो निमज्योन्मज पुनरब्रवीत् ।  
उदप्लुतमिव दार्वहीनामरसं विषं वारुग्रम् ॥४॥  
पैद्वो हन्ति कसर्णीलं पैद्वः श्वित्रमुतासितम् ।  
पैद्वो रथर्व्याः शिरः सं बिभेद पदाक्वाः ॥५॥  
पैद्व प्रेहि प्रथमोऽनु त्वा वयमेमसि ।  
अहीन् व्यस्यतात्पथो येन स्मा वयमेमसि ॥६॥  
इदं पैद्वो अजायतेदमस्य परायणम् ।  
इमान्यर्वतः पदाहिघ्न्यो वाजिनीवतः ॥७॥  
संयतं न वि ष्परदव्यात्तं न सं यमत् ।  
अस्मिन् क्षेत्रे द्वावही स्त्री च पुमांश्च तावुभावरसा ॥८॥  
अरसास इहाहयो ये अन्ति ये च दूरके ।  
घनेन हन्मि वृश्चिकमहिं दण्डेनागतम् ॥९॥  
अघाश्वस्येदं भेषजमुभयो स्वजस्य च ।  
इन्द्रो मेऽहिमघायन्तमहिं पैद्वो अरन्धयत् ॥१०॥ {१०}  
पैद्वस्य मन्महे वयं स्थिरस्य स्थिरधाम्नः ।  
इमे पश्वा पृदाकवः प्रदीध्यत आसते ॥११॥  
नष्टासवो नष्टविषा हता इन्द्रेण वज्रिणा ।  
जघानेन्द्रो जघ्निमा वयम् ॥१२॥  
हतास्तिरश्विराजयो निपिष्टासः पृदाकवः ।

दर्वि करिक्रतं श्वित्रं दर्भेष्वसितं जहि ॥१३॥  
 कैरातिका कुमारिका सका खनति भेषजम् ।  
 हिरण्ययीभिरभ्रिभिर्गिरीनामुप सानुषु ॥१४॥  
 आयमगन् युवा भिषक्पृश्निहापराजितः ।  
 स वै स्वजस्य जम्भन उभयोर्वृश्चिकस्य च ॥१५॥  
 इन्द्रो मेऽहिमरन्धयन् मित्रश्च वरुणश्च ।  
 वातापर्जन्योभा ॥१६॥  
 इन्द्रो मेऽहिमरन्धयत्पृदाकुं च पृदाक्वम् ।  
 स्वजं तिरश्चिराजिं कसणीलं दशोनसिम् ॥१७॥  
 इन्द्रो जघान प्रथमं जनितारमहे तव ।  
 तेषामु तृह्यमाणानां कः स्वित्तेषामसद्रसः ॥१८॥  
 सं हि शीर्षाण्यग्रभं पौञ्जिष्ठ इव कर्वरम् ।  
 सिन्धोर्मध्यं परेत्य व्यनिजमहेर्विषम् ॥१९॥  
 अहीनां सर्वेषां विषं परा वहन्तु सिन्धवः ।  
 हतास्तिरश्चिराजयो निपिष्टासः पृदाकवः ॥२०॥ {११}  
 ओषधीनामहं वृण उर्वरीरिव साधुया ।  
 नयाम्यर्वतीरिवाहं निरैतु विषम् ॥२१॥  
 यदग्नौ सूर्ये विषं पृथिव्यामोषधीषु यत् ।  
 कान्दाविषं कनक्नकं निरैत्वैतु ते विषम् ॥२२॥  
 ये अग्निजा ओषधिजा अहीनां ये अप्सुजा विद्युत आबभूवुः ।  
 येषां जातानि बहुधा महान्ति तेभ्यः सर्पेभ्यो नमसा विधेम ॥२३॥  
 तौदी नामासि कन्या घृताची नाम वा असि ।  
 अधस्पदेन ते पदमा ददे विषदूषणम् ॥२४॥  
 अङ्गादङ्गात्प्र च्यावय हृदयं परि वर्जय ।  
 अधा विषस्य यत्तेजोऽवाचीनं तदेतु ते ॥२५॥  
 आरे अभूद्विषमरौद्विषे विषमप्रागपि ।  
 अग्निर्विषमहेर्निरधात्सोमो निरणयीत् ।  
 दंष्टारमन्वगाद्विषमहिरमृत ॥२६॥ {१२}

10.5

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगाय ब्रह्मयोगैर्वो युनज्मि ॥१०.५.१॥

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगाय क्षत्रयोगैर्वो युनज्मि ॥१०.५.२॥

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगायेन्द्रयोगैर्वो युनज्मि ॥१०.५.३॥

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगाय सोमयोगैर्वो युनज्मि ॥१०.५.४॥

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगायाप्सुयोगैर्वो युनज्मि ॥१०.५.५॥

इन्द्रस्यौज स्थेन्द्रस्य सह स्थेन्द्रस्य बलं स्थेन्द्रस्य वीर्यं स्थेन्द्रस्य नृमणं स्थ ।  
 जिष्णवे योगाय विश्वानि मा भूतान्युप तिष्ठन्तु युक्ता म आप स्थ ॥१०.५.६॥

अग्नेर्भाग स्थ अपां शुक्रमापो देवीर्वर्चो अस्मासु धत्त ।  
 प्रजापतेर्वो धाम्नास्मै लोकाय सादये ॥१०.५.७॥

इन्द्रस्य भाग स्थ अपां शुक्रमापो देवीर्वर्चो अस्मासु धत्त ।  
 प्रजापतेर्वो धाम्नास्मै लोकाय सादये ॥१०.५.८॥

सोमस्य भाग स्थ अपां शुक्रमापो देवीर्वर्चो अस्मासु धत्त ।  
 प्रजापतेर्वो धाम्नास्मै लोकाय सादये ॥१०.५.९॥

वरुणस्य भाग स्थ अपां शुक्रमापो देवीर्वर्चो अस्मासु धत्त ।  
 प्रजापतेर्वो धाम्नास्मै लोकाय सादये ॥१०.५.१०॥ {१३}

मित्रावरुणयोर्भाग स्थ अपां शुक्रमापो देवीर्वर्चो अस्मासु धत्त ।  
 प्रजापतेर्वो धाम्नास्मै लोकाय सादये ॥१०.५.११॥

यमस्य भाग स्थ अपां शुक्रमापो देवीर्वर्चो अस्मासु धत्त ।

प्रजापतेर्वो धाम्नास्मै लोकाय सादये ॥१०.५.१२॥

पितृणां भाग स्थ अपां शुक्रमापो देवीर्वर्चो अस्मासु धत्त ।  
प्रजापतेर्वो धाम्नास्मै लोकाय सादये ॥१०.५.१३॥

देवस्य सवितुर्भाग स्थ अपां शुक्रमापो देवीर्वर्चो अस्मासु धत्त ।  
प्रजापतेर्वो धाम्नास्मै लोकाय सादये ॥१०.५.१४॥

यो व आपोऽपां भागोऽप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.१५ ॥

यो व आपोऽपामूर्मिरप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.१६ ॥

यो व आपोऽपां वत्सोऽप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.१७ ॥

यो व आपोऽपां वृषभोऽप्स्वन्तर्यजुष्यो देवयजनः ॥  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ॥  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.१८ ॥

यो व आपोऽपां हिरण्यगर्भोऽप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.१९ ॥

यो व आपोऽपामश्मा पृश्निर्दिव्योऽप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.२० ॥

यो व आपोऽपामग्नयोऽप्स्वन्तर्यजुष्यो देवयजनः ।  
इदं तमति सृजामि तं माभ्यवनिक्षि ।  
तेन तमभ्यतिसृजामो योऽस्मान् द्वेष्टि यं वयं द्विष्मः ।  
तं वधेयं तं स्तृषीयानेन ब्रह्मणानेन कर्मणानया मेन्या ॥ १०.५.२१ ॥

यदर्वाचीनं त्रैहायणादनृतं किं चोदिम ।  
आपो मा तस्मात्सर्वस्माद्दुरितात्यान्त्वंहसः ॥१०.५.२२॥

समुद्रं वः प्र हिणोमि स्वां योनिमपीतन ।  
अरिष्टाः सर्वहायसो मा च नः किं चनाममत् ॥१०.५.२३॥

अरिप्रा आपो अप रिप्रमस्मत् ।  
प्रास्मदेनो दुरितं सुप्रतीकाः प्र दुष्वप्यं प्र मलं वहन्तु ॥१०.५.२४॥

विष्णोः क्रमोऽसि सपत्नहा पृथिवीसंशितोऽग्नितेजाः ।  
पृथिवीमनु वि क्रमेऽहं पृथिव्यास्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.२५॥

विष्णोः क्रमोऽसि सपत्नहान्तरिक्षसंशितो वायुतेजाः ।  
अन्तरिक्षमनु वि क्रमेऽहमन्तरिक्षात्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.२६॥

विष्णोः क्रमोऽसि सपत्नहा द्यौसंशितः सूर्यतेजाः ।  
दिवमनु वि क्रमेऽहं दिवस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.२७॥

विष्णोः क्रमोऽसि सपत्नहा दिक्संशितो मनस्तेजाः ।  
दिशो अनु वि क्रमेऽहं दिग्भ्यस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.२८॥

विष्णोः क्रमोऽसि सपत्नहाशासंशितो वाततेजाः ।  
आशा अनु वि क्रमेऽहमाशाभ्यस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.२९॥

विष्णोः क्रमोऽसि सपत्नहा ऋक्संशितो सामतेजाः ।  
ऋचोऽनु वि क्रमेऽहमृग्भ्यस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३०॥ {१५}

विष्णोः क्रमोऽसि सपत्नहा यज्ञसंशितो ब्रह्मतेजाः ।  
यज्ञमनु वि क्रमेऽहं यज्ञात्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३१॥

विष्णोः क्रमोऽसि सपत्नहौषधीसंशितो सोमतेजाः ।  
ओषधीरनु वि क्रमेऽहमोषधीभ्यस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३०.५.३२॥

विष्णोः क्रमोऽसि सपत्नहाप्सुसंशितो वरुणतेजाः ।  
अपोऽनु वि क्रमेऽहमद्भ्यस्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३३॥

विष्णोः क्रमोऽसि सपत्नहा कृषिसंशितोऽन्नतेजाः ।  
कृषिमनु वि क्रमेऽहं कृष्यास्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३४॥

विष्णोः क्रमोऽसि सपत्नहा प्राणसंशितः पुरुषतेजाः ।  
प्राणमनु वि क्रमेऽहं प्राणात्तं निर्भजामो योऽस्मान् द्वेष्टि यं वयं द्विष्मः ।  
स मा जीवीत्तं प्राणो जहातु ॥१०.५.३५॥  
जितमस्माकमुद्भिन्नमस्माकमभ्यष्टां विश्वाः पृतना अरातीः ।  
इदमहमामुष्यायणस्यामुष्याः पुत्रस्य वर्चस्तेजः प्राणमायुर्नि वेष्टयामीदमेनमधराञ्चं पादयामि ॥१०.५.३६॥

सूर्यस्यावृतमन्वावर्ते दक्षिणामन्वावृतम् ।  
सा मे द्रविणं यच्छतु सा मे ब्राह्मणवर्चसम् ॥१०.५.३७॥

दिशो ज्योतिष्मतीरभ्यावर्ते ।  
ता मे द्रविणं यच्छन्तु ता मे ब्राह्मणवर्चसम् ॥१०.५.३८॥

सप्तऋषीन् अभ्यावर्ते ।  
ते मे द्रविणं यच्छन्तु ते मे ब्राह्मणवर्चसम् ॥१०.५.३९॥

ब्रह्माभ्यावर्ते ।  
तन् मे द्रविणं यच्छन्तु तन् मे ब्राह्मणवर्चसम् ॥१०.५.४०॥ {१६}

ब्राह्मणामभ्यावर्ते ।  
ते मे द्रविणं यच्छन्तु ते मे ब्राह्मणवर्चसम् ॥१०.५.४१॥

यं वयं मृगयामहे तं वधै स्तृणवामहे ।  
व्यात्ते परमेष्ठिनो ब्रह्मणापीपदाम तम् ॥१०.५.४२॥

वैश्वानरस्य दंष्ट्राभ्यां हेतिस्तं समधादभि ।  
इयं तं प्सात्वाहुतिः समिद्देवी सहीयसी ॥१०.५.४३॥

राज्ञो वरुणस्य बन्धोऽसि ।  
सोऽमुमामुष्यायणममुष्याः पुत्रमन्ने प्राणे बधान ॥१०.५.४४॥

यत्ते अन्नं भुवस्पत आक्षियति पृथिवीमनु ।  
तस्य नस्त्वं भुवस्पते संप्रयच्छ प्रजापते ॥१०.५.४५॥

अपो दिव्या अचायिषं रसेन समपृक्षमहि ।  
पयस्वान् अग्न आगमं तं मा सं सृज वर्चसा ॥१०.५.४६॥

सं माग्ने वर्चसा सृज सं प्रजया समायुषा ।  
विद्युर्मै अस्य देवा इन्द्रो विद्यात्सह ऋषिभिः ॥१०.५.४७॥  
यदग्ने अद्य मिथुना शपतो यद्वाचस्तृष्टं जनयन्त रेभाः ।  
मन्योर्मनसः शरव्या जायते या तया विध्य हृदये यातुधानान् ॥१०.५.४८॥

परा शृणीहि तपसा यातुधानान् पराग्ने रक्षो हरसा शृणीहि ।  
पराचिषा मूरदेवां छृणीहि परासुतृपः शोशुचतः शृणीहि ॥१०.५.४९॥

अपामस्मै वज्रं प्र हरामि चतुर्भृष्टिं शीर्षभिद्याय विद्वान् ।  
सो अस्याङ्गानि प्र शृणातु सर्वा तन् मे देवा अनु जानन्तु विश्वे ॥१०.५.५०॥ {१७}

10.6

अरातीयोर्भ्रातृव्यस्य दुर्हादो द्विषतः शिरः ।  
अपि वृश्चाम्योजसा ॥१॥  
वर्म मह्यमयं मणिः फालाज्जातः करिष्यति ।  
पूर्णे मन्थेन मागमद्रसेन सह वर्चसा ॥२॥  
यत्त्वा शिक्वः परावधीत्तक्षा हस्तेन वास्या ।  
आपस्त्वा तस्मज्जीवलाः पुनन्तु शुचयः शुचिम् ॥३॥  
हिरण्यस्रगयं मणिः श्रद्धां यज्ञं महो दधत् ।  
गृहे वसतु नोऽतिथिः ॥४॥  
तस्मै घृतं सुरं मध्वन्नमन्नं क्षदामहे ।  
स नः पितेव पुत्रेभ्यः श्रेयःश्रेयश्चिकित्सतु भूयोभूयः श्वःश्वो देवेभ्यो मणिरेत्य ॥५॥  
यमबध्नाद्बृहस्पतिर्मणिं फालं घृतश्रुतमुग्रं खदिरमोजसे ।  
तमग्निः प्रत्यमुञ्चत सो अस्मै दुहे आज्यं भूयोभूयः श्वःश्वस्तेन त्वं द्विषतो जहि ॥६॥  
यमबध्नाद्बृहस्पतिर्मणिं फालं घृतश्रुतमुग्रं खदिरमोजसे ।  
तमिन्द्रः प्रत्यमुञ्चतौजसे वीर्याय कम् ।  
सो अस्मै बलमिदुहे भूयोभूयः श्वःश्वस्तेन त्वं द्विषतो जहि ॥७॥  
यमबध्नाद्बृहस्पतिर्मणिं फालं घृतश्रुतमुग्रं खदिरमोजसे ।  
तं सोमः प्रत्यमुञ्चत महे श्रोत्राय चक्षसे ।  
सो अस्मै वर्च इदुहे भूयोभूयः श्वःश्वस्तेन त्वं द्विषतो जहि ॥८॥  
यमबध्नाद्बृहस्पतिर्मणिं फालं घृतश्रुतमुग्रं खदिरमोजसे ।  
तं सूर्यः प्रत्यमुञ्चत तेनेमा अजयेद्विशः ।  
सो अस्मै भूतिमिदुहे भूयोभूयः श्वःश्वस्तेन त्वं द्विषतो जहि ॥९॥  
यमबध्नाद्बृहस्पतिर्मणिं फालं घृतश्रुतमुग्रं खदिरमोजसे ।  
तं बिभ्रच्चन्द्रमा मणिमसुराणां पुरोऽजयद्दानवानां हिरण्ययीः ।  
सो अस्मै श्रियमिदुहे भूयोभूयः श्वःश्वस्तेन त्वं द्विषतो जहि ॥१०॥ {१८}  
यमबध्नाद्बृहस्पतिर्वाताय मणिमाशवे ।  
सो अस्मै वाजिनमिदुहे भूयोभूयः श्वःश्वस्तेन त्वं द्विषतो जहि ॥११॥  
यमबध्नाद्बृहस्पतिर्वाताय मणिमाशवे ।  
तेनेमां मणिना कृषिमश्विनावभि रक्षतः ।  
स भिषग्भ्यां महो दुहे भूयोभूयः श्वःश्वस्तेन त्वं द्विषतो जहि ॥१२॥  
यमबध्नाद्बृहस्पतिर्वाताय मणिमाशवे ।  
तं बिभ्रत्सविता मणिं तेनेदमजयत्स्वः ।  
सो अस्मै सूनृतां दुहे भूयोभूयः श्वःश्वस्तेन त्वं द्विषतो जहि ॥१३॥  
यमबध्नाद्बृहस्पतिर्वाताय मणिमाशवे ।  
तमापो बिभ्रतीर्मणिं सदा धावन्त्यक्षिताः ।  
स आभ्योऽमृतमिदुहे भूयोभूयः श्वःश्वस्तेन त्वं द्विषतो जहि ॥१४॥  
यमबध्नाद्बृहस्पतिर्वाताय मणिमाशवे ।  
तं राजा वरुणो मणिं प्रत्यमुञ्चत शंभुवम् ।  
सो अस्मै सत्यमिदुहे भूयोभूयः श्वःश्वस्तेन त्वं द्विषतो जहि ॥१५॥  
यमबध्नाद्बृहस्पतिर्वाताय मणिमाशवे ।  
तं देवा बिभ्रतो मणिं सर्वाल्लोकान् युधाजयन् ।  
स एभ्यो जितिमिदुहे भूयोभूयः श्वःश्वस्तेन त्वं द्विषतो जहि ॥१६॥  
यमबध्नाद्बृहस्पतिर्वाताय मणिमाशवे ।  
तमिमं देवता मणिं प्रत्यमुञ्चन्त शम्भुवम् ।  
स आभ्यो विश्वमिदुहे भूयोभूयः श्वःश्वस्तेन त्वं द्विषतो जहि ॥१७॥  
ऋतवस्तमबध्नतार्तवास्तमबध्नत ।  
संवत्सरस्तं बद्ध्वा सर्वं भूतं वि रक्षति ॥१८॥  
अन्तर्देशा अबध्नत प्रदिशस्तमबध्नत ।  
प्रजापतिसृष्टो मणिद्विषतो मेऽधरामकः ॥१९॥  
अथर्वाणो अबध्नताथर्वणा अबध्नत ।  
तैर्मेदिनो अङ्गिरसो दस्यूनां बिभिदुः पुरस्तेन त्वं द्विषतो जहि ॥२०॥ {१९}  
तं धाता प्रत्यमुञ्चत स भूतं व्यकल्पयत् ।  
तेन त्वं द्विषतो जहि ॥२१॥

यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमद्रसेन सह वर्चसा ॥२२॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमत्सह गोभिरजाविभिरन्नेन प्रजया सह ॥२३॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमत्सह व्रीहियवाभ्यां महसा भूत्या सह ॥२४॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमन् मधोर्धृतस्य धारया कीलालेन मणिः सह ॥२५॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमदूर्जया पयसा सह द्रविणेन श्रिया सह ॥२६॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमत्तेजसा त्विष्या सह यशसा कीर्त्या सह ॥२७॥  
 यमबध्नाद्बृहस्पतिर्देवेभ्यो असुरक्षितिम् ।  
 स मायं मणिरागमत्सर्वाभिर्भूतिभिः सह ॥२८॥  
 तमिमं देवता मणिं मह्यं ददतु पुष्टये ।  
 अभिभुं क्षत्रवर्धनं सपत्नदम्भनं मणिम् ॥२९॥  
 ब्रह्मणा तेजसा सह प्रति मुञ्चामि मे शिवम् ।  
 असपत्नः सपत्नहा सपत्नान् मेऽधरामकः ॥३०॥ {२०}  
 उत्तरं द्विषतो मामयं मणिः कृणोतु देवजाः ।  
 यस्य लोका इमे त्रयः पयो दुग्धमुपासते ।  
 स मायमधि रोहतु मणिः श्रेष्ठ्याय मूर्धतः ॥३१॥  
 यं देवाः पितरो मनुष्या उपजीवन्ति सर्वदा ।  
 स मायमधि रोहतु मणिः श्रेष्ठ्याय मूर्धतः ॥३२॥  
 यथा बीजमुर्वरायां कृष्टे फालेन रोहति ।  
 एवा मयि प्रजा पशवोऽन्नमन्नं वि रोहतु ॥३३॥  
 यस्मै त्वा यज्ञवर्धन मणे प्रत्यमुचं शिवम् ।  
 तं त्वं शतदक्षिण मणे श्रेष्ठ्याय जिन्वतात् ॥३४॥  
 एतमिध्मं समाहितं जुषणो अग्ने प्रति हर्य होमैः ।  
 तस्मिन् विधेम सुमतिं स्वस्ति प्रजां चक्षुः पशून्समिद्धे जातवेदसि ब्रह्मणा ॥३५॥ {२१}

10.7

कस्मिन् अङ्गे तपो अस्याधि तिष्ठति कस्मिन् अङ्गे ऋतमस्याध्याहितम् ।  
 क्व व्रतं क्व श्रद्धास्य तिष्ठति कस्मिन् अङ्गे सत्यमस्य प्रतिष्ठितम् ॥१॥  
 कस्मादङ्गाद्दीप्यते अग्निरस्य कस्मादङ्गात्पवते मातरिश्वा ।  
 कस्मादङ्गाद्दि मिमीतेऽधि चन्द्रमा मह स्कम्भस्य मिमानो अङ्गम् ॥२॥  
 कस्मिन् अङ्गे तिष्ठति भूमिरस्य कस्मिन् अङ्गे तिष्ठत्यन्तरिक्षम् ।  
 कस्मिन् अङ्गे तिष्ठत्याहिता द्यौः कस्मिन् अङ्गे तिष्ठत्युत्तरं दिवः ॥३॥  
 क्व प्रेप्सन् दीप्यत ऊर्ध्वो अग्निः क्व प्रेप्सन् पवते मातरिश्वा ।  
 यत्र प्रेप्सन्तीरभियन्त्यावृतः स्कम्भं तं ब्रूहि कतमः स्विदेव सः ॥४॥  
 क्वार्धमासाः क्व यन्ति मासाः संवत्सरेण सह संविदानाः ।  
 यत्र यन्त्यृतवो यत्रार्तवाः स्कम्भं तं ब्रूहि कतमः स्विदेव सः ॥५॥  
 क्व प्रेप्सन्ती युवती विरूपे अहोरात्रे द्रवतः संविदाने ।  
 यत्र प्रेप्सन्तीरभियन्त्यापः स्कम्भं तं ब्रूहि कतमः स्विदेव सः ॥६॥  
 यस्मिन्स्तब्ध्वा प्रजापतिर्लोकान्त्सर्वामधारयत् ।  
 स्कम्भं तं ब्रूहि कतमः स्विदेव सः ॥७॥  
 यत्परममवमं यच्च मध्यमं प्रजापतिः ससृजे विश्वरूपम् ।  
 कियता स्कम्भः प्र विवेश तत्र यन् न प्राविशत्कियत्तद्भूव ॥८॥  
 कियता स्कम्भः प्र विवेश भूतं कियद्भविष्यदन्वाशयेऽस्य ।  
 एकं यदङ्गमकृणोत्सहस्रधा कियता स्कम्भः प्र विवेश तत्र ॥९॥  
 यत्र लोकाम्श्च कोशांश्चापो ब्रह्म जना विदुः ।  
 असच्च यत्र सच्चान्त स्कम्भं तं ब्रूहि कतमः स्विदेव सः ॥१०॥ {२२}  
 यत्र तपः पराक्रम्य व्रतं धारयत्युत्तरम् ।  
 ऋतं च यत्र श्रद्धा चापो ब्रह्म समाहिताः स्कम्भं तं ब्रूहि कतमः स्विदेव सः ॥११॥  
 यस्मिन् भूमिरन्तरिक्षं द्यौर्यस्मिन् अध्याहिता ।  
 यत्राग्निश्चन्द्रमाः सूर्यो वातस्तिष्ठन्त्यार्पिताः स्कम्भं तं ब्रूहि कतमः स्विदेव सः ॥१२॥  
 यस्य त्रयस्त्रिंशद्देवा अङ्गे सर्वे समाहिताः ।  
 स्कम्भं तं ब्रूहि कतमः स्विदेव सः ॥१३॥  
 यत्र ऋषयः प्रथमजा ऋचः साम यजुर्मही ।  
 एकार्षीर्यस्मिन् आपितः स्कम्भं तं ब्रूहि कतमः स्विदेव सः ॥१४॥  
 यत्रामृतं च मृत्युश्च पुरुषेऽधि समाहिते ।  
 समुद्रो यस्य नाड्यः पुरुषेऽधि समाहिताः स्कम्भं तं ब्रूहि कतमः स्विदेव सः ॥१५॥  
 यस्य चतस्रः प्रदिशो नाड्यस्तिष्ठन्ति प्रथमाः ।  
 यज्ञो यत्र पराक्रान्तः स्कम्भं तं ब्रूहि कतमः स्विदेव सः ॥१६॥  
 ये पुरुषे ब्रह्म विदुस्ते विदुः परमोष्ठिनम् ।

यो वेद परमेष्ठिनं यश्च वेद प्रजापतिम् ।  
 ज्येष्ठं ये ब्राह्मणं विदुस्ते स्कम्भमनुसंविदुः ॥१७॥  
 यस्य शिरो वैश्वानरश्चक्षुरङ्गिरसोऽभवन् ।  
 अङ्गानि यस्य यातवः स्कम्भं तं ब्रूहि कतमः स्विदेव सः ॥१८॥  
 यस्य ब्रह्म मुखमाहुर्जिह्वां मधुकशामुत ।  
 विराजमूधो यस्याहुः स्कम्भं तं ब्रूहि कतमः स्विदेव सः ॥१९॥  
 यस्माद्दृवो अपातक्षन् यजुर्यस्मादपाकषन् ।  
 सामानि यस्य लोमान्यथर्वाङ्गिरसो मुखं स्कम्भं तं ब्रूहि कतमः स्विदेव सः ॥२०॥ {२३}  
 असच्चाखां प्रतिष्ठन्तीं परममिव जना विदुः ।  
 उतो सन् मन्यन्तेऽवरे ये ते शाखामुपासते ॥२१॥  
 यत्रादित्याश्च रुद्राश्च वसवश्च समाहिताः ।  
 भूतं च यत्र भव्यं च सर्वं लोकाः प्रतिष्ठिताः स्कम्भं तं ब्रूहि कतमः स्विदेव सः ॥२२॥  
 यस्य त्रयस्त्रिंशद्देवा निधिं रक्षन्ति सर्वदा ।  
 निधिं तमद्य को वेद यं देवा अभिरक्षथ ॥२३॥  
 यत्र देवा ब्रह्मविदो ब्रह्म ज्येष्ठमुपासते ।  
 यो वै तान् विद्यात्प्रत्यक्षं स ब्रह्मा वेदिता स्यात् ॥२४॥  
 बृहन्तो नाम ते देवा येऽसतः परि जज्ञिरे ।  
 एकं तदङ्गं स्कम्भस्यासदाहुः परो जनाः ॥२५॥  
 यत्र स्कम्भः प्रजनयन् पुराणं व्यवर्तयत् ।  
 एकं तदङ्गं स्कम्भस्य पुराणमनुसंविदुः ॥२६॥  
 यस्य त्रयस्त्रिंशद्देवा अङ्गं गात्रा विभञ्जिरे ।  
 तान् वै त्रयस्त्रिंशद्देवान् एके ब्रह्मविदो विदुः ॥२७॥  
 हिरण्यगर्भं परममनत्युद्यं जना विदुः ।  
 स्कम्भस्तदग्रे प्रासिञ्चद्विरण्यं लोके अन्तरा ॥२८॥  
 स्कम्भे लोकाः स्कम्भे तपः स्कम्भेऽध्यतमाहितम् ।  
 स्कम्भ त्वा वेद प्रत्यक्षमिन्द्रे सर्वं समाहितम् ॥२९॥  
 इन्द्रे लोका इन्द्रे तप इन्द्रेऽध्यतमाहितम् ।  
 इन्द्रं त्वा वेद प्रत्यक्षं स्कम्भे सर्वं प्रतिष्ठितम् ॥३०॥ {२४}  
 नाम नाम्ना जोहवीति पुरा सूर्यात्पुरोषसः ।  
 यदजः प्रथमं संबभूव स ह तत्स्वराज्यमियाय यस्मान् नान्यत्परमस्ति भूतम् ॥३१॥  
 यस्य भूमिः प्रमान्तरिक्षमुतोदरम् ।  
 दिवं यश्चक्रे मूर्धानं तस्मै ज्येष्ठाय ब्रह्मणे नमः ॥३२॥  
 यस्य सूर्यश्चक्षुश्चन्द्रमाश्च पुनर्णवः ।  
 अग्निं यश्चक्र आस्यं तस्मै ज्येष्ठाय ब्रह्मणे नमः ॥३३॥  
 यस्य वातः प्राणापानौ चक्षुरङ्गिरसोऽभवन् ।  
 दिशो यश्चक्रे प्रज्ञानीस्तस्मै ज्येष्ठाय ब्रह्मणे नमः ॥३४॥  
 स्कम्भो दाधार द्यावापृथिवी उभे इमे स्कम्भो दाधारोर्वन्तरिक्षम् ।  
 स्कम्भो दाधार प्रदिशः षडुर्वीः स्कम्भ इदं विश्वं भुवनमा विवेश ॥३५॥  
 यः श्रमात्तपसो जातो लोकान्त्सर्वान्त्समानशे ।  
 सोमं यश्चक्रे केवलं तस्मै ज्येष्ठाय ब्रह्मणे नमः ॥३६॥  
 कथं वातो नेलयति कथं न रमते मनः ।  
 किमापः सत्यं प्रेप्सन्तीर्नेलयन्ति कदा चन ॥३७॥  
 महदृक्षं भुवनस्य मध्ये तपसि क्रान्तं सलिलस्य पृष्ठे ।  
 तस्मिन् छ्रयन्ते य उ के च देवा वृक्षस्य स्कन्धः परित इव शाखाः ॥३८॥  
 यस्मै हस्ताभ्यां पादाभ्यां वाचा श्रोत्रेण चक्षुषा ।  
 यस्मै देवाः सदा बलिं प्रयच्छन्ति विमितेऽमितं स्कम्भं तं ब्रूहि कतमः स्विदेव सः ॥३९॥  
 अप तस्य हतं तमो व्यावृत्तः स पाप्मना ।  
 सर्वाणि तस्मिन् ज्योतीषि यानि त्रीणि प्रजापतौ ॥४०॥  
 यो वेतसं हिरण्ययं तिष्ठन्तं सलिले वेद ।  
 स वै गुह्यः प्रजापतिः ॥४१॥  
 तन्त्रमेके युवती विरूपे अभ्याक्रामं वयतः षण्मयूखम् ।  
 प्राप्या तन्तूस्तिरते धत्ते अन्या नाप वृञ्जाते न गमातो अन्तम् ॥४२॥  
 तयोरहं परिनृत्यन्त्योरिव न वि जानामि यतरा परस्तात् ।  
 पुमान् एनद्वयत्युद्गृणन्ति पुमान् एनद्वि जभाराधि नाके ॥४३॥  
 इमे मयूखा उप तस्तभुर्दिवं सामानि चक्रुस्तसराणि वातवे ॥४४॥ {२५}

10.8

यो भूतं च भव्यं च सर्वं यश्चाधितिष्ठति ।  
 स्वयस्य च केवलं तस्मै ज्येष्ठाय ब्रह्मणे नमः ॥१॥  
 स्कम्भेनेमे विष्टभिते द्यौश्च भूमिश्च तिष्ठतः ।  
 स्कम्भ इदं सर्वमात्मन्वद्यत्प्राणन् निमिषच्च यत् ॥२॥  
 तिस्रो ह प्रजा अत्यायमायन् न्यन्या अर्कमभितोऽविशन्त ।  
 बृहन् ह तस्थौ रजसो विमानो हरितो हरिणीरा विवेश ॥३॥  
 द्वादश प्रथयश्चक्रमेकं त्रीणि नभ्यानि क उ तच्चिकेत ।



तत्राहतास्त्रीणि शतानि शङ्कवः षष्टिश्च खीला अविचाचला ये ॥४॥  
 इदं सवितर्वि जानीहि षड्यमा एक एकजः ।  
 तस्मिन् हापित्वमिच्छन्ते य एषामेक एकजः ॥५॥  
 आविः सन् निहितं गुहा जरन् नाम महत्पदम् ।  
 तत्रेदं सर्वमार्पितमेजत्प्राणत्प्रतिष्ठितम् ॥६॥  
 एकचक्रं वर्तत एकनेमि सहस्राक्षरं प्र पुरो नि पश्चा ।  
 अर्धेन विश्वं भुवनं जजान यदस्यार्धं क्व तद्वभूव ॥७॥  
 पञ्चवाही वहत्यग्रमेषां प्रष्टयो युक्ता अनुसंवहन्ति ।  
 अयातमस्य ददृशे न यातं परं नेदीयोऽवरं दवीयः ॥८॥  
 तिर्यग्बिलश्चमस ऊर्ध्वबुध्नस्तस्मिन् यशो निहितं विश्वरूपम् ।  
 तदासत ऋषयः सप्त साकं ये अस्य गोपा महतो बभूवुः ॥९॥  
 या पुरस्ताद्युज्यते या च पश्चाद्या विश्वतो युज्यते या च सर्वतः ।  
 यया यज्ञः प्राड्तायते तां त्वा पृच्छामि कतमा सा ऋचाम् ॥१०॥ {२६}  
 यदेजति पतति यच्च तिष्ठति प्राणदप्राणन् निमिषच्च यद्भुवत् ।  
 तद्वाधार पृथिवीं विश्वरूपं तत्संभूय भवत्येकमेव ॥११॥  
 अनन्तं विततं पुरुत्रानन्तमन्तवच्चा समन्ते ।  
 ते नाकपालश्चरति विचिन्वन् विद्वान् भूतमुत भव्यमस्य ॥१२॥  
 प्रजापतिश्चरति गर्भे अन्तरदृश्यमानो बहुधा वि जायते ।  
 अर्धेन विश्वं भुवनं जजान यदस्यार्धं कतमः स केतुः ॥१३॥  
 ऊर्ध्वं भरन्तमुदकं कुम्भेनेवोदहार्यम् ।  
 पश्यन्ति सर्वे चक्षुषा न सर्वे मनसा विदुः ॥१४॥  
 दूरे पूर्णेन वसति दूर ऊनेन हीयते ।  
 महदक्षं भुवनस्य मध्ये तस्मै बलिं राष्ट्रभूतो भरन्ति ॥१५॥  
 यतः सूर्यः उदेत्यस्तं यत्र च गच्छति ।  
 तदेव मन्येऽहं ज्येष्ठं तदु नात्येति किं चन ॥१६॥  
 ये अर्वाङ्मध्य उत वा पुराणं वेदं विद्वांसमभितो वदन्ति ।  
 आदित्यमेव ते परि वदन्ति सर्वे अग्निं द्वितीयं त्रिवृतं च हंसम् ॥१७॥  
 सहस्राह्वयं वियतावस्य पक्षौ हरेर्हंसस्य पततः स्वर्गम् ।  
 स देवान्त्सर्वान् उरस्युपदद्य संपश्यन् याति भुवनानि विश्वा ॥१८॥  
 सत्येनोर्ध्वस्तपति ब्रह्मणार्वाङ्मि पश्यति ।  
 प्राणेन तिर्यङ्प्राणति यस्मिन् ज्येष्ठमधि श्रितम् ॥१९॥  
 यो वै ते विद्यादरणी याभ्यां निर्मथ्यते वसु ।  
 स विद्वान् ज्येष्ठं मन्येत स विद्यादब्राह्मणं महत् ॥२०॥ {२७}  
 अपादग्रे समभवत्सो अग्रे स्वराभरत् ।  
 चतुष्पाद्भूत्वा भोग्यः सर्वमादत्त भोजनम् ॥२१॥  
 भोग्यो भवदथो अन्नमदद्बहु ।  
 यो देवमुत्तरावन्तमुपासातै सनातनम् ॥२२॥  
 सनातनमेनमाहुरुताद्य स्यात्पुनर्णवः ।  
 अहोरात्रे प्र जायेते अन्यो अन्यस्य रूपयोः ॥२३॥  
 शतं सहस्रमयुतं न्यर्बुदमसंख्येयं स्वमस्मिन् निविष्टम् ।  
 तदस्य घ्नन्त्याभिपश्यत एव तस्माद्देवो रोचतेष एतत् ॥२४॥  
 बालादेकमणीयस्कमुतैकं नेव दृश्यते ।  
 ततः परिष्वजीयसी देवता सा मम प्रिया ॥२५॥  
 इयं कल्याण्यजरा मर्त्यस्यामृता गृहे ।  
 यस्मै कृता शये स यश्चकार जजार सः ॥२६॥  
 त्वं स्त्री त्वं पुमान् असि त्वं कुमार उत वा कुमारी ॥  
 त्वं जीर्णो दण्डेन वञ्चसि त्वं जातो भवसि विश्वतोमुखः ॥२७॥  
 उतैषां पितोत वा पुत्र एषामुतैषां ज्येष्ठ उत वा कनिष्ठः ।  
 एको ह देवो मनसि प्रविष्टः प्रथमो जातः स उ गर्भे अन्तः ॥२८॥  
 पूर्णात्पूर्णमुदचति पूर्णं पूर्णेन सिच्यते ।  
 उतो तदद्य विद्याम यतस्तत्परिषिच्यते ॥२९॥  
 एषा सनन्ती सनमेव जातैषा पुराणी परि सर्वं बभूव ।  
 मही देव्युषसो विभाती सैकेनैकेन मिषता वि चष्टे ॥३०॥ {२८}  
 अविर्वै नाम देवतर्तेनास्ते परीवृता ।  
 तस्या रूपेणेमे वृक्षा हरिता हरितस्रजः ॥३१॥  
 अन्ति सन्तं न जहात्यन्ति सन्तं न पश्यति ।  
 देवस्य पश्य काव्यं न ममार न जीर्यति ॥३२॥  
 अपूर्वेणेषिता वाचस्ता वदन्ति यथायथम् ।  
 वदन्तीर्यत्र गच्छन्ति तदाहर्ब्राह्मणं महत् ॥३३॥  
 यत्र देवाश्च मनुष्याश्चारा नाभाविव श्रिताः ।  
 अपां त्वा पूर्णं पृच्छामि यत्र तन् मायया हितम् ॥३४॥  
 येभिर्वात इषितः प्रवाति ये ददन्ते पञ्च दिशः सङ्घीचीः ।  
 य आहुतिमत्यमन्यन्त देवा अपां नेतारः कतमे त आसन् ॥३५॥  
 इमामेषां पृथिवीं वस्त एकोऽन्तरिक्षं पर्येको बभूव ।

दिवमेषां ददते यो विधर्ता विश्वा आशाः प्रति रक्षन्त्येके ॥३६॥  
 यो विद्यात्सूत्रं विततं यस्मिन् ओताः प्रजा इमाः ।  
 सूत्रं सूत्रस्य यो विद्यादस विद्याद्ब्राह्मणं महत् ॥३७॥  
 वेदाहं सूत्रं विततं यस्मिन् ओताः प्रजा इमाः ।  
 सूत्रं सूत्रस्याहं वेदाथो यद्ब्राह्मणं महद् ॥३८॥  
 यदन्तरा द्यावापृथिवी अग्निरेत्प्रदहन् विश्वदाव्यः ।  
 यत्रातिष्ठन् एकपत्नीः परस्तात्क्वेवासीन् मातरिश्वा तदानीम् ॥३९॥  
 अप्स्वासीन् मातरिश्वा प्रविष्टः प्रविष्टा देवाः सलिलान्यासन् ॥  
 बृहन् ह तस्थौ रजसो विमानः पवमानो हरित आ विवेश ॥४०॥  
 उत्तरेणेव गयत्रीममृतेऽधि वि चक्रमे ।  
 साम्ना ये साम सविदुरजस्तद्दृशे क्व ॥४१॥  
 निवेशनः संगमनो वसूनां देव इव सविता सत्यधर्मा ।  
 इन्द्रो न तस्थौ समरे धनानाम् ॥४२॥  
 पुण्डरीकं नवद्वारं त्रिभिर्गुणोभिरावृतम् ।  
 तस्मिन् यद्यक्षमात्मन्वत्तद्वै ब्रह्मविदो विदुः ॥४३॥  
 अकामो धीरो अमृतः स्वयंभू रसेन तृप्तो न कुतश्चनोनः ।  
 तमेव विद्वान् न विभाय मृत्योरात्मानं धीरमजरं युवानम् ॥४४॥ {२९}

10.9

अघायतामपि नह्या मुखानि सपत्नेषु वज्रमर्पयैतम् ।  
 इन्द्रेण दत्ता प्रथमा शतौदना भ्रातृव्यघ्नी यजमानस्य गातुः ॥१॥  
 वेदिष्ठे चर्म भवतु बर्हिर्लोमानि यानि ते ।  
 एषा त्वा रशनाग्रभीदग्रावा त्वैषोऽधि नृत्यतु ॥२॥  
 बालास्ते प्रोक्षणीः सन्तु जीह्वा सं माष्टु अघ्न्ये ।  
 शुद्धा त्वं यज्ञिया भूत्वा दिवं प्रेहि शतौदने ॥३॥  
 यः शतौदनां पचति कामप्रेण स कल्पते ।  
 प्रीता ह्यस्य ऋत्विजः सर्वे यन्ति यथायथम् ॥४॥  
 स स्वर्गमा रोहति यत्रादस्त्रिदिवं दिवः ।  
 अपूपनाभिं कृत्वा यो ददाति शतौदनाम् ॥५॥  
 स तांल्लोकान्त्समाप्नोति ये दिव्या ये च पार्थिवाः ।  
 हिरण्यज्योतिषं कृत्वा यो ददाति शतौदनाम् ॥६॥  
 ये ते देवि शमितारः पक्तारो ये च ते जनाः ।  
 ते त्वा सर्वे गोप्स्यन्ति मैभ्यो भैषीः शतौदने ॥७॥  
 वसवस्त्वा दक्षिणत उत्तरान् मरुतस्त्वा ।  
 आदित्याः पश्चाद्गोप्स्यन्ति साग्निष्टोममति द्रव ॥८॥  
 देवाः पितरो मनुष्या गन्धर्वाप्सरसश्च ये ।  
 ते त्वा सर्वे गोप्स्यन्ति सातिरात्रमति द्रव ॥९॥  
 अन्तरिक्षं दिवं भूमिमादित्यान् मरुतो दिशः ।  
 लोकान्त्स सर्वान् आप्नोति यो ददाति शतौदनाम् ॥१०॥ {३०}  
 घृतं प्रोक्षन्ती सुभगा देवी देवान् गमिष्यति ।  
 पक्तारमघ्न्ये मा हिंसीदिवं प्रेहि शतौदने ॥११॥  
 ये देवा दिविषदो अन्तरिक्षसदश्च ये ये चेमे भूम्यामधि ।  
 तेभ्यस्त्वं धुक्ष्व सर्वदा क्षीरं सर्पिरथो मधु ॥१२॥  
 यत्ते शिरो यत्ते मुखं यौ कर्णौ ये च ते हनू ।  
 आमिक्षां दुहतां दात्रे क्षीरं सर्पिरथो मधु ॥१३॥  
 यौ त ओष्ठौ ये नासिके ये शृङ्गे ये च तेऽक्षिणी ।  
 आमिक्षां दुहतां दात्रे क्षीरं सर्पिरथो मधु ॥१४॥  
 यत्ते क्लोमा यद्दृदयं पुरीतत्सहकण्ठिका ।  
 आमिक्षां दुहतां दात्रे क्षीरं सर्पिरथो मधु ॥१५॥  
 यत्ते यकृष्टं मतस्ने यदान्त्रं याश्च ते गुदाः ।  
 आमिक्षां दुहतां दात्रे क्षीरं सर्पिरथो मधु ॥१६॥  
 यस्ते प्लाशिर्यो वनिष्ठुर्यो कुक्षी यच्च चर्म ते ।  
 आमिक्षां दुहतां दात्रे क्षीरं सर्पिरथो मधु ॥१७॥  
 यत्ते मज्जा यदस्थि यन् मंसं यच्च लोहितम् ।  
 आमिक्षां दुहतां दात्रे क्षीरं सर्पिरथो मधु ॥१८॥  
 यौ ते बाहू ये दोषणी यावंसौ या च ते ककुत् ।  
 आमिक्षां दुहतां दात्रे क्षीरं सर्पिरथो मधु ॥१९॥  
 यास्ते ग्रीवा ये स्कन्धा याः पृष्ठीर्याश्च पशवः ।  
 आमिक्षां दुहतां दात्रे क्षीरं सर्पिरथो मधु ॥२०॥ {३१}  
 यौ त उरू अष्टीवन्तौ ये श्रोणी या च ते भसत् ।  
 आमिक्षां दुहतां दात्रे क्षीरं सर्पिरथो मधु ॥२१॥  
 यत्ते पुच्छं ये ते बाला यदूधो ये च ते स्तनाः ।  
 आमिक्षां दुहतां दात्रे क्षीरं सर्पिरथो मधु ॥२२॥  
 यास्ते जङ्घाः याः कुष्ठिका ऋच्छरा ये च ते शफाः ।

आमिक्षां दुहतां दात्रे क्षीरं सर्पिरथो मधु ॥२३॥  
 यत्ते चर्म शतौदने यानि लोमान्यघ्न्ये ।  
 आमिक्षां दुहतां दात्रे क्षीरं सर्पिरथो मधु ॥२४॥  
 क्रोडौ ते स्तां पुरोडाशावाज्येनाभिघारितौ ।  
 तौ पक्षी देवि कृत्वा सा पत्तारं दिवं वह ॥२५॥  
 उलूखले मुसले यश्च चर्मणि यो वा शूर्पे तण्डुलः कणः ।  
 यं वा वातो मातरिश्वा पवमानो ममाथाग्निष्टद्धोता सुहुतं कृणोतु ॥२६॥  
 अपो देवीर्मधुमतीर्धृतश्चुतो ब्रह्मणां हस्तेषु प्रपृथक्सादयामि ।  
 यत्काम इदमभिषिञ्चामि वोऽहं तन् मे सर्वं सं पद्यतां वयं स्याम पतयो रयीणाम् ॥२७॥ {३२}

10.10

नमस्ते जायमानायै जाताया उत ते नमः ।  
 बालेभ्यः शफेभ्यो रूपायाघ्न्ये ते नमः ॥१॥  
 यो विद्यात्सप्त प्रवतः सप्त विद्यात्परावतः ।  
 शिरो यज्ञस्य यो विद्यात्स वशां प्रति गृह्णीयात् ॥२॥  
 वेदाहं सप्त प्रवतः सप्त वेद परावतः ।  
 शिरो यज्ञस्याहं वेद सोमं चास्यां विचक्षणम् ॥३॥  
 यया द्यौर्यया पृथिवी ययापो गुपिता इमाः ।  
 वशां सहस्रधारां ब्रह्मणाच्छावदामसि ॥४॥  
 शतं कंसाः शतं दोग्धारः शतं गोप्तारो अधि पृष्ठे अस्याः ।  
 ये देवास्तस्यां प्राणन्ति ते वशां विदुरेकधा ॥५॥  
 यज्ञपदीराक्षीरा स्वधाप्राणा महीलुका ।  
 वशा पर्जन्यपत्नी देवामप्येति ब्रह्मणा ॥६॥  
 अनु त्वाग्निः प्राविशदनु सोमो वशे त्वा ।  
 ऊधस्ते भद्रे पर्जन्यो विद्युतस्ते स्तना वशे ॥७॥  
 अपस्त्वं धुक्षे प्रथमा उर्वरा अपरा वशे ।  
 तृतीयं राष्ट्र धुक्षेऽन्नं क्षीरं वशे त्वम् ॥८॥  
 यदादित्यैर्ह्यमनोपातिष्ठ ऋतवरि ।  
 इन्द्रः सहस्रं पात्रान्तसोमं त्वापाययद्वशे ॥९॥  
 यदनूचीन्द्रमैरात्त्वा ऋषभोऽह्वयत् ।  
 तस्मात्ते वृत्रहा पयः क्षीरं क्रुद्धोऽहरद्वशे ॥१०॥ {३३}  
 यत्ते क्रुद्धो धनपतिरा क्षीरमहरद्वशे ।  
 इदं तदद्य नाकस्त्रिषु पात्रेषु रक्षति ॥११॥  
 त्रिषु पात्रेषु तं सोममा देव्यहरद्वशा ।  
 अथर्वा यत्र दीक्षितो बर्हिष्पास्त हिरण्यये ॥१२॥  
 सं हि सोमेनागत समु सर्वेण पद्धता ।  
 वशा समुद्रमध्यष्ठदन्धर्वैः कलिभिः सह ॥१३॥  
 सं हि वातेनागत समु सर्वैः पतत्रिभिः ।  
 वशा समुद्रे प्रानृत्यदृचः सामानि बिभ्रती ॥१४॥  
 सं हि सूर्येणागत समु सर्वेण चक्षुषा ।  
 वशा समुद्रमत्यख्यद्द्रा ज्योतींषि बिभ्रती ॥१५॥  
 अभीवृता हिरण्येन यदतिष्ठ ऋतावरि ।  
 अश्वः समुद्रो भूत्वाध्यस्कन्दद्वशे त्वा ॥१६॥  
 तद्द्राद्राः समगच्छन्त वशा देष्ट्रयथो स्वधा ।  
 अथर्वा यत्र दीक्षितो बर्हिष्पास्त हिरण्यये ॥१७॥  
 वशा माता राजन्यस्य वशा माता स्वधे तव ।  
 वशाया यज्ञ आयुधं ततश्चित्तमजायत ॥१८॥  
 ऊर्ध्वो बिन्दुरुदचरदब्रह्मणः ककुदादधि ।  
 ततस्त्वं जज्ञिषे वशे ततो होताजायत ॥१९॥  
 आस्नस्ते गाथा अभवन्न उष्णिहाभ्यो बलं वशे ।  
 पाजस्याज्जज्ञे यज्ञ स्तनेभ्यो रश्मयस्तव ॥२०॥ {३४}  
 ईर्माभ्यामयनं जातं सक्थिभ्यां च वशे तव ।  
 आन्त्रेभ्यो जज्ञिरे अत्रा उदरादधि वीरुधः ॥२१॥  
 यदुदरं वरुणस्यानुप्राविशथा वशे ।  
 ततस्त्वा ब्रह्मोदह्वयत्स हि नेत्रमवेत्तव ॥२२॥  
 सर्वे गर्भादवेपन्त जायमानादसूस्वः ।  
 असूव हि तामाहु वशेति ब्रह्मभिः कूप्तः स ह्यस्या बन्धुः ॥२३॥  
 युधं एकः सं सृजति यो अस्या एकं इद्वशी ।  
 तरांसि यज्ञा अभवन् तरसां चक्षुरभवद्वशा ॥२४॥  
 वशा यज्ञं प्रत्यगृह्णाद्वशा सूर्यमधारयत् ।  
 वशायामन्तरविशदीदनो ब्रह्मणा सह ॥२५॥  
 वशामेवामृतमाहुर्वशां मृत्युमुपासते ।  
 वशेदं सर्वमभवद्देवा मनुष्या असुराः पितर ऋषयः ॥२६॥  
 य एवं विद्यात्स वशां प्रति गृह्णीयात् ।

तथा हि यज्ञः सर्वपाद्गुहे दात्रेऽनपस्फुरन् ॥२७॥  
 तिस्रो जिह्वा वरुणस्यान्तर्दीद्यत्यासनि ।  
 तासां या मध्ये राजति सा वशा दुष्प्रतिग्रहा ॥२८॥  
 चतुर्धा रेतो अभवद्वशायाः ।  
 आपस्तुरीयममृतं तुरीयं यज्ञस्तुरीयं पशवस्तुरीयम् ॥२९॥  
 वशा द्यौर्वशा पृथिवी वशा विष्णुः प्रजापतिः ।  
 वशाया दुग्धमपिबन्त्साध्या वसवश्च ये ॥३०॥  
 वशाया दुग्धं पीत्वा साध्या वसवश्च ये ।  
 ते वै ब्रध्नस्य विष्टपि पयो अस्या उपासते ॥३१॥  
 सोममेनामेके दुहे घृतमेक उपासते ।  
 य एवं विदुषे वशां ददुस्ते गतास्त्रिदिवं दिवः ॥३२॥  
 ब्राह्मणेभ्यो वशां दत्त्वा सर्वाल्लोकान्त्समश्नुते ।  
 ऋतं ह्यस्यामार्पितमपि ब्रह्माथो तपः ॥३३॥  
 वशां देवा उप जीवन्ति वशां मनुष्या उत ।  
 वशेदं सर्वमभवद्वावत्सूर्यो विपश्यति ॥३४॥ {३५}

### 11.1

अग्ने जायस्वादितिर्नाथितेयं ब्रह्मौदनं पचति पुत्रकामा ।  
 सप्तऋषयो भूतकृतस्ते त्वा मन्थन्तु प्रजया सहेह ॥१॥  
 कृणुत धूमं वृषणः सखायोऽद्रोघाविता वाचमच्छ ।  
 अयमग्निः पृतनाषाट्सुवीरो येन देवा असहन्त दस्यून ॥२॥  
 अग्नेऽजनिष्ठा महते वीर्याय ब्रह्मौदनाय पक्तवे जातवेदः ।  
 सप्तऋषयो भूतकृतस्ते त्वाजीजनन्न अस्यै रयिं सर्ववीरं नि यच्छ ॥३॥  
 समिद्धो अग्ने समिधा समिध्यस्व विद्वान् देवान् यज्ञियामेह वक्षः ।  
 तेभ्यो हविः श्रपयं जातवेद उत्तमं नाकमधि रोहयेमम् ॥४॥  
 त्रेधा भागो निहितो यः पुरा वो देवानां पितृणां मर्त्यानाम् ।  
 अंशां जानीध्वं वि भजामि तान् वो यो देवानां स इमां पारयाति ॥५॥  
 अग्ने सहस्वान् अभिभूरभीदसि नीचो न्युब्ज द्विषतः सपत्नान् ।  
 इयं मात्रा मीयमाना मिता च सजातांस्ते बलिहृतः कृणोतु ॥६॥  
 साकं सजातैः पयसा सहैध्युदुब्जैनां महते वीर्याय ।  
 ऊर्ध्वो नाकस्याधि रोह विष्टपं स्वर्गो लोक इति यं वदन्ति ॥७॥  
 इयं मही प्रति गृह्णातु चर्म पृथिवी देवी सुमनस्यमाना ।  
 अथ गच्छेम सुकृतस्य लोकम् ॥८॥  
 एतौ ग्रावाणौ सयुजा युद्धि चर्मणि निर्बिन्ध्यंशून् यजमानाय साधु ।  
 अवघ्नती नि जहि य इमां पृतन्यव ऊर्ध्वं प्रजामुद्गरन्त्युद्गह ॥९॥  
 गृहाण ग्रावाणौ सकृतौ वीर हस्त आ ते देवा यज्ञिया यज्ञमगुः ।  
 त्रयो वरा यतमांस्त्वं वृणीषे तास्ते समृद्धीरिह राधयामि ॥१०॥ {१}  
 इयं ते धीतिरिदमु ते जनित्रं गृह्णातु त्वामदितिः शूरपुत्रा ।  
 परा पुनीहि य इमां पृतन्यवोऽस्यै रयिं सर्ववीरं नि यच्छ ॥११॥  
 उपश्वसे द्रुवये सीदता यूयं वि विच्यध्वं यज्ञियासस्तुषैः ।  
 श्रिया समानान् अति सर्वान्त्स्यामाधस्पदं द्विषतस्पादयामि ॥१२॥  
 परेहि नारि पुनरेहि क्षिप्रमपां त्वा गोष्ठो अध्वरुक्षद्भराय ।  
 तासां गृह्णीताद्यतमा यज्ञिया असन् विभाज्य धीरीतरा जहीतात् ॥१३॥  
 एमा अगुर्योषितः शुम्भमाना उत्तिष्ठ नारि तवसं रभस्व ।  
 सुपत्नी पत्या प्रजया प्रजावत्या त्वागन् यज्ञः प्रति कुम्भं गृभाय ॥१४॥  
 ऊर्जा भागो निहितो यः पुरा व ऋषिप्रशिष्टाप आ भरेताः ।  
 अयं यज्ञो गातुविन् नाथवित्प्रजाविदुगः पशुविद्वीरविद्वो अस्तु ॥१५॥  
 अग्ने चरुर्यज्ञियस्त्वाध्वरुक्षच्छुचिस्तपिष्ठस्तपसा तपैनम् ।  
 आर्षेया देवा अभिसंगत्य भागमिमं तपिष्ठा ऋतुभिस्तपन्तु ॥१६॥  
 शुद्धाः पूता योषितो यज्ञिया इमा आपश्चरुमव सर्पन्तु शुभ्राः ।  
 अदुः प्रजां बहुलां पशून् नः पक्तौदनस्य सुकृतामेतु लोकम् ॥१७॥  
 ब्रह्मणा शुद्धा उत पूता घृतेन सोमस्यांशवस्तण्डुला यज्ञिया इमे ।  
 अपः प्र विशत प्रति गृह्णातु वश्चरुरिमं पक्त्वा सुकृतामेत लोकम् ॥१८॥  
 उरुः प्रथस्व महता महिम्ना सहस्रपृष्ठः सुकृतस्य लोके ।  
 पितामहाः पितरः प्रजोपजाहं पक्ता पञ्चदशस्ते अस्मि ॥१९॥  
 सहस्रपृष्ठः शतधारो अक्षितो ब्रह्मौदनो देवयानः स्वर्गः ।  
 अमंस्त आ दधामि प्रजया रेषयैनान् बलिहाराय मृडतान् मह्यमेव ॥२०॥ {२}  
 उदेहि वेदिं प्रजया वर्धयेनां नुदस्व रक्षः प्रतरं धेहीनाम् ।  
 श्रिया समानान् अति सर्वान्त्स्यामाधस्पदं द्विषतस्पादयामि ॥२१॥  
 अभ्यावर्तस्व पशुभिः सहैनां प्रत्यङ्ङेनां देवताभिः सहैधि ।  
 मा त्वा प्रापच्छपथो माभिचारः स्वे क्षेत्रे अनमीवा वि राज ॥२२॥  
 ऋतेन तष्ठा मनसा हितैषा ब्रह्मौदनस्य विहिता वेदिरग्रे ।  
 अंसर्धीं शुद्धामुप धेहि नारि तत्रौदनं सादय दैवानाम् ॥२३॥

अदितेर्हस्तां सूचमेतां द्वितीयां सप्तऋषयो भूतकृतो यामकृण्वन् ।  
 सा गात्राणि विदुष्योदनस्य दर्विवेद्यामध्येन चिनोतु ॥२४॥  
 शतं त्वा हव्यमुप सीदन्तु देवा निःसृप्याग्नेः पुनरेनान् प्र सीद ।  
 सोमेन पूतो जठरे सीद ब्रह्मणामार्षेयास्ते मा रिषन् प्राशितारः ॥२५॥  
 सोम राजन्त्संज्ञानमा वपैभ्यः सुब्राह्मणा यतमे त्वोपसीदान् ।  
 ऋषीन् आर्षेयांस्तपसोऽधि जातान् ब्रह्मौदने सुहवा जोहवीमि ॥२६॥  
 शुद्धाः पूता योषितो यज्ञिया इमा ब्रह्मणां हस्तेषु प्रपृथक्सादयामि ।  
 यत्काम इदमभिषिञ्चामि वोऽहमिन्द्रो मरुत्वान्त्स ददादिदं मे ॥२७॥  
 इदं मे ज्योतिरमृतं हिरण्यं पक्वं क्षेत्रात्कामदुघा म एषा ।  
 इदं धनं नि दधे ब्राह्मणेषु कृण्वे पन्थां पितृषु यः स्वर्गः ॥२८॥  
 अग्नौ तुषान् आ वप जातवेदसि परः कम्बुकामप मृष्टि दूरम् ।  
 एतं शुश्रुम गृहराजस्य भागमथो विद्म निर्ऋतेर्भागधेयम् ॥२९॥  
 श्राम्यतः पचतो विद्धि सुन्वतः पन्थां स्वर्गमधि रोहयैनम् ।  
 येन रोहात्परमापद्य यद्वय उत्तमं नाकं परमं व्योम ॥३०॥ {३}  
 बभ्रेरध्वर्यो मुखमेतद्वि मृडह्याज्याय लोकं कृणुहि प्रविद्वान् ।  
 घृतेन गात्रानु सर्वा वि मृष्टि कृण्वे पन्थां पितृषु यः स्वर्गः ॥३१॥  
 बभ्रे रक्षः समदमा वपैभ्योऽब्राह्मणा यतमे त्वोपसीदान् ।  
 पुरीषिणः प्रथमानाः पुरस्तादार्षेयास्ते मा रिषन् प्राशितारः ॥३२॥  
 आर्षेयेषु नि दध ओदन त्वा नानार्षेयाणामप्यस्त्यत्र ।  
 अग्निर्मे गोप्ता मरुतश्च सर्वे विश्वे देवा अभि रक्षन्तु पक्वम् ॥३३॥  
 यज्ञं दुहानं सदमित्प्रपीनं पुमांसं धेनुं सदनं रयीणाम् ।  
 प्रजामृतत्वमुत दीर्घमायू रायश्च पोषैरुप त्वा सदेम ॥३४॥  
 वृषभोऽसि स्वर्गं ऋषीन् आर्षेयान् गच्छ ।  
 सुकृतां लोके सीद तत्र नौ संस्कृतम् ॥३५॥  
 समाचिनुष्वानुसंप्रयाहाग्ने पथः कल्पय देवयानान् ।  
 एतैः सुकृतैरनु गळेम यज्ञं नाके तिष्ठन्तमधि सप्तरश्मौ ॥३६॥  
 येन देवा ज्योतिषा द्यामुदायन् ब्रह्मौदनं पक्त्वा सुकृतस्य लोकम् ।  
 तेन गोष्म सुकृतस्य लोकं स्वरारोहन्तो अभि नाकमुत्तमम् ॥३७॥ {४}

### 11.2

भवाशर्वो मृडतं माभि यातं भूतपती पशुपती नमो वाम् ।  
 प्रतिहितामायतां मा वि स्राष्टं मा नो हिंसिष्टं द्विपदो मा चतुष्पदः ॥१॥  
 शुने क्रोष्ट्रे मा शरीराणि कर्तमलिक्लवेभ्यो गृध्रेभ्यो ये च कृष्णा अविष्यवः ।  
 मक्षिकास्ते पशुपते वयांसि ते विघसे मा विदन्त ॥२॥  
 क्रन्दाय ते प्राणाय याश्च ते भव रोपयः ।  
 नमस्ते रुद्र कृष्णः सहस्राक्षायामर्त्य ॥३॥  
 पुरस्तात्ते नमः कृष्ण उत्तरादधरादुत ।  
 अभीवर्गाद्विवस्पर्यन्तरिक्षाय ते नमः ॥४॥  
 मुखाय ते पशुपते यानि चक्षुषि ते भव ।  
 त्वचे रूपाय संदृशे प्रतीचीनाय ते नमः ॥५॥  
 अङ्गेभ्यस्त उदराय जिह्वाया आस्थाय ते ।  
 ददभ्यो गन्धाय ते नमः ॥६॥  
 अस्त्रा नीलशिखण्डेन सहस्राक्षेण वाजिना ।  
 रुद्रेणार्धकघातिना तेन मा समरामहि ॥७॥  
 स नो भवः परि वृणक्तु विश्वत आप इवाग्निः परि वृणक्तु नो भवः ।  
 मा नोऽभि मांस्त नमो अस्त्वस्मै ॥८॥  
 चतुर्नमो अष्टकृत्वो भवाय दश कृत्वः पशुपते नमस्ते ।  
 तवमे पञ्च पशवो विभक्ता गावो अश्वः पुरुषा अजावयः ॥९॥  
 तव चतस्रः प्रदिशस्तव द्यौस्तव पृथिवी तवेदमुग्रोर्वन्तरिक्षम् ।  
 तवेदं सर्वमात्मन्वद्यत्प्राणत्पृथिवीमनु ॥१०॥ {५}  
 उरुः कोशो वसुधानस्तवार्य यस्मिन्न इमा विश्वा भुवनान्यन्तः ।  
 स नो मृड पशुपते नमस्ते परः क्रोष्टारो अभिभाः श्वानः परो यन्त्वघरुदो विकेश्यः ॥११॥  
 धनुर्बिभर्षि हरितं हिरण्ययं सहस्रच्छिं शतवधं शिखण्डिनम् ।  
 रुद्रस्येषुश्चरति देवहेतिस्तस्यै नमो यतमस्यां दिशीतः ॥१२॥  
 योऽभियातो निलयते त्वां रुद्र निचिकीर्षति ।  
 पश्चादनुप्रयुङ्क्षे तं विद्धस्य पदनीरिव ॥१३॥  
 भवारुद्रो सयुजा संविदानावुभावुग्नौ चरतो वीर्याय ।  
 ताभ्यां नमो यतमस्यां दिशीतः ॥१४॥  
 नमस्ते अस्त्वायते नमो अस्तु परायते ।  
 नमस्ते रुद्र तिष्ठत आसीनायोत ते नमः ॥१५॥  
 नमः सायं नमः प्रातर्नमो रात्र्या नमो दिवा ।  
 भवाय च शर्वाय चोभाभ्यामकरं नमः ॥१६॥  
 सहस्राक्षमतिपश्यं पुरस्ताद्द्रुमस्यन्तं बहुधा विपश्चितम् ।  
 मोपाराम जिह्वयेयमानम् ॥१७॥

श्यावाश्वं कृष्णमसितं मृणन्तं भीमं रथं केशिनः पादयन्तम् ।  
 पूर्वं प्रतीमो नमो अस्त्वस्मै ॥१८॥  
 मा नोऽभि स्या मत्यं देवहेतिं मा नः क्रुधः पशुपते नमस्ते ।  
 अन्यत्रास्मद्विव्यां शाखां वि धूनु ॥१९॥  
 मा नो हिंसीरधि नो ब्रूहि परि णो वृद्धि मा क्रुधः ।  
 मा त्वया समरामहि ॥२०॥ {६}  
 मा नो गोषु पुरुषेषु मा गृधो नो अजाविषु ।  
 अन्यत्रोग्र वि वर्तय पियारूणां प्रजां जहि ॥२१॥  
 यस्य तक्मा कासिका हेतिरेकमश्वस्येव वृषणः क्रन्द एति ।  
 अभिपूर्वं निर्णयते नमो अस्त्वस्मै ॥२२॥  
 योऽन्तरिक्षे तिष्ठति विष्टभितोऽयज्वनः प्रमृणन् देवपीयून् ।  
 तस्मै नमो दशाभिः शक्वरीभिः ॥२३॥  
 तुभ्यमारण्याः पशवो मृगा वने हिता हंसाः सुपर्णाः शकुना वयांसि ।  
 तव यक्षं पशुपते अप्स्वन्तस्तुभ्यं क्षरन्ति दिव्या आपो वृधे ॥२४॥  
 शिशुमारा अजगराः पुरीकया जषा मत्स्या रजसा येभ्यो अस्यसि ।  
 न ते दूरं न परिष्ठास्ति ते भव सद्यः सर्वा परि पश्यसि भूमिं पूर्वस्माद्धंस्युत्तरस्मिन्त्समुद्रे ॥२५॥  
 मा नो रुद्र तक्मना मा विषेण मा नः सं स्या दिव्येनाग्निना ।  
 अन्यत्रास्मद्विद्युतं पातयैताम् ॥२६॥  
 भवो दिवो भव ईशे पृथिव्या भव आ पप्र उर्वन्तरिक्षम् ।  
 तस्यै नमो यतमस्यां दिशीतः ॥२७॥  
 भव राजन् यजमानाय मृड पशूनां हि पशुपतिर्बभूथ ।  
 यः श्रद्धधाति सन्ति देवा इति चतुष्पदे द्विपदेऽस्य मृड ॥२८॥  
 मा नो महान्तमुत मा नो अर्भकं मा नो वहन्तमुत मा नो वक्ष्यतः ।  
 मा नो हिंसीः पितरं मातरं च स्वां तन्वं रुद्र मा रीरिषो नः ॥२९॥  
 रुद्रस्यैलबकारेभ्योऽसंसूक्तगिलेभ्यः ।  
 इदं महास्येभ्यः श्वभ्यो अकरं नमः ॥३०॥  
 नमस्ते घोषिणीभ्यो नमस्ते केशिनीभ्यः ।  
 नमो नमस्कृताभ्यो नमः संभुज्जतीभ्यः ।  
 नमस्ते देव सेनाभ्यः स्वस्ति नो अभयं च नः ॥३१॥ {७}

### 11.3

तस्यौदनस्य बृहस्पतिः शिरो ब्रह्म मुखम् ॥१॥  
 द्यावापृथिवी श्रोत्रे सूर्याचन्द्रमसावक्षिणी सप्तऋषयः प्राणापानाः ॥२॥  
 चक्षुर्मुसलं काम उलूखलम् ॥३॥  
 दितिः शूर्पमदितिः शूर्पग्राही वातोऽपाविनक् ॥४॥  
 अश्रवाः कणा गावस्तण्डुला मशकास्तुषाः ॥५॥  
 कब्रु फलीकरणाः शरोऽभ्रम् ॥६॥  
 श्याममयोऽस्य मांसानि लोहितमस्य लोहितम् ॥७॥  
 त्रपु भस्म हरितं वर्णः पुष्करमस्य गन्धः ॥८॥  
 खलः पात्रं स्पयावंसावीषे अनूक्ये ॥९॥  
 आन्त्राणि जत्रवो गुदा वरत्राः ॥१०॥  
 इयमेव पृथिवी कुम्भी भवति राध्यमानस्यौदनस्य द्यौरपिधानम् ॥११॥  
 सीताः पर्ववः सिकता ऊबध्यम् ॥१२॥  
 ऋतं हस्तावनेजनं कुल्योपसेचनम् ॥१३॥  
 ऋचा कुम्भ्यधिहितात्विज्येन प्रेषिता ॥१४॥  
 ब्रह्मणा परिगृहीता साम्ना पर्यूढा ॥१५॥  
 बृहदायवनं रथन्तरं दर्विः ॥१६॥  
 ऋतवः पक्तार आर्तवाः समिन्धते ॥१७॥  
 चरुं पञ्चबिलमुखं घर्मोऽभीन्धे ॥१८॥  
 ओदनेन यज्ञवतः सर्वे लोकाः समाप्याः ॥१९॥  
 यस्मिन्त्समुद्रो द्यौर्भूमिस्रयोऽवरपरं श्रिताः ॥२०॥  
 यस्य देवा अकल्पन्तोच्छिष्टे षडशीतयः ॥२१॥  
 तं त्वौदनस्य पृष्ठामि यो अस्य महिमा महान् ॥२२॥  
 स य ओदनस्य महिमानं विद्यात् ॥२३॥  
 नाल्प इति ब्रूयान् नानुपसेचन इति नेदं च किं चेति ॥२४॥  
 यावद्दाताभिमनस्येत तन् नाति वदेत् ॥२५॥  
 ब्रह्मवादिनो वदन्ति पराञ्चमोदनं प्राशी३ः प्रत्यञ्चा३ इति ॥२६॥  
 त्वमोदनं प्राशी३ त्वामोदना३ इति ॥२७॥  
 पराञ्चं चैनं प्राशीः प्राणास्त्वा हास्यन्तीत्येनमाह ॥२८॥  
 प्रत्यञ्चं चैनं प्राशीरपानास्त्वा हास्यन्तीत्येनमाह ॥२९॥  
 नैवाहमोदनं न मामोदनः ॥३०॥  
 ओदन एवौदनं प्राशीत् ॥३१॥ {८}  
 ततश्चैनमन्येन शीर्ष्णा प्राशीर्येन चैतं पूर्वं ऋषयः प्राश्रन् ।  
 ज्येष्ठतस्ते प्रजा मरिष्यतीत्येनमाह ।

तं वा अहं नार्वञ्चं न पराञ्चं न प्रत्यञ्चम् ।  
 बृहस्पतिना शीर्ष्णा ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३२॥ [१]  
 ततश्चैनमन्याभ्यां श्रोत्राभ्यां प्राशीर्याभ्यां चैतं पूर्वं ऋषयः प्राश्नन् ।  
 बधिरो भविष्यसीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 द्यावापृथिवीभ्यां श्रोत्राभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३३॥ [२]  
 ततश्चैनमन्याभ्यामक्षीभ्यां प्राशीर्याभ्यां चैतं पूर्वं ऋषयः प्राश्नन् ।  
 अन्धो भविष्यसीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 सूर्याचन्द्रमसाभ्यामक्षीभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३४॥ [३]  
 ततश्चैनमन्येन मुखेन प्राशीर्येन चैतं पूर्वं ऋषयः प्राश्नन् ।  
 मुखतस्ते प्रजा मरिष्यतीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 ब्रह्मणा मुखेन ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३५॥ [४]  
 ततश्चैनमन्यया जिह्वया प्राशीर्यया चैतं पूर्वं ऋषयः प्राश्नन् ।  
 जिह्वा ते मरिष्यतीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 अग्नेर्जिह्वया ।  
 तयैनं प्राशिषं तयैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३६॥ [५]  
 ततश्चैनमन्यैर्दन्तैः प्राशीर्यैश्चैतं पूर्वं ऋषयः प्राश्नन् ।  
 दन्तास्ते शत्स्यन्तीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 ऋतुभिर्दन्तैः ।  
 तैरेनं प्राशिषं तैरेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३७॥ [६]  
 ततश्चैनमन्यैः प्राणापानैः प्राशीर्यैश्चैतं पूर्वं ऋषयः प्राश्नन् ।  
 प्राणापानास्त्वा हास्यन्तीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 सप्तऋषिभिः प्राणापानैः ।  
 तैरेनं प्राशिषं तैरेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३८॥ [७]  
 ततश्चैनमन्येन व्यचसा प्राशीर्येन चैतं पूर्वं ऋषयः प्राश्नन् ।  
 राजयक्ष्मस्त्वा हनिष्यतीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 अन्तरिक्षेण व्यचसा ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥३९॥ [८]  
 ततश्चैनमन्येन पृष्ठेन प्राशीर्येन चैतं पूर्वं ऋषयः प्राश्नन् ।  
 विद्युत्त्वा हनिष्यतीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।  
 दिवा पृष्ठेन ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४०॥ [९]  
 ततश्चैनमन्येनोरसा प्राशीर्येन चैतं पूर्वं ऋषयः प्राश्नन् ।  
 कृष्या न रात्स्यसीत्येनमाह ।  
 तं वा अहं नार्वञ्चं न पराञ्चं न प्रत्यञ्चम् ।

पृथिव्योरसा ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४१॥ [१०]  
 ततश्चैनमन्येनोदरेण प्राशीर्येन चैतं पूर्वं ऋषयः प्राश्नन् ।  
 उदरदारस्त्वा हनिष्यतीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 सत्येनोदरेण ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४२॥ [११]  
 ततश्चैनमन्येन वस्तिना प्राशीर्येन चैतं पूर्वं ऋषयः प्राश्नन् ।  
 अप्सु मरिष्यसीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 समुद्रेण वस्तिना ।  
 तेनैनं प्राशिषं तेनैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४३॥ [१२]  
 ततश्चैनमन्याभ्यामूरुभ्यां प्राशीर्याभ्यां चैतं पूर्वं ऋषयः प्राश्नन् ।  
 ऊरू ते मरिष्यत इत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 मित्रावरुणयोरूरुभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४४॥ [१३]  
 ततश्चैनमन्याभ्यामधीवद्भ्यां प्राशीर्याभ्यां चैतं पूर्वं ऋषयः प्राश्नन् ।  
 सामो भविष्यसीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 त्वष्टुरधीवद्भ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४५॥ [१४]  
 ततश्चैनमन्याभ्यां पादाभ्यां प्राशीर्याभ्यां चैतं पूर्वं ऋषयः प्राश्नन् ।  
 बहुचारी भविष्यसीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 अश्विनोः पादाभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४६॥ [१५]  
 ततश्चैनमन्याभ्यां प्रपदाभ्यां प्राशीर्याभ्यां चैतं पूर्वं ऋषयः प्राश्नन् ।  
 सर्पस्त्वा हनिष्यतीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 सवितुः प्रपदाभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४७॥ [१६]  
 ततश्चैनमन्याभ्यां हस्ताभ्यां प्राशीर्याभ्यां चैतं पूर्वं ऋषयः प्राश्नन् ।  
 ब्राह्मणं हनिष्यसीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 ऋतस्य हस्ताभ्याम् ।  
 ताभ्यामेनं प्राशिषं ताभ्यामेनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४८॥ [१७]  
 ततश्चैनमन्यया प्रतिष्ठया प्राशीर्यया चैतं पूर्वं ऋषयः प्राश्नन् ।  
 अप्रतिष्ठानोऽनायतनो मरिष्यसीत्येनमाह ।  
 तं वा अहं नार्वाञ्चं न पराञ्चं न प्रत्यञ्चम् ।  
 सत्ये प्रतिष्ठाय ।  
 तयैनं प्राशिषं तयैनमजीगमम् ।  
 एष वा ओदनः सर्वाङ्गः सर्वपरुः सर्वतनूः ।  
 सर्वाङ्ग एव सर्वपरुः सर्वतनूः सं भवति य एवं वेद ॥४९॥ [१८] {९}  
 एतद्वै ब्रध्नस्य विष्टपं यदोदनः ॥५०॥ [१]  
 ब्रध्नलोको भवति ब्रध्नस्य विष्टपि श्रयते य एवं वेद ॥५१॥ [२]  
 एतस्माद्वा ओदनात्त्रयस्त्रिंशत् लोकान् निरमिमीत प्रजापतिः ॥५२॥ [३]  
 तेषां प्रज्ञानाय यज्ञमसृजत ॥५३॥ [४]



स य एवं विदुष उपद्रष्टा भवति प्राणं रुणद्धि ॥५४॥ [५]  
 न च प्राणं रुणद्धि सर्वज्यानि जीयते ॥५५॥ [६]  
 न च सर्वज्यानि जीयते पुरैनं जरसः प्राणो जहाति ॥५६॥ [७] {१०}

11.4(११.६)

प्राणाय नमो यस्य सर्वमिदं वशे ।  
 यो भूतः सर्वस्येश्वरो यस्मिन्सर्वं प्रतिष्ठितम् ॥१॥  
 नमस्ते प्राण क्रन्दाय नमस्ते स्तनयित्नुवे ।  
 नमस्ते प्राण विद्युते नमस्ते प्राण वर्षते ॥२॥  
 यत्प्राण स्तनयित्नुनाभिक्रन्दत्योषधीः ।  
 प्र वीयन्ते गर्भान् दधतेऽथो बह्वीर्वि जायन्ते ॥३॥  
 यत्प्राण ऋतावागतेऽभिक्रन्दत्योषधीः ।  
 सर्वं तदा प्र मोदते यत्किं च भूम्यामधि ॥४॥  
 यदा प्राणो अभ्यवर्षीद्वर्षेण पृथिवीं महीम् ।  
 पशवस्तत्प्र मोदन्ते महो वै नो भविष्यति ॥५॥  
 अभिवृष्टा ओषधयः प्राणेन समवादिरन् ।  
 आयुर्वै नः प्रातीतरः सर्वा नः सुरभीरकः ॥६॥  
 नमस्ते अस्त्वायते नमो अस्तु परायते ।  
 नमस्ते प्राण तिष्ठत आसीनायोत ते नमः ॥७॥  
 नमस्ते प्राण प्राणते नमो अस्त्वपानते ।  
 पराचीनाय ते नमः प्रतीचीनाय ते नमः सर्वस्मै त इदं नमः ॥८॥  
 या ते प्राण प्रिया तनूर्यो ते प्राण प्रेयसी ।  
 अथो यद्भेषजं तव तस्य नो धेहि जीवसे ॥९॥  
 प्राणः प्रजा अनु वस्ते पिता पुत्रमिव प्रियम् ।  
 प्राणो ह सर्वस्येश्वरो यच्च प्राणति यच्च न ॥१०॥ {११}  
 प्राणो मृत्युः प्राणस्तक्मा प्राणं देवा उपासते ।  
 प्राणो ह सत्यवादिनमुत्तमे लोक आ दधत् ॥११॥  
 प्राणो विराट्प्राणो देष्ट्री प्राणं सर्वं उपासते ।  
 प्राणो ह सूर्यश्चन्द्रमाः प्राणमाहुः प्रजापतिम् ॥१२॥  
 प्राणापानौ व्रीहियवावनड्वान् प्राण उच्यते ।  
 यवे ह प्राण आहितोऽपानो व्रीहिरुच्यते ॥१३॥  
 अपानति प्राणति पुरुषो गर्भे अन्तरा ।  
 यदा त्वं प्राण जिन्वस्यथ स जायते पुनः ॥१४॥  
 प्राणमाहुर्मतिरिश्वानं वातो ह प्राण उच्यते ।  
 प्राणे ह भूतं भव्यं च प्राणे सर्वं प्रतिष्ठितम् ॥१५॥  
 आथर्वणीराङ्गिरसीर्देवीर्मनुष्यजा उत ।  
 ओषधयः प्र जायन्ते यदा त्वं प्राण जिन्वसि ॥१६॥  
 यदा प्राणो अभ्यवर्षीद्वर्षेण पृथिवीं महीम् ।  
 ओषधयः प्र जायन्तेऽथो याः काश्च वीरुधः ॥१७॥  
 यस्ते प्राणेदं वेद यस्मिंश्चासि प्रतिष्ठितः ।  
 सर्वे तस्मै बलिं हरान् अमुष्मिल्लोक उत्तमे ॥१८॥  
 यथा प्राण बलिहतस्तुभ्यं सर्वाः प्रजा इमाः ।  
 एवा तस्मै बलिं हरान् यस्त्वा शृणवत्सुश्रवः ॥१९॥  
 अन्तर्गर्भश्चरति देवतास्वाभूतो भूतः स उ जायते पुनः ।  
 स भूतो भव्यं भविष्यत्पिता पुत्रं प्र विवेशा शचीभिः ॥२०॥ {१२}  
 एकं पादं नोत्खिदति सलिलाद्धस उच्चरन् ।  
 यदङ्ग स तमुत्खिदेन् नैवाद्य न श्वः स्यात् ।  
 न रात्री नाहः स्यान् न व्युच्छेत्कदा चन ॥२१॥  
 अष्टाचक्रं वर्तत एकनेमि सहस्राक्षरं प्र पुरो नि पश्चा ।  
 अर्थेन विश्वं भुवनं जजान यदस्यार्थं कतमः स केतुः ॥२२॥  
 यो अस्य विश्वजन्मन ईशे विश्वस्य चेष्टतः ।  
 अन्येषु क्षिप्रधन्वने तस्मै प्राण नमोऽस्तु ते ॥२३॥  
 यो अस्य सर्वजन्मन ईशे सर्वस्य चेष्टतः ।  
 अतन्द्रो ब्रह्मणा धीरः प्राणो मानु तिष्ठतु ॥२४॥  
 ऊर्ध्वः सुप्तेषु जागार ननु तिर्यङ्नि पद्यते ।  
 न सुप्तमस्य सुप्तेष्वनु शुश्राव कश्चन ॥२५॥  
 प्राण मा मत्पर्यावृतो न मदन्यो भविष्यसि ।  
 अपां गर्भमिव जीवसे प्राण बध्नामि त्वा मयि ॥२६॥ {१३}

11.5(११.७)

ब्रह्मचारीष्णश्चरति रोदसी उभे तस्मिन् देवाः संमनसो भवन्ति ।  
 स दाधार पृथिवीं दिवं च स आचार्यं तपसा पिपति ॥१॥  
 ब्रह्मचारिणं पितरो देवजनाः पृथग्देवा अनुसंयन्ति सर्वे ।  
 गन्धर्वा एनमन्वायन् त्रयस्त्रिंशत्त्रिंशताः षट्सहस्राः सर्वान्त्स देवांस्तपसा पिपति ॥२॥

आचार्य उपनयमानो ब्रह्मचारिणं कृणुते गर्भमन्तः ।  
 तं रात्रीस्तिस्त्र उदरे बिभर्ति तं जातं द्रष्टुमभिसंयन्ति देवाः ॥३॥  
 इयं समित्पृथिवी द्यौर्द्वितीयोतान्तरिक्षं समिधा पृणाति ।  
 ब्रह्मचारी समिधा मेखलया श्रमेण लोकांस्तपसा पिपति ॥४॥  
 पूर्वं जातो ब्रह्मणो ब्रह्मचारी घर्मं वसानस्तपसोदतिष्ठत् ।  
 तस्माज्जातं ब्राह्मणं ब्रह्म ज्येष्ठं देवाश्च सर्वं अमृतेन साकम् ॥५॥  
 ब्रह्मचार्येति समिधा समिद्धः कार्ष्णं वसानो दीक्षितो दीर्घश्मश्रुः ।  
 स सद्य एति पूर्वस्मादुत्तरं समुद्रं लोकान्त्संगृभ्य मुहुराचरिक्त् ॥६॥  
 ब्रह्मचारी जनयन् ब्रह्मापो लोकं प्रजापतिं परमेष्ठिनं विराजम् ।  
 गर्भो भूत्वामृतस्य योनाविन्द्रो ह भूत्वासुरांस्ततर्ह ॥७॥  
 आचार्यस्ततक्ष नभसी उभे इमे उर्वी गम्भीरे पृथिवीं दिवं च ।  
 ते रक्षति तपसा ब्रह्मचारी तस्मिन् देवाः संमनसो भवन्ति ॥८॥  
 इमां भूमिं पृथिवीं ब्रह्मचारी भिक्षामा जभार प्रथमो दिवं च ।  
 ते कृत्वा समिधावुपास्ते तयोरापिता भुवनानि विश्वा ॥९॥  
 अर्वागन्यः परो अन्यो दिवस्पृष्टाद्गुहा निधी निहितौ ब्राह्मणस्य ।  
 तौ रक्षति तपसा ब्रह्मचारी तत्केवलं कृणुते ब्रह्म विद्वान् ॥१०॥ {१४}  
 अर्वागन्य इतो अन्यः पृथिव्या अग्नी समेतो नभसी अन्तरेमे ।  
 तयोः श्रयन्ते रश्मयोऽधि दृढास्तान् आ तिष्ठति तपसा ब्रह्मचारी ॥११॥  
 अभिक्रन्दन् स्तनयन् अरुणः शितिङ्गो बृहच्छेपोऽनु भूमौ जभार ।  
 ब्रह्मचारी सिञ्चति सानौ रेतः पृथिव्यां तेन जीवन्ति प्रदिशश्चतस्रः ॥१२॥  
 अग्नौ सूर्यं चन्द्रमसि मातरिश्चन् ब्रह्मचार्यस्य समिधमा दधाति ।  
 तासामर्चाषि पृथगभ्रे चरन्ति तासामाज्यं पुरुषो वर्षमापः ॥१३॥  
 आचार्यो मृत्युर्वरुणः सोम ओषधयः पयः ।  
 जीमूता आसन्त्सत्वानस्तैरिदं स्वराभृतम् ॥१४॥  
 अमा घृतं कृणुते केवलमाचार्यो भूत्वा वरुणः ।  
 यद्यदैच्छत्प्रजापतौ तद्ब्रह्मचारी प्रायच्छत्त्वान् मित्रो अध्यात्मनः ॥१५॥  
 आचार्यो ब्रह्मचारी ब्रह्मचारी प्रजापतिः ।  
 प्रजापतिर्वि राजति विराडिन्द्रोऽभवद्दशी ॥१६॥  
 ब्रह्मचर्येण तपसा राजा राष्ट्रं वि रक्षति ।  
 आचार्यो ब्रह्मचर्येण ब्रह्मचारिणमिच्छते ॥१७॥  
 ब्रह्मचर्येण कन्या युवानं विन्दते पतिम् ।  
 अनड्वान् ब्रह्मचर्येणाश्वो घासं जिगीषति ॥१८॥  
 ब्रह्मचर्येण तपसा देवा मृत्युमपाघ्नत ।  
 इन्द्रो ह ब्रह्मचर्येण देवेभ्यः स्वराभरत् ॥१९॥  
 ओषधयो भूतभव्यमहोरात्रे वनस्पतिः ।  
 संवत्सरः सह ऋतुभिस्ते जाता ब्रह्मचारिणः ॥२०॥ {१५}  
 पार्थिवा दिव्याः पशव आरण्या ग्राम्याश्च ये ।  
 अपक्षाः पक्षिणश्च ये ते जाता ब्रह्मचारिणः ॥२१॥  
 पृथक्सर्वे प्राजापत्याः प्राणान् आत्मसु बिभ्रति ।  
 तान्त्सर्वान् ब्रह्म रक्षति ब्रह्मचारिण्याभृतम् ॥२२॥  
 देवानामेतत्परिषूतमनभ्यारूढं चरति रोचमानम् ।  
 तस्माज्जातं ब्राह्मणं ब्रह्म ज्येष्ठं देवाश्च सर्वं अमृतेन साकम् ॥२३॥  
 ब्रह्मचारी ब्रह्म भ्राजद्विभर्ति तस्मिन् देवा अधि विश्वे समोताः ।  
 प्राणापानौ जनयन् आदव्यानं वाचं मनो हृदयं ब्रह्म मेधाम् ॥२४॥  
 चक्षुः श्रोत्रं यशो अस्मासु धेह्यन्नं रेतो लोहितमुदरम् ॥२५॥  
 तानि कल्पन् ब्रह्मचारी सलिलस्य पृष्ठे तपोऽतिष्ठत्तप्यमानः समुद्रे ।  
 स स्नातो बभ्रुः पिङ्गलः पृथिव्यां बहु रोचते ॥२६॥ {१६}

11.6(११.८)

अग्निं ब्रूमो वनस्पतीन् ओषधीरुत वीरुधः ।  
 इन्द्रं बृहस्पतिं सूर्यं ते नो मुञ्चन्त्वंहसः ॥१॥  
 ब्रूमो राजानं वरुणं मित्रं विष्णुमथो भगम् ।  
 अशं विवस्वन्तं ब्रूमस्ते नो मुञ्चन्त्वंहसः ॥२॥  
 ब्रूमो देवं सवितारं धातारमुत पूषणम् ।  
 त्वष्टारमग्निं ब्रूमस्ते नो मुञ्चन्त्वंहसः ॥३॥  
 गन्धर्वाप्सरसो ब्रूमो अश्विना ब्रह्मणस्पतिम् ।  
 अर्यमा नाम यो देवस्ते नो मुञ्चन्त्वंहसः ॥४॥  
 अहोरात्रे इदं ब्रूमः सूर्याचन्द्रमसावुभा ।  
 विश्वान् आदित्यान् ब्रूमस्ते नो मुञ्चन्त्वंहसः ॥५॥  
 वातं ब्रूमः पर्जन्यमन्तरिक्षमथो दिशः ।  
 आशाश्च सर्वा ब्रूमस्ते नो मुञ्चन्त्वंहसः ॥६॥  
 मुञ्चन्तु मा शपथ्यादहोरात्रे अथो उषाः ।  
 सोमो मा देवो मुञ्चतु यमाहुश्चन्द्रमा इति ॥७॥  
 पार्थिवा दिव्याः पशव आरण्या उत ये मृगाः ।

शकुन्तान् पक्षिणो ब्रूमस्ते नो मुञ्चन्त्वंहसः ॥८॥  
 भवाशर्वाविदं ब्रूमो रुद्रं पशुपतिश्च यः ।  
 इषूर्या एषां संविद्य ता नः सन्तु सदा शिवाः ॥९॥  
 दिवं ब्रूमो नक्षत्राणि भूमिं यक्षाणि पर्वतान् ।  
 समुद्रा नद्यो वेशन्तास्ते नो मुञ्चन्त्वंहसः ॥१०॥ {१७}  
 सप्तऋषीन् वा इदं ब्रूमोऽपो देवीः प्रजापतिम् ।  
 पितृन् यमश्रेष्ठान् ब्रूमस्ते नो मुञ्चन्त्वंहसः ॥११॥  
 ये देवा दिविषदो अन्तरिक्षसदश्च ये ।  
 पृथिव्यां शक्रा ये श्रितास्ते नो मुञ्चन्त्वंहसः ॥१२॥  
 आदित्या रुद्रा वसवो दिवि देवा अथर्वाणः ।  
 अङ्गिरसो मनीषिणस्ते नो मुञ्चन्त्वंहसः ॥१३॥  
 यज्ञं ब्रूमो यजमानमृचः सामानि भेषजा ।  
 यजूंषि होत्रा ब्रूमस्ते नो मुञ्चन्त्वंहसः ॥१४॥  
 पञ्च राज्यानि वीरुधां सोमश्रेष्ठानि ब्रूमः ।  
 दर्भो भङ्गो यवः सहस्ते नो मुञ्चन्त्वंहसः ॥१५॥  
 अरायान् ब्रूमो रक्षांसि सर्पान् पुण्यजनान् पितृन् ।  
 मृत्युन् एकशतं ब्रूमस्ते नो मुञ्चन्त्वंहसः ॥१६॥  
 ऋतून् ब्रूम ऋतुपतीन् आर्तवान् उत हायनान् ।  
 समाः संवत्सरान् मासांस्ते नो मुञ्चन्त्वंहसः ॥१७॥  
 एत देवा दक्षिणतः पश्चात्प्राञ्च उदेत ।  
 पुरस्तादुत्तराच्छक्रा विश्वे देवाः समेत्य ते नो मुञ्चन्त्वंहसः ॥१८॥  
 विश्वान् देवान् इदं ब्रूमः सत्यसन्धान् ऋतावृधः ।  
 विश्वाभिः पत्नीभिः सह ते नो मुञ्चन्त्वंहसः ॥१९॥  
 सर्वान् देवान् इदं ब्रूमः सत्यसन्धान् ऋतावृधः ।  
 सर्वाभिः पत्नीभिः सह ते नो मुञ्चन्त्वंहसः ॥२०॥  
 भूतं ब्रूमो भूतपतिं भूतानामुत यो वशी ।  
 भूतानि सर्वा संगत्य ते नो मुञ्चन्त्वंहसः ॥२१॥  
 या देवीः पञ्च प्रदिशो ये देवा द्वादश ऋतवः ।  
 संवत्सरस्य ये दंष्ट्रास्ते नः सन्तु सदा शिवाः ॥२२॥  
 यन् मातली रथक्रीतममृतं वेद भेषजम् ।  
 तदिन्द्रो अप्सु प्रावेशयत्तदापो दत्त भेषजम् ॥२३॥ {१८}

11.7(११.९)

उच्छिष्टे नाम रूपं चोच्छिष्टे लोक आहितः ।  
 उच्छिष्ट इन्द्रश्चाग्निश्च विश्वमन्तः समाहितम् ॥१॥  
 उच्छिष्टे द्यावापृथिवी विश्वं भूतं समाहितम् ।  
 आपः समुद्र उच्छिष्टे चन्द्रमा वात आहितः ॥२॥  
 सन्न उच्छिष्टे असंश्रोभौ मृत्युर्वाजः प्रजापतिः ।  
 लौक्या उच्छिष्टे आयत्ता ब्रश्च द्रश्चापि श्रीर्मयि ॥३॥  
 दृढो दृह स्थिरो न्यो ब्रह्म विश्वसृजो दश ।  
 नाभिमिव सर्वतश्चक्रमुच्छिष्टे देवताः श्रिताः ॥४॥  
 ऋक्साम यजुरुच्छिष्ट उद्गीथः प्रस्तुतं स्तुतम् ।  
 हिङ्कार उच्छिष्टे स्वरः साम्नो मंडिश्च तन् मयि ॥५॥  
 ऐन्द्राग्नं पावमानं महानाम्नीर्महाव्रतम् ।  
 उच्छिष्टे यज्ञस्याङ्गान्यन्तर्गर्भ इव मातरि ॥६॥  
 राजसूयं वाजपेयमग्निष्टोमष्टदध्वरः ।  
 अर्काश्वमेधावुच्छिष्टे जीवबर्हिर्मदिन्तमः ॥७॥  
 अग्न्याधेयमथो दीक्षा कामप्रश्छन्दसा सह ।  
 उत्सन्ना यज्ञाः सत्राण्युच्छिष्टेऽधि समाहिताः ॥८॥  
 अग्निहोत्रं च श्रद्धा च वषट्कारो व्रतं तपः ।  
 दक्षिणोष्ठं पूर्तं चोच्छिष्टेऽधि समाहिताः ॥९॥  
 एकरात्रो द्विरात्रः सद्यःक्रीः प्रक्रीरुक्थ्यः ।  
 ओतं निहितमुच्छिष्टे यज्ञस्याणूनि विद्यया ॥१०॥ {१९}  
 चतुरात्रः पञ्चरात्रः षड्रात्रश्चोभयः सह ।  
 षोडशी सप्तरात्रश्चोच्छिष्टाज्जज्ञिरे सर्वे ये यज्ञा अमृते हिताः ॥११॥  
 प्रतीहारी निधनं विश्वजिच्चाभिजिच्च यः ।  
 साहातिरात्रावुच्छिष्टे द्वादशाहोऽपि तन् मयि ॥१२॥  
 सूनता संनतिः क्षेमः स्वधोर्जामृतं सहः ।  
 उच्छिष्टे सर्वे प्रत्यञ्चः कामाः कामेन तात्पुः ॥१३॥  
 नव भूमीः समुद्रा उच्छिष्टेऽधि श्रिता दिवः ।  
 आ सूर्यो भात्युच्छिष्टेऽहोरात्रे अपि तन् मयि ॥१४॥  
 उपहव्यं विषूवन्तं ये च यज्ञा गुहा हिताः ।  
 बिभर्ति भर्ता विश्वस्योच्छिष्टो जनितुः पिता ॥१५॥  
 पिता जनितुरुच्छिष्टोऽसोः पौत्रः पितामहः ।

स क्षियति विश्वस्येशानो वृषा भूम्यामतिघ्न्यः ॥१६॥  
 ऋतं सत्यं तपो राष्ट्रं श्रमो धर्मश्च कर्म च ।  
 भूतं भविष्यदुच्छिष्टे वीर्यं लक्ष्मीर्बलं बले ॥१७॥  
 समृद्धिरोज आकृतिः क्षत्रं राष्ट्रं षडुर्व्यः ।  
 संवत्सरोऽध्युच्छिष्ट इडा प्रैषा ग्रहा हविः ॥१८॥  
 चतुर्होतार आप्रियश्चातुर्मास्यानि नीविदः ।  
 उच्छिष्टे यज्ञा होत्राः पशुबन्धास्तदिष्टयः ॥१९॥  
 अर्धमासाश्च मासाश्चार्तवा ऋतुभिः सह ।  
 उच्छिष्टे घोषिणीराप स्तनयित्नुः श्रुतिर्मही ॥२०॥ {२०}  
 शर्कराः सिकता अश्मान ओषधयो वीरुधस्तृणा ।  
 अभ्राणि विद्युतो वर्षमुच्छिष्टे संश्रिता श्रिता ॥२१॥  
 राद्धिः प्राप्तिः समाप्तिर्व्याप्तिर्मह एधतुः ।  
 अत्याप्तिरुच्छिष्टे भूतिश्चाहिता निहिता हिता ॥२२॥  
 यच्च प्राणति प्राणन यच्च पश्यति चक्षुषा ।  
 उच्छिष्टाज्जज्ञिरे सर्वे दिवि देवा दिविश्रितः ॥२३॥  
 ऋचः सामानि छन्दांसि पुराणं यजुषा सह ।  
 उच्छिष्टाज्जज्ञिरे सर्वे दिवि देवा दिविश्रितः ॥२४॥  
 प्राणापानौ चक्षुः श्रोत्रमक्षितिश्च क्षितिश्च या ।  
 उच्छिष्टाज्जज्ञिरे सर्वे दिवि देवा दिविश्रितः ॥२५॥  
 आनन्दा मोदाः प्रमूदोऽभीमोदमुदश्च ये ।  
 उच्छिष्टाज्जज्ञिरे सर्वे दिवि देवा दिविश्रितः ॥२६॥  
 देवाः पितरो मनुष्या गन्धर्वाप्सरसश्च ये ।  
 उच्छिष्टाज्जज्ञिरे सर्वे दिवि देवा दिविश्रितः ॥२७॥ {२१}

### 11.8(११.१०)

यन् मन्युर्जायामावहत्संकल्पस्य गृहादधि ।  
 क आसं जन्याः के वराः क उ ज्येष्ठवरोऽभवत् ॥१॥  
 तपश्चैवास्तां कर्म चान्तर्महत्यर्णवे ।  
 त आसं जन्यास्ते वरा ब्रह्म ज्येष्ठवरोऽभवत् ॥२॥  
 दश साकमजायन्त देवा देवेभ्यः पुरा ।  
 यो वै तान् विद्यात्प्रत्यक्षं स वा अद्य महद्वदेत् ॥३॥  
 प्राणापानौ चक्षुः श्रोत्रमक्षितिश्च क्षितिश्च या ।  
 व्यानोदानौ वाङ्मनस्ते वा आकृतिमावहन् ॥४॥  
 अजाता आसन् ऋतवोऽथो धाता बृहस्पतिः ।  
 इन्द्राग्नी अश्विना तर्हि कं ते ज्येष्ठमुपासत ॥५॥  
 तपश्चैवास्तां कर्म चान्तर्महत्यर्णवे ।  
 तपो ह जज्ञे कर्मणस्तत्ते ज्येष्ठमुपासत ॥६॥  
 येत आसीद्भूमिः पूर्वा यामद्वातय इद्विदुः ।  
 यो वै तां विद्यान् नामथा स मन्येत पुराणवित् ॥७॥  
 कुत इन्द्रः कुतः सोमः कुतो अग्निरजायत ।  
 कुतस्त्वष्टा समभवत्कुतो धाताजायत ॥८॥  
 इन्द्रादिन्द्रः सोमात्सोमो अग्नेरग्निरजायत ।  
 त्वष्टा ह जज्ञे त्वष्टुर्धातुर्धाताजायत ॥९॥  
 ये त आसन् दश जाता देवा देवेभ्यः पुरा ।  
 पुत्रेभ्यो लोकं दत्त्वा कस्मिंस्ते लोक आसते ॥१०॥ {२२}  
 यदा केशान् अस्थि स्नाव मांसं मज्जानमाभरत् ।  
 शरीरं कृत्वा पादवत्कं लोकमनु प्राविशत् ॥११॥  
 कुतः केशान् कुतः स्नाव कुतो अस्थीन्याभरत् ।  
 अङ्गा पर्वाणि मज्जानं को मांसं कुत आभरत् ॥१२॥  
 संसिचो नाम ते देवा ये संभारान्त्समभरन् ।  
 सर्वे संसिच्य मर्त्यं देवाः पुरुषमाविशन् ॥१३॥  
 ऊरू पादावष्टीवन्तौ शिरो हस्तावथो मुखम् ।  
 पृष्टीर्बर्जह्ये पार्श्वे कस्तत्समदधादृषिः ॥१४॥  
 शिरो हस्तावथो मुखं जिह्वां ग्रीवाश्च कीकसाः ।  
 त्वचा प्रावृत्य सर्वे तत्संधा समदधान् मही ॥१५॥  
 यत्तच्छरीरमशयत्संधया संहितं महत् ।  
 येनेदमद्य रोचते को अस्मिन् वर्णमाभरत् ॥१६॥  
 सर्वे देवा उपाशिक्षन् तदजानाद्ब्रूः सती ।  
 ईशा वशस्य या जाया सास्मिन् वर्णमाभरत् ॥१७॥  
 यदा त्वष्टा व्यतृणत्पिता त्वष्टुर्य उत्तरः ।  
 गृहं कृत्वा मर्त्यं देवाः पुरुषमाविशन् ॥१८॥  
 स्वप्नो वै तन्द्रीर्निर्ऋतिः पाप्मानो नाम देवताः ।  
 जरा खालत्यं पालित्यं शरीरमनु प्राविशन् ॥१९॥  
 स्तेयं दुष्कृतं वृजिनं सत्यं यज्ञो यशो बृहत् ।

बलं च क्षत्रमोजश्च शरीरमनु प्राविशन् ॥२०॥ {२३}  
 भूतिश्च वा अभूतिश्च रातयोऽरातयश्च याः ।  
 क्षुधश्च सर्वास्तृष्णाश्च शरीरमनु प्राविशन् ॥२१॥  
 निन्दाश्च वा अनिन्दाश्च यच्च हन्तेति नेति च ।  
 शरीरं श्रद्धा दक्षिणाश्रद्धा चानु प्राविशन् ॥२२॥  
 विद्याश्च वा अविद्याश्च यच्चान्यदुपदेश्यम् ।  
 शरीरं ब्रह्म प्राविशदृचः सामाथो यजुः ॥२३॥  
 आनन्दा मोदाः प्रमूदोऽभीमोदमुदश्च ये ।  
 हसो नरिष्ठा नृत्तानि शरीरमनु प्राविशन् ॥२४॥  
 आलापाश्च प्रलापाश्चाभीलापलपश्च ये ।  
 शरीरं सर्वे प्राविशन् आयुजः प्रयुजो युजः ॥२५॥  
 प्राणापानौ चक्षुः श्रोत्रमक्षितिश्च क्षितिश्च या ।  
 व्यानोदानौ वाङ्मनः शरीरेण त ईयन्ते ॥२६॥  
 आशिषश्च प्रशिषश्च संशिषो विशिषश्च याः ।  
 चित्तानि सर्वे संकल्पाः शरीरमनु प्राविशन् ॥२७॥  
 आस्तेयीश्च वास्तेयीश्च त्वरणाः कृपणाश्च याः ।  
 गुह्याः शुक्रा स्थूला अपस्ता बीभत्सावसादयन् ॥२८॥  
 अस्थि कृत्वा समिधं तदष्टापो असादयन् ।  
 रेतः कृत्वाज्यं देवाः पुरुषमाविशन् ॥२९॥  
 या आपो याश्च देवता या विराड्ब्रह्मणा सह ।  
 शरीरं ब्रह्म प्राविशच्छरीरेऽधि प्रजापतिः ॥३०॥  
 सूर्यश्चक्षुर्वतः प्राणं पुरुषस्य वि भेजिरे ।  
 अथास्येतरमात्मानं देवाः प्रायच्छन् अग्नये ॥३१॥  
 तस्माद्दे विद्वान् पुरुषमिदं ब्रह्मेति मन्यते ।  
 सर्वा ह्यस्मिन् देवता गावो गोष्ठ इवासते ॥३२॥  
 प्रथमेन प्रमारेण त्रेधा विष्वङ्ग्वि गच्छति ।  
 अद एकेन गच्छत्यद एकेन गच्छतीहैकेन नि षेवते ॥३३॥  
 अप्सु स्तीमासु वृद्धासु शरीरमन्तरा हितम् ।  
 तस्मिं छवोऽध्यन्तरा तस्माच्छवोऽध्युच्यते ॥३४॥ {२४}

11.9(११.११)

ये बाहवो या इषवो धन्वनां वीर्याणि च ।  
 असीन् परशून् आयुधं चित्ताकृतं च यद्भृदि ।  
 सर्वं तदबुदे त्वममित्रेभ्यो दृशे कुरूदारंश्च प्र दर्शय ॥१॥  
 उत्तिष्ठत सं नहाध्वं मित्रा देवजना यूयम् ।  
 संदृष्टा गुप्ता वः सन्तु या नो मित्राण्यबुदे ॥२॥  
 उत्तिष्ठतमा रभेतामादानसंदानाभ्याम् ।  
 अमित्राणां सेना अभि धत्तमबुदे ॥३॥  
 अबुदिर्नाम यो देव ईशानश्च न्यबुदिः ।  
 याभ्यामन्तरिक्षमावृतमियं च पृथिवी मही ।  
 ताभ्यामिन्द्रमेदिभ्यामहं जितमन्वेमि सेनया ॥४॥  
 उत्तिष्ठ त्वं देवजनाबुदे सेनया सह ।  
 भञ्जन् अमित्राणां सेनां भोगेभिः परि वारय ॥५॥  
 सप्त जातान् न्यबुद उदाराणां समीक्षयन् ।  
 तेभिष्ट्वमाज्ये हुते सर्वैरुत्तिष्ठ सेनया ॥६॥  
 प्रतिघ्नानाश्रुमुखी कृधुकर्णी च क्रोशतु ।  
 विकेशी पुरुषे हते रदिते अबुदे तव ॥७॥  
 संकर्षन्ती करूकरं मनसा पुत्रमिच्छन्ती ।  
 पतिं भ्रातरमात्स्वान् रदिते अबुदे तव ॥८॥  
 अलिक्लवा जाष्कमदा गृध्राः श्येनाः पतत्रिणः ।  
 ध्वाङ्क्षाः शकुनयस्तृप्यन्त्वमित्रेषु समीक्षयन् रदिते अबुदे तव ॥९॥  
 अथो सर्वं श्वापदं मक्षिका तृप्यतु क्रिमिः ।  
 पौरुषेयेऽधि कुणपे रदिते अबुदे तव ॥१०॥ {२५}  
 आ गृह्णीतं सं बृहतं प्राणापानान् न्यबुदे ।  
 निवाशा घोषाः सं यन्त्वमित्रेषु समीक्षयन् रदिते अबुदे तव ॥११॥  
 उद्वेपय सं विजन्तां भियामित्रान्त्सं सृज ।  
 उरुग्राहैर्बाह्वङ्कैर्विध्यामित्रान् न्यबुदे ॥१२॥  
 मुह्यन्त्वेषां बाहवश्चित्ताकृतं च यद्भृदि ।  
 मैषामुच्छेषि किं चन रदिते अबुदे तव ॥१३॥  
 प्रतिघ्नानाः सं धावन्तूरः पटौरावाघ्नानाः ।  
 अघारिणीर्विकेश्यो रुदत्यः पुरुषे हते रदिते अबुदे तव ॥१४॥  
 श्वन्वतीरप्सरसो रूपका उताबुदे ।  
 अन्तःपात्रे रेरिहतीं रिशां दुर्णिहितैषिणीम् ।  
 सर्वास्ता अबुदे त्वममित्रेभ्यो दृशे कुरूदारंश्च प्र दर्शय ॥१५॥

खडूरेऽधिचङ्कमां खर्विकां खर्ववासिनीम् ।  
 य उदारा अन्तर्हिता गन्धर्वाप्सरसश्च ये ।  
 सर्पा इतरजना रक्षांसि ॥१६॥  
 चतुर्दंष्ट्रां छावावदतः कुम्भमुष्कामसुङ्खान् ।  
 स्वभ्यसा ये चोदभ्यसाः ॥१७॥  
 उद्वेपय त्वमर्बुदेऽमित्राणाममूः सिचः ।  
 जयंश्च जिष्णुश्चामित्रां जयतामिन्द्रमेदिनौ ॥१८॥  
 प्रब्लीनो मृदितः शयां हतोऽमित्रो न्यर्बुदे ।  
 अग्निजिह्वा धूमशिखा जयन्तीर्यन्तु सेनया ॥१९॥  
 तयार्बुदे प्रणुत्तानामिन्द्रो हन्तु वरंवरम् ।  
 अमित्राणां शचीपतिर्मामीषां मोचि कश्चन ॥२०॥ {२६}  
 उत्कसन्तु हृदयान्यूर्ध्वः प्राण उदीषतु ।  
 शौष्कास्यमनु वर्तताममित्रान् मोत मित्रिणः ॥२१॥  
 ये च धीरा ये चाधीराः पराञ्चो बधिराश्च ये ।  
 तमसा ये च तूपरा अथो बस्ताभिवासिनः ।  
 सर्वास्तामर्बुदे त्वममित्रेभ्यो दर्श कुरूदारांश्च प्र दर्शय ॥२२॥  
 अर्बुदिश्च त्रिषन्धिश्चामित्रान् नो वि विध्यताम् ।  
 यथेषामिन्द्र वृत्रहन् हनाम शचीपतेऽमित्राणां सहस्रशः ॥२३॥  
 वनस्पतीन् वानस्पत्यान् ओषधीरुत वीरुधः ।  
 गन्धर्वाप्सरसः सर्पान् देवान् पुण्यजनान् पितृन् ।  
 सर्वास्तामर्बुदे त्वममित्रेभ्यो दर्श कुरूदारांश्च प्र दर्शय ॥२४॥  
 ईशां वो मरुतो देव आदित्यो ब्रह्मणस्पतिः ।  
 ईशां व इन्द्रश्चाग्निश्च धाता मित्रः प्रजापतिः ।  
 ईशां व ऋषयश्चक्रुरमित्रेषु समीक्षयन् रदिते अर्बुदे तव ॥२५॥  
 तेषां सर्वेषामीशाना उत्तिष्ठत सं नह्यध्वम् ।  
 मित्रा देवजना यूयमिमं संग्रामं संजित्य यथालोकं वि तिष्ठध्वम् ॥२६॥ {२७}

11.10(११.१२)

उत्तिष्ठत सं नह्यध्वमुदाराः केतुभिः सह ।  
 सर्पा इतरजना रक्षांस्यमित्रान् अनु धावत ॥१॥  
 ईशां वो वेद राज्यं त्रिषन्धे अरुणैः केतुभिः सह ।  
 ये अन्तरिक्षे ये दिवि पृथिव्यां ये च मानवाः ।  
 त्रिषन्धेस्ते चेतसि दुर्णामान उपासताम् ॥२॥  
 अयोमुखाः सूचीमुखा अथो विकङ्कतीमुखाः ।  
 क्रव्यादो वातरहस आ सजन्त्वमित्रान् वज्रेण त्रिषन्धिना ॥३॥  
 अन्तर्धेहि जातवेद आदित्य कुणपं बहु ।  
 त्रिषन्धेरियं सेना सुहितास्तु मे वशे ॥४॥  
 उत्तिष्ठ त्वं देवजनार्बुदे सेनया सह ।  
 अयं बलिर्व आहुतस्त्रिषन्धेराहुतिः प्रिया ॥५॥  
 शितिपदी सं द्यतु शरव्येयं चतुष्पदी ।  
 कृत्येऽमित्रेभ्यो भव त्रिषन्धेः सह सेनया ॥६॥  
 धूमाक्षी सं पततु कृधुकर्णी च क्रोशतु ।  
 त्रिषन्धेः सेनया जिते अरुणाः सन्तु केतवः ॥७॥  
 अवायन्तां पक्षिणो ये वयांस्यन्तरिक्षे दिवि ये चरन्ति ।  
 श्वापदो मक्षिकाः सं रभन्तामामादो गृध्राः कुणपे रदन्ताम् ॥८॥  
 यामिन्द्रेण संधां समधत्था ब्रह्मणा च बृहस्पते ।  
 तयाहमिन्द्रसंधया सर्वान् देवान् इह हुव इतो जयत मामुतः ॥९॥  
 बृहस्पतिराङ्गिरस ऋषयो ब्रह्मसंशिताः ।  
 असुरक्षयणं वधं त्रिषन्धिं दिव्याश्रयन् ॥१०॥ {२८}  
 येनासौ गुप्त आदित्य उभाविन्द्रश्च तिष्ठतः ।  
 त्रिषन्धिं देवा अभजन्तौजसे च बलाय च ॥११॥  
 सर्वाल्लोकान्त्समजयन् देवा आहुत्यानया ।  
 बृहस्पतिराङ्गिरसो वज्रं यमसिञ्चतासुरक्षयणं वधम् ॥१२॥  
 बृहस्पतिराङ्गिरसो वज्रं यमसिञ्चतासुरक्षयणं वधम् ।  
 तेनाहममूं सेनां नि लिप्पामि बृहस्पतेऽमित्रान् हन्म्योजसा ॥१३॥  
 सर्वे देवा अत्यायन्ति ये अश्रन्ति वषट्कृतम् ।  
 इमां जुषध्वमाहुतिमितो जयत मामुतः ॥१४॥  
 सर्वे देवा अत्यायन्तु त्रिषन्धेराहुतिः प्रिया ।  
 संधां महतीं रक्षत ययाग्रे असुरा जिताः ॥१५॥  
 वायुरमित्राणामिष्वग्राण्याञ्चतु ।  
 इन्द्र एषां बाहून् प्रति भनक्तु मा शकन् प्रतिधामिषुम् ।  
 आदित्य एषामस्त्रं वि नाशयतु चन्द्रमा युतामगतस्य पन्थाम् ॥१६॥  
 यदि प्रेयुर्देवपुरा ब्रह्म वर्माणि चक्रिरे ।

तनूपानं परिपाणं कृण्वाना यदुपोचिरे सर्वं तदरसं कृधि ॥१७॥  
 क्रव्यादानुवर्तयन् मृत्युना च पुरोहितम् ।  
 त्रिषन्धे प्रेहि सेनया जयामित्रान् प्र पद्यस्व ॥१८॥  
 त्रिषन्धे तमसा त्वममित्रान् परि वारय ।  
 पृषदाज्यप्रणुत्तानां मामीषां मोचि कश्चन ॥१९॥  
 शितिपदी सं पतत्वमित्राणाममूः सिचः ।  
 मुहान्त्वद्यामूः सेना अमित्राणां न्यर्बुदे ॥२०॥ {२९}  
 मूढा अमित्रा न्यर्बुदे जहोषां वरंवरम् ।  
 अनया जहि सेनया ॥२१॥  
 यश्च कवची यश्चाकवचोऽमित्रो यश्चाज्मनि ।  
 ज्यापाशैः कवचपाशैरज्मनाभिहतः शयाम् ॥२२॥  
 ये वर्मिणो येऽवर्माणो अमित्रा ये च वर्मिणः ।  
 सर्वास्तामर्बुदे हतां छवानोऽदन्तु भूम्याम् ॥२३॥  
 ये रथिनो ये अरथा असादा ये च सादिनः ।  
 सर्वान् अदन्तु तान् हतान् गृध्राः श्येनाः पतत्रिणः ॥२४॥  
 सहस्रकुणपा शेतामामित्री सेना समरे वधानाम् ।  
 विविद्धा ककजाकृता ॥२५॥  
 मर्माविधं रोरुवतं सुपर्णैरदन्तु दुश्चितं मृदितं शयानम् ।  
 य इमां प्रतीचीमाहुतिममित्रो नो युयुत्सति ॥२६॥  
 यां देवा अनुतिष्ठन्ति यस्या नास्ति विराधनम् ।  
 तयेन्द्रो हन्तु वृत्रहा वज्रेण त्रिषन्धिना ॥२७॥ {३०}

### 12.1

सत्यं बृहदृतमुग्रं दीक्षा तपो ब्रह्म यज्ञः पृथिवीं धारयन्ति ।  
 सा नो भूतस्य भव्यस्य पत्न्युरुं लोकं पृथिवी नः कृणोतु ॥१॥  
 असंबाधं मध्यतो मानवानां यस्या उद्धतः प्रवतः समं बहु ।  
 नानावीर्या ओषधीर्या बिभर्ति पृथिवी नः प्रथतां राध्यतां नः ॥२॥  
 यस्यां समुद्र उत सिन्धुरापो यस्यामन्नं कृष्टयः संबभूवुः ।  
 यस्यामिदं जिन्वति प्राणदेजत्सा नो भूमिः पूर्वपेये दधातु ॥३॥  
 यस्याश्चतस्रः प्रदिशः पृथिव्या यस्यामन्नं कृष्टयः संबभूवुः ।  
 या बिभर्ति बहुधा प्राणदेजत्सा नो भूमिर्गोष्वप्यन्ने दधातु ॥४॥  
 यस्यां पूर्वं पूर्वजना विचक्रिरे यस्यां देवा असुरान् अभ्यवर्तयन् ।  
 गवामश्वानां वयसश्च विष्टा भगं वर्चः पृथिवी नो दधातु ॥५॥  
 विश्वंभरा वसुधानी प्रतिष्ठा हिरण्यवक्षा जगतो निवेशनी ।  
 वैश्वानरं बिभ्रती भूमिरग्निमिन्द्रऋषभा द्रविणे नो दधातु ॥६॥  
 यां रक्षन्त्यस्वप्रा विश्वदानीं देवा भूमिं पृथिवीमप्रमादम् ।  
 सा नो मधु प्रियं दुहामथो उक्षतु वर्चसा ॥७॥  
 यार्णवेऽधि सलिलमग्र आसीत्यां मायाभिरन्वचरन् मनीषिणः ।  
 यस्या हृदयं परमे व्योमन्त्सत्येनावृतममृतं पृथिव्याः ।  
 सा नो भूमिस्त्विषि बलं राष्ट्रे दधातूत्तमे ॥८॥  
 यस्यामापः परिचराः समानीरहोरात्रे अप्रमादं क्षरन्ति ।  
 सा नो भूमिर्भूरिधारा पयो दुहामथो उक्षतु वर्चसा ॥९॥  
 यामश्विनावमिमातां विष्णुर्यस्यां विचक्रमे ।  
 इन्द्रो यां चक्र आत्मनेऽनमित्रां शचीपतिः ।  
 सा नो भूमिर्वि सृजतां माता पुत्राय मे पयः ॥१०॥ {१}  
 गिरयस्ते पर्वता हिमवन्तोऽरण्यं ते पृथिवि स्योनमस्तु ।  
 बभूवुः कृष्णां रोहिणीं विश्वरूपां ध्रुवां भूमिं पृथिवीमिन्द्रगुप्ताम् ।  
 अजीतोऽहतो अक्षतोऽध्यष्टां पृथिवीमहम् ॥११॥  
 यत्ते मध्यं पृथिवि यच्च नभ्यं यास्त ऊर्जस्तन्वः संबभूवुः ।  
 तासु नो धेह्याभि नः पवस्व माता भूमिः पुत्रो अहं पृथिव्याः पर्जन्यः पिता स उ नः पिपर्तु ॥१२॥  
 यस्यां वेदिं परिगृह्णन्ति भूम्यां यस्यां यज्ञं तन्वते विश्वकर्माणः ।  
 यस्यां मीयन्ते स्वरवः पृथिव्यामूर्ध्वाः शुक्रा आहुत्याः पुरस्तात् ।  
 सा नो भूमिर्वर्धयद्वर्धमाना ॥१३॥  
 यो नो द्वेषत्पृथिवि यः पृतन्याद्योऽभिदासान् मनसा यो वधेन ।  
 तं नो भूमे रन्धय पूर्वकृत्वरि ॥१४॥  
 त्वज्जातास्त्वयि चरन्ति मर्त्यास्त्वं बिभर्षि द्विपदस्त्वं चतुष्पदः ।  
 तवेमे पृथिवि पञ्च मानवा येभ्यो ज्योतिरमृतं मर्त्येभ्य उद्यन्त्सूर्या रश्मिभिरातनोति ॥१५॥  
 ता नः प्रजाः सं दूहतां समग्रा वाचो मधु पृथिवि धेहि मह्यम् ॥१६॥  
 विश्वस्वं मातरमोषधीनां ध्रुवां भूमिं पृथिवीं धर्मणा धृताम् ।  
 शिवां स्योनामनु चरेम विश्वहा ॥१७॥  
 महत्सधस्थं महती बभूविथ महान् वेग एजथुर्वेपथुष्टे ।  
 महांस्त्वेन्द्रो रक्षत्यप्रमादम् ।  
 सा नो भूमे प्र रोचय हिरण्यस्येव संदृशि मा नो द्विक्षत कश्चन ॥१८॥

अग्निभूम्यामोषधीष्वग्निमापो बिभ्रत्यग्निरश्मसु ।  
 अग्निरन्तः पुरुषेषु गोष्वश्वेष्वग्नयः ॥१९॥  
 अग्निर्दिव आ तपत्यग्नेर्देवस्योर्वन्तरिक्षम् ।  
 अग्निं मर्तास इन्धते हव्यवाहं घृतप्रियम् ॥२०॥ {२}  
 अग्निवासाः पृथिव्यसितजूस्त्विषीमन्तं संशितं मा कृणोतु ॥२१॥  
 भूम्यां देवभ्यो ददति यज्ञं हव्यमरंकृतम् ।  
 भूम्यां मनुष्या जीवन्ति स्वधयान्नेन मर्त्याः ।  
 सा नो भूमिः प्राणमायुर्दधातु जरदधिं मा पृथिवी कृणोतु ॥२२॥  
 यस्ते गन्धः पृथिवि संबभूव यं बिभ्रत्योषधयो यमापः ।  
 यं गन्धर्वा अप्सरसश्च भेजिरे तेन मा सुरभिं कृणु मा नो द्विक्षत कश्चन ॥२३॥  
 यस्ते गन्धः पुष्करमाविवेश यं संजभूः सूर्याया विवाहे ।  
 अमर्त्याः पृथिवि गन्धमग्रे तेन मा सुरभिं कृणु मा नो द्विक्षत कश्चन ॥२४॥  
 यस्ते गन्धः पुरुषेषु स्त्रीषु पुंसु भगो रुचिः ।  
 यो अश्वेषु वीरेषु यो मृगेषु त हस्तिषु ।  
 कन्यायां वर्चो यद्भूमे तेनास्मामपि सं सृज मा नो द्विक्षत कश्चन ॥२५॥  
 शिला भूमिरश्मा पोसुः सा भूमिः संधृता धृता ।  
 तस्यै हिरण्यवक्षसे पृथिव्या अकरं नमः ॥२६॥  
 यस्यां वृक्षा वानस्पत्या ध्रुवास्तिष्ठन्ति विश्वहा ।  
 पृथिवीं विश्वधायसं धृतामछावदामसि ॥२७॥  
 उदीराणा उतासीनास्तिष्ठन्तः प्रक्रामन्तः ।  
 पद्भ्यां दक्षिणसव्याभ्यां मा व्यथिष्महि भूम्याम् ॥२८॥  
 विमृग्वरीं पृथिवीमा वदामि क्षमां भूमिं ब्रह्मणा वावृधानाम् ।  
 ऊर्जं पुष्टं बिभ्रतीमन्नभागं घृतं त्वाभि नि षीदेम भूमे ॥२९॥  
 शुद्धा न आपस्तन्वे क्षरन्तु यो नः सेदुरप्रिये तं नि दध्मः ।  
 पवित्रेण पृथिवि मोत्पुनामि ॥३०॥ {३}  
 यास्ते प्राचीः प्रदिशो या उदीचीर्यास्ते भूमे अधराद्याश्च पश्चात् ।  
 स्योनास्ता मह्यं चरते भवन्तु मा नि पत्तं भुवने शिश्रियाणः ॥३१॥  
 मा नः पश्चान् मा पुरस्तान् नुदिष्ठा मोत्तरादधरादुत् ।  
 स्वस्ति भूमे नो भव मा विदन् परिपन्थिनो वरीयो यावया वधम् ॥३२॥  
 यावत्तेऽभि विपश्यामि भूमे सूर्येण मेदिना ।  
 तावन् मे चक्षुर्मा मेष्टोत्तरामुत्तरां समाम् ॥३३॥  
 यच्छयानः पर्यावर्ते दक्षिणं सख्यमभि भूमे पार्श्वमुत्तानास्त्वा प्रतीचीं यत्पृष्ठीभिरधिशेमे ।  
 मा हिंसीस्तत्र नो भूमे सर्वस्य प्रतिशीवरे ॥३४॥  
 यत्ते भूमे विखनामि क्षिप्रं तदपि रोहतु ।  
 मा ते मर्म विमृग्वरि मा ते हृदयमपिपम् ॥३५॥  
 ग्रीष्मस्ते भूमे वर्षाणि शरद्धेमन्तः शिशिरो वसन्तः ।  
 ऋतवस्ते विहिता हायनीरहोरात्रे पृथिवि नो दुहाताम् ॥३६॥  
 याप सर्पं विजमाना विमृग्वरी यस्यामासन्न अग्नयो ये अप्स्वन्तः ।  
 परा दस्यून ददती देवपीयून् इन्द्रं वृणाना पृथिवी न वृत्रं शक्राय दध्ने वृषभाय वृष्णे ॥३७॥  
 यस्यां सदोहविधनि यूपो यस्यां निमीयते ।  
 ब्रह्मणो यस्यामर्चन्त्यृग्भिः साम्ना यजुर्विदः युज्यन्ते यस्यामृत्विजः सोममिन्द्राय पातवे ॥३८॥  
 यस्यां पूर्वं भूतकृत ऋषयो गा उदानृचुः ।  
 सप्त सत्रेण वेधसो यज्ञेन तपसा सह ॥३९॥  
 सा नो भूमिरा दिशतु यद्धनं कामयामहे ।  
 भगो अनुप्रयुङ्क्तामिन्द्र एतु पुरोगवः ॥४०॥ {४}  
 यस्यां गायन्ति नृत्यन्ति भूम्यां मर्त्या व्यैलबाः ।  
 युध्यन्ते यस्यामाक्रन्दो यस्यां वदति दुन्दुभिः ।  
 सा नो भूमिः प्र णुदतां सपत्नान् असपत्नं मा पृथिवी कृणोतु ॥४१॥  
 यस्यामन्नं व्रीहियवौ यस्या इमाः पञ्च कृष्टयः ।  
 भूम्यै पर्जन्यपत्न्यै नमोऽस्तु वर्षमेदसे ॥४२॥  
 यस्याः पुरो देवकृताः क्षेत्रे यस्या विकुर्वते ।  
 प्रजापतिः पृथिवीं विश्वगर्भामाशामाशां रण्यां नः कृणोतु ॥४३॥  
 निधिं बिभ्रती बहुधा गुहा वसु मणिं हिरण्यं पृथिवी ददातु मे ।  
 वसूनि नो वसुदा रासमाना देवी दधातु सुमनस्यमाना ॥४४॥  
 जनं बिभ्रती बहुधा विवाचसं नानाधर्माणं पृथिवी यथौकसम् ।  
 सहस्रं धारा द्रविणस्य मे दुहां ध्रुवेव धेनुरनपस्फुरन्ती ॥४५॥  
 यस्ते सर्पो वृश्चिकस्तृष्टदंश्मा हेमन्तजब्धो भूमलो गुहा शये ।  
 क्रिमिर्जिन्वत्पृथिवि यद्यदेजति प्रावृषि तन् नः सर्पन् मोप सृपद्यच्छिवं तेन नो मृड ॥४६॥  
 ये ते पन्थानो बहवो जनायना रथस्य वर्त्मानसश्च यातवे ।  
 यैः संचरन्त्युभये भद्रपापास्तं पन्थानं जयेमानमिन्नमतस्करं यच्छिवं तेन नो मृड ॥४७॥  
 मत्वं बिभ्रती गुरुभृद्द्रपापस्य निधनं तितिक्षुः ।  
 वराहेण पृथिवी संविदाना सूकराय वि जिहीते मृगाय ॥४८॥  
 ये त आरण्याः पशवो मृगा वने हिताः सिंहा व्याघ्राः पुरुषादश्चरन्ति ।  
 उलं वृकं पृथिवि दुह्युनामित ऋक्षीकां रक्षो अप बाधयास्मत् ॥४९॥



ये गन्धर्वा अप्सरसो ये चारायाः किमीदिनः ।  
 पिशाचान्सर्वा रक्षांसि तान् अस्मद्भूमे यावय ॥५०॥ {५}  
 यां द्विपादः पक्षिणः संपतन्ति हंसाः सुपर्णाः शकुना वयांसि ।  
 यस्यां वातो मातरिश्वयते रजांसि कृण्वंश्यावयंश्च वृक्षान् ।  
 वातस्य प्रवामुपवामनु वात्यर्चिः ॥५१॥  
 यस्यां कृष्णामरुणं च संहिते अहोरात्रे विहिते भूम्यामधि ।  
 वर्षेण भूमिः पृथिवी वृतावृता सा नो दधातु भद्रया प्रिये धामनिधामनि ॥५२॥  
 द्यौश्च म इदं पृथिवी चान्तरिक्षं च मे व्यचः ।  
 अग्निः सूर्य आपो मेधां विश्वे देवाश्च सं ददुः ॥५३॥  
 अहमस्मि सहमान उत्तरो नाम भूम्याम् ।  
 अभीषाडस्मि विश्वाषाडाशामाशां विषासहिः ॥५४॥  
 अदो यदेवि प्रथमाना पुरस्ताद्देवैरुक्ता व्यसर्पो महित्वम् ।  
 आ त्वा सुभूतमविशत्तदानीमकल्पयथाः प्रदिशश्चतस्रः ॥५५॥  
 ये ग्रामा यदरण्यं याः सभा अधि भूम्याम् ।  
 ये संग्रामाः समितयस्तेषु चारु वदेम ते ॥५६॥  
 अश्व इव रजो दुधुवे वि तान् जनान् य आक्षियन् पृथिवीं यादजायत ।  
 मन्द्राग्रेत्वरी भुवनस्य गोपा वनस्पतीनां गृभिरोषधीनाम् ॥५७॥  
 यद्धदामि मधुमत्तद्धदामि यदीक्षे तद्धनन्ति मा ।  
 त्विषीमान् अस्मि जूतिमान् अवान्यान् हन्मि दोधतः ॥५८॥  
 शन्तिवा सुरभिः स्याना कीलालोधी पयस्वती ।  
 भूमिरधि ब्रवीतु मे पृथिवी पयसा सह ॥५९॥  
 यामन्वैच्छद्धविषा विश्वकर्मान्तरणवि रजसि प्रविष्टाम् ।  
 भुजिष्यं पात्रं निहितं गुहा यदाविर्भोगे अभवन् मातृमद्भ्यः ॥६०॥  
 त्वमस्यावपनी जनानामदितिः कामदुघा पप्रथाना ।  
 यत् ऊनं तत्त आ पूरयाति प्रजापतिः प्रथमजा ऋतस्य ॥६१॥  
 उपस्थास्ते अनमीवा अयक्ष्मा अस्मभ्यं सन्तु पृथिवि प्रसूताः ।  
 दीर्घं न आयुः प्रतिबुध्यमाना वयं तुभ्यं बलिहृतः स्याम ॥६२॥  
 भूमे मातर्नि धेहि मा भद्रया सुप्रतिष्ठितम् ।  
 संविदाना दिवा कवे श्रियां मा धेहि भूम्याम् ॥६३॥ {६}

## 12.2

नडमा रोह न ते अत्र लोक इदं सीसं भागधेयं त एहि ।  
 यो गोषु यक्ष्मः पुरुषेषु यक्ष्मस्तेन त्वं साकमधराड्परेहि ॥१॥  
 अघशंसदुःशंसाभ्यां करेणानुकरेण च ।  
 यक्ष्मं च सर्वं तेनेतो मृत्युं च निरजामसि ॥२॥  
 निरितो मृत्युं निरर्हति निररातिमजामसि ।  
 यो नो द्वैष्टि तमद्भ्याग्ने अक्रव्याद्यमु द्विष्मस्तमु ते प्र सुवामसि ॥३॥  
 यद्यग्निः क्रव्याद्यदि वा व्याघ्र इमं गोष्ठं प्रविवेशान्योकाः ।  
 तं माषाज्यं कृत्वा प्र हिणोमि दूरं स गच्छत्वप्सुषदोऽप्यग्नीन् ॥४॥  
 यत्त्वा क्रुद्धाः प्रचक्रुर्मन्युना पुरुषे मृते ।  
 सुकल्पमग्ने तत्त्वया पुनस्त्वोद्दीपयामसि ॥५॥  
 पुनस्त्वादित्या रुद्रा वसवः पुनर्ब्रह्मा वसुनीतिरग्ने ।  
 पुनस्त्वा ब्रह्मणस्पतिराधादीर्घायुत्वाय शतशारदाय ॥६॥  
 यो अग्निः क्रव्यात्प्रविवेश नो गृहमिमं पश्यन् इतरं जातवेदसम् ।  
 तं हरामि पितृयज्ञाय दूरं स घर्ममिन्धां परमे सधस्थे ॥७॥  
 क्रव्यादमग्निं प्र हिणोमि दूरं यमराज्ञो गच्छतु रिप्रवाहः ।  
 इहायमितरो जातवेदा देवो देवेभ्यो हव्यं वहतु प्रजानन् ॥८॥  
 क्रव्यादमग्निमिषितो हरामि जनान् दूहन्तं वज्रेण मृत्युम् ।  
 नि तं शास्मि गार्हपत्येन विद्वान् पितृणां लोकेऽपि भागो अस्तु ॥९॥  
 क्रव्यादमग्निं शशमानमुक्थ्यं प्र हिणोमि पथिभिः पितृयाणैः ।  
 मा देवयानैः पुनरा गा अत्रैवैधि पितृषु जागृहि त्वम् ॥१०॥ {७}  
 समिन्धते संकसुकं स्वस्तये शुद्धा भवन्तः शुचयः पावकाः ।  
 जहाति रिप्रमत्येन एति समिद्धो अग्निः सुपुना पुनाति ॥११॥  
 देवो अग्निः संकसुको दिवस्पृष्ठान्यारुहत् ।  
 मुच्यमानो निरेणसोऽमोगस्मामशस्त्याः ॥१२॥  
 अस्मिन् वयं संकसुके अग्नौ रिप्राणि मृज्महे ।  
 अभूम यज्ञियाः शुद्धाः प्र ण आयूषि तारिषत् ॥१३॥  
 संकसुको विकसुको निर्ऋथो यश्च निस्वरः ।  
 ते ते यक्ष्मं सर्वेदसो दूराहूरमनीनशन् ॥१४॥  
 यो नो अश्वेषु वीरेषु यो नो गोष्वजाविषु ।  
 क्रव्यादं निर्णुदामसि यो अग्निर्जनयोपनः ॥१५॥  
 अन्येभ्यस्त्वा पुरुषेभ्यो गोभ्यो अश्वेभ्यस्त्वा ।  
 निः क्रव्यादं नुदामसि यो अग्निर्जीवितयोपनः ॥१६॥  
 यस्मिन् देवा अमृजत यस्मिन् मनुष्या उत ।

तस्मिन् घृतस्तावो मृष्ट्वा त्वमग्ने दिवं रुह ॥१७॥  
 समिद्धो अग्न आहुत स नो माभ्यपक्रमीः ।  
 अत्रैव दीदिहि द्यवि ज्योक्च सूर्यं दृशे ॥१८॥  
 सीसे मृडद्धवं नडे मृडद्धवमग्नौ संकसुके च यत् ।  
 अथो अव्यां रामायां शीर्षक्तिमुपबर्हणे ॥१९॥  
 सीसे मलं सादयित्वा शीर्षक्तिमुपबर्हणे ।  
 अव्यामसिवन्यां मृष्ट्वा शुद्धा भवत यज्ञियाः ॥२०॥ {८}  
 परं मृत्यो अनु परेहि पन्थां यस्त एष इतरो देवयानात् ।  
 चक्षुष्मते शृण्वते ते ब्रवीमीहेमे वीरा बहवो भवन्तु ॥२१॥  
 इमे जीवा वि मृतराववृत्रन् अभूद्द्रा देवहुतिर्नो अद्य ।  
 प्राञ्चो अगाम नृतये हसाय सुवीरासो विदथमा वदेम ॥२२॥  
 इमं जीवेभ्यः परिधिं दधामि मैषां नु गादपरो अर्थमेतम् ।  
 शतं जीवन्तः शरदः पुरूचीस्तिरो मृत्युं दधतां पर्वतेन ॥२३॥  
 आ रोहतायुर्जरसं वृणाना अनुपूर्वं यतमाना यति स्थ ।  
 तान् वस्त्वष्टा सुजनिमा सजीषाः सर्वमायुर्नयतु जीवनाय ॥२४॥  
 यथाहान्यनुपूर्वं भवन्ति यथ त्व ऋतुभिर्यन्ति साकम् ।  
 यथा न पूर्वमपरो जहात्येवा धातरायूषि कल्पयैषाम् ॥२५॥  
 अश्मन्वती रीयते सं रभध्वं वीरयध्वं प्र तरता सखायः ।  
 अत्रा जहीत ये असन् दुरेवा अनमीवान् उत्तरेमाभि वाजान् ॥२६॥  
 उत्तिष्ठता प्र तरता सखायोऽश्मन्वती नदी स्यन्दत इयम् ।  
 अत्रा जहीत ये असन् अशिवाः शिवान्त्स्योनान् उत्तरेमाभि वाजान् ॥२७॥  
 वैश्वदेवीं वर्चसा आ रभध्वं शुद्धा भवन्तः शुचयः पावकाः ।  
 अतिक्रामन्तो दुरिता पदानि शतं हिमाः सर्ववीरा मदेम ॥२८॥  
 उदीचीनैः पथिभिर्वायुमद्भिरतिक्रामन्तोऽवरान् परेभिः ।  
 त्रिः सप्त कृत्व ऋषयः परेता मृत्युं प्रत्यौहन् पदयोपनेन ॥२९॥  
 मृत्योः पदं योपयन्त एत द्राघीय आयुः प्रतरं दधानाः ।  
 आसीना मृत्युं नुदता सधस्थेऽथ जीवासो विदथमा वदेम ॥३०॥ {९}  
 इमा नारीरविधवाः सुपत्नीराञ्जनेन सर्पिषा सं स्पृशन्ताम् ।  
 अनश्रवो अनमीवाः सुरत्ना आ रोहन्तु जनयो योनिमग्रे ॥३१॥  
 व्याकरोमि हविषाहमेतौ तौ ब्रह्मणा व्यहं कल्पयामि ।  
 स्वधां पितृभ्यो अजरां कृणोमि दीर्घेणायुषा समिमान्त्सृजामि ॥३२॥  
 यो नो अग्निः पितरो हृत्स्वन्तराविवेशामृतो मर्त्येषु ।  
 मय्यहं तं परि गृह्णामि देवं मा सो अस्मान् द्विक्षत मा वयं तम् ॥३३॥  
 अपावृत्य गार्हपत्यात्क्रव्यादा प्रेत दक्षिणा ।  
 प्रियं पितृभ्य आत्मने ब्रह्मभ्यः कृणुता प्रियम् ॥३४॥  
 द्विभागधनमादाय प्र क्षिणात्यवर्त्या ।  
 अग्निः पुत्रस्य ज्येष्ठस्य यः क्रव्यादनिराहितः ॥३५॥  
 यत्कृषते यद्भुते यच्च वस्नेन विन्दते ।  
 सर्वं मर्त्यस्य तन् नास्ति क्रव्याच्चेदनिराहितः ॥३६॥  
 अयज्ञियो हतवर्चा भवति नैनेन हविरत्तवे ।  
 छिनन्ति कृष्या गौर्धनाद्यं क्रव्यादनुवर्तते ॥३७॥  
 मुहुर्गृधैः प्र वदत्यार्तिं मर्त्यो नीत्य ।  
 क्रव्याद्यान् अग्निरन्तिकादनुविद्वान् वितावति ॥३८॥  
 ग्राह्या गृहाः सं सृज्यन्ते स्त्रिया यन् प्रियते पतिः ।  
 ब्रह्मैव विद्वान् एष्यो यः क्रव्यादं निरादधत् ॥३९॥  
 यद्विप्रं शमलं चकृम यच्च दुष्कृतम् ।  
 आपो मा तस्माच्छुभन्त्वग्नेः संकसुकाच्च यत् ॥४०॥ {१०}  
 ता अधरादुदीचीराववृत्रन् प्रजानेतीः पथिभिर्देवयानैः ।  
 पर्वतस्य वृषभस्याधि पृष्ठे नवाश्वरन्ति सरितः पुराणीः ॥४१॥  
 अग्ने अक्रव्यान् निः क्रव्यादं नुदा देवयजनं वह ॥४२॥  
 इमं क्रव्यादा विवेशायं क्रव्यादमन्वगात् ।  
 व्याघ्रौ कृत्वा नानानं तं हरामि शिवापरम् ॥४३॥  
 अन्तर्धिर्देवानां परिधिर्मनुष्याणामग्निर्गार्हपत्य उभयान् अन्तरा श्रितः ॥४४॥  
 जीवानामायुः प्र तिर त्वमग्ने पितृणां लोकमपि गच्छन्तु ये मृताः ।  
 सुगार्हपत्यो वितपन् अरातिमुषामुषां श्रेयसीं धेह्यस्मै ॥४५॥  
 सर्वान् अग्ने सहमानः सपत्नान् ऐषामूर्जं रयिमस्मासु धेहि ॥४६॥  
 इममिन्द्रं वह्निं पप्रिमन्वारभध्वं स वो निर्वक्षद्दुरितादवद्यात् ।  
 तेनाप हत शरुमापतन्तं तेन रुद्रस्य परि पातोस्ताम् ॥४७॥  
 अनड्वाहं प्लवमन्वारभध्वं स वो निर्वक्षद्दुरितादवद्यात् ।  
 आ रोहत सवितुर्नावमेतां षडभिर्रुर्वीभिरमार्ते तरेम ॥४८॥  
 अहोरात्रे अन्वेषि बिभ्रत्क्षेम्यस्तिष्ठन् प्रतरणः सुवीरः ।  
 अनातुरान्त्सुमनसस्तल्प बिभ्रज्ज्योगेव नः पुरुषगन्धिरेधि ॥४९॥  
 ते देवेभ्य आ वृश्न्ते पापं जीवन्ति सर्वदा ।  
 क्रव्याद्यान् अग्निरन्तिकादश्व इवानुवपते नडम् ॥५०॥ {११}

येऽश्रद्धा धनकाम्या क्रव्यादा समासते ।  
 ते वा अन्येषां कुम्भीं पर्यादधति सर्वदा ॥५१॥  
 प्रेव पिपतिषति मनसा मुहुरा वर्तते पुनः ।  
 क्रव्याद्यान् अग्निरन्तिकादनुविद्वान् वितावति ॥५२॥  
 अविः कृष्णा भागधेयं पशूनां सीसं क्रव्यादपि चन्द्रं त आहुः ।  
 माषाः पिष्टा भागधेयं ते हव्यमरण्यान्या गह्वरं सचस्व ॥५३॥  
 इषीकां जरतीमिष्ट्वा तिल्पिज्जं दण्डनं नडम् ।  
 तमिन्द्र इधं कृत्वा यमस्याग्निं निरादधौ ॥५४॥  
 प्रत्यञ्चमर्कं प्रत्यर्पयित्वा प्रविद्वान् पन्थां वि ह्याविवेश ।  
 परामीषामसून् दिदेश दीर्घेणायुषा समिमान्त्सृजामि ॥५५॥ {१२}

### 12.3

पुमान् पुंसोऽधि तिष्ठ चर्मेहि तत्र ह्वयस्व यतमा प्रिया ते ।  
 यावन्तावग्रे प्रथमं समेयथुस्तद्वां वयो यमराज्ये समानम् ॥१॥  
 तावद्वां चक्षुस्तति वीर्याणि तावत्तेजस्ततिधा वाजिनानि ।  
 अग्निः शरीरं सचते यदैधोऽथा पक्वान् मिथुना सं भवाथः ॥२॥  
 समस्मिंल्लोके समु देवयाने सं स्मा समेतं यमराज्येषु ।  
 पूतौ पवित्रैरुप तदध्वयेथां यद्यद्रेतो अधि वां संबभूव ॥३॥  
 आपस्पुत्रासो अभि सं विशध्वमिमं जीवं जीवधन्याः समेत्य ।  
 तासां भजध्वममृतं यमाहुरोदनं पचति वां जनित्री ॥४॥  
 यं वां पिता पचति यं च माता रिप्रान् निर्मुक्त्यै शमलाच्च वाचः ।  
 स ओदनः शतधारः स्वर्ग उभे व्याप नभसी महित्वा ॥५॥  
 उभे नभसी उभयांश्च लोकान् ये यज्वनामभिजिताः स्वर्गाः ।  
 तेषां ज्योतिष्मान् मधुमान् यो अग्रे तस्मिन् पुत्रैर्जरसि सं श्रयेथाम् ॥६॥  
 प्राचींप्राचीं प्रदिशमा रभेथामेतं लोकं श्रद्धधानाः सचन्ते ।  
 यद्वां पक्वं परिविष्टमग्नौ तस्य गुप्तये दंपती सं श्रयेथाम् ॥७॥  
 दक्षिणां दिशमभि नक्षमाणौ पर्यावर्तेथामभि पात्रमेतत् ।  
 तस्मिन् वां यमः पितृभिः संविदानः पक्वाय शर्म बहुलं नि यच्छात् ॥८॥  
 प्रतीची दिशामियमिद्वरं यस्यां सोमो अधिपा मृडिता च ।  
 तस्यां श्रयेथां सुकृतः सचेथामथा पक्वान् मिथुना सं भवाथः ॥९॥  
 उत्तरं राष्ट्रं प्रजयोत्तरावद्दिशामुदीची कृणवन् नो अग्रम् ।  
 पाङ्क्तं छन्दः पुरुषो बभूव विश्वैर्विश्वाङ्गैः सह सं भवेम ॥१०॥ {१३}  
 ध्रुवेयं विराण्णमो अस्त्वस्यै शिवा पुत्रेभ्य उत मह्यमस्तु ।  
 सा नो देव्यदिते विश्ववार इर्य इव गोपा अभि रक्ष पक्वम् ॥११॥  
 पितेव पुत्रान् अभि सं स्वजस्व नः शिवा नो वाता इह वान्तु भूमौ ।  
 यमोदनं पचतो देवते इह तं नस्तप उत सत्यं च वेत्तु ॥१२॥  
 यद्यदकृष्णः शकुन एह गत्वा त्सरन् विषक्तं बिल आससाद ।  
 यद्वा दास्यार्द्रहस्ता समङ्क्त उलूखलं मुसलं शुम्भतापः ॥१३॥  
 अयं ग्रावा पृथुबुध्नो वयोधाः पूतः पवित्रैरुप हन्तु रक्षः ।  
 आ रोह चर्म महि शर्म यच्छ मा दंपती पौत्रमघं नि गाताम् ॥१४॥  
 वनस्पतिः सह देवैर्न आगन् रक्षः पिशाचामपबाधमानः ।  
 स उच्छ्रयाते प्र वदाति वाचं तेन लोकामभि सर्वान् जयेम ॥१५॥  
 सप्त मेधान् पशवः पर्यगृह्णन् य एषां ज्योतिष्माँ उत यश्चकर्श ।  
 त्रयस्त्रिंशद्देवतास्तान्त्सचन्ते स नः स्वर्गमभि नेष लोकम् ॥१६॥  
 स्वर्गं लोकमभि नो नयासि सं जायया सह पुत्रैः स्याम ।  
 गृह्णामि हस्तमनु मैत्वत्र मा नस्तारीन् निर्ऋतिर्मा अरातिः ॥१७॥  
 ग्राहिं पाप्मानमति तामयाम तमो व्यस्य प्र वदासि वल्गु ।  
 वानस्पत्य उद्यतो मा जिहिंसीर्मा तण्डुलं वि शरीर्देवयन्तम् ॥१८॥  
 विश्वव्यचा घृतपृष्ठी भविष्यन्त्सयोनिर्लोकमुप याह्योतम् ।  
 वर्षवृद्धमुप यच्छ शूर्पं तुषं पलावान् अप तद्विनक्तु ॥१९॥  
 त्रयो लोकाः समिता ब्राह्मणेन द्यौरेवासौ पृथिव्यन्तरिक्षम् ।  
 अंशून् गृभीत्वान्वारभेथामा प्यायन्तां पुनरा यन्तु शूर्पम् ॥२०॥ {१४}  
 पृथग्रूपणि बहुधा पशूनामेकरूपो भवसि सं समृद्ध्या ।  
 एतां त्वचं लोहिनीं तां नुदस्व ग्रावा शुम्भाति मलग इव वस्त्रा ॥२१॥  
 पृथिवीं त्वा पृथिव्यामा वेशयामि तनूः समानी विकृता त एषा ।  
 यद्यद्दयुतं लिखितमर्पणेन तेन मा सुस्रोर्ब्रह्मणापि तद्वपामि ॥२२॥  
 जनित्रीव प्रति हर्यासि सूनुं सं त्वा दधामि पृथिवीं पृथिव्या ।  
 उखा कुम्भी वेद्यां मा व्यथिष्ठा यज्ञायुधैराज्येनातिषक्ता ॥२३॥  
 अग्निः पचन् रक्षतु त्वा पुरस्तादिन्द्रो रक्षतु दक्षिणतो मरुत्वान् ।  
 वरुणस्त्वा दृहाद्धरुणे प्रतीच्या उत्तरान्त्वा सोमः सं ददाते ॥२४॥  
 पूताः पवित्रैः पवन्ते अन्नादिवं च यन्ति पृथिवीं च लोकान् ।  
 ता जीवला जीवधन्याः प्रतिष्ठाः पात्र आसिक्ताः पर्यग्निरिन्धाम् ॥२५॥  
 आ यन्ति दिवः पृथिवीं सचन्ते भूम्याः सचन्ते अध्यन्तरिक्षम् ।  
 शुद्धाः सतीस्ता उ शुम्भन्त एव ता नः स्वर्गमभि लोकं नयन्तु ॥२६॥

उतेव प्रभ्वीरुत संमितास उत शुक्राः शुचयश्चामृतासः ।  
 ता ओदनं दंपतिभ्यां प्रशिष्टा आपः शिक्षन्तीः पचता सुनाथाः ॥२७॥  
 संख्याता स्तोकाः पृथिवीं सचन्ते प्राणापानैः संमिता ओषधीभिः ।  
 असंख्याता ओष्यमानाः सुवर्णाः सर्वे व्यापुः शुचयः शुचित्वम् ॥२८॥  
 उद्योधन्त्यभि वल्यन्ति तप्ताः फेनमस्यन्ति बहुलांश्च बिन्दून् ।  
 योषेव दृष्ट्वा पतिमृत्वियायैतेस्तण्डुलैर्भवता समापः ॥२९॥  
 उत्थापय सीदतो बुध्न एनान् अद्भिरात्मानमभि सं स्पृशन्ताम् ।  
 अमासि पात्रैरुदकं यदेतन् मितास्तण्डुलाः प्रदिशो यदीमाः ॥३०॥ {१५}  
 प्र यच्छ पशुं त्वरया हरौसमहिंसन्त ओषधीर्दान्तु पर्वन् ।  
 वासां सोमः परि राज्यं बभूवामन्युता नो वीरुधो भवन्तु ॥३१॥  
 नवं बर्हिरोदनाय स्तुणीत प्रियं हृदश्चक्षुषो वल्वस्तु ।  
 तस्मिन् देवाः सह दैवीर्विशन्त्विमं प्राश्रन्त्वतुभिर्निषद्य ॥३२॥  
 वनस्पते स्तीर्णमा सीद बर्हिरग्निष्टोभैः संमितो देवताभिः ।  
 त्वष्ट्रेव रूपं सुकृतं स्वधित्वैना एहाः परि पात्रे ददृशाम् ॥३३॥  
 षष्ट्यां शरत्सु निधिपा अभीच्छात्स्वः पक्वेनाभ्यश्रवाते ।  
 उपैनं जीवान् पितरश्च पुत्रा एतं स्वर्गं गमयान्तमग्नेः ॥३४॥  
 धर्ता धियस्व धरुणे पृथिव्या अच्युतं त्वा देवताश्रयावयन्तु ।  
 तं त्वा दंपती जीवन्ती जीवपुत्राबुद्धासयातः पर्यग्निधानात् ॥३५॥  
 सर्वान्त्समागा अभिजित्य लोकान् यावन्तः कामाः समतीतुपस्तान् ।  
 वि गाहेथामायवनं च दविरिकस्मिन् पात्रे अध्युद्धुरैन्म ॥३६॥  
 उप स्तुणीहि प्रथय पुरस्ताद्धृतेन पात्रमभि घारयैतत् ।  
 वाश्रेवोस्रा तरुणं स्तनस्युमिमं देवासो अभिहिङ्कृणोत ॥३७॥  
 उपास्तरौरकरो लोकमेतमुरुः प्रथतामसमः स्वर्गः ।  
 तस्मिं छ्रयाते महिषः सुपर्णो देवा एनं देवताभ्यः प्र यच्छान् ॥३८॥  
 यद्यज्जाया पचति त्वत्परःपरः पतिर्वा जाये त्वत्तिरः ।  
 सं तत्सृजेथां सह वां तदस्तु संपादयन्तौ सह लोकमेकम् ॥३९॥  
 यावन्तो अस्याः पृथिवीं सचन्ते अस्मत्पुत्राः परि ये संबभूवुः ।  
 सर्वास्तामुप पात्रे ह्वयेथां नाभिं जानानाः शिशवः समायान् ॥४०॥ {१६}  
 वसोर्या धारा मधुना प्रपीना घृतेन मिश्रा अमृतस्य नाभयः ।  
 सर्वास्ता अव रुन्धे स्वर्गः षष्ट्यां शरत्सु निधिपा अभीच्छात् ॥४१॥  
 निधिं निधिपा अभ्येनमिच्छादनीश्वरा अभितः सन्तु येऽन्ये ।  
 अस्माभिर्दत्तो निहितः स्वर्गस्त्रिभिः काण्डैस्त्रीन्त्स्वर्गान् अरुक्षत् ॥४२॥  
 अग्नी रक्षस्तपतु यद्विदेवं क्रव्यादपिशाच इह मा प्र पास्त ।  
 नुदाम एनमप रुध्मो अस्मदादित्या एनमङ्गिरसः सचन्ताम् ॥४३॥  
 आदित्येभ्यो अङ्गिरोभ्यो मध्विदं घृतेन मिश्रं प्रति वेदयामि ।  
 शुद्धहस्तौ ब्राह्मणस्यानिहत्यैतं स्वर्गं सुकृतावपीतम् ॥४४॥  
 इदं प्रापमुत्तमं काण्डमस्य यस्माल्लोकात्परमेष्ठी समाप ।  
 आ सिञ्च सर्पिर्घृतवत्समङ्गध्येष भागो अङ्गिरसो नो अत्र ॥४५॥  
 सत्याय च तपसे देवताभ्यो निधिं शेवधिं परि दद्य एतम् ।  
 मा नो हृतेऽव गान् मा समित्यां मा स्मान्यस्मा उत्सृजता पुरा मत् ॥४६॥  
 अहं पचाम्यहं ददामि ममेदु कर्मन् करुणेऽधि जाया ।  
 कौमारो लोको अजनिष्ट पुत्रोऽन्वारभेथां वय उत्तरावत् ॥४७॥  
 न किल्बिषमत्र नाधारो अस्ति न यन् मित्रैः समममान एति ।  
 अनूनं पात्रं निहितं न एतत्पत्कारं पक्वः पुनरा विशाति ॥४८॥  
 प्रियं प्रियाणां कृणवाम तमस्ते यन्तु यतमे द्विषन्ति ।  
 धेनुरनड्वान् वयोवय आयदेव पौरुषेयमप मृत्युं नुदन्तु ॥४९॥  
 समग्नयः विदुरन्यो अन्यं य ओषधीः सचते यश्च सिन्धून् ।  
 यावन्तो देवा दिव्यातपन्ति हिरण्यं ज्योतिः पचतो बभूव ॥५०॥ {१७}  
 एषा त्वचां पुरुषे सं बभूवानग्नाः सर्वे पशवो ये अन्ये ।  
 क्षत्रेणात्मानं परि धापयाथोऽमोतं वासो मुखमोदनस्य ॥५१॥  
 यदक्षेषु वदा यत्समित्यां यद्वा वदा अनृतं वित्तकाम्या ।  
 समानं तन्तुमभि सम्बसानौ तस्मिन्त्सर्वं शमलं सादयाथः ॥५२॥  
 वर्षं वनुष्वापि गच्छ देवांस्त्वचो धूमं पर्युत्पातयासि ।  
 विश्वव्यचा घृतपृष्ठो भविष्यन्त्सयोर्निर्लोकमुप याहोतम् ॥५३॥  
 तन्वं स्वर्गो बहुधा वि चक्रे यथा विद आत्मन् अन्यवर्णाम् ।  
 अपाजैत्कृष्णां रुशतीं पुनानो या लोहिनी तां ते अग्नौ जुहोमि ॥५४॥  
 प्राच्यै त्वा दिशेऽग्नयेऽधिपतयेऽसिताय रक्षित्र आदित्यायेषुमते ।  
 एतं परि दद्यस्तं नो गोपायतास्माकमैतोः ।  
 दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥५५॥  
 दक्षिणायै त्वा दिश इन्द्रायाधिपतये तिरश्चिराजये रक्षित्रे यमायेषुमते ।  
 एतं परि दद्यस्तं नो गोपायतास्माकमैतोः ।  
 दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥५६॥  
 प्रतीच्यै त्वा दिशे वरुणायाधिपतये पूदाकवे रक्षित्रेऽन्नायेषुमते ।  
 एतं परि दद्यस्तं नो गोपायतास्माकमैतोः ।

दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥५७॥  
उदीच्यै त्वा दिशे सोमायाधिपतये स्वजाय रक्षित्रेऽशन्या इषुमत्यै ।  
एतं परि दद्मस्तं नो गोपायतास्माकमैतोः ।  
दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥५८॥  
ध्रुवायै त्वा दिशे विष्णवेऽधिपतये कल्माषग्रीवाय रक्षित्र ओषधीभ्य इषुमतीभ्यः ।  
एतं परि दद्मस्तं नो गोपायतास्माकमैतोः ।  
दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥५९॥  
ऊर्ध्वायै त्वा दिशे बृहस्पतयेऽधिपतये श्वित्राय रक्षित्रे वर्षायेषुमते ।  
एतं परि दद्मस्तं नो गोपायतास्माकमैतोः ।  
दिष्टं नो अत्र जरसे नि नेषज्जरा मृत्यवे परि णो ददात्वथ पक्वेन सह सं भवेम ॥६०॥ {१८}

#### 12.4

ददामीत्येव ब्रूयादनु चैनामभुत्सत ।  
वशां ब्रह्मभ्यां याचद्भ्यस्तत्प्रजावदपत्यवत् ॥१॥  
प्रजया स वि क्रीणीते पशुभिश्चोप दस्यति ।  
य आर्षेयेभ्यो याचद्भ्यो देवानां गां न दित्सति ॥२॥  
कूटयास्य सं शीर्यन्ते श्लोणया काटमर्दति ।  
बण्डया दह्यन्ते गृहाः काणया दीयते स्वम् ॥३॥  
विलोहितो अधिष्ठानाच्छक्नो विन्दति गोपतिम् ।  
तथा वशायाः संविद्यं दुरदभ्ना हुच्यसे ॥४॥  
पदोरस्या अधिष्ठानाद्विक्लिन्दुर्नाम विन्दति ।  
अनामनात्सं शीर्यन्ते या मुखेनोपजिघ्रति ॥५॥  
यो अस्याः कर्णावास्कुनोत्या स देवेषु वृश्चते ।  
लक्ष्म कुर्व इति मन्यते कनीयः कृणुते स्वम् ॥६॥  
यदस्याः कस्मि चिद्भोगाय बालान् कश्चित्प्रकृन्तति ।  
ततः किशोरा म्रियन्ते वत्सांश्च घातुको वृकः ॥७॥  
यदस्या गोपतौ सत्या लोम ध्वाङ्क्षो अजीहिडत् ।  
ततः कुमारा म्रियन्ते यक्ष्मो विन्दत्यनामनात् ॥८॥  
यदस्याः पल्पूलनं शकृद्दासी समस्यति ।  
ततोऽपरूपं जायते तस्मादव्येष्यदेनसः ॥९॥  
जायमानाभि जायते देवान्त्सब्राह्मणान् वशा ।  
तस्माद्ब्रह्मभ्यो देवैषा तदाहुः स्वस्य गोपनम् ॥१०॥ {१९}  
य एनां वनिमायन्ति तेषां देवकृता वशा ।  
ब्रह्मज्येयं तदब्रुवन् य एनां निप्रियायते ॥११॥  
य आर्षेयेभ्यो याचद्भ्यो देवानां गां न दित्सति ।  
आ स देवेषु वृश्चते ब्राह्मणानां च मन्यवे ॥१२॥  
यो अस्य स्याद्द्वशाभोगो अन्यामिच्छेत् तर्हि सः ।  
हिंस्ते अदत्ता पुरुषं याचितां च न दित्सति ॥१३॥  
यथा शेवधिर्निहितो ब्राह्मणानां तथा वशा ।  
तामेतदछायन्ति यस्मिन् कस्मिंश्च जायते ॥१४॥  
स्वमेतदछायन्ति यद्वशां ब्राह्मणा अभि ।  
यथैनान् अन्यास्मिन् जिनीयादेवास्या निरोधनम् ॥१५॥  
चरेदेवा त्रैहायणादविज्ञातगदा सती ।  
वशां च विद्यान् नारद ब्राह्मणास्तर्होष्याः ॥१६॥  
य एनामवशामाह देवानां निहितं निधिम् ।  
उभौ तस्मै भवाशर्वो परिक्रम्येषुमस्यतः ॥१७॥  
यो अस्या ऊधो न वेदाथो अस्या स्तनान् उत ।  
उभयेनैवास्मै दुहे दातुं चेदशकद्वशाम् ॥१८॥  
दुरदभ्नैनमा शये याचितां च न दित्सति ।  
नास्मै कामाः समृध्यन्ते यामदत्त्वा चिकीर्षति ॥१९॥  
देवा वशामयाचन् मुखं कृत्वा ब्राह्मणम् ।  
तेषां सर्वेषामददद्दुर्द न्येति मानुषः ॥२०॥ {२०}  
हेडं पशुनां न्येति ब्राह्मणेभ्योऽददद्वशाम् ।  
देवानां निहितं भागं मर्त्यश्चेन् निप्रियायते ॥२१॥  
यदन्ये शतं याचेयुर्ब्राह्मणा गोपतिं वशाम् ।  
अथैनां देवा अब्रुवन् एवं ह विदुषो वशा ॥२२॥  
य एवं विदुषेऽदत्त्वाथान्येभ्यो ददद्वशाम् ।  
दुर्गा तस्मा अधिष्ठाने पृथिवी सहदेवता ॥२३॥  
देवा वशामयाचन् यस्मिन् अग्रे अजायत ।  
तामेतां विद्यान् नारदः सह देवैरुदाजत ॥२४॥  
अनपत्यमल्पपशुं वशा कृणोति पूरुषम् ।  
ब्राह्मणैश्च याचितामथैनां निप्रियायते ॥२५॥  
अग्नीषोमाभ्यां कामाय मित्राय वरुणाय च ।  
तेभ्यो याचन्ति ब्राह्मणास्तेष्वा वृश्चतेऽददत् ॥२६॥

यावदस्या गोपतिर्नोपशुणुयादृचः स्वयम् ।  
चरेदस्य तावद्गोषु नास्य श्रुत्वा गृहे वसेत् ॥२७॥  
यो अस्या ऋच उपश्रुत्याथ गोष्वचीचरत् ।  
आयुश्च तस्य भूतिं च देवा वृश्चन्ति हीडिताः ॥२८॥  
वशा चरन्ती बहुधा देवानां निहितो निधिः ।  
आविष्कृणुष्व रूपाणि यदा स्थाम जिघांसति ॥२९॥  
आविरात्मानं कृणुते यदा स्थाम जिघांसति ।  
अथो ह ब्रह्मभ्यो वशा याञ्च्याय कृणुते मनः ॥३०॥ {२१}  
मनसा सं कल्पयति तद्देवामपि गच्छति ।  
ततो ह ब्रह्माणो वशामुपप्रयन्ति याचितुम् ॥३१॥  
स्वधाकारेण पितृभ्यो यज्ञेन देवताभ्यः ।  
दानेन राजन्यो वशाया मातुर्हेडं न गच्छति ॥३२॥  
वशा माता राजन्यस्य तथा संभूतमग्रशः ।  
तस्या आहुरनर्पणं यद्ब्रह्मभ्यः प्रदीयते ॥३३॥  
यथाज्यं प्रगृहीतमालुम्पेत्सुचो अग्नये ।  
एवा ह ब्रह्मभ्यो वशामग्नय आ वृश्चतेऽददत् ॥३४॥  
पुरोडाशवत्सा सुदुघा लोकेऽस्मा उप तिष्ठति ।  
सास्मै सर्वान् कामान् वशा प्रददुषे दुहे ॥३५॥  
सर्वान् कामान् यमराज्ये वशा प्रददुषे दुहे ।  
अथाहुर्नारकं लोकं निरुन्धानस्य याचिताम् ॥३६॥  
प्रवीयमाना चरति क्रुद्धा गोपतये वशा ।  
वेहतं मा मन्यमानो मृत्योः पाशेषु बध्यताम् ॥३७॥  
यो वेहतं मन्यमानोऽमा च पचते वशाम् ।  
अप्यस्य पुत्रान् पौत्रांश्च याचयते बृहस्पतिः ॥३८॥  
महदेषाव तपति चरन्ती गोषु गौरपि ।  
अथो ह गोपतये वशाददुषे विषं दुहे ॥३९॥  
प्रियं पशूनां भवति यद्ब्रह्मभ्यः प्रदीयते ।  
अथो वशायास्तत्प्रियं यद्देवत्रा हविः स्यात् ॥४०॥ {२२}  
या वशा उदकल्पयन् देवा यज्ञादुदेत्य ।  
तासां विलिप्त्यं भीमामुदाकुरुत नारदः ॥४१॥  
तां देवा अमीमांसन्त वशेयाऽ अवशेति ।  
तामब्रवीन् नारद एषा वशानां वशतमेति ॥४२॥  
कति नु वशा नारद यास्त्वं वेत्थ मनुष्यजाः ।  
तास्त्वा पृष्ठामि विद्वांसं कस्या नाश्रीयादब्राह्मणः ॥४३॥  
विलिप्त्या बृहस्पते या च सूतवशा वशा ।  
तस्या नाश्रीयादब्राह्मणो य आशंसेत भूत्याम् ॥४४॥  
नमस्ते अस्तु नारदानुष्ठु विदुषे वशा ।  
कतमासां भीमतमा यामदत्त्वा पराभवेत् ॥४५॥  
विलिप्ती या बृहस्पतेऽथो सूतवशा वशा ।  
तस्या नाश्रीयादब्राह्मणो य आशंसेत भूत्याम् ॥४६॥  
त्रीणि वै वशाजातानि विलिप्ती सूतवशा वशा ।  
ताः प्र यच्छेद्ब्रह्मभ्यः सोऽनात्रस्कः प्रजापतौ ॥४७॥  
एतद्गो ब्राह्मणा हविरिति मन्वीत याचितः ।  
वशां चेदेनं याचेयुर्या भीमाददुषो गृहे ॥४८॥  
देवा वशां पर्यवदन् न नोऽदादिति हीडिताः ।  
एताभिर्ऋग्भिर्भेदं तस्माद्द्वै स पराभवत् ॥४९॥  
उतैनां भेदो नाददाद्दशामिन्द्रेण याचितः ।  
तस्मात्तं देवा आगसोऽवृश्चन् अहमुत्तरे ॥५०॥  
ये वशाया अदानाय वदन्ति परिरापिणः ।  
इन्द्रस्य मन्यवे जाल्मा आ वृश्चन्ते अचित्या ॥५१॥  
ये गोपतिं पराणीयाथाहूर्मा ददा इति ।  
रुद्रस्यास्तां ते हेर्ती परि यन्त्यचित्या ॥५२॥  
यदि हुतं यद्यहुताममा च पचते वशाम् ।  
देवान्त्सब्राह्मणान् ऋत्वा जिहो लोकान् निर्ऋच्छति ॥५३॥ {२३}

12.5

श्रमेण तपसा सृष्टा ब्रह्मणा वित्ता र्ते श्रिता ॥१॥  
सत्येनावृता श्रिया प्रावृता यशसा परीवृता ॥२॥  
स्वधया परिरहिता श्रद्धया पर्युढा दीक्षया गुप्ता यज्ञे प्रतिष्ठिता लोको निधनम् ॥३॥  
ब्रह्म पदवायं ब्राह्मणोऽधिपतिः ॥४॥  
तामाददानस्य ब्रह्मगर्वी जिनतो ब्राह्मणं क्षत्रियस्य ॥५॥  
अप क्रामति सूनुता वीर्यं पुन्या लक्ष्मीः ॥६॥ {२४}  
ओजश्च तेजश्च सहश्च बलं च वाक्चेन्द्रियं च श्रीश्च धर्मश्च ॥७॥  
ब्रह्म च क्षत्रं च राष्ट्रं च विशश्च त्विषिश्च यशश्च वर्चश्च द्रविणं च ॥८॥

आयुश्च रूपं च नाम च कीर्तिश्च प्राणश्चापानश्च चक्षुश्च श्रोत्रं च ॥९॥  
 पयश्च रसश्चान्नं चान्नाद्यं च र्तं च सत्यं चेष्टं च पूर्णं च प्रजा च पशवश्च ॥१०॥  
 तानि सर्वाण्यप क्रामन्ति ब्रह्मगवीमाददानस्य जिनतो ब्राह्मणं क्षत्रियस्य ॥११॥ {२५}  
 सैषा भीमा ब्रह्मगव्यघविषा साक्षात्कृत्या कूल्बजमावृता ॥१२॥  
 सर्वाण्यस्यां घोराणि सर्वे च मृत्यवः ॥१३॥  
 सर्वाण्यस्यां क्रूराणि सर्वे पुरुषवधाः ॥१४॥  
 सा ब्रह्मज्यं देवपीयुं ब्रह्मगव्यादीयमाना मृत्योः पद्वीष आ द्यति ॥१५॥  
 मेनिः शतवधा हि सा ब्रह्मज्यस्य क्षितिर्हि सा ॥१६॥  
 तस्माद्वै ब्राह्मणानां गौर्दुराधर्षा विजानता ॥१७॥  
 वज्रो धावन्ती वैश्वानर उद्वीता ॥१८॥  
 हेतिः शफान् उखिदन्ती महादेवोऽपेक्षमाणा ॥१९॥  
 क्षुरपविरीक्षमाणा वाश्यमानाभि स्फूर्जति ॥२०॥  
 मृत्युर्हिङ्कण्वत्युग्रो देवः पुच्छं पर्यस्यन्ती ॥२१॥  
 सर्वज्यानिः कर्णो वरीवर्जयन्ती राजयक्ष्मो मेहन्ती ॥२२॥  
 मेनिर्दुह्यमाना शीर्षक्तिर्दुग्धा ॥२३॥  
 सेदिरुपतिष्ठन्ती मिथोयोधः परामृष्टा ॥२४॥  
 शरव्या मुखेऽपिनह्यमाना ऋतिर्हन्यमाना ॥२५॥  
 अघविषा निपतन्ती तमो निपतिता ॥२६॥  
 अनुगच्छन्ती प्राणान् उप दासयति ब्रह्मगवी ब्रह्मज्यस्य ॥२७॥ {२६}  
 वैरं विकृत्यमाना पौत्राद्यं विभाज्यमाना ॥२८॥  
 देवहेतिर्हियमाणा व्युद्धिर्हता ॥२९॥  
 पाप्माधिधीयमाना पारुष्यमवधीयमाना ॥३०॥  
 विषं प्रयस्यन्ती तक्मा प्रयस्ता ॥३१॥  
 अघं प्रच्यमाना दुष्वज्यं पक्वा ॥३२॥  
 मूलबर्हणी पर्याक्रियमाणा क्षितिः पर्याकृता ॥३३॥  
 असंज्ञा गन्धेन शुगुदधियमाणाशीविष उद्धृता ॥३४॥  
 अभूतिरुपहियमाणा पराभूतिरुपहृता ॥३५॥  
 शर्वः क्रुद्धः पिश्यमाना शिमिदा पिशिता ॥३६॥  
 अवर्तिरश्यमाना निर्ऋतिरशिता ॥३७॥  
 अशिता लोकाच्छिनत्ति ब्रह्मगवी ब्रह्मज्यमस्माच्चामुष्माच्च ॥३८॥ {२७}  
 तस्या आहननं कृत्या मेनिराशसनं वलग ऊबध्यम् ॥३९॥  
 अस्वगता परिहृता ॥४०॥  
 अग्निः क्रव्याद्धृत्वा ब्रह्मगवी ब्रह्मज्यं प्रविश्यात्ति ॥४१॥  
 सर्वास्याङ्गा पर्वी मूलानि वृश्चति ॥४२॥  
 छिनत्त्यस्य पितृबन्धु परा भावयति मातृबन्धु ॥४३॥  
 विवाहां ज्ञातीन्त्सवान् अपि क्षापयति ब्रह्मगवी ब्रह्मज्यस्य क्षत्रियेणापुनर्दीयमाना ॥४४॥  
 अवास्तुमेनमस्वगमप्रजसं करोत्यपरापरणो भवति क्षीयते ॥४५॥  
 य एवं विदुषो ब्राह्मणस्य क्षत्रियो गामादत्ते ॥४६॥ {२८}  
 क्षिप्रं वै तस्याहनने गृध्राः कुर्वत ऐलबम् ॥४७॥  
 क्षिप्रं वै तस्यादहनं परि नृत्यन्ति केशिनीराघानाः पाणिनोरसि कुर्वाणाः पापमैलबम् ॥४८॥  
 क्षिप्रं वै तस्य वास्तुषु वृकाः कुर्वत ऐलबम् ॥४९॥  
 क्षिप्रं वै तस्य पृच्छन्ति यत्तदासी३ इदं नु ता३ इति ॥५०॥  
 छिन्ध्या छिन्धि प्र छिन्ध्यपि क्षापय क्षापय ॥५१॥  
 आददानमाङ्गिरसि ब्रह्मज्यमुप दासय ॥५२॥  
 वैश्वदेवी ह्युच्यसे कृत्या कूल्बजमावृता ॥५३॥  
 ओषन्ती समोषन्ती ब्रह्मणो वज्रः ॥५४॥  
 क्षुरपविर्मृत्युर्भृत्वा वि धाव त्वम् ॥५५॥  
 आ दत्सं जिनतां वर्च इष्टं पूर्णं चाशिषः ॥५६॥  
 आदाय जीतं जीताय लोकेऽमुष्मिन् प्र यच्छसि ॥५७॥  
 अघ्न्ये पदवीर्भव ब्राह्मणस्याभिशस्त्या ॥५८॥  
 मेनिः शरव्या भवाघादघविषा भव ॥५९॥  
 अघ्न्ये प्र शिरो जहि ब्रह्मज्यस्य कृतागसो देवपीयोरराधसः ॥६०॥  
 त्वया प्रमूर्णं मृदितमग्निर्दहतु दुश्चितम् ॥६१॥ {२९}  
 वृश्च प्र वृश्च सं वृश्च दह प्र दह सं दह ॥६२॥  
 ब्रह्मज्यं देव्यघ्न्य आ मूलादनुसंदह ॥६३॥  
 यथायाद्यमसादनात्पापलोकान् परावतः ॥६४॥  
 एवा त्वं देव्यघ्न्ये ब्रह्मज्यस्य कृतागसो देवपीयोरराधसः ॥६५॥  
 वज्रेण शतपर्वणा तीक्ष्णेन क्षुरभृष्टिना ॥६६॥  
 प्र स्कन्धान् प्र शिरो जहि ॥६७॥  
 लोमान्यस्य सं छिन्धि त्वचमस्य वि वेष्टय ॥६८॥  
 मांसान्यस्य शातय स्नावान्यस्य सं वृह ॥६९॥  
 अस्थीन्यस्य पीडय मज्जानमस्य निर्जहि ॥७०॥  
 सर्वास्याङ्गा पर्वणि वि श्रथय ॥७१॥  
 अग्निरेनं क्रव्यात्पृथिव्या नुदतामुदोषतु वायुरन्तरिक्षान् महतो वरिष्णः ॥७२॥

सूर्य एनं दिवः प्र णुदतां न्योषतु ॥७३॥ {३०}

13.1

उदेहि वाजिन् यो अप्स्वन्तरिदं राष्ट्रं प्र विश सूनृतावत् ।  
यो रोहितो विश्वमिदं जजान स त्वा राष्ट्राय सुभृतं बिभर्तु ॥१॥  
उद्वाज आ गन् यो अप्स्वन्तर्विश आ रोह त्वद्यानयो याः ।  
सोमं दधानोऽप ओषधीर्गाश्वतुष्पदो द्विपद आ वेशयेह ॥२॥  
यूयमुग्रा मरुतः पृश्निमातर इन्द्रेण युजा प्र मृणीत शत्रून् ।  
आ वो रोहितः शृणवत्सुदानवस्त्रिषप्तासो मरुतः स्वादुसमुदः ॥३॥  
रुहो रुरोह रोहित आ रुरोह गर्भो जनीनां जनुषामुपस्थम् ।  
ताभिः संरब्धमन्वविन्दन् षडूर्वीर्गातुं प्रपश्यन् इह राष्ट्रमाहाः ॥४॥  
आ ते राष्ट्रमिह रोहितोऽहाषोद्व्यास्थन् मृधो अभयं ते अभूत् ।  
तस्मै ते द्यावापृथिवी रेवतीभिः कामं दुहातामिह शक्वरीभिः ॥५॥  
रोहितो द्यावापृथिवी जजान तत्र तन्तुं परमेष्ठी ततान ।  
तत्र शिश्रियेऽज एकपादोऽदंहृद्यावापृथिवी बलेन ॥६॥  
रोहितो द्यावापृथिवी अदंहृतेन स्व स्तभितं तेन नाकः ।  
तेनान्तरिक्षं विमिता रजांसि तेन देवा अमृतमन्वविन्दन् ॥७॥  
वि रोहितो अमृशद्विश्वरूपं समाकुर्वाणः प्ररुहो रुहश्च ।  
दिवं रूढ्वा महता महिम्ना सं ते राष्ट्रमनक्तु पयसा घृतेन ॥८॥  
यास्ते रुहः प्ररुहो यास्त आरुहो याभिरापृणांसि दिवमन्तरिक्षम् ।  
तासां ब्रह्मणा पयसा ववृधानो विशि राष्ट्रे जागृहि रोहितस्य ॥९॥  
यस्ते विशस्तपसः संबभूवृत्सं गायत्रीमनु ता इहागुः ।  
तास्त्वा विशन्तु मनसा शिवेन संमाता वत्सो अभ्येतु रोहितः ॥१०॥ {१}  
ऊर्ध्वो रोहितो अधि नाके अस्थाद्विश्वा रूपाणि जनयन् युवा कविः ।  
तिग्मेनाग्निर्ज्योतिषा वि भाति तृतीये चक्रे रजसि प्रियाणि ॥११॥  
सहस्रशृङ्गो वृषभो जातवेदा घृताहुतः सोमपृष्ठः सुवीरः ।  
मा मा हासीन् नाथितो नेत्त्वा जहानि गोपोषं च मे वीरपोषं च धेहि ॥१२॥  
रोहितो यज्ञस्य जनिता मुखं च रोहिताय वाचा श्रोत्रेण मनसा जुहोमि ।  
रोहितं देवा यन्ति सुमनस्यमानाः स मा रोहैः सामित्वै रोहयतु ॥१३॥  
रोहितो यज्ञं व्यदधाद्विश्वकर्मणे तस्मात्तेजांस्युप मेमान्यागुः ।  
वोचेयं ते नाभिं भुवनस्याधि मज्मनि ॥१४॥  
आ त्वा रुरोह बृहत्युत पङ्क्तिरा ककुब्बर्चसा जातवेदः ।  
आ त्वा रुरोहोष्णिहाक्षरो वषट्कार आ त्वा रुरोह रोहितो रेतसा सह ॥१५॥  
अयं वस्ते गर्भं पृथिव्या दिवं वस्तेऽयमन्तरिक्षम् ।  
अयं ब्रह्मस्य विष्टपि स्वर्लोकान् व्यानशे ॥१६॥  
वाचस्पते पृथिवी नः स्योना स्योना योनिस्तल्पा नः सुशेवा ।  
इहैव प्राणः सख्ये नो अस्तु तं त्वा परमेष्ठिन् पर्यग्निरायुषा वर्चसा दधातु ॥१७॥  
वाचस्पत ऋतवः पञ्च ये नौ वैश्वकर्मणाः परि ये संबभूवुः ।  
इहैव प्राणः सख्ये नो अस्तु तं त्वा परमेष्ठिन् परि रोहित आयुषा वर्चसा दधातु ॥१८॥  
वाचस्पते सौमनसं मनश्च गोष्ठे नो गा जनय योनिषु प्रजाः ।  
इहैव प्राणः सख्ये नो अस्तु तं त्वा परमेष्ठिन् पर्यहमायुषा वर्चसा दधातु ॥१९॥  
परि त्वा धात्सविता देवो अग्निर्वर्चसा मित्रावरुणावभि त्वा ।  
सर्वा अरातीरवक्रामन् एहीदं राष्ट्रमकरः सुनृतावत् ॥२०॥ {२}  
यं त्वा पृषती रथे प्रष्टिर्वहति रोहित ।  
शुभा यासि रिणन्न अपः ॥२१॥  
अनुव्रता रोहिणी रोहितस्य सूरिः सुवर्णा बृहती सुवर्चाः ।  
तया वाजान् विश्वरूपां जयेम तया विश्वाः पृतना अभि ष्याम ॥२२॥  
इदं सदो रोहिणी रोहितस्यासौ पन्थाः पृषती येन याति ।  
तां गन्धर्वाः कश्यपा उन् नयन्ति तां रक्षन्ति कवयोऽप्रमादम् ॥२३॥  
सूर्यस्याश्वा हरयः केतुमन्तः सदा वहन्त्यमृताः सुखं रथम् ।  
घृतपावा रोहितो भ्राजमानो दिवं देवः पृषतीमा विवेश ॥२४॥  
यो रोहितो वृषभस्तिग्मशृङ्गः पर्यग्निं परि सूर्यं बभूव ।  
यो विष्टभ्नाति पृथिवीं दिवं च तस्माद्देवा अधि सृष्टीः सृजन्ते ॥२५॥  
रोहितो दिवमारुहन् महतः पर्यर्णवात् ।  
सर्वो रुरोह रोहितो रुहः ॥२६॥  
वि मिमीष्व पयस्वतीं घृताचीं देवानां धेनुरनपस्पृगेषा ।  
इन्द्रः सोमं पिबतु क्षेमो अस्त्वग्निः प्र स्तीतु वि मृधो नुदस्व ॥२७॥  
समिद्धो अग्निः समिधानो घृतवृद्धो घृताहुतः ।  
अभीषाट्विश्वाषाडग्निः सपत्नान् हन्तु ये मम ॥२८॥  
हन्त्वेनान् प्र दहत्वरियो नः पृतन्यति ।  
क्रव्यादाग्निना वयं सपत्नान् प्र दहामसि ॥२९॥  
अवाचीनान् अव जहीन्द्र वज्रेण बाहुमान् ।  
अथा सपत्नान् मामकान् अग्नेस्तेजोभिरादिषि ॥३०॥ {३}



अग्ने सपत्नान् अधरान् पादयास्मद्व्यथया सजातमुत्पिपानं बृहस्पते ।  
 इन्द्राग्नी मित्रावरुणावधरे पद्यन्तामप्रतिमन्युयमानाः ॥३१॥  
 उद्यंस्त्वं देव सूर्य सपत्नान् अव मे जहि ।  
 अवैनान् अश्मना जहि ते यन्त्वधमं तमः ॥३२॥  
 वत्सो विराजो वृषभो मतीनामा रुरोह शुक्रपृष्ठोऽन्तरिक्षम् ।  
 घृतेनार्कमभ्यर्चन्ति वत्सं ब्रह्म सन्तं ब्रह्मणा वर्धयन्ति ॥३३॥  
 दिवं च रोह पृथिवीं च रोह राष्ट्रं च रोह द्रविणं च रोह ।  
 प्रजां च रोहामृतं च रोह रोहितेन तन्वं सं स्पृषस्व ॥३४॥  
 ये देवा राष्ट्रभृतोऽभितो यन्ति सूर्यम् ।  
 तैष्टे रोहितः सम्विदानो राष्ट्रं दधातु सुमनस्यमानः ॥३५॥  
 उत्त्वा यज्ञा ब्रह्मपूता वहन्त्यध्वगतो हरयस्त्वा वहन्ति ।  
 तिरः समुद्रमति रोचसेऽर्णवम् ॥३६॥  
 रोहिते द्यावापृथिवी अधि श्रिते वसुजिति गोजिति संधनाजिति ।  
 सहस्रं यस्य जनिमानि सप्त च वोच्यं ते नाभिं भुवनस्याधि मज्जनि ॥३७॥  
 यशा यासि प्रदिशो दिशश्च यशाः पशूनामुत चर्षणीनाम् ।  
 यशाः पृथिव्या अदित्या उपस्थेऽहं भूयासं सवितेव चारुः ॥३८॥  
 अमुत्र सन्न इह वेत्थेतः संस्तानि पश्यसि ।  
 इतः पश्यन्ति रोचनं दिवि सूर्यं विपश्चितम् ॥३९॥  
 देवो देवान् मर्चयस्यन्तश्चरस्यर्णवे ।  
 समानमग्निमिन्धते तं विदुः कवयः परे ॥४०॥ {४}  
 अवः परेण पर एनावरेण पदा वत्सं बिब्रती गौरुदस्थात् ।  
 सा कद्रीची कं स्विदर्थं परागात्वव स्वित्सूते नहि यूथे अस्मिन् ॥४१॥  
 एकपदी द्विपदी सा चतुष्पद्यष्टापदी नवपदी बभूवुषी ।  
 सहस्राक्षरा भुवनस्य पङ्क्तिस्तस्याः समुद्रा अधि वि क्षरन्ति ॥४२॥  
 आरोहन् द्याममृतः प्राव मे वचः ।  
 उत्त्वा यज्ञा ब्रह्मपूता वहन्त्यध्वगतो हरयस्त्वा वहन्ति ॥४३॥  
 वेद तत्ते अमर्त्यं यत् आक्रमणं दिवि ।  
 यत्ते सधस्थं परमे व्योमन् ॥४४॥  
 सूर्यो द्यां सूर्यः पृथिवीं सूर्य आपोऽति पश्यति ।  
 सूर्यो भूतस्यैकं चक्षुरा रुरोह दिवं महीम् ॥४५॥  
 उर्वीरासन् परिधयो वेदिभूमिरकल्पत ।  
 तत्रैतावग्नी आधत्त हिमं घ्नसं च रोहितः ॥४६॥  
 हिमं घ्नसं चाधाय यूपान् कृत्वा पर्वतान् ।  
 वर्षाज्यावग्नी ईजाते रोहितस्य स्वर्विदः ॥४७॥  
 स्वर्विदो रोहितस्य ब्रह्मणाग्निः समिध्यते ।  
 तस्माद्घ्नसस्तस्माद्धिमस्तस्माद्यज्ञोऽजायत ॥४८॥  
 ब्रह्मणाग्नी वावृधानौ ब्रह्मवृद्धौ ब्रह्माहुतौ ।  
 ब्रह्मेद्धावग्नी ईजाते रोहितस्य स्वर्विदः ॥४९॥  
 सत्ये अन्यः समाहितोऽप्स्वन्यः समिध्यते ।  
 ब्रह्मेद्धावग्नी ईजाते रोहितस्य स्वर्विदः ॥५०॥ {५}  
 यं वातः परिशुम्भति यं वेन्द्रो ब्रह्मणस्पतिः ।  
 ब्रह्मेद्धावग्नी ईजाते रोहितस्य स्वर्विदः ॥५१॥  
 वेदिं भूमिं कल्पयित्वा दिवं कृत्वा दक्षिणाम् ।  
 घ्नसं तदग्निं कृत्वा चकार विश्वमात्मन्चद्वर्षेणाज्येन रोहितः ॥५२॥  
 वर्षमाजं घ्नसो अग्निर्वेदिभूमिरकल्पत ।  
 तत्रैतान् पर्वतान् अग्निर्गीर्भिरूर्ध्वमकल्पयत् ॥५३॥  
 गीर्भिरूर्ध्वान् कल्पयित्वा रोहितो भूमिमब्रवीत् ।  
 त्वयीदं सर्वं जायतां यद्भूतं यच्च भाव्यम् ॥५४॥  
 स यज्ञः प्रथमो भूतो भव्यो अजायत ।  
 तस्माद्भ्रज इदं सर्वं यत्किं चेदं विरोचते रोहितेन ऋषिणाभृतम् ॥५५॥  
 यश्च गां पदा स्फुरति प्रत्यङ्सूर्यं च मेहति ।  
 तस्य वृश्चामि ते मूलं न छायां करवोऽपरम् ॥५६॥  
 यो माभिच्छायमत्येषि मां चाग्निं चान्तरा ।  
 तस्य वृश्चामि ते मूलं न छायां करवोऽपरम् ॥५७॥  
 यो अद्य देव सूर्यं त्वां च मां चान्तरायति ।  
 दुष्वप्यं तस्मिं छमलं दुरितानि च मृज्महे ॥५८॥  
 मा प्र गाम् पथो वयं मा यज्ञादिन्द्र सोमिनः ।  
 मान्तं स्थुर्नो अरातयः ॥५९॥  
 यो यज्ञस्य प्रसाधनस्तन्तुर्देवेष्वगततः ।  
 तमाहुतमशीमहि ॥६०॥ {६}

13.2

उदस्य केतवो दिवि शुक्रा भ्राजन्त ईरते ।  
 आदित्यस्य नृचक्षसो महिब्रतस्य मीढुषः ॥१॥

दिशां प्रज्ञानां स्वरयन्तमर्चिषा सुपक्षमाशुं पतयन्तमर्णवे ।  
 स्तवाम सूर्यं भुवनस्य गोपां यो रश्मिभिर्दिश आभाति सर्वाः ॥२॥  
 यत्प्राङ्प्रत्यङ्स्वधया यासि शीभं नानारूपे अहनी कर्षि मायया ।  
 तदादित्य महि तत्ते महि श्रवो यदेको विश्वं परि भूम जायसे ॥३॥  
 विपश्चितं तरणिं भ्राजमानं वहन्ति यं हरितः सप्त बह्वीः ।  
 सुताद्यमन्त्रिर्दिवमुन्निनाय तं त्वा पश्यन्ति परियान्तमाजिम् ॥४॥  
 मा त्वा दभन् परियान्तमाजिं स्वस्ति दुर्गामति याहि शीभम् ।  
 दिवं च सूर्यं पृथिवीं च देवीमहोरात्रे विमिमनो यदेषि ॥५॥  
 स्वस्ति ते सूर्यं चरसे रथाय येनोभावन्तौ परियासि सद्यः ।  
 यं ते वहन्ति हरितो वहिष्ठाः शतमश्वो यदि वा सप्त बह्वीः ॥६॥  
 सुखं सूर्यं रथमंशुमन्तं स्योनं सुवह्निमधि तिष्ठ वाजिनम् ।  
 यं ते वहन्ति हरितो वहिष्ठाः शतमश्वो यदि वा सप्त बह्वीः ॥७॥  
 सप्त सूर्यो हरितो यातवे रथे हिरण्यत्वचसो बृहतीरयुक्त ।  
 अमोचि शुक्रो रजसः परस्ताद्विधूय देवस्तमो दिवमारुहत् ॥८॥  
 उत्केतुना बृहता देव आगन् अपावृक्तमोऽभि ज्योतिरश्रित् ।  
 दिव्यः सुपर्णः स वीरो व्यख्यददितेः पुत्रो भुवनानि विश्वा ॥९॥  
 उद्यन् रश्मीन् आ तनुषे विश्वा रूपाणि पुष्यसि ।  
 उभा समुद्रौ क्रतुना वि भासि सर्वाल्लोकान् परिभूर्भ्राजमानः ॥१०॥ {७}  
 पूर्वापरं चरतो माययैतौ शिशु क्रीडन्तौ परि यातोऽर्णवम् ।  
 विश्वान्यो भुवना विचष्टे हैरण्यैरन्यं हरितो वहन्ति ॥११॥  
 दिवि त्वात्त्रिरधारयत्सूर्या मासाय कर्तवे ।  
 स एषि सुधृतस्तपन् विश्वा भूतावचाकशत् ॥१२॥  
 उभावन्तौ समर्षसि वत्सः संमातराविव ।  
 नन्वेतदितः पूरा ब्रह्म देवा अमी विदुः ॥१३॥  
 यत्समुद्रमनु श्रितं तत्सिषासति सूर्यः ।  
 अध्वास्य विततो महान् पूर्वश्चापरश्च यः ॥१४॥  
 तं समाप्नोति जूतिभिस्ततो नाप चिकित्सति ।  
 तेनामृतस्य भक्षं देवानां नाव रुन्धते ॥१५॥  
 उदु त्यं जातवेदसं देवं वहन्ति केतवः ।  
 दृशे विश्वाय सूर्यम् ॥१६॥  
 अप त्ये तायवो यथा नक्षत्रा यन्त्यक्तुभिः ।  
 सूराय विश्वचक्षसे ॥१७॥  
 अदृश्रन् अस्य केतवो वि रश्मयो जनामनु ।  
 भ्राजन्तो अग्नयो यथा ॥१८॥  
 तरणिविश्वदर्शतो ज्योतिष्कृदसि सूर्य ।  
 विश्वमा भासि रोचन ॥१९॥  
 प्रत्यङ्देवानां विशः प्रत्यङ्ङुदेषि मानुषीः ।  
 प्रत्यङ्ङुविश्वं स्वर्दशे ॥२०॥ {८}  
 येना पावक चक्षसा भुरण्यन्तं जनामनु ।  
 त्वं वरुण पश्यसि ॥२१॥  
 वि द्यामेषि रजस्पृध्वहर्मिमनो अक्तुभिः ।  
 पश्यन् जन्मानि सूर्य ॥२२॥  
 सप्त त्वा हरितो रथे वहन्ति देव सूर्य ।  
 शोचिष्केशं विचक्षणम् ॥२३॥  
 अयुक्त सप्त शुन्ध्युवः सूरौ रथस्य नप्त्यः ।  
 ताभिर्याति स्वयुक्तिभिः ॥२४॥  
 रोहितो दिवमारुहत्तपसा तपस्वी ।  
 स योनिमैति स उ जायते पुनः स देवानामधिपतिर्बभूव ॥२५॥  
 यो विश्वचर्षणिरुत विश्वतोमुखो यो विश्वतस्पाणिरुत विश्वतस्पृथः ।  
 सं बाहुभ्यां भरति सं पतत्रैर्द्यावापृथिवी जनयन् देव एकः ॥२६॥  
 एकपाद्द्विपदो भूयो वि चक्रमे द्विपात्त्रिपादमभ्येति पश्चात् ।  
 द्विपाद्द्विषट्पदो भूयो वि चक्रमे त एकपदस्तन्वं समासते ॥२७॥  
 अतन्द्रो यास्यन् हरितो यदास्थाहवे रूपे कृणुते रोचमानः ।  
 केतुमान् उद्यन्त्सहमानो रजांसि विश्वा आदित्य प्रवतो वि भासि ॥२८॥  
 बण्महामसि सूर्यं बडादित्य महामसि ।  
 महांस्ते महतो महिमा त्वमादित्य महामसि ॥२९॥  
 रोचसे दिवि रोचसे अन्तरिक्षे पतङ्ग पृथिव्यां रोचसे रोचसे अप्स्वन्तः ।  
 उभा समुद्रौ रुच्या व्यापिथ देवो देवासि महिषः स्वर्जित् ॥३०॥ {९}  
 अर्वाङ्परस्तात्प्रयतो व्यध्व आशुर्विपश्चित्पतयन् पतङ्गः ।  
 विष्णुर्विचित्तः शवसाधितिष्ठन् प्र केतुना सहते विश्वमेजत् ॥३१॥  
 चित्राश्रिकित्वान् महिषः सुपर्ण आरोचयन् रोदसी अन्तरिक्षम् ।  
 अहोरात्रे परि सूर्यं वसाने प्रास्य विश्वा तिरतो वीर्याणि ॥३२॥  
 तिग्मो विभ्राजन् तन्वं शिशानोऽरंगमासः प्रवतो रराणः ।  
 ज्योतिष्मान् पक्षी महिषो वयोधा विश्वा आस्थात्प्रदिशः कल्पमानः ॥३३॥

चित्रं देवानां केतुरनीकं ज्योतिष्मान् प्रदिशः सूर्य उद्यन् ।  
 दिवाकरोऽति ह्युन्मैस्तमांसि विश्वातारीदुरितानि शुक्रः ॥३४॥  
 चित्रं देवानामुदगादनीकं चक्षुर्मित्रस्य वरुणस्याग्नेः ।  
 आप्राहृयावापृथिवी अन्तरिक्षं सूर्य आत्मा जगतस्तस्थुषश्च ॥३५॥  
 उच्चा पतन्तमरुणं सुपर्णं मध्ये दिवस्तरणि भ्राजमानम् ।  
 पश्यम त्वा सवितारं यमाहरजसं ज्योतिर्यदविन्ददत्त्रिः ॥३६॥  
 दिवस्पृष्टे धावमानं सुपर्णमदित्याः पुत्रं नाथकाम उप यामि भीतः ।  
 स नः सूर्य प्र तिर दीर्घमायुर्मा रिषाम सुमतौ ते स्याम ॥३७॥  
 सहस्राहृष्यं वियतावस्य पक्षी हरेर्हंसस्य पततः स्वर्गम् ।  
 स देवान्त्सर्वांन् उरस्युपदद्य संपश्यन् याति भुवनानि विश्वा ॥३८॥  
 रोहितः कालो अभवद्रोहितोऽग्रे प्रजापतिः ।  
 रोहितो यज्ञानां मुखं रोहितः स्वराभरत् ॥३९॥  
 रोहितो लोको अभवद्रोहितोऽत्यतपद्विवम् ।  
 रोहितो रश्मिभिर्भूमिं समुद्रमनु सं चरत् ॥४०॥ {१०}  
 सर्वा दिशः समचरद्रोहितोऽधिपतिर्दिवः ।  
 दिवं समुद्रमाद्भूमिं सर्वं भूतं वि रक्षति ॥४१॥  
 आरोहन् छुक्रो बृहतीरतन्द्रो द्वे रूपे कृणुते रोचमानः ।  
 चित्रश्रिकित्वान् महिषो वातमाया यावतो लोकान् अभि यद्विभाति ॥४२॥  
 अभ्यन्यदेति पर्यन्यदस्यतेऽहोरात्राभ्यां महिषः कल्पमानः ।  
 सूर्यं वयं रजसि क्षियन्तं गातुविदं हवामहे नाधमानाः ॥४३॥  
 पृथिवीप्रो महिषो नाधमानस्य गातुरदब्धचक्षुः परि विश्वं बभूव ।  
 विश्वं संपश्यन्सुविदत्रो यजत्र इदं शृणोतु यदहं ब्रवीमि ॥४४॥  
 पर्यस्य महिमा पृथिवीं समुद्रं ज्योतिषा विभ्राजन् परि द्यामन्तरिक्षम् ।  
 सर्वं संपश्यन्सुविदत्रो यजत्र इदं शृणोतु यदहं ब्रवीमि ॥४५॥  
 अबोध्यग्निः समिधा जनानां प्रति धेनुमिवायतीमुषासम् ।  
 यद्वा इव प्र वयामुज्जिहानाः प्र भानवः सिस्रतं नाकमच्छ ॥४६॥ {११}

### 13.3

य इमे द्यावापृथिवी जजान यो द्रापि कृत्वा भुवनानि वस्ते ।  
 यस्मिन् क्षियन्ति प्रदिशः षडुर्वीर्याः पतङ्गो अनु विचाकशीति ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 यस्माद्वाता ऋतुथा पवन्ते यस्मात्समुद्रा अधि विक्षरन्ति ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहित प्र क्षिणीहि ब्रह्मज्यस्य प्रति मुञ्च पाशान् ॥२॥  
 यो मारयति प्राणयति यस्मात्प्राणन्ति भुवनानि विश्वा ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहित प्र क्षिणीहि ब्रह्मज्यस्य प्रति मुञ्च पाशान् ॥३॥  
 यः प्राणेन द्यावापृथिवी तर्पयत्यपानेन समुद्रस्य जठरं यः पिपर्ति ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहित प्र क्षिणीहि ब्रह्मज्यस्य प्रति मुञ्च पाशान् ॥४॥  
 यस्मिन् विराट्परमेष्ठी प्रजापतिरग्निर्वैश्वानरः सह पङ्क्त्या श्रितः ।  
 यः परस्य प्राणं परमस्य तेज आददे ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 यस्मिन् षडुर्वीः पञ्च दिशो अधिश्रिताश्चतस्र आपो यज्ञस्य त्रयोऽक्षराः ।  
 यो अन्तरा रोदसी क्रुद्धश्चक्षुषैक्षत ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 यो अन्नादो अन्नपतिर्बभूव ब्रह्मणस्पतिरुत यः ।  
 भूतो भविष्यत्भुवनस्य यस्पतिः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 अहोरात्रैर्विमितं त्रिंशदङ्गं त्रयोदशं मासं यो निर्मिमीते ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहित प्र क्षिणीहि ब्रह्मज्यस्य प्रति मुञ्च पाशान् ॥८॥  
 कृष्णं नियानं हरयः सुपर्णा अपो वसाना दिवमुत्पतन्ति ।  
 त आववृत्रन्सदनादुतस्य ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 यत्ते चन्द्रं कश्यप रोचनावद्यत्संहितं पुष्कलं चित्रभानु यस्मिन्सूर्या आपिताः सप्त साकम् ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहित प्र क्षिणीहि ब्रह्मज्यस्य प्रति मुञ्च पाशान् ॥१०॥ {१२}  
 बृहदेनमनु वस्ते पुरस्ताद्रथतरं प्रति गृह्णाति पश्चात् ।  
 ज्योतिर्वसाने सदमप्रमादम् ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 बृहदन्यतः पक्ष आसीद्रथंतरमन्यतः सबले सधीची ।  
 यद्रोहितमजनयन्त देवाः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।

स वरुणः सायमग्निर्भवति स मित्रो भवति प्रातरुद्यन् ।  
 स सविता भूत्वान्तरिक्षेण याति स इन्द्रो भूत्वा तपति मध्यतो दिवम् ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 सहस्राह्वयं वियतावस्य पक्षौ हरेर्हसस्य पततः स्वर्गम् ।  
 स देवान्त्सर्वान् उरस्युपदद्य संपश्यन् याति भुवनानि विश्वा ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 अयं स देवो अप्सवन्तः सहस्रमूलः परुशाको अत्रिः ।  
 य इदं विश्वं भुवनं जजान ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 शुक्रं वहन्ति हरयो रघुष्यदो देवं दिवि वर्चसा भ्राजमानम् ।  
 यस्योर्ध्वा दिवं तन्वस्तपन्त्यर्वाङ्सुवर्णैः पटरैर्वि भाति ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 येनादित्यान् हरितः सम्बहन्ति येन यज्ञेन बहवो यन्ति प्रजानन्तः ।  
 यदेकं ज्योतिर्बहुधा विभाति ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 सप्त युञ्जन्ति रथमेकचक्रमेको अश्वो वहति सप्तनामा ।  
 त्रिणाभि चक्रमजरमनर्वं यत्रेमा विश्वा भुवनाधि तस्थुः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 अष्टधा युक्तो वहति वह्निरुग्रः पिता देवानां जनिता मतीनाम् ।  
 ऋतस्य तन्तुं मनसा मिमानः सर्वा दिशः पवते मातरिश्वा ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 संयञ्चं तन्तुं प्रदिशोऽनु सर्वा अन्तर्गायत्र्याममृतस्य गर्भं ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहितं प्र क्षिणीहि ब्रह्मज्यस्य प्रति मुञ्च पाशान् ॥२०॥ {१३}  
 निम्नुचस्तिस्त्रो व्युषो ह तिस्रस्त्रीणि रजांसि दिवो अङ्ग तिस्रः ।  
 विद्वा ते अग्ने त्रेधा जनित्रं त्रेधा देवानां जनिमानि विद्वा ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 वि य और्णोत्पृथिवीं जायमान आ समुद्रमदधातन्तरिक्षे ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 उद्वेपय रोहितं प्र क्षिणीहि ब्रह्मज्यस्य प्रति मुञ्च पाशान् ॥२२॥  
 त्वमग्ने क्रतुभिः केतुभिर्हितोऽर्कः समिद्ध उदरोचथा दिवि ।  
 किमभ्यार्चन् मरुतः पृश्निमातरो यद्रोहितमजनयन्त देवाः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 य आत्मदा बलदा यस्य विश्व उपासते प्रशिषं यस्य देवाः ।  
 योऽस्येशे द्विपदो यश्चतुष्पदः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 एकपाद्विपदो भूयो वि चक्रमे द्विपात्रिपादमभ्येति पश्चात् ।  
 चतुष्पाच्चक्रे द्विपदामभिस्वरे संपश्यन् पङ्क्तिमुपतिष्ठमानः ।  
 तस्य देवस्य क्रुद्धस्यैतदागो य एवं विद्वांसं ब्राह्मणं जिनाति ।  
 कृष्णायः पुत्रो अर्जुनो रात्र्या वत्सोऽजायत ।  
 स ह द्यामधि रोहति रुहो रुरोह रोहितः ॥२६॥ {१४}

#### 13.4

स एति सविता स्वर्दिवस्पृष्टेऽवचाकशत् ॥१॥  
 रश्मिभिर्नभ आभृतं महेन्द्र एत्यावृतः ॥२॥  
 स धाता स विधर्ता स वायुर्नभ उच्छ्रितम् ॥३॥  
 सोऽर्यमा स वरुणः स रुद्रः स महादेवः ॥४॥  
 सो अग्निः स उ सूर्यः स उ एव महायमः ॥५॥  
 तं वत्सा उप तिष्ठन्त्येकशीर्षाणो युता दश ॥६॥  
 पश्चात्प्राञ्च आ तन्वन्ति यदुदेति वि भासति ॥७॥  
 तस्यैष मारुतो गणः स एति शिक्वाकृतः ॥८॥  
 रश्मिभिर्नभ आभृतं महेन्द्र एत्यावृतः ॥९॥  
 तस्येमे नव कोशा विष्टम्भा नवधा हिताः ॥१०॥  
 स प्रजाभ्यो वि पश्यति यच्च प्राणति यच्च न ॥११॥  
 तमिदं निगतं सहः स एष एक एकवृदेक एव ॥१२॥  
 एते अस्मिन् देवा एकवृतो भवन्ति ॥१३॥ {१५}

#### 13.5

कीर्तिश्च यशश्चाम्भश्च नभश्च ब्राह्मणवर्चसं चात्रं चान्नाद्यं च ॥१४॥  
 य एतं देवमेकवृतं वेद ॥१५॥  
 न द्वितीयो न तृतीयश्चतुर्थो नाप्युच्यते ॥१६॥  
 न पञ्चमो न षष्ठः सप्तमो नाप्युच्यते ॥१७॥  
 नाष्टमो न नवमो दशमो नाप्युच्यते ॥१८॥  
 स सर्वस्मै वि पश्यति यच्च प्राणति यच्च न ॥१९॥  
 तमिदं निगतं सहः स एष एक एकवृदेक एव ॥२०॥

सर्वे अस्मिन् देवा एकवृतो भवन्ति ॥२१॥ {१६}

13.6

ब्रह्म च तपश्च कीर्तिश्च यशश्चाग्भश्च नभश्च ब्राह्मणवर्चसं चात्रं चान्नाद्यं च ॥२२॥

भूतं च भव्यं च श्रद्धा च रुचिश्च स्वर्गश्च स्वधा च ॥२३॥

य एतं देवमेकवृतं वेद ॥२४॥

स एव मृत्युः सोऽमृतं सोऽभ्वं स रक्षः ॥२५॥

स रुद्रो वसुवनिर्वसुर्देये नमोवाके वषट्कारोऽनु संहितः ॥२६॥

तस्येमे सर्वे यातव उप प्रशिषमासते ॥२७॥

तस्यामू सर्वा नक्षत्रा वशे चन्द्रमसा सह ॥२८॥ {१७}

13.7

स वा अह्नोऽजायत तस्मादहरजायत ॥२९॥

स वै रात्र्या अजायत तस्माद्रात्रिरजायत ॥३०॥

स वा अन्तरिक्षादजायत तस्मादन्तरिक्षमजायत ॥३१॥

स वै वायोरजायत तस्माद्वायुरजायत ॥३२॥

स वै दिवोऽजायत तस्माद्दिवोऽजायत ॥३३॥

स वै दिग्भ्योऽजायत तस्माद्दिशोऽजायन्त ॥३४॥

स वै भूमेरजायत तस्माद्भूमिरजायत ॥३५॥

स वा अग्नेरजायत तस्मादग्निरजायत ॥३६॥

स वा अद्भ्योऽजायत तस्मादापोऽजायन्त ॥३७॥

स वा ऋग्भ्योऽजायत तस्माद्ऋचोऽजायन्त ॥३८॥

स वै यज्ञादजायत तस्माद्यज्ञोऽजायत ॥३९॥

स यज्ञस्तस्य यज्ञः स यज्ञस्य शिरस्कृतम् ॥४०॥

स स्तनयति स वि द्योतते स उ अश्मानमस्यति ॥४१॥

पापाय वा भद्राय वा पुरुषायासुराय वा ॥४२॥

यद्वा कृणोष्योषधीर्यद्वा वर्षसि भद्रया यद्वा जन्यमवीवृधः ॥४३॥

तावांस्तं मघवन् महिमोपो ते तन्वः शतम् ॥४४॥

उपो ते बध्वे बद्धानि यदि वासि न्यर्बुदम् ॥४५॥ {१८}

13.8

भूयान् इन्द्रो नमुराद्भयान् इन्द्रासि मृत्युभ्यः ॥४६॥

भूयान् अरात्याः शच्याः पतिस्त्वमिन्द्रासि विभूः प्रभूरिति त्वोपास्महे वयम् ॥४७॥

नमस्ते अस्तु पश्यत पश्य मा पश्यत ॥४८॥

अन्नाद्येन यशसा तेजसा ब्राह्मणवर्चसेन ॥४९॥

अम्भो अमो महः सह इति त्वोपास्महे वयम् ॥५०॥

अम्भो अरुणं रजतं रजः सह इति त्वोपास्महे वयम् ॥५१॥ {१९}

13.9

उरुः पृथुः सुभूर्भुव इति त्वोपास्महे वयम् ॥५२॥

प्रथो वरो व्यचो लोक इति त्वोपास्महे वयम् ॥५३॥

भवद्भसुरिदद्भसुः संयद्भसुरायद्भसुरिति त्वोपास्महे वयम् ॥५४॥

नमस्ते अस्तु पश्यत पश्य मा पश्यत ॥५५॥

अन्नाद्येन यशसा तेजसा ब्राह्मणवर्चसेन ॥५६॥ {२०}

14.1

सत्येनोत्तभिता भूमिः सूर्येणोत्तभिता द्यौः ।

ऋतेनादित्यास्तिष्ठन्ति दिवि सोमो अधि श्रितः ॥१॥

सोमेनादित्या बलिनः सोमेन पृथिवी मही ।

अथो नक्षत्राणामेषामुपस्थे सोम आहितः ॥२॥

सोमं मन्यते पपिवान् यत्संपिषन्त्योषधिम् ।

सोमं यं ब्रह्माणो विदुर्न तस्याश्राति पार्थिवः ॥३॥

यत्त्वा सोम प्रपिबन्ति तत आ प्यायसे पुनः ।

वायुः सोमस्य रक्षिता समानां मास आकृतिः ॥४॥

आच्छद्विधानैर्गुपितो बार्हतैः सोम रक्षितः ।

ग्राव्णामिच्छृण्वन् तिष्ठसि न ते अश्राति पार्थिवः ॥५॥

चित्तिरा उपबर्हणं चक्षुरा अभ्यञ्जनम् ।

द्यौर्भूमिः कोश आसीद्यदयात्सूर्या पतिम् ॥६॥

रैभ्यासीदनुदेयी नाराशंसी न्योचनी ।

सूर्याया भद्रमिद्धासो गाथयैति परिष्कृता ॥७॥

स्तोमा आसन् प्रतिधयः कुरीरं छन्द ओपशः ।

सूर्याया अश्विना वराग्निरासीत्पुरोगवः ॥८॥

सोमो वधूयुरभवदश्विनास्तामुभा वरा ।

सूर्या यत्पत्ये शंसन्तीं मनसा सविताददात् ॥९॥

मनो अस्या अन आसीद्यौरासीदुत च्छदिः ।

शुक्रावनड्वाहावास्तां यदयात्सूर्या पतिम् ॥१०॥ {१}

ऋक्सामाभ्यामभिहितौ गावौ ते सामनावैताम् ।

श्रोत्रे ते चक्रे आस्तां दिवि पन्थाश्चराचरः ॥११॥  
 शुची ते चक्रे यात्या व्यानो अक्ष आहतः ।  
 अनो मनस्मयं सूर्यारोहत्प्रयती पतिम् ॥१२॥  
 सूर्याया वहतुः प्रागात्सविता यमवासृजत् ।  
 मघासु हन्यन्ते गावः फल्गुनीषु व्युह्यते ॥१३॥  
 यदश्विना पृच्छमानावयातं त्रिचक्रेण वहतुं सूर्यायाः ।  
 क्वैकं चक्रं वामासीत्क्व देष्ट्राय तस्थुः ॥१४॥  
 यदयातं शुभस्पती वरेयं सूर्यामुप ।  
 विश्वे देवा अनु तद्धामजानन् पुत्रः पितरमवृणीत पूषा ॥१५॥  
 द्वे ते चक्रे सूर्यं ब्रह्माण ऋतुथा विदुः ।  
 अथैकं चक्रं यद्गृहा तदद्भ्यतय इद्विदुः ॥१६॥  
 अर्यमणं यजामहे सुबन्धुं पतिवेदनम् ।  
 उर्वारुकमिव बन्धनात्प्रेतो मुञ्चामि नामुतः ॥१७॥  
 प्रेतो मुञ्चामि नामुतः सुबद्धाममुतस्करम् ।  
 यथेयमिन्द्र मीढवः सुपुत्रा सुभगासति ॥१८॥  
 प्र त्वा मुञ्चामि वरुणस्य पाशाद्येन त्वाबध्नात्सविता सुशेवाः ।  
 ऋतस्य योनौ सुकृतस्य लोके स्योनं ते अस्तु सहसंभलायै ॥१९॥  
 भगस्त्वेतो नयतु हस्तगृह्याश्विना त्वा प्र वहतां रथेन ।  
 गृहान् गच्छ गृहपत्नी यथासो वशिनी त्वं विदथमा वदासि ॥२०॥ {२}  
 इह प्रियं प्रजायै ते समृध्यतामस्मिन् गृहे गार्हपत्याय जागृहि ।  
 एना पत्या तन्वं सं स्पृशस्वाथ जिर्विद्विदथमा वदासि ॥२१॥  
 इहैव स्तं मा वि यौष्टं विश्वमायुर्व्यश्रुतम् ।  
 क्रीडन्तौ पुत्रैर्नप्तृभिर्मोदमानौ स्वस्तकौ ॥२२॥  
 पूर्वापरं चरतो मायैतौ शिशू क्रीडन्तौ परि यातोऽर्णवम् ।  
 विश्वान्यो भुवना विचष्ट ऋतूरन्यो विदधज्जायसे नवः ॥२३॥  
 नवोनवो भवसि जायमानोऽह्नां केतुरुषसामेष्यग्रम् ।  
 भागं देवेभ्यो वि दधास्यायन् प्र चन्द्रमस्तिरसे दीर्घमायुः ॥२४॥  
 परा देहि शामुल्यं ब्रह्मभ्यो वि भजा वसु ।  
 कृत्यैषा पद्वती भूत्वा जाया विशते पतिम् ॥२५॥  
 नीललोहितं भवति कृत्यासक्तिर्व्यज्यते ।  
 एधन्ते अस्या ज्ञातयः पतिर्बन्धेषु बध्यते ॥२६॥  
 अश्वीला तनूर्भवति रुशती पापयामुया ।  
 पतिर्यद्वध्वो वाससः स्वमङ्गमभ्यूर्णुते ॥२७॥  
 आशसनं विशसनमथो अधिविकर्तनम् ।  
 सूर्यायाः पश्य रूपाणि तानि ब्रह्मोत शुम्भति ॥२८॥  
 तृष्टमेतत्कटुकमपाष्ठवद्विषवन् नैतदत्तवे ।  
 सूर्या यो ब्रह्मा वेद स इद्वाधुयमर्हति ॥२९॥  
 स इत्तत्स्योनं हरति ब्रह्मा वासः सुमङ्गलम् ।  
 प्रायश्चित्तिं यो अध्येति येन जाया न रिष्यति ॥३०॥ {३}  
 युवं भगं सं भरतं समृद्धमृतं वदन्तावृतोद्येषु ।  
 ब्रह्मणस्पते पतिमस्यै रोचय चारु संभलो वदतु वाचमेताम् ॥३१॥  
 इहेदसाथ न परो गमाथेमं गावः प्रजया वर्धयाथ ।  
 शुभं यतीरुस्रियाः सोमवर्चसो विश्वे देवाः क्रन् इह वो मनांसि ॥३२॥  
 इमं गावः प्रजया सं विशाथायं देवानां न मिनाति भागम् ।  
 अस्मै वः पूषा मरुतश्च सर्वे अस्मै वो धाता सविता सुवाति ॥३३॥  
 अनुक्षरा ऋजवः सन्तु पन्थनो येभिः सखायो यन्ति नो वरेयम् ।  
 सं भगेन समर्यम्णा सं धाता सृजतु वर्चसा ॥३४॥  
 यच्च वर्चो अक्षेषु सुरायां च यदाहितम् ।  
 यद्गोष्वश्विना वर्चस्तेनेमां वर्चसावतम् ॥३५॥  
 येन महानघ्न्या जघनमश्विना येन वा सुरा ।  
 येनाक्षा अभ्यषिच्यन्त तेनेमां वर्चसावतम् ॥३६॥  
 यो अनिधो दीदयदप्स्वन्तर्यं विप्रास ईडते अध्वरेषु ।  
 अपां नपान् मधुमतीरपो दा याभिरिन्द्रो वावृधे वीर्यावान् ॥३७॥  
 इदमहं रुशन्तं ग्राभं तनूदूषिमपोहामि ।  
 यो भद्रो रोचनस्तमुदचामि ॥३८॥  
 आस्यै ब्राह्मणाः स्नपनीर्हरन्त्ववीरघ्नीरुदजन्त्वापः ।  
 अर्यम्णो अग्निं पर्येतु पूषन् प्रतीक्षन्ते श्वशुरो देवरश्च ॥३९॥  
 शं ते हिरण्यं शमु सन्त्वापः शं मेधिर्भवतु शं युगस्य तर्ध ।  
 शं त आपः शतपवित्रा भवन्तु शमु पत्या तन्वं सं स्पृशस्व ॥४०॥ {४}  
 खे रथस्य खेऽनसः खे युगस्य शतक्रतो ।  
 अपालामिन्द्र त्रिष्पूत्वाकृणोः सूर्यत्वचम् ॥४१॥  
 आशासाना सौमनसं प्रजां सौभाग्यं रयिम् ।  
 पत्युरनुव्रता भूत्वा सं नहास्वामृताय कम् ॥४२॥  
 यथा सिन्धुर्नदीनां साम्राज्यं सुषुवे वृषा ।

एवा त्वं सम्राज्येधि पत्युरस्तं परेत्य ॥४३॥  
 सम्राज्येधि श्वशुरेषु सम्राज्युत देवेषु ।  
 ननान्दुः सम्राज्येधि सम्राज्युत श्वश्रवाः ॥४४॥  
 या अकृन्तन् अवयन् याश्च तन्निरं या देवीरन्तामभितोऽददन्त ।  
 तास्त्वा जरसे सं व्ययन्त्वायुष्मतीदं परि धत्स्व वासः ॥४५॥  
 जीवं रुदन्ति वि नयन्त्यध्वरं दीर्घामनु प्रसिति दीध्युर्नरः ।  
 वामं पितृभ्यो य इदं समीरिरे मयः पतिभ्यो जनये परिष्वजे ॥४६॥  
 स्योनं ध्रुवं प्रजायै धारयामि तेऽश्मानं देव्याः पृथिव्या उपस्थे ।  
 तमा तिष्ठानुमाद्या सुवर्चा दीर्घं त आयुः सविता कृणोतु ॥४७॥  
 येनाग्निरस्या भूम्या हस्तं जग्राह दक्षिणम् ।  
 तेन गृह्णामि ते हस्तं मा व्यथिष्ठा मया सह प्रजया च धनेन च ॥४८॥  
 देवस्ते सविता हस्तं गृह्णातु सोमो राजा सुप्रजसं कृणोतु ।  
 अग्निः सुभगां जतवेदाः पत्ये पत्नीं जरदष्टिं कृणोतु ॥४९॥  
 गृह्णामि ते सौभगत्वाय हस्तं मया पत्या जरदष्टिर्यथासः ।  
 भगो अर्यमा सविता पुरंधिर्मह्यं त्वादुर्गार्हपत्याय देवाः ॥५०॥ {५}  
 भगस्ते हस्तमग्रहीत्सविता हस्तमग्रहीत् ।  
 पत्नी त्वमसि धर्मणाहं गृहपतिस्तव ॥५१॥  
 ममेयमस्तु पोष्या मह्यं त्वादाद्बृहस्पतिः ।  
 मया पत्या प्रजावति सं जीव शरदः शतम् ॥५२॥  
 त्वष्टा वासो व्यदधाच्छुभे कं बृहस्पतेः प्रशिषा कवीनाम् ।  
 तेनेमां नारीं सविता भगश्च सूर्यामिव परि धत्तां प्रजया ॥५३॥  
 इन्द्राग्नी द्यावापृथिवी मातरिश्वा मित्रावरुणा भगो अश्विनोभा ।  
 बृहस्पतिर्मरुतो ब्रह्म सोम इमां नारिं प्रजया वर्धयन्तु ॥५४॥  
 बृहस्पतिः प्रथमः सूर्यायाः शीर्षं केशामकल्पयत् ।  
 तेनेमामश्विना नारीं पत्ये सं शोभयामसि ॥५५॥  
 इदं तद्रूपं यदवस्त योषा जायां जिज्ञासे मनसा चरन्तीम् ।  
 तामन्वर्तिष्ये सखिभिर्नवगवैः क इमान् विद्वान् वि चर्त पाशान् ॥५६॥  
 अहं वि ष्यामि मयि रूपमस्या वेददित्पथ्यन् मनसः कुलायम् ।  
 न स्तेयमग्नि मनसोदमुच्ये स्वयं श्रध्नानो वरुणस्य पाशान् ॥५७॥  
 प्र त्वा मुञ्चामि वरुणस्य पाशाद्येन त्वाबध्नात्सविता सुशेवाः ।  
 उरुं लोकं सुगमत्र पन्थां कृणोमि तुभ्यं सहपत्यै वधु ॥५८॥  
 उद्यच्छध्वमप रक्षी हनाथेमं नारीं सुकृते दधात ।  
 धाता विपश्चित्पतिमस्यै विवेद भगो राजा पुर एतु प्रजानन् ॥५९॥  
 भगस्ततक्ष चतुरः पादान् भगस्ततक्ष चत्वार्युष्पलानि ।  
 त्वष्टा पिपेश मध्यतोऽनु वर्धन्त्सा नो अस्तु सुमङ्गली ॥६०॥  
 सुकिंशुकं वहतुं विश्वरूपं हिरण्यवर्णं सुवृतं सुचक्रम् ।  
 आ रोह सूर्ये अमृतस्य लोकं स्योनं पतिभ्यो वहतुं कृणु त्वम् ॥६१॥  
 अभ्रातृर्घ्नीं वरुणापशुर्घ्नीं बृहस्पते ।  
 इन्द्रापतिर्घ्नीं पुत्रिणीमास्मभ्यं सवितर्वह ॥६२॥  
 मा हिंसिष्टं कुमार्यं स्थूणे देवकृते पथि ।  
 शालाया देव्या द्वारं स्योनं कृण्मो वधूपथम् ॥६३॥  
 ब्रह्मापरं युज्यतां ब्रह्म पूर्वं ब्रह्मान्ततो मध्यतो ब्रह्म सर्वतः ।  
 अनाव्याधां देवपुरां प्रपद्य शिवा स्योना पतिलोके वि राज ॥६४॥ {६}

#### 14.2

तुभ्यमग्रे पर्यवहन्त्सूर्यां वहतुना सह ।  
 स नः पतिभ्यो जायां दा अग्ने प्रजया सह ॥१॥  
 पुनः पत्नीमग्निरदादायुषा सह वर्चसा ।  
 दीर्घायुरस्या यः पतिर्जीवाति शरदः शतम् ॥२॥  
 सोमस्य जाया प्रथमं गन्धर्वस्तेऽपरः पतिः ।  
 तृतीयो अग्निष्टे पतिस्तुरीयस्ते मनुष्यजाः ॥३॥  
 सोमो ददद्गन्धर्वाय गन्धर्वो दददग्नये ।  
 रयिं च पुत्रांस्चादादग्निर्मह्यमथो इमाम् ॥४॥  
 आ वामगन्त्सुमतिर्वाजिनीवसू न्यश्विना हृत्सु कामा अरंसत ।  
 अभूतं गोपा मिथुना शुभस्पती प्रिया अर्यम्णो दुर्यामशीमहि ॥५॥  
 सा मन्दसाना मनसा शिवेन रयिं धेहि सर्ववीरं वचस्यम् ।  
 सुगं तीर्थं सुप्रपाणं शुभस्पती स्थाणुं पथिष्ठामप दुर्मतिं हतम् ॥६॥  
 या ओषधयो या नद्यो यानि क्षेत्राणि या वना ।  
 तास्त्वा वधु प्रजावतीं पत्ये रक्षन्तु रक्षसः ॥७॥  
 एमं पन्थामरुक्षाम सुगं स्वस्तिवाहनम् ।  
 यस्मिन् वीरो न रिष्यत्यन्येषां विन्दते वसु ॥८॥  
 इदं सु मे नरः शृणुत ययाशिषा दंपती वाममश्रुतः ।  
 ये गन्धर्वा अप्सरसश्च देवीरेषु वानस्पत्येषु येऽधि तस्थुः ।  
 स्योनास्ते अस्यै वध्वै भवन्तु मा हिंसिषुर्वहतुमुह्यमानम् ॥९॥

ये वध्वश्चन्द्रं वहतुं यक्ष्मा यन्ति जनामनु ।  
पुनस्तान् यज्ञिया देवा नयन्तु यत आगताः ॥१०॥ {७}  
मा विदन् परिपन्थिनो य आसीदन्ति दंपती ।  
सुगेन दुर्गमतीतामप द्रान्त्वरातयः ॥११॥  
सं काशयामि वहतुं ब्रह्मणा गृहैरघोरेण चक्षुषा मित्रियेण ।  
पर्याणद्धं विश्वरूपं यदस्ति स्योनं पतिभ्यः सविता तत्कृणोतु ॥१२॥  
शिवा नारीयमस्तमागन् इमं धाता लोकमस्यै दिदेश ।  
तामर्यमा भगो अश्विनोभा प्रजापतिः प्रजया वर्धयन्तु ॥१३॥  
आत्मन्वत्युर्वरा नारीयमागन् तस्यां नरो वपत बीजमस्याम् ।  
सा वः प्रजां जनयद्दक्षणाभ्यो बिभ्रती दुग्धमृषभस्य रेतः ॥१४॥  
प्रति तिष्ठ विराडसि विष्णुरिवेह सरस्वति ।  
सिनीवालि प्र जायतां भगस्य सुमतावसत् ॥१५॥  
उद्ध ऊर्मिः शम्या हन्त्वापो योक्त्राणि मुञ्चत ।  
मादुष्कृतौ व्येनसावघ्न्यावशुनमारताम् ॥१६॥  
अघोरचक्षुरपतिघ्नी स्योना शम्या सुशेवा सुयमा गृहेभ्यः ।  
वीरसूर्देवकामा सं त्वयैधिषीमहि सुमस्यमाना ॥१७॥  
अदेवघ्न्यपतिघ्नीहैधि शिवा पशुभ्यः सुयमा सुवर्चाः ।  
प्रजावती वीरसूर्देवकामा स्योनेममग्निं गार्हपत्यं सपर्य ॥१८॥  
उत्तिष्ठेते किमिच्छन्तीदमागा अहं त्वेडे अभिभूः स्वाद्गृहात् ।  
शून्यैषी निर्ऋते याजगन्धोत्तिष्ठाराते प्र पत मेह रंस्थाः ॥१९॥  
यदा गार्हपत्यमसपर्यैत्पूर्वमग्निं वधूरियम् ।  
अधा सरस्वत्यै नारि पितृभ्यश्च नमस्कुरु ॥२०॥ {८}  
शर्म वमैतदा हरास्यै नार्या उपस्तिरे ।  
सिनीवालि प्र जायतां भगस्य सुमतावसत् ॥२१॥  
यं बल्बजं न्यस्यथ चर्म चोपस्तुणीथन ।  
तदा रोहतु सुप्रजा या कन्या विन्दते पतिम् ॥२२॥  
उप स्तुणीहि बल्बजमधि चर्मणि रोहिते ।  
तत्रोपविश्य सुप्रजा इममग्निं सपर्यतु ॥२३॥  
आ रोह चर्मोप सीदाग्निमेष देवो हन्ति रक्षांसि सर्वा ।  
इह प्रजां जनय पत्ये अस्मै सुज्यैष्ठ्यो भवत्युत्रस्त एषः ॥२४॥  
वि तिष्ठन्तां मातुरस्या उपस्थान् नानारूपाः पशवो जायमानाः ।  
सुमङ्गल्युप सीदेममग्निं संपत्नीं प्रति भूषेह देवान् ॥२५॥  
सुमङ्गली प्रतरणी गृहाणां सुशेवा पत्ये श्वशुराय शंभूः ।  
स्योना श्वश्रुवै प्र गृहान् विशेमान् ॥२६॥  
स्योना भव श्वशुरेभ्यः स्योना पत्ये गृहेभ्यः ।  
स्योनास्यै सर्वस्यै विशे स्योना पुष्टयैषां भव ॥२७॥  
सुमङ्गलीरियं वधूरिमां समेत पश्यत ।  
सौभाग्यमस्यै दत्त्वा दौर्भाग्यैर्विपरेतन ॥२८॥  
या दुर्हादो युवतयो याश्चेह जरतीरपि ।  
वर्चो न्वस्यै सं दत्ताथास्तं विपरेतन ॥२९॥  
रुक्मप्रस्तरणं वहां विश्वा रूपाणि बिभ्रतम् ।  
आरोहत्सूर्या सावित्री बृहते सौभाग्याय कम् ॥३०॥ {९}  
आ रोह तल्पं सुमनस्यमानेह प्रजां जनय पत्ये अस्मै ।  
इन्द्राणीव सुबुधा बुध्यमाना ज्योतिरग्रा उषसः प्रति जागरासि ॥३१॥  
देवा अग्रे न्यपद्यन्त पत्नीः समस्पृशन्त तन्वस्तनूभिः ।  
सूर्येव नारि विश्वरूपा महित्वा प्रजावती पत्या सं भवेह ॥३२॥  
उत्तिष्ठेतो विश्वावसो नमसेडामहे त्वा ।  
जामिमिच्छ पितृषदं न्यक्तां स ते भागो जनुषा तस्य विद्धि ॥३३॥  
अप्सरसः सधमादं मदन्ति हविर्धानमन्तरा सूर्यं च ।  
तास्ते जनित्रमभि ताः परेहि नमस्ते गन्धर्वतुना कृणोमि ॥३४॥  
नमो गन्धर्वस्य नमसे नमो भामाय चक्षुषे च कृष्णः ।  
विश्ववसो ब्रह्मणा ते नमोऽभि जाया अप्सरसः परेहि ॥३५॥  
राया वयं सुमनसः स्यामोदितो गन्धर्वमावीवृताम् ।  
अगन्त्स देवः परमं सधस्थमगन्म यत्र प्रतिरन्त आयुः ॥३६॥  
सं पितरावृत्तिये सृजेथां माता पिता च रेतसो भवाथः ।  
मर्य इव योषामधि रोहयैनां प्रजां कृण्वाथामिह पुष्यतं रयिम् ॥३७॥  
तां पूषं छिवतमामेरयस्व यस्यां बीजं मनुष्या वपन्ति ।  
या न ऊरू उशती विश्रयाति यस्यामुशन्तः प्रहरेम शेषः ॥३८॥  
आ रोहीरुमुप धत्स्व हस्तं परि ष्वजस्व जायां सुमनस्यमानः ।  
प्रजां कृण्वाथामिह मोदमानौ दीर्घं वामायुः सविता कृणोतु ॥३९॥  
आ वां प्रजां जनयतु प्रजापतिरहोरात्राभ्यां समनक्त्वर्थमा ।  
अदुर्मङ्गली पतिलोकमा विशेमं शं नो भव द्विपदे शं चतुष्पदे ॥४०॥ {१०}  
देवैर्दत्तं मनुना साकमेतद्वाधुयं वासो वध्वश्च वस्त्रम् ।  
यो ब्रह्मणे चिकितुषे ददाति स इद्रक्षांसि तल्पानि हन्ति ॥४१॥



यं मे दत्तो ब्रह्मभागं वधुयोर्वाधुयं वासो वध्वश्च वस्त्रम् ।  
 युवं ब्रह्मणेऽनुमन्यमानौ बृहस्पते साकमिन्द्रश्च दत्तम् ॥४२॥  
 स्योनाद्योनेरधि बध्यमानौ हसामुदौ महसा मोदमानौ ।  
 सुगू सुपुत्रौ सुगृहौ तराथो जीवावुषसो विभातीः ॥४३॥  
 नवं वसानः सुरभिः सुवासा उदागां जीव उषसो विभातीः ।  
 आपण्डात्पतत्रीवामुक्षि विश्वस्मादेनसस्परि ॥४४॥  
 शुम्भनी द्यावापृथिवी अन्तिसुम्ने महिब्रते ।  
 आपः सप्त सुस्रुवुर्देवीस्ता नो मुञ्चन्त्वंहसः ॥४५॥  
 सूर्यायै देवेभ्यो मित्राय वरुणाय च ।  
 ये भूतस्य प्रचेतसस्तेभ्य इदमकरं नमः ॥४६॥  
 य ऋते चिदभिश्चिषः पुरा जत्रुभ्य आतुदः ।  
 संधाता संधिं मघवा पुरूवसुर्निष्कर्ता विहृतं पुनः ॥४७॥  
 अपास्मत्तम उच्छतु नीलं पिशङ्गमुत लोहितं यत् ।  
 निर्दहनी या पृषातक्यस्मिन् तां स्थाणावध्या सजामि ॥४८॥  
 यावतीः कृत्या उपवासने यावन्तो राज्ञो वरुणस्य पाशाः ।  
 व्यृद्धयो या असमृद्धयो या अस्मिन् ता स्थाणावधि सादयामि ॥४९॥  
 या मे प्रियतमा तनूः सा मे बिभाय वाससः ।  
 तस्याग्रे त्वं वनस्पते नीविं कृणुष्व मा वयं रिषाम ॥५०॥ {११}  
 ये अन्ता यावतीः सिचो य औतवो ये च तन्त्ववः ।  
 वासो यत्पत्नीभिरुतं तन् न स्योनमुप स्पृशात् ॥५१॥  
 उशतीः कन्यला इमाः पितृलोकात्पति यतीः ।  
 अव दीक्षामसृक्षत स्वाहा ॥५२॥  
 बृहस्पतिनावसृष्टां विश्वे देवा अधारयन् ।  
 वर्चो गोषु प्रविष्टं यत्तेनेमां सं सृजामसि ॥५३॥  
 बृहस्पतिनावसृष्टां विश्वे देवा अधारयन् ।  
 तैजो गोषु प्रविष्टं यत्तेनेमां सं सृजामसि ॥५४॥  
 बृहस्पतिनावसृष्टां विश्वे देवा अधारयन् ।  
 भजो गोषु प्रविष्टो यस्तेनेमां सं सृजामसि ॥५५॥  
 बृहस्पतिनावसृष्टां विश्वे देवा अधारयन् ।  
 यशो गोषु प्रविष्टं यत्तेनेमां सं सृजामसि ॥५६॥  
 बृहस्पतिनावसृष्टां विश्वे देवा अधारयन् ।  
 पयो गोषु प्रविष्टं यत्तेनेमां सं सृजामसि ॥५७॥  
 बृहस्पतिनावसृष्टां विश्वे देवा अधारयन् ।  
 रसो गोषु प्रविष्टो यस्तेनेमां सं सृजामसि ॥५८॥  
 यदीमे केशिनो जना गृहे ते समनर्तिषू रोदेन कृण्वन्तोऽघम् ।  
 अग्निष्ट्वा तस्मादेनसः सविता च प्र मुञ्चताम् ॥५९॥  
 यदीयं दुहिता तव विकेश्यरुदद्गृहे रोदेन कृण्वत्यघम् ।  
 अग्निष्ट्वा तस्मादेनसः सविता च प्र मुञ्चताम् ॥६०॥ {१२}  
 यज्जामयो यद्युवतयो गृहे ते समनर्तिषू रोदेन कृण्वतीरघम् ।  
 अग्निष्ट्वा तस्मादेनसः सविता च प्र मुञ्चताम् ॥६१॥  
 यत्ते प्रजायां पशुषु यद्वा गृहेषु निष्ठितमघकृद्भिरघं कृतम् ।  
 अग्निष्ट्वा तस्मादेनसः सविता च प्र मुञ्चताम् ॥६२॥  
 इयं नार्युप ब्रूते पूत्यान्यावपन्तिका ।  
 दीर्घायुरस्तु मे पतिर्जीवाति शरदः शतम् ॥६३॥  
 इहेमाविन्द्र सं नुद चक्रवाकेव दंपती ।  
 प्रजयैनौ स्वस्तकौ विश्वमायुर्व्यश्रुताम् ॥६४॥  
 यदासन्ध्यामुपधाने यद्दोपवासने कृतम् ।  
 विवाहे कृत्यां यां चक्रुरास्नाने तां नि दध्मसि ॥६५॥  
 यद्दुष्कृतं यच्छमलं विवाहे वहतौ च यत् ।  
 तत्संभलस्य कम्बले मृज्महे दुरितं वयम् ॥६६॥  
 संभले मलं सादयित्वा कम्बले दुरितं वयम् ।  
 अभूम यज्ञियाः शुद्धाः प्र ण आयूंषि तारिषत् ॥६७॥  
 कृत्रिमः कण्टकः शतदन् य एषः ।  
 अपास्याः केश्यं मलमप शीर्षण्यं लिखात् ॥६८॥  
 अङ्गादङ्गाद्वयमस्या अप यक्ष्मं नि दध्मसि ।  
 तन् मा प्रापत्पृथिवीं मोत देवान् दिवं मा प्रापदुर्वन्तरिक्षम् ।  
 अपो मा प्रापन् मलमेतदग्ने यमं मा प्रापत्पितृंश्च सर्वांन् ॥६९॥  
 सं त्वा नह्यामि पयसा पृथिव्याः सं त्वा नह्यामि पयसौषधीनाम् ।  
 सं त्वा नह्यामि प्रजया धनेन सा संनद्धा सनुहि वाजमेमम् ॥७०॥ {१३}  
 अमोऽहमस्मि सा त्वं सामाहमस्पृक्त्वं द्यौरहं पृथिवी त्वम् ।  
 ताविह सं भवाव प्रजामा जनयावहै ॥७१॥  
 जनियन्ति नावग्रवः पुत्रियन्ति सुदानवः ।  
 अरिष्टासू सचेवहि बृहते वाजसातये ॥७२॥  
 ये पितरो वधूदर्शा इमं वहतुमागमन् ।

ते अस्यै वध्वै संपत्त्यै प्रजावच्छर्म यच्छन्तु ॥७३॥  
येदं पूर्वागन् रशनायमाना प्रजामस्यै द्रविणं चेह दत्त्वा ।  
तां वहन्त्वगतस्यानु पन्थां विराडियं सुप्रजा अत्यजैषीत् ॥७४॥  
प्र बुध्यस्व सुबुधा बुध्यमाना दीर्घायुत्वाय शतशारदाय ।  
गृहान् गच्छ गृहपत्नी यथासौ दीर्घं त आयुः सविता कृणोतु ॥७५॥ {१४}

15.1

ब्रात्य आसीदीयमान एव स प्रजापतिं समैरयत् ॥१॥  
स प्रजापतिः सुवर्णमात्मन् अपश्यत्तत्प्राजनयत् ॥२॥  
तदेकमभवत्तल्लाममभवत्तन् महदभवत्तज्ज्येष्ठमभवत्तद्ब्रह्माभवत्तत्तपोऽभवत्तत्सत्यमभवत् तेन प्राजायत ॥  
सोऽवर्धत स महान् अभवत्स महादेवोऽभवत् ॥४॥  
स देवानामीशां पर्यैत्स ईशानोऽभवत् ॥५॥  
स एकब्रात्योऽभवत्स धनुरादत्त तदेवेन्द्रधनुः ॥६॥  
नीलमस्योदरं लोहितं पुष्टम् ॥७॥  
नीलेनैवाप्रियं भ्रातृव्यं प्रीणोति लोहितेन द्विषन्तं विध्यतीति ब्रह्मवादिनो वदन्ति ॥  
चादित्येभ्यश्च विश्वेभ्यश्च देवेभ्य आ वृश्चते य एवं  
बृहतश्च वै स रथन्तरस्य

15,2

स उदतिष्ठत्स प्राचीं दिशमनु व्यचलत् । [१]  
तं बृहच्च रथन्तरं चादित्याश्च विश्वे च देवा अनुव्यचलन् । [२]  
बृहते च वै स रथन्तराय चादित्येभ्यश् च विश्वेभ्यश् च देवेभ्य आ वृश्चते य एवं विद्वांसं ब्रात्यम् उपवदति । [३]  
बृहतश् च वै स रथन्तरस्य चादित्यानां च विश्वेषां च देवानां प्रियं धाम भवति य एवं वेद । [४]  
तस्य प्राच्यां दिशि श्रद्धा पुंश्रुली मित्रो मागधो विज्ञानं वासोऽहरुष्णीषं रात्री केशा हरितौ प्रवर्तौ कल्मलिर्मणिः । [५]  
भूतं च भविष्यच्च परिष्कन्दौ मनो विपथं मातरिश्वा च पवमानश्च विपथवाहौ वातः सारथी रेष्मा प्रतोदः कीर्तिश् च यशश् च पुरःसरौ ॥  
एनं कीर्तिर्गच्छत्या यशो गच्छति य एवं वेद ॥१॥ [८]  
स उदतिष्ठत्स दक्षिणां दिशमनु व्यचलत् । [९]  
तं यज्ञायज्ञियं च वामदेव्यं च यज्ञश्च यजमानश्च पशवश्चानुव्यचलन् । [१०]  
यज्ञायज्ञियाय च वै स वामदेव्याय च यज्ञाय च यजमानाय च पशुभ्यश्चा वृश्चते य एवं विद्वांसं ब्रात्यम् उपवदति  
यज्ञायज्ञियस्य च वै स वामदेव्यस्य च यज्ञस्य च यजमानस्य च पशूनां च प्रियं धाम भवति य एवं वेद  
तस्य दक्षिणायां दिशुषाः पुंश्रुली मन्त्रो मागधो विज्ञानं वासोऽहरुष्णीषं रात्री केशा हरितौ प्रवर्तौ कल्मलिर् मणिः  
अमावास्या च पौर्णमासी च परिष्कन्दौ मनो विपथं ॥  
मातरिश्वा च पवमानश्च विपथवाहौ वातः सारथी रेष्मा प्रतोदः ॥  
कीर्तिश्च यशश्च पुरःसरौ वैनं कीर्तिर्गच्छत्या यशो गच्छति य एवं वेद ॥२॥ [१४]  
स उदतिष्ठत्स प्रतीचीं दिशमनु व्यचलत् । [१५]  
तं वैरूपं च वैराजं चापश्च वरुणश्च राजानुव्यचलन् । [१६]  
वैरूपाय च वै स वैराज्यं चाद्भ्यश्च वरुणाय च राज्ञ आ वृश्चते य एवं विद्वांसं ब्रात्यमुपवदति ॥  
वैरूपस्य च वै स वैराजस्य चापां च वरुणस्य च राज्ञः प्रियं धाम भवति य एवं वेद । [१८]  
तस्य प्रतीच्यां दिशीरा पुंश्रुली हसो मागधो विज्ञानं वासोऽहरुष्णीषं रात्री केशा हरितौ प्रवर्तौ कल्मलिर्मणिः । [१९]  
अहश्च रात्री च परिष्कन्दौ मनो विपथं मातरिश्वा च पवमानश्च विपथवाहौ वातः सारथी रेष्मा प्रतोदः कीर्तिश्च यशश्च पुरःसरौ ।  
एनं कीर्तिर्गच्छत्या यशो गच्छति य एवं वेद ॥३॥ [२०]  
स उदतिष्ठत्स उदीचीं दिशमनु व्यचलत् । [२१]  
तं श्यैतं च नौधसं च सप्तर्षयश्च सोमश्च राजानुव्यचलन् । [२२]  
श्यैताय च वै स नौधसाय च सप्तर्षिभ्यश्च सोमाय च राज्ञ आ वृश्चते य एवं विद्वांसं ब्रात्यमुपवदति ॥  
श्यैतस्य च वै स नौधसस्य च सप्तर्षीणां च सोमस्य च राज्ञः प्रियं धाम भवति भवति य एवं वेद । [२४]  
तस्योदीच्यां दिशि विद्युत्पुंश्रुली स्तनयित्नुर्मागधो विज्ञानं वासोऽहरुष्णीषं  
श्रुतं च विश्रुतं च परिष्कन्दौ मनो विपथं मातरिश्वा च पवमानश्च विपथवाहौ वातः सारथी रेष्मा प्रतोदः कीर्तिश्च यशश्च पुरःसरौ ।  
[२६२७]  
एनं कीर्तिर्गच्छत्या यशो गच्छति य एवं वेद ॥४॥ [२८]

15.3

स संवत्सरमूर्ध्वोऽतिष्ठत्तं देवा अब्रुवन् ब्रात्य किं नु तिष्ठसीति ॥१॥  
सोऽब्रवीदासन्दीं मे सं भरन्त्विति ॥२॥  
तस्मै ब्रात्यायासन्दीं समभरन् ॥३॥  
तस्या ग्रीष्मश्च वसन्तश्च द्वौ पादावास्तां शरच्च वर्षाश्च द्वौ ॥४॥  
बृहच्च रथन्तरं चानूच्ये आस्तां यज्ञायज्ञियं च वामदेव्यं च तिरश्च्ये ॥५॥  
ऋचः प्राञ्चस्तन्तवो यजुषि तिर्यञ्चः ॥६॥  
वेद आस्तरणं ब्रह्मोपबर्हणम् ॥७॥  
सामासाद उद्गीथोऽपश्रयः ॥८॥  
तामासन्दीं ब्रात्य आरोहत् ॥९॥

तस्य देवजनाः परिष्कन्दा आसन्त्संकल्पाः प्रहाय्या विश्वानि भूतान्युपसदः ॥१०॥  
विश्वान्येवास्य भूतान्युपसदो भवन्ति य एवं वेद ॥११॥

15.4

तस्मै प्राच्या दिशः । [१]  
वासन्तौ मासौ गोप्तारावकुर्वन् बृहच्च रथन्तरं चानुष्ठातारौ । [२]  
वासन्तावेनं मासौ प्राच्या दिशो गोपायतो बृहच्च रथन्तरं चानु तिष्ठतो य एवं वेद॥  
तस्मै दक्षिणाया दिशः । [४]  
गैष्मौ मासौ गोप्तारावकुर्वन् यज्ञायज्ञियं च वामदेव्यं चानुष्ठातारौ ।  
गैष्मावेनं मासौ दक्षिणाया दिशो गोपायतो यज्ञायज्ञियं च वामदेव्यं चानु तिष्ठतो य एवं वेद॥  
तस्मै प्रतीच्या दिशः । [७]  
वार्षिकौ मासौ गोप्तारावकुर्वन् वैरूपं च वैराजं चानुष्ठातारौ । [८]  
वार्षिकावेनं मासौ प्रतीच्या दिशो गोपायतो वैरूपं च वैराजं चानु तिष्ठतो य एवं वेद॥  
तस्मा उदीच्या दिशः । [१०]  
शारदौ मासौ गोप्तारावकुर्वन् छ्यैतं च नौधसं चानुष्ठातारौ । [११]  
शारदावेनं मासावुदीच्या दिशो गोपायतः श्यैतं च नौधसं चानु तिष्ठतो य एवं वेद॥  
तस्मै ध्रुवाया दिशः । [१३]  
हैमनौ मासौ गोप्तारावकुर्वन् भूमिं चाग्निं चानुष्ठातारौ । [१४]  
हैमनावेनं मासौ ध्रुवाया दिशो गोपायतो भूमिश्चाग्निश्चानु तिष्ठतो य एवं वेद॥  
तस्मा ऊर्ध्वाया दिशः । [१६]  
शैशिरौ मासौ गोप्तारावकुर्वन् दिवं चादित्यं चानुष्ठातारौ । [१७]  
शैशिरावेनं मासावूर्ध्वाया दिशो गोपायतो द्यौश्चादित्यश्चानु तिष्ठतो य एवं वेद॥

15.5

तस्मै प्राच्या दिशो अन्तर्देशाद्भवमिष्वासमनुष्ठातारमकुर्वन् । [१]  
भव एनमिष्वासः प्राच्या दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मै दक्षिणाया दिशो अन्तर्देशाच्छर्वमिष्वासमनुष्ठातारमकुर्वन् । [४]  
शर्व एनमिष्वासो दक्षिणाया दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मै प्रतीच्या दिशो अन्तर्देशात्पशुपतिमिष्वासमनुष्ठातारमकुर्वन् । [६]  
पशुपतिरेनमिष्वासः प्रतीच्या दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मा उदीच्या दिशो अन्तर्देशादुग्रं देवमिष्वासमनुष्ठातारमकुर्वन् । [८]  
उग्र एनं देव इष्वास उदीच्या दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मै ध्रुवाया दिशो अन्तर्देशाद्भवमिष्वासमनुष्ठातारमकुर्वन् । [१०]  
रुद्र एनमिष्वासो ध्रुवाया दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मा ऊर्ध्वाया दिशो अन्तर्देशान् महादेवमिष्वासमनुष्ठातारमकुर्वन् । [१२]  
महादेव एनमिष्वास ऊर्ध्वाया दिशो अन्तर्देशादनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥  
तस्मै सर्वेभ्यो अन्तर्देशेभ्य ईशानमिष्वासमनुष्ठातारमकुर्वन् । [१४]  
ईशान एनमिष्वासः सर्वेभ्यो अन्तर्देशेभ्योऽनुष्ठातानु तिष्ठति नैनं शर्वो न भवो नेशानः॥  
नास्य पशून् न समानान् हिनस्ति य एवं वेद॥

15.6

स ध्रुवां दिशमनु व्यचलत् । [१]  
तं भूमिश्चाग्निश्चौषधयश्च वनस्पतयश्च वानस्पत्याश्च वीरुधश्चानुव्यचलन् ।  
भूमेश्च वै सोऽग्नेश्चौषधीनां च वनस्पतीनां च वानस्पत्यानां च वीरुधां च प्रियं धाम भवति य एवं वेद  
स ऊर्ध्वा दिशमनु व्यचलत् । [४]  
तमृतं च सत्यं च सूर्यश्च चन्द्रश्च नक्षत्राणि चानुव्यचलन् । [५]  
ऋतस्य च वै स सत्यस्य च सूर्यस्य च चन्द्रस्य च नक्षत्राणां च प्रियं धाम भवति य एवं वेद  
स उत्तमां दिशमनु व्यचलत् । [७]  
तमृचश्च सामानि च यजुषि च ब्रह्म चानुव्यचलन् । [८]  
ऋचां च वै स साम्नां च यजुषां च ब्रह्मणश्च प्रियं धाम भवति य एवं वेद ॥३॥  
स बृहतीं दिशमनु व्यचलत् । [१०]  
तमितिहासश्च पुराणं च गाथाश्च नाराशंसीश्चानुव्यचलन् । [११]  
इतिहासस्य च वै स पुराणस्य च गाथानां च नाराशंसीनां च प्रियं धाम भवति य एवं वेद॥  
स परमां दिशमनु व्यचलत् । [१३]  
तमाहवनीयश्च गार्हपत्यश्च दक्षिणाग्निश्च यज्ञश्च यजमानश्च पशवश्चानुव्यचलन्॥  
आहवनीयस्य च वै स गार्हपत्यस्य च दक्षिणाग्नेश्च यज्ञस्य च यजमानस्य च पशूनां च प्रियं धाम भवति य एवं वेद  
सोऽनादिष्टां दिशमनु व्यचलत् । [१६]  
तमृतवश्वार्तवाश्च लोकाश्च लौक्याश्च मासाश्चार्धमासाश्चाहोरात्रे चानुव्यचलन्॥

ऋतूनां च वै स आर्तवानां च लोकानां च लौक्यानां च मासानां चार्धमासानां चाहोरात्रयोश्च प्रियं धाम भवति य एवं वेद  
सोऽनावृत्तां दिशमनु व्यचलत्ततो नावत्स्यन् अमन्यत । [१९]  
तं दितिश्चादितिश्चेडा चेन्द्राणी चानुव्यचलन् । [२०]  
दितेश्च वै सोऽदितेश्चेडायाश्चेन्द्राण्याश्च प्रियं धाम भवति य एवं वेद  
स दिशोऽनु व्यचलत्तं विराडनु व्यचलत्सर्वे च देवाः सर्वाश्च देवताः । [२२]  
विराजश्च वै स सर्वेषां च देवानां सर्वासां च देवतानां प्रियं धाम भवति य एवं वेद॥  
स सर्वान् अन्तर्देशान् अनु व्यचलत् । [२४]  
तं प्रजापतिश्च परमेष्ठी च पिता च पितामहश्चानुव्यचलन् । [२५]  
प्रजापतेश्च वै स परमेष्ठिनश्च पितुश्च पितामहस्य च प्रियं धाम भवति य एवं वेद॥

15.7

स महिमा सद्भूत्वान्तं पृथिव्या अगच्छत्समुद्रोऽभवत्॥१॥  
तं प्रजापतिश्च परमेष्ठी च पिता च पितामहश्चापश्च श्रद्धा च वर्षं भूत्वानुव्यवर्तयन्त ॥२॥  
ऐनमापो गच्छन्त्यैनं श्रद्धा गच्छत्यैनं वर्षं गच्छति य एवं वेद ॥३॥  
तं श्रद्धा च यज्ञश्च लोकश्चान्नं चान्नाद्यं च भूत्वाभिपर्यावर्तन्त ॥४॥  
ऐनं श्रद्धा गच्छत्यैनं यज्ञो गच्छत्यैनं लोको गच्छत्यैनमन्नं गच्छत्यैनमन्नाद्यं गच्छति य एवं वेद॥

15.8

सोऽरज्यत ततो राजन्योऽजायत ॥१॥  
स विशः सबन्धुन् अन्नमन्नाद्यमभ्युदतिष्ठत्॥२॥  
विशां च वै स सबन्धूनां चान्नस्य चान्नाद्यस्य च प्रियं धाम भवति य एवं वेद ॥३॥

15.9

स विशोऽनु व्यचलत्॥१॥  
तं सभा च समितिश्च सेना च सुरा चानुव्यचलन् ॥२॥  
सभायाश्च वै स समितेश्च सेनायाश्च सुरायाश्च प्रियं धाम भवति य एवं वेद ॥३॥

15.10

तद्यस्यैवं विद्वान् व्रात्यो राज्ञोऽतिथिर्गृहान् आगच्छेत्॥१॥  
श्रेयांसमेनमात्मनो मानयेत्तथा क्षत्राय ना वृश्चते तथा राष्ट्राय ना वृश्चते ॥  
अतो वै ब्रह्म च क्षत्रं चोदतिष्ठतां ते अब्रूतां कं प्र विशावेति ॥३॥  
बृहस्पतिमेव ब्रह्म प्रविशत्विन्द्रं क्षत्रं तथा वा इति ॥४॥  
अतो वै बृहस्पतिमेव ब्रह्म प्राविशदिन्द्रं क्षत्रम् ॥५॥  
इयं वा उ पृथिवी बृहस्पतिर्द्यौरिवेन्द्रः ॥६॥  
अयं वा उ अग्निर्ब्रह्मासावादित्यः क्षत्रम् ॥७॥  
ऐनं ब्रह्म गच्छति ब्रह्मवर्चसी भवति ॥८॥  
यः पृथिवीं बृहस्पतिमग्निं ब्रह्म वेद ॥९॥  
ऐनमिन्द्रियं गच्छतीन्द्रियवान् भवति ॥१०॥  
य आदित्यं क्षत्रं दिवमिन्द्रं वेद ॥११॥

15.11

तद्यस्यैवं विद्वान् व्रात्योऽतिथिर्गृहान् आगच्छेत्॥१॥  
स्वयमेनमभ्युदेत्य ब्रूयाद्ब्रात्या क्वावात्सीर्ब्रात्योदकं ब्रात्य तर्पयन्तु ब्रात्य यथा ते प्रियं तथास्तु ब्रात्य यथा ते वशस्तथास्तु ब्रात्य यथा  
ते निकामस्तथास्त्विति ॥२॥  
यदेनमाह ब्रात्य क्वावात्सीरिति पथ एव तेन देवयानान् अव रुन्धे ॥३॥  
यदेनमाह ब्रात्योदकमित्यप एव तेनाव रुन्धे ॥४॥  
यदेनमाह ब्रात्य तर्पयन्त्विति प्राणमेव तेन वर्षीयांसं कुरुते ॥५॥  
यदेनमाह ब्रात्य यथा ते प्रियं तथास्त्विति प्रियमेव तेनाव रुन्धे ॥६॥  
ऐनं प्रियं गच्छति प्रियः प्रियस्य भवति य एवं वेद ॥७॥  
यदेनमाह ब्रात्य यथा ते वशस्तथास्त्विति वशमेव तेनाव रुन्धे ॥८॥  
ऐनं वशो गच्छति वशी वशिनां भवति य एवं वेद ॥९॥  
यदेनमाह ब्रात्य यथा ते निकामस्तथास्त्विति निकाममेव तेनाव रुन्धे ॥१०॥  
ऐनं निकामो गच्छति निकामे निकामस्य भवति य एवं वेद ॥११॥

15.12

तद्यस्यैवं विद्वान् ब्रात्य उद्भूतेष्वग्निष्वधिश्चितेऽग्निहोत्रेऽतिथिर्गृहान् आगच्छेत्॥१॥  
स्वयमेनमभ्युदेत्य ब्रूयाद्ब्रात्याति सृज होष्यामीति ॥२॥  
स चातिसृजेज्जुहुयान् न चातिसृजेन् न जुहुयात्॥३॥  
स य एवं विदुषा ब्रात्येनातिसृष्टो जुहोति ॥४॥  
प्र पितृयाणं पन्थां जानाति प्र देवयानम् ॥५॥  
न देवेष्व्वा वृश्चते हुतमस्य भवति ॥६॥  
पर्यस्यास्मिंल्लोक आयतनं शिष्यते य एवं विदुषा ब्रात्येनातिसृष्टो जुहोति ॥७॥  
अथ य एवं विदुषा ब्रात्येनानतिसृष्टो जुहोति ॥८॥  
न पितृयाणं पन्थां जानाति न देवयानम् ॥९॥

आ देवेषु वृश्चते अहुतमस्य भवति ॥१०॥  
नास्यास्मिल्लोक आयतनं शिष्यते य एवं विदुषा ब्रात्येनानतिसृष्टो जुहोति ॥११॥

15.13

तद्यस्यैवं विद्वान् ब्रात्य एकां रात्रिमतिथिर्गृहे वसति । [१]  
ये पृथिव्यां पुण्या लोकास्तान् एव तेनाव रुन्धे ॥१॥ [२]  
तद्यस्यैवं विद्वान् ब्रात्यो द्वितीयां रात्रिमतिथिर्गृहे वसति । [३]  
येऽन्तरिक्षे पुण्या लोकास्तान् एव तेनाव रुन्धे ॥२॥ [४]  
तद्यस्यैवं विद्वान् ब्रात्यस्तृतीयां रात्रिमतिथिर्गृहे वसति । [५]  
ये दिवि पुण्या लोकास्तान् एव तेनाव रुन्धे ॥३॥ [६]  
तद्यस्यैवं विद्वान् ब्रात्यश्चतुर्थीं रात्रिमतिथिर्गृहे वसति । [७]  
ये पुण्यानां पुण्या लोकास्तान् एव तेनाव रुन्धे ॥४॥ [८]  
तद्यस्यैवं विद्वान् ब्रात्योऽपरिमिता रात्रीरतिथिर्गृहे वसति । [९]  
य एवापरिमिताः पुण्या लोकास्तान् एव तेनाव रुन्धे ॥५॥ [१०]  
अथ यस्याब्रात्यो ब्रात्यब्रुवो नामबिभ्रत्यतिथिर्गृहान् आगच्छेत् ॥६॥ [११]  
कर्षेदेनं न चैनं कर्षेत् ॥७॥ [१२]  
अस्यै देवताया उदकं याचामीमां देवतां वासय इमामिमां देवतां परि वेवेष्मी परि वेविष्यात् ॥८॥  
तस्यामेवास्य तद्देवतायां हुतं भवति य एवं वेद ॥९॥ [१४]

15.14

स यत्प्राचीं दिशमनु व्यचलन् मारुतं शर्धो भूत्वानुव्यचलन् मनोऽन्नादं कृत्वा । [१]  
मनसान्नादेनान्नमत्ति य एवं वेद ॥१॥ [२]  
स यद्दक्षिणां दिशमनु व्यचलदिन्द्रो भूत्वानुव्यचलद्वलमन्नादं कृत्वा । [३]  
बलेनान्नादेनान्नमत्ति य एवं वेद ॥२॥ [४]  
स यत्प्राचीं दिशमनु व्यचलद्वरुणो राजा भूत्वानुव्यचलदपोऽन्नादीः कृत्वा [५]  
अद्विरन्नादीभिरन्नमत्ति य एवं वेद ॥३॥ [६]  
स यदुदीचीं दिशमनु व्यचलत्सोमो राजा भूत्वानुव्यचलत्सप्तर्षिभिर्हुत आहुतिमन्नादीं कृत्वा । [७]  
आहुत्यान्नाद्यान्नमत्ति य एवं वेद ॥४॥ [८]  
स यदध्रुवां दिशमनु व्यचलद्विष्णुर्भूत्वानुव्यचलद्विराजमन्नादीं कृत्वा  
विराजान्नाद्यान्नमत्ति य एवं वेद ॥५॥ [१०]  
स यत्पशून् अनु व्यचलद्वद्रो भूत्वानुव्यचलदोषधीरन्नादीः कृत्वा । [११]  
ओषधीभिरन्नादीभिरन्नमत्ति य एवं वेद ॥६॥ [१२]  
स यत्पितृन् अनु व्यचलद्वमो राजा भूत्वानुव्यचलत्स्वधाकारमन्नादं कृत्वा  
स्वधाकारेणान्नादेनान्नमत्ति य एवं वेद ॥७॥ [१४]  
स यन् मनुष्यान् अनु व्यचलदग्निर्भूत्वानुव्यचलत्स्वाहाकारमन्नादं कृत्वा  
स्वाहाकारेणान्नादेनान्नमत्ति य एवं वेद ॥८॥ [१६]  
स यदूर्ध्वा दिशमनु व्यचलद्वहस्पतिर्भूत्वानुव्यचलद्वषट्कारमन्नादं कृत्वा  
वषट्कारेणान्नादेनान्नमत्ति य एवं वेद ॥९॥ [१८]  
स यद्देवान् अनु व्यचलदीशानो भूत्वानुव्यचलन् मन्युमन्नादं कृत्वा । [१]  
मन्युनान्नादेनान्नमत्ति य एवं वेद ॥१०॥ [२०]  
स यत्प्रजा अनु व्यचलत्प्रजापतिर्भूत्वानुव्यचलत्प्राणमन्नादं कृत्वा ।  
प्राणेनान्नादेनान्नमत्ति य एवं वेद ॥११॥ [२२]  
स यत्सर्वान् अन्तर्देशान् अनु व्यचलत्परमेष्ठी भूत्वानुव्यचलदब्रह्मान्नादं कृत्वा । [२३]  
ब्रह्मणान्नादेनान्नमत्ति य एवं वेद ॥१२॥ [२४]

15.15

तस्य ब्रात्यस्य ॥१॥  
सप्त प्राणाः सप्तापानाः सप्त व्यानाः ॥२॥  
योऽस्य प्रथमः प्राण ऊर्ध्वो नामायं सो अग्निः ॥३॥  
योऽस्य द्वितीयः प्राणः प्रौढो नामासौ स आदित्यः ॥४॥  
योऽस्य तृतीयः प्राणोऽभ्यूढो नामासौ स चन्द्रमाः ॥५॥  
योऽस्य चतुर्थः प्राणो विभूर्नामायं स पवमानः ॥६॥  
योऽस्य पञ्चमः प्राणो योनिर्नाम ता इमा आपः ॥७॥  
योऽस्य षष्ठः प्राणः प्रियो नाम त इमे पशवः ॥८॥  
योऽस्य सप्तमः प्राणोऽपरिमितो नाम ता इमाः प्रजाः ॥९॥

15.16

योऽस्य प्रथमोऽपानः सा पौर्णमासी ॥१॥  
योऽस्य द्वितीयोऽपानः साष्टका ॥२॥  
योऽस्य तृतीयोऽपानः सामावास्या ॥३॥  
योऽस्य चतुर्थोऽपानः सा श्रद्धा ॥४॥  
योऽस्य पञ्चमोऽपानः सा दीक्षा ॥५॥  
योऽस्य षष्ठोऽपानः स यज्ञः ॥६॥  
योऽस्य सप्तमोऽपानस्ता इमा दक्षिणाः ॥७॥

15.17

योऽस्य प्रथमो व्यानः सेयं भूमिः ॥१॥  
योऽस्य द्वितीयो व्यानस्तदन्तरिक्षम् ॥२॥  
योऽस्य तृतीयो व्यानः सा द्यौः ॥३॥  
योऽस्य चतुर्थो व्यानस्तानि नक्षत्राणि ॥४॥  
योऽस्य पञ्चमो व्यानस्त ऋतवः ॥५॥  
योऽस्य षष्ठो व्यानस्त आर्तवाः ॥६॥  
योऽस्य सप्तमो व्यानः स संवत्सरः ॥७॥  
समानमर्थं परि यन्ति देवाः संवत्सरं वा एतदृतवोऽनुपरियन्ति ब्राह्मणं च ॥८॥  
यदादित्यमभिसंविशन्त्यमावास्यां चैव तत्पौर्णमासीं च ॥९॥  
एकं तदेषाममृतत्वमित्याहुतिरेव ॥१०॥

15.18

तस्य ब्राह्मणस्य ॥१॥  
यदस्य दक्षिणमक्षयसौ स आदित्यो यदस्य सव्यमक्षयसौ स चन्द्रमाः ॥२॥  
योऽस्य दक्षिणः कर्णोऽयं सो अग्निर्योऽस्य सव्यः कर्णोऽयं स पवमानः ॥३॥  
अहोरात्रे नासिके दितिश्चादितिश्च शीर्षकपाले संवत्सरः शिरः ॥४॥  
अह्ना प्रत्यङ्ब्राह्मणो रात्र्या प्राङ्मनो ब्राह्मणाय ॥५॥

(15,111अ) ब्राह्मण आसीद् ईयमान एव स प्रजापतिं सम् अइरयत् ॥1॥

(15,112अ) स प्रजापतिः सुवर्णम् आत्मन् अपश्यत् तत् प्राजनयत् ॥2॥

(15,113अ) तद् एकम् अभवत् तत् ललामम् अभवत् तन् महद् अभवत् तज् ज्येष्ठम् अभवत् तद् ब्रह्माभवत् तत् तपो 'भवत् तत् सत्यम् अभवत् तेन प्राजायत ॥3॥

(15,114अ) सो 'वर्धत स महान् अभवत् स महादेवो 'भवत् ॥4॥

(15,115अ) स देवानाम् ईशां पर्य् अइत् स ईशानो 'भवत् ॥5॥

(15,116अ) स एकब्राह्मणो 'भवत् स धनुर् आदत्त तद् एवेन्द्रधनुः ॥6॥

(15,117अ) नीलम् अस्योदरं लोहितं पृष्ठम् ॥7॥

(15,118अ) नीलेनैवाप्रियं भ्रातृव्यं प्रोणोति लोहितेन द्विषन्तं विध्यतीति ब्रह्मवादिनो वदन्ति ॥8॥

(15,211[211]अ) स उद् अतिष्ठत् स प्राचीं दिशम् अनु व्य् अचलत् | [1]

(15,211[212]ब) तं बृहच् च रथन्तरं चादित्याश् च विश्वे च देवा अनुव्यचलन् | [2]

(15,211[213]च्) बृहते च वै स रथन्तराय चादित्येभ्यश् च विश्वेभ्यश् च देवेभ्य आ वृश्चते य एवं विद्वांसं ब्राह्मणम् उपवदति | [3]

(15,211[214]द) बृहतश् च वै स रथन्तरस्य चादित्यानां च विश्वेषां च देवानां प्रियं धाम भवति य एवं वेद | [4]

(15,211[215]ए) तस्य प्राच्यां दिशि श्रद्धा पुंश्रुली मित्रो मागधो विज्ञानं वासो 'हर् उष्णीषं रात्री केशा हरितौ प्रवर्तौ कल्मलिर् मणिः | [5]

(15,211[216-7]फ) भूतं च भविष्यच् च परिष्कन्दौ मनो विपथं मातरिश्वा च पवमानश् च विपथवाहौ वातः सारथी रेष्मा प्रतोदः कीर्तिश् च यशश् च पुरःसरौ | [6-7]

(15,211[218]ग) अइनं कीर्तिर् गच्छत्य् आ यशो गच्छति य एवं वेद ॥1॥ [8]

(15,212[219]अ) स उद् अतिष्ठत् स दक्षिणां दिशम् अनु व्य् अचलत् | [9]

(15,212[2110]ब) तं यज्ञायज्ञियं च वामदेव्यं च यज्ञश् च यजमानश् च पशवश् चानुव्यचलन् | [10]

(15,212[2111]च्) यज्ञायज्ञियाय च वै स वामदेव्याय च यज्ञाय च यजमानाय च पशुभ्यश् चा वृश्चते य एवं विद्वांसं ब्राह्मणम् उपवदति | [11]

(15,212[2112]द) यज्ञायज्ञियस्य च वै स वामदेव्यस्य च यज्ञस्य च यजमानस्य च पशूनां च प्रियं धाम भवति य एवं वेद | [12]

(15,212[2113]ए) तस्य दक्षिणायां दिश्य उषाः पुंश्र्वली मन्त्रो मागधो विज्ञानं वासो 'हर् उष्णीषं रात्री केशा हरितौ प्रवर्तौ कल्मलिर् मणिः | [13]

(15,212[2114]फ) अमावास्या च पौर्णमासी च परिष्कन्दौ मनो विपथं मातरिश्वा च पवमानश् च विपथवाहौ वातः सारथी रेष्मा प्रतोदः कीर्तिश् च यशश् च पुरःसरौ |

(15,212[2114]ग) अइनं कीर्तिर् गच्छत्य् आ यशो गच्छति य एवं वेद ||2|| [14]

(15,213[2115]अ) स उद् अतिष्ठत् स प्रतीचीं दिशम् अनु व्य् अचलत् | [15]

(15,213[2116]ब) तं वैरूपं च वैराजं चापश् च वरुणश् च राजानुव्यचलन् | [16]

(15,213[2117]च्) वैरूपाय च वै स वैराजाय चाद्भ्यश् च वरुणाय च राज्ञ आ वृश्चते य एवं विद्वांसं ब्रात्यम् उपवदति | [17]

(15,213[2118]द) वैरूपस्य च वै स वैराजस्य चापां च वरुणस्य च राज्ञः प्रियं धाम भवति य एवं वेद | [18]

(15,213[2119]ए) तस्य प्रतीच्यां दिशीरा पुंश्र्वली हसो मागधो विज्ञानं वासो 'हर् उष्णीषं रात्री केशा हरितौ प्रवर्तौ कल्मलिर् मणिः | [19]

(15,213[2120]फ) अहश् च रात्री च परिष्कन्दौ मनो विपथं मातरिश्वा च पवमानश् च विपथवाहौ वातः सारथी रेष्मा प्रतोदः कीर्तिश् च यशश् च पुरःसरौ |

(15,213[2120]ग) अइनं कीर्तिर् गच्छत्य् आ यशो गच्छति य एवं वेद ||3|| [20]

(15,214[2121]अ) स उद् अतिष्ठत् स उदीचीं दिशम् अनु व्य् अचलत् | [21]

(15,214[2122]ब) तं श्यैतं च नौधसं च सप्तर्षयश् च सोमश् च राजानुव्यचलन् | [22]

(15,214[2123]च्) श्यैताय च वै स नौधसाय च सप्तर्षिभ्यश् च सोमाय च राज्ञ आ वृश्चते य एवं विद्वांसं ब्रात्यम् उपवदति | [23]

(15,214[2124]द) श्यैतस्य च वै स नौधसस्य च सप्तर्षीणां च सोमस्य च राज्ञः प्रियं धाम भवति य एवं वेद | [24]

(15,214[2125]ए) तस्योदीच्यां दिशि विद्युत् पुंश्र्वली स्तनयित्नुर् मागधो विज्ञानं वासो 'हर् उष्णीषं रात्री केशा हरितौ प्रवर्तौ कल्मलिर् मणिः | [25]

(15,214[2126-27]फ) श्रुतं च विश्रुतं च परिष्कन्दौ मनो विपथं मातरिश्वा च पवमानश् च विपथवाहौ वातः सारथी रेष्मा प्रतोदः कीर्तिश् च यशश् च पुरःसरौ | [26-27]

(15,214[2128]ग) अइनं कीर्तिर् गच्छत्य् आ यशो गच्छति य एवं वेद ||4|| [28]

(15,311अ) स संवत्सरम् ऊर्ध्वो 'तिष्ठत् तं देवा अब्रुवन् ब्रात्य किं नु तिष्ठसीति ||1||

(15,312अ) सो 'ब्रवीद् आसन्दीं मे सं भरन्त्व इति ||2||

(15,313अ) तस्मै ब्रात्यायासन्दीं सम् अभरन् ||3||

(15,314अ) तस्या ग्रीष्मश् च वसन्तश् च द्वौ पादाव् आस्तां शरच् च वर्षाश् च द्वौ ||4||

(15,315अ) बृहच् च रथन्तरं चानूच्ये आस्तां यज्ञायज्ञियं च वामदेव्यं च तिरश्च्ये ||5||

(15,316अ) ऋचः प्राञ्चस् तन्तवो यजूषि तिर्यञ्चः ||6||

(15,317अ) वेद आस्तरणं ब्रह्मोपबर्हणम् ||7||

(15,318अ) सामासाद उद्गीथो 'पश्रयः ||8||

(15,319अ) ताम् आसन्दीं ब्रात्य आरोहत् ||9||

(15,3110अ) तस्य देवजनाः परिष्कन्दा आसन्त् संकल्पाः प्रहाय्या विश्वानि भूतान्य् उपसदः ||10||

(15, 3।11 अ) विश्वान्य् एवास्य भूतान्य् उपसदो भवन्ति य एवं वेद ॥11॥

[3] (15, 4।1[4।1]अ) तस्मै प्राच्या दिशः । [1]  
(15, 4।1[4।2]ब) वासन्तौ मासौ गोप्ताराव् अकुर्वन् बृहच् च रथन्तरं चानुष्ठातारौ । [2]  
(15, 4।1[4।3]च्) वासन्ताव् एनं मासौ प्राच्या दिशो गोपायतो बृहच् च रथन्तरं चानु तिष्ठतो य एवं वेद ॥1॥

2। [6] (15, 4।2[4।4]अ) तस्मै दक्षिणाया दिशः । [4]  
(15, 4।2[4।5]ब) ग्रेष्मौ मासौ गोप्ताराव् अकुर्वन् यज्ञायज्ञियं च वामदेव्यं चानुष्ठातारौ । [5]  
(15, 4।2[4।6]च्) ग्रेष्माव् एनं मासौ दक्षिणाया दिशो गोपायतो यज्ञायज्ञियं च वामदेव्यं चानु तिष्ठतो य एवं वेद ॥

[9] (15, 4।3[4।7]अ) तस्मै प्रतीच्या दिशः । [7]  
(15, 4।3[4।8]ब) वार्षिकौ मासौ गोप्ताराव् अकुर्वन् वैरूपं च वैराजं चानुष्ठातारौ । [8]  
(15, 4।3[4।9]च्) वार्षिकाव् एनं मासौ प्रतीच्या दिशो गोपायतो वैरूपं च वैराजं चानु तिष्ठतो य एवं वेद ॥3॥

[12] (15, 4।4[4।10]अ) तस्मा उदीच्या दिशः । [10]  
(15, 4।4[4।11]ब) शारदौ मासौ गोप्ताराव् अकुर्वन् छत्रैतं च नौधसं चानुष्ठातारौ । [11]  
(15, 4।4[4।12]च्) शारदाव् एनं मासाव् उदीच्या दिशो गोपायतः श्यैतं च नौधसं चानु तिष्ठतो य एवं वेद ॥4॥

[15] (15, 4।5[4।13]अ) तस्मै ध्रुवाया दिशः । [13]  
(15, 4।5[4।14]ब) हैमनौ मासौ गोप्ताराव् अकुर्वन् भूमिं चाग्निं चानुष्ठातारौ । [14]  
(15, 4।5[4।15]च्) हैमनाव् एनं मासौ ध्रुवाया दिशो गोपायतो भूमिश् चाग्निश् चानु तिष्ठतो य एवं वेद ॥5॥

[18] (15, 4।6[4।16]अ) तस्मा ऊर्ध्वाया दिशः । [16]  
(15, 4।6[4।17]ब) शैशिरौ मासौ गोप्ताराव् अकुर्वन् दिवं चादित्यं चानुष्ठातारौ । [17]  
(15, 4।6[4।18]च्) शैशिराव् एनं मासाव् ऊर्ध्वाया दिशो गोपायतो द्यौश् चादित्यश् चानु तिष्ठतो य एवं वेद ॥6॥

(15, 5।1[5।1]अ) तस्मै प्राच्या दिशो अन्तर्देशाद् भवम् इष्वासम् अनुष्ठातारम् अकुर्वन् । [1]  
(15, 5।1[5।2-3]ब) भव एनम् इष्वासः प्राच्या दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥1॥ [2-3]

(15, 5।2[5।4]अ) तस्मै दक्षिणाया दिशो अन्तर्देशाच् छर्वम् इष्वासम् अनुष्ठातारम् अकुर्वन् । [4]  
(15, 5।2[5।5]ब) शर्व एनम् इष्वासो दक्षिणाया दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥2॥ [5]

(15, 5।3[5।6]अ) तस्मै प्रतीच्या दिशो अन्तर्देशात् पशुपतिम् इष्वासम् अनुष्ठातारम् अकुर्वन् । [6]  
(15, 5।3[5।7]ब) पशुपतिर् एनम् इष्वासः प्रतीच्या दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥3॥ [7]

(15, 5।4[5।8]अ) तस्मा उदीच्या दिशो अन्तर्देशाद् उग्रं देवम् इष्वासम् अनुष्ठातारम् अकुर्वन् । [8]  
(15, 5।4[5।9]ब) उग्र एनं देव इष्वास उदीच्या दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥4॥ [9]



(15,515[5110]अ) तस्मै ध्रुवाया दिशो अन्तर्देशाद् रुद्रम् इष्वासम् अनुष्ठातारम् अकुर्वन् । [10]  
(15,515[5111]ब) रुद्र एनम् इष्वासो ध्रुवाया दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥5॥ [11]

(15,516[5112]अ) तस्मा ऊर्ध्वाया दिशो अन्तर्देशान् महादेवम् इष्वासम् अनुष्ठातारम् अकुर्वन् । [12]  
(15,516[5113]ब) महादेव एनम् इष्वास ऊर्ध्वाया दिशो अन्तर्देशाद् अनुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥6॥ [13]

(15,517[5114]अ) तस्मै सर्वेभ्यो अन्तर्देशेभ्य ईशानम् इष्वासम् अनुष्ठातारम् अकुर्वन् । [14]  
(15,517[5115-16]ब) ईशान एनम् इष्वासः सर्वेभ्यो अन्तर्देशेभ्यो 'नुष्ठातानु तिष्ठति नैनं शर्वो न भवो नेशानो नास्य पशून् न समानान् हिनस्ति य एवं वेद ॥7॥ [15-16]

(15,611[611]अ) स ध्रुवां दिशम् अनु व्य् अचलत् । [1]  
(15,611[612]ब) तं भूमिश् चाग्निश् चौषधयश् च वनस्पतयश् च वानस्पत्याश् च वीरुधश् चानुव्यचलन् । [2]  
(15,611[613]च) भूमेश् च वै सो 'ग्नेश् चौषधीनां च वनस्पतीनां च वानस्पत्यानां च वीरुधां च प्रियं धाम भवति य एवं वेद ॥1॥ [3]

(15,612[614]अ) स ऊर्ध्वा दिशम् अनु व्य् अचलत् । [4]  
(15,612[615]ब) तम् ऋतं च सत्यं च सूर्यश् च चन्द्रश् च नक्षत्राणि चानुव्यचलन् । [5]  
(15,612[616]च) ऋतस्य च वै स सत्यस्य च सूर्यस्य च चन्द्रस्य च नक्षत्राणां च प्रियं धाम भवति य एवं वेद ॥ 2॥ [6]

(15,613[617]अ) स उत्तमां दिशम् अनु व्य् अचलत् । [7]  
(15,613[618]ब) तम् ऋचश् च सामानि च यजूषि च ब्रह्म चानुव्यचलन् । [8]  
(15,613[619]च) ऋचां च वै स साम्नां च यजुषां च ब्रह्मणश् च प्रियं धाम भवति य एवं वेद ॥3॥ [9]

(15,614[6110]अ) स बृहतीं दिशम् अनु व्य् अचलत् । [10]  
(15,614[6111]ब) तम् इतिहासश् च पुराणं च गाथाश् च नाराशंसीश् चानुव्यचलन् । [11]  
(15,614[6112]च) इतिहासस्य च वै स पुराणस्य च गाथानां च नाराशंसीनां च प्रियं धाम भवति य एवं वेद ॥ 4॥ [12]

(15,615[6113]अ) स परमां दिशम् अनु व्य् अचलत् । [13]  
(15,615[6114]ब) तम् आहवनीयश् च गार्हपत्यश् च दक्षिणाग्निश् च यज्ञश् च यजमानश् च पशवश् चानुव्यचलन् । [14]  
(15,615[6115]च) आहवनीयस्य च वै स गार्हपत्यस्य च दक्षिणाग्नेश् च यज्ञस्य च यजमानस्य च पशूनां च प्रियं धाम भवति य एवं वेद ॥5॥ [15]

(15,616[6116]अ) सो 'नादिष्टां दिशम् अनु व्य् अचलत् । [16]  
(15,616[6117]ब) तम् ऋतवश् चार्तवाश् च लोकाश् च लौक्याश् च मासाश् चार्धमासाश् चाहोरात्रे चानुव्यचलन् । [17]  
(15,616[6118]च) ऋतूनां च वै स आर्तवानां च लोकानां च लौक्यानां च मासानां चार्धमासानां चाहोरात्रयोश् च प्रियं धाम भवति य एवं वेद ॥6॥ [18]

(15,617[6119]अ) सो 'नावृत्तां दिशम् अनु व्य् अचलत् ततो नावत्स्यन् अमन्यत । [19]  
(15,617[6120]ब) तं दितिश् चादितिश् चेढा चेन्द्राणी चानुव्यचलन् । [20]  
(15,617[6121]च) दितेश् च वै सो 'दितेश् चेढायाश् चेन्द्राण्याश् च प्रियं धाम भवति य एवं वेद ॥7॥ [21]

(15,618[6122]अ) स दिशो 'नु व्य् अचलत् तं विराद् अनु व्य् अचलत् सर्वे च देवाः सर्वाश् च देवताः । [22]  
(15,618[6123]ब) विराजश् च वै स सर्वेषां च देवानां सर्वासां च देवतानां प्रियं धाम भवति य एवं वेद ॥8॥ [23]

(15,619[6124]अ) स सर्वान् अन्तर्देशान् अनु व्य् अचलत् | [24]  
(15,619[6125]ब) तं प्रजापतिश् च परमेष्ठी च पिता च पितामहश् चानुव्यचलन् | [25]  
(15,619[6126]च) प्रजापतेश् च वै स परमेष्ठिनश् च पितुश् च पितामहस्य च प्रियं धाम भवति य एवं वेद ||  
9|| [26]

(15,711अ) स महिमा सद्गूरु भूत्वान्तं पृथिव्या अगच्छत् समुद्रो 'भवत् ||1||

(15,712अ) तं प्रजापतिश् च परमेष्ठी च पिता च पितामहश् चापश् च श्रद्धा च वर्षं भूत्वानुव्यवर्तयन्त ||2||

(15,713अ) अइनम् आपो गच्छन्त्य् अइनं श्रद्धा गच्छत्य् अइनं वर्षं गच्छति य एवं वेद ||3||

(15,714अ) तं श्रद्धा च यज्ञश् च लोकश् चान्नं चान्नाद्यं च भूत्वाभिपर्यावर्तन्त ||4||

(15,715अ) अइनं श्रद्धा गच्छत्य् अइनं यज्ञो गच्छत्य् अइनं लोको गच्छत्य् अइनम् अन्नं गच्छत्य् अइनम् अन्नाद्यं गच्छति य एवं वेद ||5||

(15,811अ) सो 'रज्यत ततो राजन्यो 'जायत ||1||

(15,812अ) स विशः सबन्धून् अन्नम् अन्नाद्यम् अभ्युदतिष्ठत् ||2||

(15,813अ) विशां च वै स सबन्धूनां चान्नस्य चान्नाद्यस्य च प्रियं धाम भवति य एवं वेद ||3||

(15,911अ) स विशो 'नु व्य् अचलत् ||1||

(15,912अ) तं सभा च समितिश् च सेना च सुरा चानुव्यचलन् ||2||

(15,913अ) सभायाश् च वै स समितेश् च सेनायाश् च सुरायाश् च प्रियं धाम भवति य एवं वेद ||3||

(15,1011अ) तद् यस्यैवं विद्वान् व्रात्यो राज्ञो 'तिथिर् गृहान् आगच्छेत् ||1||

(15,1012अ) श्रेयांसम् एनम् आत्मनो मानयेत् तथा क्षत्राय ना वृश्चते तथा राष्ट्राय ना वृश्चते ||2||

(15,1013अ) अतो वै ब्रह्म च क्षत्रं चोद् अतिष्ठतां ते अब्रूतां कं प्र विशावेति ||3||

(15,1014अ) बृहस्पतिम् एव ब्रह्म प्रविशत् इन्द्रं क्षत्रं तथा वा इति ||4||

(15,1015अ) अतो वै बृहस्पतिम् एव ब्रह्म प्राविशद् इन्द्रं क्षत्रम् ||5||

(15,10|6 अ) इयं वा उ पृथिवी बृहस्पतिर् द्यौर एवेन्द्रः ||6||

(15,10|7 अ) अयं वा उ अग्निर् ब्रह्मासाव् आदित्यः क्षत्रम् ||7||

(15,10|8 अ) अइनं ब्रह्म गच्छति ब्रह्मवर्चसी भवति ||8||

(15,10|9 अ) यः पृथिवीं बृहस्पतिम् अग्निं ब्रह्म वेद ||9||

(15,10|10 अ) अइनम् इन्द्रियं गच्छतीन्द्रियवान् भवति ||10||

(15,10|11 अ) य आदित्यं क्षत्रं दिवम् इन्द्रं वेद ||11||

(15,11|1 अ) तद् यस्यैवं विद्वान् व्रात्यो 'तिथिर् गृहान् आगच्छेत् ||1||

(15,11|2 अ) स्वयम् एनम् अभ्युदेत्य ब्रूयाद् व्रात्य क्वावात्सीर् व्रात्योदकं व्रात्य तर्पयन्तु व्रात्य यथा ते प्रियं तथास्तु व्रात्य यथा ते वशस् तथास्तु व्रात्य यथा ते निकामस् तथास्त्व इति ||2||

(15,11|3 अ) यद् एनम् आह व्रात्य क्वावात्सीर् इति पथ एव तेन देवयानान् अव रुन्धे ||3||

(15,11|4 अ) यद् एनम् आह व्रात्योदकम् इत्य् अप एव तेनाव रुन्धे ||4||

(15,11|5 अ) यद् एनम् आह व्रात्य तर्पयन्त्व इति प्राणम् एव तेन वर्षीयांसं कुरुते ||5||

(15,11|6 अ) यद् एनम् आह व्रात्य यथा ते प्रियं तथास्त्व इति प्रियम् एव तेनाव रुन्धे ||6||

(15,11|7 अ) अइनं प्रियं गच्छति प्रियः प्रियस्य भवति य एवं वेद ||7||

(15,11|8 अ) यद् एनम् आह व्रात्य यथा ते वशस् तथास्त्व इति वशम् एव तेनाव रुन्धे ||8||

(15,11|9 अ) अइनं वशो गच्छति वशी वशिनां भवति य एवं वेद ||9||

(15,11|10 अ) यद् एनम् आह व्रात्य यथा ते निकामस् तथास्त्व इति निकामम् एव तेनाव रुन्धे ||10||

(15,11|11 अ) अइनं निकामो गच्छति निकामे निकामस्य भवति य एवं वेद ||11||

(15,12|1 अ) तद् यस्यैवं विद्वान् व्रात्य उद्धृतेष्व् अग्निष्व् अधिश्रिते 'ग्निहोत्रे 'तिथिर् गृहान् आगच्छेत् ||1||

(15,12|2 अ) स्वयम् एनम् अभ्युदेत्य ब्रूयाद् व्रात्याति सृज होष्यामीति ||2||

(15,12|3 अ) स चातिसृजेज् जुहुयान् न चातिसृजेन् न जुहुयात् ||3||

(15,12|4 अ) स य एवं विदुषा ब्रात्येनातिसृष्टो जुहोति ||4||

(15,12|5 अ) प्र पितृयाणं पन्थां जानाति प्र देवयानम् ||5||

(15,12|6 अ) न देवेषु आ वृश्चते हुतम् अस्य भवति ||6||

(15,12|7 अ) पर्य् अस्यास्मिन् लोक आयतनं शिष्यते य एवं विदुषा ब्रात्येनातिसृष्टो जुहोति ||7||

(15,12|8 अ) अथ य एवं विदुषा ब्रात्येनानतिसृष्टो जुहोति ||8||

(15,12|9 अ) न पितृयाणं पन्थां जानाति न देवयानम् ||9||

(15,12|10 अ) आ देवेषु वृश्चते अहुतम् अस्य भवति ||10||

(15,12|11 अ) नास्यास्मिन् लोक आयतनं शिष्यते य एवं विदुषा ब्रात्येनानतिसृष्टो जुहोति ||11||

(15,13|1[13|1]अ) तद् यस्यैवं विद्वान् ब्रात्य एकां रात्रिम् अतिथिर् गृहे वसति | [1]

(15,13|1[13|2]ब) ये पृथिव्यां पुण्या लोकास् तान् एव तेनाव रुन्धे ||1|| [2]

(15,13|2[13|3]अ) तद् यस्यैवं विद्वान् ब्रात्यो द्वितीयां रात्रिम् अतिथिर् गृहे वसति | [3]

(15,13|2[13|4]ब) ये 'न्तरिक्षे पुण्या लोकास् तान् एव तेनाव रुन्धे ||2|| [4]

(15,13|3[13|5]अ) तद् यस्यैवं विद्वान् ब्रात्यस् तृतीयां रात्रिम् अतिथिर् गृहे वसति | [5]

(15,13|3[13|6]ब) ये दिवि पुण्या लोकास् तान् एव तेनाव रुन्धे ||3|| [6]

(15,13|4[13|7]अ) तद् यस्यैवं विद्वान् ब्रात्यश् चतुर्थीं रात्रिम् अतिथिर् गृहे वसति | [7]

(15,13|4[13|8]ब) ये पुण्यानां पुण्या लोकास् तान् एव तेनाव रुन्धे ||4|| [8]

(15,13|5[13|9]अ) तद् यस्यैवं विद्वान् ब्रात्यो 'परिमिता रात्रीर् अतिथिर् गृहे वसति | [9]

(15,13|5[13|10]ब) य एवापरिमिताः पुण्या लोकास् तान् एव तेनाव रुन्धे ||5|| [10]

(15,13|6[13|11]अ) अथ यस्याब्रात्यो ब्रात्यब्रुवो नामभिभ्रत्य् अतिथिर् गृहान् आगच्छेत् ||6|| [11]

(15,13|7[13|12]अ) कर्षेद् एनं न चैनं कर्षेत् ||7|| [12]

(15,13|8[13|13]अ) अस्यै देवताया उदकं याचामीमां देवतां वासय इमाम् इमां देवतां परि वेवेष्मीत्य् एनं परि वेविष्यात् ||8|| [13]

(15,13|9[13|14]अ) तस्याम् एवास्य तद् देवतायां हुतं भवति य एवं वेद ||9|| [14]

(15,14|1[14|1]अ) स यत् प्राचीं दिशम् अनु व्यचलन् मारुतं शर्धो भूत्वानुव्यचलन् मनो 'न्नादं कृत्वा | [1]

(15,14|1[14|2]ब) मनसान्नादेनान्नम् अत्ति य एवं वेद ||1|| [2]

(15,14|2[14|3]अ) स यद् दक्षिणां दिशम् अनु व्यचलद् इन्द्रो भूत्वानुव्यचलद् बलम् अन्नादं कृत्वा | [3]

(15,14|2[14|4]ब) बलेनान्नादेनान्नम् अत्ति य एवं वेद ||2|| [4]

(15,14|3[14|5]अ) स यत् प्रतीचीं दिशम् अनु व्यचलद् वरुणो राजा भूत्वानुव्यचलद् अपो 'न्नादीः कृत्वा | [5]  
(15,14|3[14|6]ब) अद्भिर् अन्नादीभिर् अन्नम् अत्ति य एवं वेद ||3|| [6]

(15,14|4[14|7]अ) स यद् उदीचीं दिशम् अनु व्यचलत् सोमो राजा भूत्वानुव्यचलत् सप्तर्षिभिर् हुत आहुतिम्  
अन्नादीं कृत्वा | [7]

(15,14|4[14|8]ब) आहुत्यान्नाद्यान्नम् अत्ति य एवं वेद ||4|| [8]

(15,14|5[14|9]अ) स यद् ध्रुवां दिशम् अनु व्यचलद् विष्णुर् भूत्वानुव्यचलद् विराजम् अन्नादीं कृत्वा | [9]  
(15,14|5[14|10]ब) विराजान्नाद्यान्नम् अत्ति य एवं वेद ||5|| [10]

(15,14|6[14|11]अ) स यत् पशून् अनु व्यचलद् रुद्रो भूत्वानुव्यचलद् ओषधीर् अन्नादीः कृत्वा | [11]  
(15,14|6[14|12]ब) ओषधीभिर् अन्नादीभिर् अन्नम् अत्ति य एवं वेद ||6|| [12]

(15,14|7[14|13]अ) स यत् पितृन् अनु व्यचलद् यमो राजा भूत्वानुव्यचलत् स्वधाकारम् अन्नादं कृत्वा | [13]  
(15,14|7[14|14]ब) स्वधाकारेणान्नादेनान्नम् अत्ति य एवं वेद ||7|| [14]

(15,14|8[14|15]अ) स यन् मनुष्यान् अनु व्यचलद् अग्निर् भूत्वानुव्यचलत् स्वाहाकारम् अन्नादं कृत्वा | [15]  
(15,14|8[14|16]ब) स्वाहाकारेणान्नादेनान्नम् अत्ति य एवं वेद ||8|| [16]

(15,14|9[14|17]अ) स यद् ऊर्ध्वां दिशम् अनु व्यचलद् बृहस्पतिर् भूत्वानुव्यचलद् वषट्कारम् अन्नादं कृत्वा |  
[17]

(15,14|9[14|18]ब) वषट्कारेणान्नादेनान्नम् अत्ति य एवं वेद ||9|| [18]

(15,14|10[14|19]अ) स यद् देवान् अनु व्यचलद् ईशानो भूत्वानुव्यचलन् मन्युम् अन्नादं कृत्वा | [19]  
(15,14|10[14|20]ब) मन्युनान्नादेनान्नम् अत्ति य एवं वेद ||10|| [20]

(15,14|11[14|21]अ) स यत् प्रजा अनु व्यचलत् प्रजापतिर् भूत्वानुव्यचलत् प्राणम् अन्नादं कृत्वा | [21]  
(15,14|11[14|22]ब) प्राणेनान्नादेनान्नम् अत्ति य एवं वेद ||11|| [22]

(15,14|12[14|23]अ) स यत् सर्वान् अन्तर्देशान् अनु व्यचलत् परमेष्ठी भूत्वानुव्यचलद् ब्रह्मान्नादं कृत्वा | [23]  
(15,14|12[14|24]ब) ब्रह्मणान्नादेनान्नम् अत्ति य एवं वेद ||12|| [24]

(15,15|1 अ) तस्य ब्रात्यस्य ||1||

(15,15|2 अ) सप्त प्राणाः सप्तापानाः सप्त व्यानाः ||2||

(15,15|3 अ) यो 'स्य प्रथमः प्राण ऊर्ध्वो नामायं सो अग्निः ||3||

(15,15|4 अ) यो 'स्य द्वितीयः प्राणः प्रौडो नामासौ स आदित्यः ||4||

(15,15|5 अ) यो 'स्य तृतीयः प्राणो 'भ्यूडो नामासौ स चन्द्रमाः ||5||

(15,15|6 अ) यो 'स्य चतुर्थः प्राणो विभूर् नामायं स पवमानः ||6||

(15,1517 अ) यो 'स्य पञ्चमः प्राणो योनिर् नाम ता इमा आपः ||7||

(15,1518 अ) यो 'स्य षष्ठः प्राणः प्रियो नाम त इमे पशवः ||8||

(15,1519 अ) यो 'स्य सप्तमः प्राणो 'परिमितो नाम ता इमाः प्रजाः ||9||

(15,1611 अ) यो 'स्य प्रथमो 'पानः सा पौर्णमासी ||1||

(15,1612 अ) यो 'स्य द्वितीयो 'पानः साष्टका ||2||

(15,1613 अ) यो 'स्य तृतीयो 'पानः सामावास्या ||3||

(15,1614 अ) यो 'स्य चतुर्थो 'पानः सा श्रद्धा ||4||

(15,1615 अ) यो 'स्य पञ्चमो 'पानः सा दीक्षा ||5||

(15,1616 अ) यो 'स्य षष्ठो 'पानः स यज्ञः ||6||

(15,1617 अ) यो 'स्य सप्तमो 'पानस् ता इमा दक्षिणाः ||7||

(15,1711 अ) यो 'स्य प्रथमो व्यानः सेयं भूमिः ||1||

(15,1712 अ) यो 'स्य द्वितीयो व्यानस् तद् अन्तरिक्षम् ||2||

(15,1713 अ) यो 'स्य तृतीयो व्यानः सा द्यौः ||3||

(15,1714 अ) यो 'स्य चतुर्थो व्यानस् तानि नक्षत्राणि ||4||

(15,1715 अ) यो 'स्य पञ्चमो व्यानस् त ऋतवः ||5||

(15,1716 अ) यो 'स्य षष्ठो व्यानस् त आर्तवाः ||6||

(15,1717 अ) यो 'स्य सप्तमो व्यानः स संवत्सरः ||7||

(15,1718 अ) समानम् अर्थं परि यन्ति देवाः संवत्सरं वा एतद् ऋतवो 'नुपरियन्ति ब्राह्मणं च ||8||

(15,1719 अ) यद् आदित्यम् अभिसंविशन्त्य् अमावास्यां चैव तत् पौर्णमासीं च ||9||

(15,17110 अ) एकं तद् एषाम् अमृतत्वम् इत्य् आहुतिर् एव ||10||

(15,18|1 अ) तस्य ब्रात्यस्य ||1||

(15,18|2 अ) यद् अस्य दक्षिणम् अक्ष्य् असौ स आदित्यो यद् अस्य सव्यम् अक्ष्य् असौ स चन्द्रमाः ||2||

(15,18|3 अ) यो 'स्य दक्षिणः कर्णो 'यं सो अग्निर् यो 'स्य सव्यः कर्णो 'यं स पवमानः ||3||

(15,18|4 अ) अहोरात्रे नासिके दितिश् चादितिश् च शीर्षकपाले संवत्सरः शिरः ||4||

(15,18|5 अ) अह्ना प्रत्यङ् ब्रात्यो रात्र्या प्राङ् नमो ब्रात्याय ||5||

16.1

अतिसृष्टो अपां वृषभोऽतिसृष्टा अग्नयो दिव्याः ॥१॥  
रुजन् परिरुजन् मृणन् प्रमृणन् ॥२॥  
म्रोको मनोहा खनो निदाह आत्मदूषिस्तनूदूषिः ॥३॥  
इदं तमति सृजामि तं माभ्यवनिक्षि ॥४॥  
तेन तमभ्यतिसृजामो योऽस्मान् द्वेष्टि यं वयं द्विष्मः ॥५॥  
अपामग्रमसि समुद्रं वोऽभ्यवसृजामि ॥६॥  
योऽप्स्वग्निरति तं सृजामि म्रोकं खनिं तनूदूषिम् ॥७॥  
यो व आपोऽग्निराविवेश स एष यद्गो घोरं तदेतत् ॥८॥  
इन्द्रस्य व इन्द्रियेणाभि षिञ्चेत् ॥९॥  
अरिप्रा आपो अप रिप्रमस्मत् ॥१०॥  
प्रास्मदेनो वहन्तु प्र दुष्वज्यं वहन्तु ॥११॥  
शिवेन मा चक्षुषा पश्यतापः शिवया तन्वोप स्पृशत त्वचं मे ॥१२॥  
शिवान् अग्नीन् अप्सुषदो हवामहे मयि क्षत्रं वर्च आ धत्त देवीः ॥१३॥

16.2

निर्दुर्मण्य ऊर्जा मधुमती वाक् ॥१॥  
मधुमती स्थ मधुमती वाचमुदेयम् ॥२॥  
उपहृतो मे गोपाः उपहृतो गोपीथः ॥३॥  
सुश्रुतौ कर्णौ भद्रश्रुतौ कर्णौ भद्रं श्लोकं श्रूयासम् ॥४॥  
सुश्रुतिश्च मोपश्रुतिश्च मा हासिष्टां सौपर्णं चक्षुरजस्रं ज्योतिः ॥५॥  
ऋषीणां प्रस्तरोऽसि नमोऽस्तु देवाय प्रस्तराय ॥६॥

16.3

मूर्धाहं रयीणां मूर्धा समानानां भूयासम् ॥१॥  
रुजश्च मा वेनश्च मा हासिष्टां मूर्धा च मा विधर्मा च मा हासिष्टाम् ॥२॥  
उर्वश्च मा चमसश्च मा हासिष्टां धर्ता च मा धरुणश्च मा हासिष्टाम् ॥३॥  
विमोकश्च मार्द्रपविश्च मा हासिष्टामार्द्रदानुश्च मा मातरिश्वा च मा हासिष्टाम् ॥४॥  
बृहस्पतिर्म आत्मा नृमणा नाम हृद्यः ॥५॥  
असंतापं मे हृदयमुर्वी गव्यूतिः समुद्रो अस्मि विधर्मणा ॥६॥

16.4

नाभिरहं रयीणां नाभिः समानानां भूयासम् ॥१॥  
स्वासदसि सूषा अमृतो मर्त्येश्वा ॥२॥  
मा मां प्राणो हासीन् मो अपानोऽवहाय परा गात् ॥३॥  
सूर्यो माह्नः पात्वग्निः पृथिव्या वायुरन्तरिक्षाद्यमो मनुष्येभ्यः सरस्वती पार्थिवेभ्यः ॥४॥  
प्राणापनौ मा मा हासिष्टं मा जने प्र मेषि ॥५॥  
स्वस्त्यद्योषसो दोषसश्च सर्व आपः सर्वगणो अशीय ॥६॥  
शक्वरी स्थ पशवो मोप स्थेषुर्मित्रावरुणौ मे प्राणापानावग्निर्मे दक्षं दधातु ॥७॥

16.5

विद्म ते स्वप्नं जनित्रं ग्राह्याः पुत्रोऽसि यमस्य करणः ।  
अन्तकोऽसि मृत्युरसि ।  
तं त्वा स्वप्नं तथा सं विद्म स नः स्वप्नं दुष्वज्यात्पाहि ॥१॥

विद्म ते स्वप्न जनित्रं निर्ऋत्याः पुत्रोऽसि यमस्य करणः ।  
 अन्तकोऽसि मृत्युरसि ।  
 तं त्वा स्वप्न तथा सं विद्म स नः स्वप्न दुष्वप्यात्पाहि ॥ २ ॥  
 विद्म ते स्वप्न जनित्रमभूत्याः पुत्रोऽसि यमस्य करणः ।  
 अन्तकोऽसि मृत्युरसि ।  
 तं त्वा स्वप्न तथा सं विद्म स नः स्वप्न दुष्वप्यात्पाहि ॥ ३ ॥  
 विद्म ते स्वप्न जनित्रं निर्भूत्याः पुत्रोऽसि यमस्य करणः ।  
 अन्तकोऽसि मृत्युरसि ।  
 तं त्वा स्वप्न तथा सं विद्म स नः स्वप्न दुष्वप्यात्पाहि ॥ ४ ॥  
 विद्म ते स्वप्न जनित्रं पराभूत्याः पुत्रोऽसि यमस्य करणः ।  
 अन्तकोऽसि मृत्युरसि ।  
 तं त्वा स्वप्न तथा सं विद्म स नः स्वप्न दुष्वप्यात्पाहि ॥ ५ ॥  
 विद्म ते स्वप्न जनित्रं देवजामीनां पुत्रोऽसि यमस्य करणः ।  
 अन्तकोऽसि मृत्युरसि ।  
 तं त्वा स्वप्न तथा सं विद्म स नः स्वप्न दुष्वप्यात्पाहि ॥ ६ ॥

16.6

अजैष्माद्यासनामद्यामूमनागसो वयम् ॥१॥  
 उषो यस्माद्दुष्वप्यादभैष्माप तदुच्छतु ॥२॥  
 द्विषते तत्परा वह शपते तत्परा वह ॥३॥  
 यं द्विषो यश्च नो द्वेष्टि तस्मा एनद्रमयामः ॥४॥  
 उषा देवी वाचा संविदाना वाग्देव्युषसा संविदाना ॥५॥  
 उषस्पतिर्वाचस्पतिना संविदानो वाचस्पतिना संविदानः ॥६॥  
 तेऽमुष्मे परा वहन्त्वरायान् दुर्णाम्निः सदान्वाः ॥७॥  
 कुम्भीकाः दूषीकाः पीयकान् ॥८॥  
 जाग्रद्दुष्वप्यं स्वप्नेदुष्वप्यम् ॥९॥  
 अनागमिष्यतो वरान् अवित्तेः संकल्पान् अमुच्या द्रुहः पाशान् ॥१०॥  
 तदमुष्मा अग्ने देवाः परा वहन्तु वघ्निर्यथासद्विधुरो न साधुः ॥११॥

16.7

तेनैनं विध्याम्यभूत्यैनं विध्यामि निर्भूत्यैनं विध्यामि पराभूत्यैनं विध्यामि ग्राह्यैनं विध्यामि तमसैनं विध्यामि ॥१॥  
 देवानामेनं घोरेः क्रूरेः प्रैषैरभिप्रेष्यामि ॥२॥  
 वैश्वानरस्यैनं दंष्ट्रयोरपि दधामि ॥३॥  
 एवानेवाव सा गरत् ॥४॥  
 योऽस्मान् द्वेष्टि तमात्मा द्वेष्टु यं वयं द्विषमः स आत्मानं द्वेष्टु ॥५॥  
 निर्द्विषन्तं दिवो निः पृथिव्या निरन्तरिक्षाद्भ्रजाम ॥६॥  
 सुयामंश्चाक्षुष ॥७॥  
 इदमहमामुष्यायणोऽमुष्याः पुत्रे दुष्वप्यं मृजे ॥८॥  
 यददोअदो अभ्यगच्छं यद्दोषा यत्पूर्वा रात्रिम् ॥९॥  
 यज्जाग्रद्यत्सुप्तो यद्दिवा यन् नक्तम् ॥१०॥  
 यदहरहरभिगच्छामि तस्मादेनमव दये ॥११॥  
 तं जहि तेन मन्दस्व तस्य पृष्टीरपि शृणीहि ॥१२॥  
 स मा जीवीत्तं प्राणो जहातु ॥१३॥

16.8

जितमस्माकमुद्भिन्नमस्माकमृतमस्माकं तेजसस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ॥  
 १॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।  
 स निर्ऋत्याः पाशान् मा मोचि ॥२॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।  
 सोऽभूत्याः पाशान् मा मोचि ॥३॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।  
 स निर्भूत्याः पाशान् मा मोचि ॥४॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।  
 स पराभूत्याः पाशान् मा मोचि ॥५॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।  
 स देवजामीनां पाशान् मा मोचि ॥६॥  
 जितमस्माकमुद्भिन्नमस्माकमृतमस्माकं तेजोऽस्माकं ब्रह्मास्माकं स्वरस्माकं यज्ञोऽस्माकं पशवोऽस्माकं प्रजा अस्माकं वीरा अस्माकम् ।  
 तस्मादमुं निर्भजामोऽमुमामुष्यायणममुष्याः पुत्रमसौ यः ।





तदग्निराह तद् सोम आह पूषा मा धात्सुकृतस्य लोके ॥२॥  
 अगन्म स्वः स्वरगन्म सं सूर्यस्य ज्योतिषागन्म ॥३॥  
 वस्योभूयाय वसुमान् यज्ञो वसु वंसिषीय वसुमान् भूयासं वसु मयि धेहि ॥४॥

17.1

विषासहिं सहमानं सासहानं सहीयांसम् ।  
 सहमानं सहोजितं स्वर्जितं गोजितं संधनाजितम् ।  
 ईड्यं नाम ह्व इन्द्रमायुष्मान् भूयासम् ॥१॥  
 विषासहिं सहमानं सासहानं सहीयांसम् ।  
 सहमानं सहोजितं स्वर्जितं गोजितं संधनाजितम् ।  
 ईड्यं नाम ह्व इन्द्रं प्रियो देवानां भूयासम् ॥२॥  
 विषासहिं सहमानं सासहानं सहीयांसम् ।  
 सहमानं सहोजितं स्वर्जितं गोजितं संधनाजितम् ।  
 ईड्यं नाम ह्व इन्द्रं प्रियः प्रजानां भूयासम् ॥३॥  
 विषासहिं सहमानं सासहानं सहीयांसम् ।  
 सहमानं सहोजितं स्वर्जितं गोजितं संधनाजितम् ।  
 ईड्यं नाम ह्व इन्द्रं प्रियः पशूनां भूयासम् ॥४॥  
 विषासहिं सहमानं सासहानं सहीयांसम् ।  
 सहमानं सहोजितं स्वर्जितं गोजितं संधनाजितम् ।  
 ईड्यं नाम ह्व इन्द्रं प्रियः समानानां भूयासम् ॥५॥  
 उदिह्युदिहि सूर्यं वर्चसा माभ्युदिहि ।  
 द्विषंश्च मह्यं रथ्यतु मा चाहं द्विषते रथं तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥६॥  
 उदिह्युदिहि सूर्यं वर्चसा माभ्युदिहि ।  
 आंश्च पश्यामि यांश्च न तेषु मा सुमतिं कृधि तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥७॥  
 मा त्वा दभन्त्सलिले अप्स्वन्तर्ये पाशिन उपतिष्ठन्त्यत्र ।  
 हित्वाशस्तिं दिवमारुक्ष एतां स नो मृड सुमतौ ते स्याम तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥८॥  
 त्वं न इन्द्र महते सौभगायादब्धेभिः परि पाहाक्तुभिस्तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥९॥  
 त्वं न इन्द्रोतिभिः शिवाभिः शंतमो भव ।  
 आरोहंस्त्रिदिवं दिवो गुणानः सोमपीतये प्रियधामा स्वस्तये तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१०॥ {१}  
 त्वमिन्द्रासि विश्वजित्सर्ववित्पुरुहूतस्त्वमिन्द्र ।  
 त्वमिन्द्रेमं सुहवं स्तोममेरयस्व स नो मृड सुमतौ ते स्याम तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥११॥  
 अदब्धो दिवि पृथिव्यामुतासि न त आपुर्महिमानमन्तरिक्षे ।  
 अदब्धेन ब्रह्मणा वावुधानः स त्वं न इन्द्र दिवि षं छर्म यच्छ तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१२॥  
 या त इन्द्र तनूरप्सु या पृथिव्यां यान्तरग्नौ या ते इन्द्र पवमाने स्वर्विदि ।  
 ययेन्द्र तन्वाऽन्तरिक्षं व्यापिथ तथा न इन्द्र तन्वा शर्म यच्छ तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१३॥  
 त्वामिन्द्र ब्रह्मणा वर्धयन्तः सत्रं नि षेदुर्ऋषयो नाधमानास्तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१४॥  
 त्वं तूतं त्वं पर्येष्युत्सं सहस्रधारं विदथं स्वर्विदं तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१५॥  
 त्वं रक्षसें प्रदिशश्चतस्रस्त्वं शोचिषा नभसी वि भासि ।  
 त्वमिमा विश्वा भुवनानु तिष्ठस ऋतस्य पन्थामन्वेषि विद्वांस्तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१६॥  
 पञ्चभिः पराङ्गतपस्येकयावाडशस्तिमेषि सुदिने बाधमानस्तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१७॥  
 त्वमिन्द्रस्त्वं महेन्द्रस्त्वं लोकस्त्वं प्रजापतिः ।  
 तुभ्यं यज्ञो वि तायते तुभ्यं जुह्वति जुह्वतस्तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१८॥  
 असति सत्प्रतिष्ठितं सति भूतं प्रतिष्ठितम् ।  
 भूतं ह भव्य आहितं भव्यं भूते प्रतिष्ठितं तवेद्विष्णो बहुधा वीर्याणि ।  
 त्वं नः पूणीहि पशुभिर्विश्वरूपैः सुधायां मा धेहि परमे व्योमन् ॥१९॥  
 शुक्रोऽसि भ्राजोऽसि ।  
 स यथा त्वं भ्राजता भ्राजोऽस्येवाहं भ्राजता भ्राज्यासम् ॥२०॥ {२}  
 रुचिरसि रोचोऽसि ।

स यथा त्वं रुच्या रोचोऽस्येवाहं पशुभिश्च ब्राह्मणवर्चसेन च रुचिषीय ॥२१॥  
 उद्यते नम उदायते नम उदिताय नमः ।  
 विराजे नमः स्वराजे नमः सम्राजे नमः ॥२२॥  
 अस्तंयते नमोऽस्तमेष्यते नमोऽस्तमिताय नमः ।  
 विराजे नमः स्वराजे नमः सम्राजे नमः ॥२३॥  
 उदगादयमादित्यो विश्वेन तपसा सह ।  
 सपत्नान् मह्यं रन्धयन् मा चाहं द्विषते रधं तवेद्विष्णो बहुधा वीर्याणि ।  
 त्वं नः पृणीहि पशुभिर्विश्वरूपैः सुधायां मा धेहि परमे व्योमन् ॥२४॥  
 आदित्य नावमारुक्षः शतारित्रां स्वस्तये ।  
 अहर्मात्यपीपरो रात्रिं सत्राति पारय ॥२५॥  
 सूर्य नावमारुक्षः शतारित्रां स्वस्तये ।  
 रात्रिं मात्यपीपरोऽहः सत्राति पारय ॥२६॥  
 प्रजापतेरावृत्तो ब्रह्मणा वर्मणाहं कश्यपस्य ज्योतिषा वर्चसा च ।  
 जरदष्टिः कृतवीर्यो विहायाः सहस्रायुः सुकृतश्चरेयम् ॥२७॥  
 परिवृत्तो ब्रह्मणा वर्मणाहं कश्यपस्य ज्योतिषा वर्चसा च ।  
 मा मा प्रापन्न इषवो देव्या या मा मानुषीरवसृष्टाः वधाय ॥२८॥  
 ऋतेन गुप्त ऋतुभिश्च सर्वैर्भूतेन गुप्तो भव्येन चाहम् ।  
 मा मा प्रापत्पाप्मा मोत मृत्युरन्तर्दधेऽहं सलिलेन वाचः ॥२९॥  
 अग्निर्मा गोप्ता परि पातु विश्वतः उद्यन्त्सूर्यो नुदतां मृत्युपाशान् ।  
 व्युच्छन्तीरुषसः पर्वता ध्रुवाः सहस्रं प्राणा मय्या यतन्ताम् ॥३०॥ {३}

18.1

ओ चित्सखायं सख्या ववृत्त्यां तिरः पुरू चिदर्णवं जगन्वान् ।  
 पितुर्नपातमा दधीत वेधा अधि क्षमि प्रतरं दीध्यानः ॥१॥  
 न ते सखा सख्यं वष्ट्येतत्सलक्ष्मा यद्विषुरुपा भवति ।  
 महस्पुत्रासो असुरस्य वीरा दिवो धर्तर उर्विया परि ख्यन् ॥२॥  
 उशान्ति घा ते अमृतास एतदेकस्य चित्त्यजसं मर्त्यस्य ।  
 नि ते मनो मनसि धाय्यस्मे जन्युः पतिस्तन्वमा विविष्याः ॥३॥  
 न यत्पुरा चक्रुमा कद्ध नूनमृतं वदन्तो अनृतं रपेम ।  
 गन्धर्वा अप्स्वप्या च योषा सा नौ नाभिः परमं जामि तन् नौ ॥४॥  
 गर्भे नु नौ जनिता दम्पती कर्देवस्त्वष्टा सविता विश्वरूपः ।  
 नकिरस्य प्र मिनन्ति व्रतानि वेद नावस्य पृथिवी उत द्यौः ॥५॥  
 को अद्य युङ्क्ते धुरि गा ऋतस्य शिमीवर्तो भामिनो दुर्हणायून् ।  
 आसन्निषून् हृत्स्वसो मयोभून् य एषां भृत्यामृणधत्स जीवात् ॥६॥  
 को अस्य वेद प्रथमस्याहः क ई ददर्श क इह प्र वोचत् ।  
 बृहन् मित्रस्य वरुणस्य धाम कदु ब्रव आहनो वीच्या नून् ॥७॥  
 यमस्य मा यम्यं काम आगन्त्समाने योनौ सहशेय्याय ।  
 जायेव पत्ये तन्वं रिरिच्यां वि चिद्ब्रुहेव रथ्येव चक्रा ॥८॥  
 न तिष्ठन्ति न नि मिषन्त्येते देवानां स्पश इह ये चरन्ति ।  
 अन्येन मदाहनो याहि तूयं तेन वि वृह रथ्येव चक्रा ॥९॥  
 रात्रीभिरस्मा अहर्भिर्दशस्येत्सूर्यस्य चक्षुर्मुहुरुन् मिमीयात् ।  
 दिवा पृथिव्या मिथुना सबन्धू यमीर्यमस्य विवृहादजामि ॥१०॥ {१}  
 आ घा ता गछान् उत्तरा युगानि यत्र जामयः कृणवन् अजामि ।  
 उप बर्बुहि वृषभाय बाहुमन्यमिच्छस्व सुभगे पतिं मत् ॥११॥  
 किं भ्रातासद्यदनाथं भवाति किमु स्वसा यन् निर्ऋतिर्निगच्छात् ।  
 काममृता बह्वेतद्रपामि तन्वा मे तन्वं सं पिपृग्धि ॥१२॥  
 न ते नाथं यम्यत्राहमस्मि न ते तनूं तन्वा सं पपृच्याम् ।  
 अन्येन मत्प्रमुदः कल्पयस्व न ते भ्राता सुभगे वष्ट्येतत् ॥१३॥  
 न वा उ ते तनूं तन्वा सं पिपृच्यां पापमाहुर्यः स्वसारं निगच्छात् ।  
 असंयदेतन् मनसो हृदो मे भ्राता स्वसुः शयने यच्छयीय ॥१४॥  
 बतो बतासि यम नैव ते मनो हृदयं चाविदामा ।  
 अन्या किल त्वां कक्ष्येव युक्तं परि ष्वजातौ लिबुजेव वृक्षम् ॥१५॥  
 अन्यमू षु यम्यन्त्य उ त्वां परि ष्वजातौ लिबुजेव वृक्षम् ।  
 तस्य वा त्वं मन इच्छा स वा तवाधा कृणुष्व संविदं सुभद्राम् ॥१६॥  
 त्रीणि च्छन्दांसि कवयो वि येतिरे पुरुरूपं दर्शतं विश्वचक्षणम् ।  
 आपो वाता ओषधयस्तान्येकस्मिन् भुवन आर्पितानि ॥१७॥  
 वृषा वृष्णे दुदुहे दोहसा दिवः पर्यासि यह्नो अदितेरदाभ्यः ।  
 विश्वं स वेद वरुणो यथा धिया स यज्ञियो यजति यज्ञियामृतून् ॥१८॥  
 रपद्गन्धर्वीरप्या च योषणा नदस्य नादे परि पातु नो मनः ।  
 इष्टस्य मध्ये अदितिर्नि धातु नो भ्राता नो ज्येष्ठः प्रथमो वि वोचति ॥१९॥  
 सो चित्नु भद्रा क्षुमती यशस्वत्युषा उवास मनवे स्वर्वती ।  
 यदीमुशन्तमुशतामनु क्रतुमग्निं होतारं विदथाय जीजनन् ॥२०॥ {२}  
 अध त्यं द्रप्सं विभ्वं विचक्षनं विराभरदिषिरः श्येनो अध्वरे ।

यदी विशो वृणते दस्ममार्या अग्निं होतारमध धीरजायत ॥२१॥  
 सदासि रण्वा यवसेव पुष्यते होत्राभिरग्ने मनुषः स्वध्वरः ।  
 विप्रस्य वा यच्छशमान उक्थ्यो वाजं ससवामुपयासि भूरिभिः ॥२२॥  
 उदीरय पितरा जार आ भगमियक्षति हर्यतो हृत्त इष्यति ।  
 विवक्ति वह्निः स्वपस्यते मखस्तविष्यते असुरो वेपते मती ॥२३॥  
 यस्ते अग्ने सुमतिं मर्तो अख्यत्सहसः सूनी अति स प्र शृण्वे ।  
 इषं दधानो वहमानो अश्वैरा स द्युमाममवान् भूषति द्यून् ॥२४॥  
 श्रुधी नो अग्ने सदने सधस्थे युक्ष्वा रथममृतस्य द्रवित्नुम् ।  
 आ नो वह रोदसी देवपुत्रे माकिर्देवानामप भूरिह स्याः ॥२५॥  
 यदग्न एषा समितिर्भवाति देवी देवेषु यजता यजत्र ।  
 रत्ना च यद्विभजासि स्वधावो भागं नो अत्र वसुमन्तं वीतात् ॥२६॥  
 अन्वग्निरुषसामग्रमख्यदन्वहानि प्रथमो जातवेदाः ।  
 अनु सूर्य उषसो अनु रश्मीन् द्यावापृथिवी आ विवेश ॥२७॥  
 प्रत्यग्निरुषसामग्रमख्यत्प्रत्यहानि प्रथमो जातवेदाः ।  
 प्रति सूर्यस्य पुरुधा च रश्मीन् प्रति द्यावापृथिवी आ ततान ॥२८॥  
 द्यावा ह क्षामा प्रथमे ऋतेनाभिश्वावे भवतः सत्यवाचा ।  
 देवो यन् मर्तान् यजथाय कृण्वन्त्सीदद्धोता प्रत्यङ्स्वमसुं यन् ॥२९॥  
 देवो देवान् परिभूर्ऋतेन वहा नो हव्यं प्रथमश्चिकित्वान् ।  
 धूमकेतुः समिधा भाऋजीको मन्द्रो होता नित्यो वाचा यजीयान् ॥३०॥ {३}  
 अर्चामि वां वर्धायापो घृतस्नु द्यावाभूमी शृणुतं रोदसी मे ।  
 अहा यद्देवा असुनीतिमायन् मध्वा नो अत्र पितरा शिशीताम् ॥३१॥  
 स्वावृदेवस्यामृतं यदी गौरतो जातासो धारयन्त उर्वी ।  
 विश्वे देवा अनु तत्ते यजुर्गुर्दुहे यदेनी दिव्यं घृतं वाः ॥३२॥  
 किं स्वित् नो राजा जगृह कदस्याति व्रतं चकृमा को वि वेद ।  
 मित्रस्चिद्धिष्मा जुहुराणो देवां छलोको न यातामपि वाजो अस्ति ॥३३॥  
 दुर्मन्त्रामृतस्य नाम सलक्ष्मा यद्विषुरूपा भवाति ।  
 यमस्य यो मनवते सुमन्त्वग्ने तमृष्व पाह्यप्रयुच्छन् ॥३४॥  
 यस्मिन् देवा विदथे मादयन्ते विवस्वतः सदने धारयन्ते ।  
 सूर्ये ज्योतिरदधुर्मास्यक्नुन् परि द्योतनिं चरतो अजसा ॥३५॥  
 यस्मिन् देवा मन्मनि संचरन्त्यपीच्ये न वयमस्य विद्म ।  
 मित्रो नो अत्रादितिरनागान्त्सविता देवो वरुणाय वोचत् ॥३६॥  
 सखाय आ शिषामहे ब्रह्मेन्द्राय वज्रिणे ।  
 स्तुष ऊ षु नृतमाय धृष्णवे ॥३७॥  
 शवसा ह्यासि श्रुतो वृत्रहत्येन वृत्रहा ।  
 मधैर्मघोनो अति शूर दाशसि ॥३८॥  
 स्तेगो न क्षामत्येषि पृथिवीं मही नो वाता इह वान्तु भूमौ ।  
 मित्रो नो अत्र वरुणो युजमानो अग्निर्वने न व्यसृष्ट शोकम् ॥३९॥  
 स्तुहि श्रुतं गर्तसदं जनानां राजानं भीममुपहन्तुमुग्रम् ।  
 मूडा जरित्रे रुद्र स्तवानो अन्यमस्मत्ते नि वपन्तु सेन्यम् ॥४०॥ {४}  
 सरस्वतीं देवयन्तो हवन्ते सरस्वतीमध्वरे तायमाने ।  
 सरस्वतीं सुकृतो हवन्ते सरस्वती दाशुषे वार्यं दात् ॥४१॥  
 सरस्वतीं पितरो हवन्ते दक्षिणा यज्ञर्माभिनक्षमाणाः ।  
 आसद्यास्मिन् बर्हिषि मादयध्वमनमीवा इष आ धेहास्मे ॥४२॥  
 सरस्वति या सरथं ययाथोक्थैः स्वधाभिर्देवि पितृभिर्मदन्ती ।  
 सहस्रार्घमिडो अत्र भागं रायस्पोषं यजमानाय धेहि ॥४३॥  
 उदीरतामवर उत्परास उन् मध्यमाः पितरः सोम्यासः ।  
 असुं य ईयुरवका ऋतज्ञास्ते नोऽवन्तु पितरो हवेषु ॥४४॥  
 आहं पितृन्त्सुविदत्रामवित्ति नपातं च विक्रमणं च विष्णोः ।  
 बर्हिषदो ये स्वधया सुतस्य भजन्त पित्वस्त इहागमिष्ठाः ॥४५॥  
 इदं पितृभ्यो नमो अस्त्वद्य ये पूर्वासो ये अपरास ईयुः ।  
 ये पार्थिवे रजस्या निषक्ता ये वा नूनं सुवृजनासु दिक्षु ॥४६॥  
 मातली कव्यैर्यमो अङ्गिरोभिर्बहस्पतिर्ऋक्वाभिर्वावृधानः ।  
 यांश्च देवा वावृथुर्ये च देवांस्ते नोऽवन्तु पितरो हवेषु ॥४७॥  
 स्वादुष्किलायं मधुमामृतायं तीव्रः किलायं रसवामृतायम् ।  
 उतो न्वस्य पपिवांसमिन्द्रं न कश्चन सहत आहवेषु ॥४८॥  
 परेयिवांसं प्रवतो महीरिति बहुभ्यः पन्थामनुपस्पशानम् ।  
 वैवस्वतं संगमनं जनानां यमं राजानं हविषा सपर्यत ॥४९॥  
 यमो नो गातुं प्रथमो विवेद नैषा गव्यूतिरपभर्तवा उ ।  
 यत्रा नः पूर्वं पितरः परेता एना जज्ञानाः पथ्या अनु स्वाः ॥५०॥ {५}  
 बर्हिषदः पितर उत्यर्वागिमा वो हव्या चकृमा जुषध्वम् ।  
 त आ गतावसा शंतमेनाधा नः शं योररपो दधात ॥५१॥  
 आच्या जानु दक्षिणतो निषद्येदं नो हविरभि गृणन्तु विश्वे ।  
 मा हिंसिष्ट पितरः केन चिन् नो यद्द आगः पुरुषता कराम ॥५२॥  
 त्वष्टा दुहित्रे वहतुं कृणोति तेनेदं विश्वं भुवनं समेति ।

यमस्य माता पर्युह्यमाना महो जाया विवस्वतो ननाश ॥५३॥  
 प्रेहि प्रेहि पथिभिः पूर्याणैर्येना ते पूर्वे पितरः परेताः ।  
 उभा राजानौ स्वधया मदन्तौ यमं पश्यासि वरुणं च देवम् ॥५४॥  
 अपेत वीत वि च सर्पतातोऽस्मा एतं पितरो लोकमक्रन् ।  
 अहोभिरद्विरक्तुभिर्व्यक्तं यमो ददात्यवसानमस्मै ॥५५॥  
 उशन्तस्त्वेधीमह्युशन्तः समिधीमहि ।  
 उशन् उशत आ वह पितृन् हविषे अत्तवे ॥५६॥  
 द्युमन्तस्त्वेधीमहि द्युमन्तः समिधीमहि ।  
 द्युमान् द्युमत आ वह पितृन् हविषे अत्तवे ॥५७॥  
 अङ्गिरसो नः पितरो नवग्वा अथर्वाणो भृगवः सोम्यासः ।  
 तेषां वयं सुमतौ यज्ञियानामपि भद्रे सौमनसे स्याम ॥५८॥  
 अङ्गिरोभिर्यज्ञियैरा गहीह यम वैरूपैरिह मादयस्व ।  
 विवस्वन्तं हुवे यः पिता तेऽस्मिन् बर्हिष्या निषद्य ॥५९॥  
 इमं यम प्रस्तरमा हि रोहाङ्गिरोभिः पितृभिः संविदानः ।  
 आ त्वा मन्त्राः कविशस्ता वहन्त्वेना राजन् हविषो मादयस्व ॥६०॥  
 इत एत उदारुहन् दिवस्पृष्ठान्वारुहन् ।  
 प्र भूर्जयो यथा पथा द्यामङ्गिरसो ययुः ॥६१॥ {६}

18.2

यमाय सोमः पवते यमाय क्रियते हविः ।  
 यमं ह यज्ञो गच्छत्यग्निदूतो अरकृतः ॥१॥  
 यमाय मधुमत्तमं जुहोता प्र च तिष्ठत ।  
 इदं नम ऋषिभ्यः पूर्वजेभ्यः पूर्वैभ्यः पथिकृद्भ्यः ॥२॥  
 यमाय घृतवत्पयो राज्ञे हविर्जुहोतन ।  
 स नो जीवेष्वामेदीर्घमायुः प्र जीवसे ॥३॥  
 मैनमग्ने वि दहो माभि शूशुचो मास्य त्वचं चिक्षिपो मा शरीरम् ।  
 शृतं यदा करसि जातवेदोऽथमेनं प्र हिणुतात्पितृरूप ॥४॥  
 यदा शृतं कृणवो जातवेदोऽथमेनं परि दत्तात्पितृभ्यः ।  
 यदो गच्छात्यसुनीतिमेतामथ देवानां वशनीर्भवाति ॥५॥  
 त्रिकद्रुकेभिः पवते षडुवीरकमिद्वहत् ।  
 त्रिष्टुब्बायत्री छन्दासि सर्वा ता यम आर्पिता ॥६॥  
 सूर्यं चक्षुषा गच्छ वातमात्मना दिवं च गच्छ पृथिवीं च धर्मभिः ।  
 अपो वा गच्छ यदि तत्र ते हितमोषधीषु प्रति तिष्ठा शरीरैः ॥७॥  
 अजो भागस्तपस्स्तं तपस्व तं ते शोचिस्तपतु तं ते अर्चिः ।  
 यास्ते शिवास्तन्वो जातवेदस्ताभिर्वहैनं सुकृतामु लोकम् ॥८॥  
 यास्ते शोचयो रंहयो जातवेदो याभिरापूणासि दिवमन्तरिक्षम् ।  
 अजं यन्तमनु ताः समृण्वतामथेतराभिः शिवतमाभिः शृतं कृधि ॥९॥  
 अव सृज पुनरग्ने पितृभ्यो यस्त आहुतश्चरति स्वधावान् ।  
 आयुर्वसान उप यातु शेषः सं गच्छतां तन्वा सुवर्चाः ॥१०॥ {७}  
 अति द्रव श्वानौ सारमेयौ चतुरक्षौ शबलौ साधुना पथा ।  
 अथा पितृन्सुविदत्रामपीहि यमेन ये सधमादं मदन्ति ॥११॥  
 यौ ते श्वानौ यम रक्षितारौ चतुरक्षौ पथिषदी नृचक्षसा ।  
 ताभ्यां राजन् परि धेह्येनं स्वस्त्यस्मा अनमीवं च धेहि ॥१२॥  
 उरूणसावसुतृपावुदुम्बलौ यमस्य दूतौ चरतो जनामनु ।  
 तावस्मभ्यं दृशये सूर्याय पुनर्दातामसुमद्येह भद्रम् ॥१३॥  
 सोम एकेभ्यः पवते घृतमेक उपासते ।  
 येभ्यो मधु प्रधावति तांश्चिदेवापि गच्छतात् ॥१४॥  
 ये चित्पूर्वं ऋतसाता ऋतजाता ऋतावृधः ।  
 ऋषीन् तपस्वतो यम तपोजामपि गच्छतात् ॥१५॥  
 तपसा ये अनाधृष्यास्तपसा ये स्वर्ययुः ।  
 तपो ये चक्रिरे महस्तांश्चिदेवापि गच्छतात् ॥१६॥  
 ये युध्यन्ते प्रधनेषु शूरासो ये स्वर्तनृत्यजः ।  
 ये वा सहस्रदक्षिणास्तां चिदेवापि गच्छतात् ॥१७॥  
 सहस्रणीथाः कवयो ये गोपायन्ति सूर्यम् ।  
 ऋषीन् तपस्वतो यम तपोजामपि गच्छतात् ॥१८॥  
 स्योनास्मै भव पृथिव्यनृक्षरा निवेशनी ।  
 यच्छास्मै शर्म सप्रथाः ॥१९॥  
 असंबाधे पृथिव्या उरौ लोके नि धीयस्व ।  
 स्वधा याश्चकृषे जीवन् तास्ते सन्तु मधुश्रुतः ॥२०॥ {८}  
 ह्वयामि ते मनसा मन इहेमान् गृहामुप जुजुषाण एहि ।  
 सं गच्छस्व पितृभिः सं यमेन स्योनास्त्वा वाता उप वान्तु शग्माः ॥२१॥  
 उत्त्वा वहन्तु मरुत उदवाहा उदप्रुतः ।

अजेन कृण्वन्तः शीतं वर्षेणोक्षन्तु बालिति ॥२२॥  
 उदह्णमायुरायुषे क्रत्वे दक्षाय जीवसे ।  
 स्वान् गच्छतु ते मनो अधा पितृरुप द्रव ॥२३॥  
 मा ते मनो मासोर्माङ्गानां मा रसस्य ते ।  
 मा ते हास्त तन्वः किं चनेह ॥२४॥  
 मा त्वा वृक्षः सं बाधिष्ट मा देवी पृथिवी मही ।  
 लोकं पितृषु वित्त्वैधस्व यमराजसु ॥२५॥  
 यत्ते अङ्गमतिहितं पराचैरपानः प्राणो य उ वा ते परेतः ।  
 तत्ते संगत्य पितरः सनीडा घासाद्वासं पुनरा वेशयन्तु ॥२६॥  
 अपेमं जीवा अरुधन् गृहेभ्यस्तं निर्वहत परि ग्रामादितः ।  
 मृत्युर्यमस्यासीद्दूतः प्रचेता असून् पितृभ्यो गमयां चकार ॥२७॥  
 ये दस्यवः पितृषु प्रविष्टा ज्ञातिमुखा अहुतादश्वरन्ति ।  
 परापुरो निपुरो ये भरन्त्यग्निष्ठान् अस्मात्प्र धमाति यज्ञात् ॥२८॥  
 सं विशन्तिवह पितरः स्वा नः स्योनं कृण्वन्तः प्रतिरन्त आयुः ।  
 तेभ्यः शकेम हविषा नक्षमाणा ज्योग्जीवन्तः शरदः पुरूचीः ॥२९॥  
 यां ते धेनुं निपूणामि यमु क्षीर ओदनम् ।  
 तेना जनस्यासो भर्ता योऽत्रासदजीवनः ॥३०॥ {९}  
 अश्रावतीं प्र तर या सुशेवा क्षाकं वा प्रतरं नवीयः ।  
 यस्त्वा जघान वध्यः सो अस्तु मा सो अन्यद्विदत भागधेयम् ॥३१॥  
 यमः परोऽवरो विवस्वान् ततः परं नाति पश्यामि किं चन ।  
 यमे अध्वरो अधि मे निविष्टो भुवो विवस्वान् अन्वाततान ॥३२॥  
 अपागूहन् अमृतां मर्त्येभ्यः कृत्वा सवर्णामदधुर्विवस्वते ।  
 उताश्विनावभरद्यत्तदासीदजहादु द्वा मिथुना सरण्यूः ॥३३॥  
 ये निखाता ये परोप्ता ये दग्धा ये चोद्धिताः ।  
 सर्वास्तान् अग्न आ वह पितृन् हविषे अत्तवे ॥३४॥  
 ये अग्निदग्धा ये अनग्निदग्धा मध्ये दिवः स्वधया मादयन्ते ।  
 त्वं तान् वेत्थ यदि ते जातवेदः स्वधया यज्ञं स्वधितिं जुषन्ताम् ॥३५॥  
 शं तप माति तपो अग्ने मा तन्वं तपः ।  
 वणेषु शुष्मो अस्तु ते पृथिव्यामस्तु यद्भरः ॥३६॥  
 ददाम्यस्मा अवसानमेतद्य एष आगन् मम चेदभूदिह ।  
 यमश्चिकित्वान् प्रत्येतदाह ममैष राय उप तिष्ठतामिह ॥३७॥  
 इमां मात्रां मिमीमहे यथापरं न मासातै ।  
 शते शरत्सु नो पुरा ॥३८॥  
 प्रेमां मात्रां मिमीमहे यथापरं न मासातै ।  
 शते शरत्सु नो पुरा ॥३९॥  
 अपेमां मात्रां मिमीमहे यथापरं न मासातै ।  
 शते शरत्सु नो पुरा ॥४०॥ {१०}  
 वीमां मात्रां मिमीमहे यथापरं न मासातै ।  
 शते शरत्सु नो पुरा ॥४१॥  
 निरिमां मात्रां मिमीमहे यथापरं न मासातै ।  
 शते शरत्सु नो पुरा ॥४२॥  
 उदिमां मात्रां मिमीमहे यथापरं न मासातै ।  
 शते शरत्सु नो पुरा ॥४३॥  
 समिमां मात्रां मिमीमहे यथापरं न मासातै ।  
 शते शरत्सु नो पुरा ॥४४॥  
 अमासि मात्रां स्वरगामायुष्मान् भूयासम् ।  
 यथापरं न मासातै शते शरत्सु नो पुरा ॥४५॥  
 प्राणो अपानो व्यान आयुश्चक्षुर्दृशये सूर्याय ।  
 अपरिपरेण पथा यमराज्ञः पितृन् गच्छ ॥४६॥  
 ये अग्रवः शशमानाः परेयुर्हित्वा द्वेषांस्यनपत्यवन्तः ।  
 ते ह्यामुदित्याविदन्त लोकं नाकस्य पृष्ठे अधि दीध्यानाः ॥४७॥  
 उदन्वतीं द्यौरवमा पीलुमतीति मध्यमा ।  
 तृतीया ह प्रद्यौरिति यस्यां पितर आसते ॥४८॥  
 ये न पितुः पितरो ये पितामहा य आविविशुर्वन्तरिक्षम् ।  
 य आक्षियन्ति पृथिवीमूत ह्यां तेभ्यः पितृभ्यो नमसा विधेम ॥४९॥  
 इदमिद्वा उ नापरं दिवि पश्यसि सूर्यम् ।  
 माता पुत्रं यथा सिचाभ्येनं भूम ऊर्णुहि ॥५०॥ {११}  
 इदमिद्वा उ नापरं जरस्यन्यदितोऽपरम् ।  
 जाया पतिमिव वाससाभ्येनं भूम ऊर्णुहि ॥५१॥  
 अभि त्वोर्णामि पृथिव्या मातुर्वस्त्रेण भद्रया ।  
 जीवेषु भद्रं तन् मयि स्वधा पितृषु सा त्वयि ॥५२॥  
 अनीषोमा पथिकृता स्योनं देवेभ्यो रत्नं दधथुर्वि लोकम् ।  
 उप प्रेष्यन्तं पूषणं यो वहात्यञ्जोयानैः पथिभिस्तत्र गच्छतम् ॥५३॥  
 पूषा त्वेतश्चयावयतु प्र विद्वान् अनष्टपशुर्भुवनस्य गोपाः ।

स त्वैतेभ्यः परि ददत्पितृभ्योऽग्निर्देवेभ्यः सुविदत्रियेभ्यः ॥५४॥  
 आयुर्विश्वायुः परि पातु त्वा पूषा त्वा पातु प्रपथे पुरस्तात् ।  
 यत्रासते सुकृतो यत्र त ईयुस्तत्र त्वा देवः सविता दधातु ॥५५॥  
 इमौ युनज्मि ते वह्नी असुनीताय वोढवे ।  
 ताभ्यां यमस्य सादनं समितिश्चाव गच्छतात् ॥५६॥  
 एतत्त्वा वासः प्रथमं न्वागन् अर्पैतदूह यदिहाबिभः पुरा ।  
 इष्टापूर्तमनुसंक्राम विद्वान् यत्र ते दत्तं बहुधा विबन्धुषु ॥५७॥  
 अग्नेर्वर्म परि गोभिव्ययस्व सं प्रोर्णुष्व मेदसा पीवसा च ।  
 नेत्त्वा धृष्णुर्हरसा जर्हषाणो दधृग्विधक्षन् परीङ्खयातै ॥५८॥  
 दण्डं हस्तादाददानो गतासोः सह श्रोत्रेण वर्चसा बलेन ।  
 अत्रैव त्वमिह वयं सुवीरा विश्वा मृधो अभिमातीर्जयेम ॥५९॥  
 धनुर्हस्तादाददानो मृतस्य सह क्षत्रेण वर्चसा बलेन ।  
 समागृभाय वसु भूरि पुष्टमर्वाङ्त्वमेह्युप जीवलोकम् ॥६०॥ {१२}

18.3

इयं नारी पतिलोकं वृणाना नि पद्यत उप त्वा मर्त्यं प्रेतम् ।  
 धर्मं पुराणमनुपालयन्ती तस्यै प्रजां द्रविणं चेह धेहि ॥१॥  
 उदीर्ष्व नार्यभि जीवलोकं गतासुमेतमुप शेष एहि ।  
 हस्तग्राभस्य दधिषोस्तवेदं पत्युर्जनित्वमभि सं बभूथ ॥२॥  
 अपश्यं युवतिं नीयमानां जीवां मृतेभ्यः परिणीयमानाम् ।  
 अन्धेन यत्तमसा प्रावृतासीत्प्राक्तो अपाचीमनयं तदेनाम् ॥३॥  
 प्रजानत्यघ्न्ये जीवलोकं देवानां पन्थामनुसंचरन्ती ।  
 अयं ते गोपतिस्तं जुषस्व स्वर्गं लोकमधि रोहयैनम् ॥४॥  
 उप द्यामुप वेतसमवत्तरो नदीनाम् ।  
 अग्ने पित्तमपामसि ॥५॥  
 यं त्वमग्ने समदहस्तमु निर्वापय पुनः ।  
 क्याम्बूरत्र रोहतु शाण्डदूर्वा व्यल्कशा ॥६॥  
 इदं त एकं पुर ऊ त एकं तृतीयेन ज्योतिषा सं विशस्व ।  
 संवेशने तन्वा चारुरेधि प्रियो देवानां परमे सधस्थे ॥७॥  
 उत्तिष्ठ प्रेहि प्र द्रवौकः कृणुष्व सलिले सधस्थे ।  
 तत्र त्वं पितृभिः संविदानः सं सोमेन मदस्व सं स्वधाभिः ॥८॥  
 प्र च्यवस्व तन्वं सं भरस्व मा ते गात्रा वि हायि मौ शरीरम् ।  
 मनो निविष्टमनुसंविशस्व यत्र भूमेर्जुषसे तत्र गच्छ ॥९॥  
 वर्चसा मां पितरः सोम्यासो अञ्जन्तु देवा मधुना घृतेन ।  
 चक्षुषे मा प्रतरं तारयन्तो जरसे मा जरदष्टिं वर्धन्तु ॥१०॥ {१३}  
 वर्चसा मां समनक्त्वग्निर्मैधां मे विष्णुर्नक्त्वासन् ।  
 रयिं मे विश्वे नि यच्छन्तु देवाः स्योना मापः पवनैः पुनन्तु ॥११॥  
 मित्रावरुणा परि मामधातामादित्या मा स्वरवो वर्धयन्तु ।  
 वर्चो म इन्द्रो न्यनक्तु हस्तयोर्जरदष्टिं मा सविता कृणोतु ॥१२॥  
 यो ममार प्रथमो मर्त्यानां यः प्रेयाय प्रथमो लोकमेतम् ।  
 वैवस्वतं संगमनं जनानां यमं राजानं हविषा सपर्यत ॥१३॥  
 परा यात पितर आ च यातार्यं वो यज्ञो मधुना समक्तः ।  
 दत्तो अस्मभ्यं द्रविणेह भद्रं रयिं च नः सर्ववीरं दधात ॥१४॥  
 कण्वः कक्षीवान् पुरुमीढो अगस्त्यः श्यावाश्वः सोभ्यर्चनानाः ।  
 विश्वामित्रोऽयं जमदग्निरत्रिरवन्तु नः कश्यपो वामदेवः ॥१५॥  
 विश्वामित्र जमदग्ने वसिष्ठ भरद्वाज गोतम वामदेव ।  
 शर्दिर्नो अत्रिग्रभीन् नमोभिः सुसंशासः पितरो मृडता नः ॥१६॥  
 कस्ये मृजाना अति यन्ति रिप्रमायुर्दधानाः प्रतरं नवीयः ।  
 आप्यायमानाः प्रजया धनेनाथ स्याम सुरभयो गृहेषु ॥१७॥  
 अञ्जते व्यञ्जते समञ्जते क्रतुं रिहन्ति मधुनाभ्यञ्जते ।  
 सिन्धोरुच्छवासे पतयन्तमुक्षणं हिरण्यपावाः पशुमासु गृह्णते ॥१८॥  
 यद्वो मुद्रं पितरः सोम्यं च तेनो सचध्वं स्वयशसो हि भूत ।  
 ते अर्वाणः कवय आ शृणोत सुविदत्रा विदथे हुयमानाः ॥१९॥  
 ये अत्रयो अङ्गिरसो नवग्वा इष्टावन्तो रातिषाचो दधानाः ।  
 दक्षिणावन्तः सुकृतो य उ स्थासद्यास्मिन् बर्हिषि मादयध्वम् ॥२०॥ {१४}  
 अधा यथा नः पितरः परासः प्रत्नासो अग्न ऋतमाशशानाः ।  
 शुचीदयन् दीध्यत उक्थशसः क्षामा भिन्दन्तो अरुणीरप व्रन् ॥२१॥  
 सुकर्मानः सुरुचो देवयन्तो अयो न देवा जनिमा धमन्तः ।  
 शुचन्तो अग्निं वावृधन्त इन्द्रमुर्वीं गव्यां परिषदं नो अक्रन् ॥२२॥  
 आ यूथेव क्षुमति पश्वो अख्यहेवानां जनिमान्त्युगः ।  
 मर्तासंश्रिदुर्वशोरकृप्रन् वृधे चिदर्य उपरस्यायोः ॥२३॥  
 अकर्म ते स्वपसो अभूम ऋतमवसन्न उषसो विभातीः ।  
 विश्वं तद्भद्रं यदवन्ति देवा बृहद्वदेम विदथे सुवीराः ॥२४॥  
 इन्द्रो मा मरुत्वान् प्राच्या दिशः पातु बाहुच्युता पृथिवी द्यामिवोपरि ।

लोककृतः पथिकृतो यजामहे ये देवानां हुतभागा इह स्थ ॥२५॥  
धाता मा निर्ऋत्या दक्षिणाया दिशः पातु बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥२६॥  
अदितिर्मादित्यैः प्रतीच्या दिशः पातु बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥२७॥  
सोमो मा विश्वेदेवैरुदीच्या दिशः पातु बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥२८॥  
धर्ता ह त्वा धरुणो धारयाता ऊर्ध्वं भानुं सविता द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥२९॥  
प्राच्यां त्वा दिशि पुरा सम्वृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३०॥ {१५}  
दक्षिणायां त्वा दिशि पुरा सम्वृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३१॥  
प्रतीच्यां त्वा दिशि पुरा संवृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३२॥  
उदीच्यां त्वा दिशि पुरा सम्वृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३३॥  
ध्रुवायां त्वा दिशि पुरा संवृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३४॥  
ऊर्ध्वायां त्वा दिशि पुरा सम्वृतः स्वधायामा दधामि बाहुच्युता पृथिवी द्यामिवोपरि ।  
लोककृतः पथिकृतो यजामहे ये देवानां हुतभागा इह स्थ ॥३५॥  
धर्तासि धरुनोऽसि वंसगोऽसि ॥३६॥  
उदपूरसि मधुपूरसि वातपूरसि ॥३७॥  
इतश्च मामुतश्चावतां यमे इव यतमाने यदैतम् ।  
प्र वां भरन् मानुषा देवयन्तो आ सीदतां स्वमु लोकं विदाने ॥३८॥  
स्वासस्थे भवतमिन्दवे नो युजे वां ब्रह्म पूर्वं नमोभिः ।  
वि श्लोक एति पथ्येव सूरिः शृण्वन्तु विश्वे अमृतास एतत् ॥३९॥  
त्रीणि पदानि रुपो अन्वरोहच्चतुष्पदीमन्वेतद्व्रतेन ।  
अक्षरेण प्रति मिमीते अर्कमृतस्य नाभावभि सं पुनाति ॥४०॥ {१६}  
देवेभ्यः कमवृणीत मृत्युं प्रजायै किममृतं नावृणीत ।  
बृहस्पतिर्यज्ञमतनुत ऋषिः प्रियां यमस्तन्वमा रिरेच ॥४१॥  
त्वमग्न ईडितो जातवेदोऽवाङ्मव्यानि सुरभीणि कृत्वा ।  
प्रादाः पितृभ्यः स्वधया ते अक्षन् अद्धि त्वं देव प्रयता हवींषि ॥४२॥  
आसीनासो अरुणीनामुपस्थे रयिं धत्त दाशुषे मर्त्याय ।  
पुत्रेभ्यः पितरस्तस्य वस्वः प्र यच्छत त इहोर्जं दधात ॥४३॥  
अग्निष्वात्ताः पितर एह गच्छत सदःसदः सदत सुप्रणीतयः ।  
अत्तो हवींषि प्रयतानि बर्हिषि रयिं च नः सर्ववीरं दधात ॥४४॥  
उपहृता नः पितरः सोम्यासो बर्हिष्येषु निधिषु प्रियेषु ।  
त आ गमन्तु त इह श्रुवन्त्वधि ब्रुवन्तु तेऽवन्त्वस्मान् ॥४५॥  
ये नः पितुः पितरो ये पितामहा अनूजहिरे सोमपीथं वसिष्ठाः ।  
तेभिर्यमः सम्रराणो हवींष्युशन् उशान्द्विः प्रतिकाममत्तु ॥४६॥  
ये तातृषुर्देवत्रा जेहमाना होत्राविदः स्तोमतष्टासो अर्कः ।  
आग्ने याहि सहस्रं देववन्दैः सत्यैः कविभिर्ऋषिभिर्धर्मसद्भिः ॥४७॥  
ये सत्यासो हविरदो हविष्पा इन्द्रेण देवैः सरथं तुरेण ।  
आग्ने याहि सुविदत्रेभिरवाङ्मपैः पूर्वैर्ऋषिभिर्धर्मसद्भिः ॥४८॥  
उप सर्प मातरं भूमिमेतामुरुव्यचसं पृथिवीं सुशेवाम् ।  
ऊर्णम्रदाः पृथिवी दक्षिणावत एषा त्वा पातु प्रपथे पुरस्तात् ॥४९॥  
उच्छवञ्चस्व पृथिवि मा नि बाधथाः सूपायनास्मै भव सूपसर्पणा ।  
माता पुत्रं यथा सिचाभ्येनं भूम ऊर्णुहि ॥५०॥ {१७}  
उच्छवञ्चमाना पृथिवी सु तिष्ठतु सहस्रं मित उप हि श्रयन्ताम् ।  
ते गृहासो घृतश्रुतः स्योना विश्वाहास्मै शरणाः सन्त्वत्र ॥५१॥  
उत्ते स्तभ्नामि पृथिवीं त्वत्परीमं लोगं निदधन् मो अहं रिषम् ।  
एतां स्थूणां पितरो धारयन्ति ते तत्र यमः सादना ते कृणोतु ॥५२॥  
इममग्ने चमसं मा वि जिह्वरः प्रियो देवानामुत सोम्यानाम् ।  
अयं यश्चमसो देवपानस्तस्मिन् देवा अमृता मादयन्ताम् ॥५३॥  
अथर्वा पूर्णं चमसं यमिन्द्रायाबिभर्वाजिनीवते ।  
तस्मिन् कृणोति सुकृतस्य भक्षं तस्मिन् इन्दुः पवते विश्वदानिम् ॥५४॥  
यत्ते कृष्णः शकुन आतुतोद पिपीलः सर्प उत वा श्वापदः ।  
अग्निर्द्विश्वादगदं कृणोतु सोमश्च यो ब्राह्मणामाविवेश ॥५५॥  
पयस्वतीरोषधयः पयस्वन् मामकं पयः ।  
अपां पयसो यत्पयस्तेन मा सह शुम्भतु ॥५६॥  
इमा नारीरविधवाः सुपत्नीराञ्जनेन सर्पिषा सं स्पृशन्ताम् ।  
अनश्रवो अनमीवाः सुरत्ना आ रोहन्तु जनयो योनिमग्रे ॥५७॥  
सं गच्छस्व पितृभिः सं यमेनेष्टापूरतेन परमे व्योमन् ।



हित्वावद्यं पुनरस्तमेहि सं गच्छतां तन्वा सुवर्चाः ॥५८॥  
 ये नः पितुः पितरो ये पितामहा य आविविशुरुर्वन्तरिक्षम् ।  
 तेभ्यः स्वरादसुनीतिर्नो अद्य वथावशं तन्वः कल्पयाति ॥५९॥  
 शं ते नीहारी भवतु शं ते पुष्पाव शीयताम् ।  
 शीतिके शीतिकावति ह्लादिके ह्लादिकावति ।  
 मण्डूक्यप्सु शं भुव इमं स्वग्निं शमय ॥६०॥ {१८}  
 विवस्वान् नो अभयं कृणोतु यः सुत्रामा जीरदानुः सुदानुः ।  
 इहेमे वीरा बहवो भवन्तु गोमदश्ववन् मय्यस्तु पुष्टम् ॥६१॥  
 विवस्वान् नो अमृतत्वे दधातु परैतु मृत्युरमृतं न ऐतु ।  
 इमान् रक्षतु पुरुषान् आ जरिम्णो मां स्वेषामसवो यमं गुः ॥६२॥  
 यो दधे अन्तरिक्षे न मद्वा पितृणां कविः प्रमतिर्मतीनाम् ।  
 तमर्चत विश्वमित्रा हविर्भिः स नो यमः प्रतरं जीवसे धात् ॥६३॥  
 आ रोहत दिवमुत्तमामृषयो मा बिभीतन ।  
 सोमपाः सोमपायिन इदं वः क्रियते हविरगन्म ज्योतिरुत्तमम् ॥६४॥  
 प्र केतुना बृहता भात्यग्निरा रोदसी वृषभो रोरवीति ।  
 दिवश्चिदन्तादुपमामुदानडपामुपस्थे महिषो ववर्ध ॥६५॥  
 नाके सुपर्णमुप यत्पतन्तं हृदा वेनन्तो अभ्यचक्षत त्वा ।  
 हिरण्यपक्षं वरुणस्य दूतं यमस्य योनौ शकुनं भुरन्युम् ॥६६॥  
 इन्द्र क्रतुं न आ भर पिता पुत्रेभ्यो यथा ।  
 शिक्षा णो अस्मिन् पुरुहूत यामनि जीवा ज्योतिरशीमहि ॥६७॥  
 अपूपापिहितान् कुम्भान् यांस्ते देवा अधारयन् ।  
 ते ते सन्तु स्वधावन्तो मधुमन्तो घृतश्रुतः ॥६८॥  
 यास्ते धाना अनुकिरामि तिलमिश्रा स्वधावतीः ।  
 तास्ते सन्तु विभ्वीः प्रभ्वीस्तास्ते यमो राजानु मन्यताम् ॥६९॥  
 पुनर्देहि वनस्पते य एष निहितस्त्वयि ।  
 यथा यमस्य सादन आसातौ विदथा वदन् ॥७०॥  
 आ रभस्व जातवेदस्तेजस्वद्धरो अस्तु ते ।  
 शरीरमस्य सं दहाथैनं देहि सुकृताम् लोके ॥७१॥  
 ये ते पूर्वे परागता अपरे पितरश्च ये ।  
 तेभ्यो घृतस्य कुल्यैतु शतधारा व्युन्दती ॥७२॥  
 एतदा रोह वय उन्मृजानः स्वा इह बृहदु दीदयन्ते ।  
 अभि प्रेहि मध्यतो माप हास्थाः पितृनां लोकं प्रथमो यो अत्र ॥७३॥ {१९}

18.4

आ रोहत जनित्रीं जातवेदसः पितृयानैः सं व आ रोहयामि ।  
 अवाङ्मव्येषितो हव्यवाह ईजानं युक्ताः सुकृतां धत्त लोके ॥१॥  
 देवा यज्ञमृतवः कल्पयन्ति हविः पुरोडाशं सुचो यज्ञायुधानि ।  
 तेभिर्याहि पथिभिर्देवयानैर्यैरीजानाः स्वर्गं यन्ति लोकम् ॥२॥  
 ऋतस्य पन्थामनु पश्य साध्वङ्गिरसः सुकृतो येन यन्ति ।  
 तेभिर्याहि पथिभिः स्वर्गं यत्रादित्या मधु भक्षयन्ति तृतीये नाके अधि वि श्रयस्व ॥३॥  
 त्रयः सुपर्णा उपरस्य मायू नाकस्य पृष्ठे अधि विष्टपि श्रिताः ।  
 स्वर्गा लोका अमृतेन विष्ठा इषमूर्जं यजमानाय दुहाम् ॥४॥  
 जुहूर्दाधार द्यामुपभृदन्तरिक्षं ध्रुवा दाधार पृथिवीं प्रतिष्ठाम् ।  
 ध्रुव आ रोह पृथिवीं विश्वभोजसमन्तरिक्षमुपभृदा क्रमस्व ।  
 प्रतीमां लोका घृतपृष्ठाः स्वर्गाः कामं कामं यजमानाय दुहाम् ॥५॥  
 ध्रुव आ रोह पृथिवीं विश्वभोजसमन्तरिक्षमुपभृदा क्रमस्व ।  
 जुहु द्यां गच्छ यजमानेन साकं सुवेण वत्सेन दिशः प्रपीनाः सर्वा धुक्वाहृण्यमानः ॥६॥  
 तीर्थस्तरन्ति प्रवतो महीरिति यज्ञकृतः सुकृतो येन यन्ति ।  
 अत्रादधुर्यजमानाय लोकं दिशो भूतानि यदकल्पयन्त ॥७॥  
 अङ्गिरसामयनं पूर्वं अग्निरादित्यानामयनं गार्हपत्यो दक्षिणानामयनं दक्षिणाग्निः ।  
 महिमानमग्नेर्विहितस्य ब्रह्मणा समङ्गः सर्व उप याहि शमः ॥८॥  
 पूर्वं अग्निष्ट्वा तपतु शं पुरस्ताच्छं पश्चात्तपतु गार्हपत्यः ।  
 दक्षिणाग्निष्टे तपतु शर्म वर्मात्तरतो मध्यतो अन्तरिक्षाद्दिशोदिशो अग्ने परि पाहि घोरात् ॥९॥  
 यूयमग्ने शंतमाभिस्तनूभिरीजानमभि लोकं स्वर्गम् ।  
 अश्वा भूत्वा पृष्टिवाहो वहाथ यत्र देवैः सधमादं मदन्ति ॥१०॥ {२०}  
 शमग्ने पश्चात्तप शं पुरस्ताच्छमुत्तराच्छमधरात्तपैनम् ।  
 एकस्त्रेधा विहितो जातवेदः सम्यगेनं धेहि सुकृताम् लोके ॥११॥  
 शमग्नयः समिद्धा आ रभन्तां प्राजापत्यं मेध्यं जातवेदसः ।  
 शृतं कृण्वन्त इह माव चिक्षिपन् ॥१२॥  
 यज्ञ एति विततः कल्पमान ईजानमभि लोकं स्वर्गम् ।  
 तमग्नयः सर्वहुतं जुषन्तां प्राजापत्यं मेध्यं जातवेदसः ॥१३॥  
 ईजानश्चितमारुक्षदग्निं नाकस्य पृष्ठादिवमुत्पतिष्यन् ।  
 तस्मै प्र भाति नभसो ज्योतिषीमान्स्वर्गः पन्थाः सुकृते देवयानः ॥१४॥  
 अग्निर्होताध्वर्युष्टे बृहस्पतिरिन्द्रो ब्रह्मा दक्षिणतस्ते अस्तु ।

हुतोऽयं संस्थितो यज्ञ एति यत्र पूर्वमयनं हुतानाम् ॥१५॥  
 अपूपवान् क्षीरवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥१६॥  
 अपूपवान् दधिवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥१७॥  
 अपूपवान् द्रप्सवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥१८॥  
 अपूपवान् घृतवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥१९॥  
 अपूपवान् मांसवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥२०॥ {२१}  
 अपूपवान् अन्नवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥२१॥  
 अपूपवान् मधुमांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥२२॥  
 अपूपवान् रसवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥२३॥  
 अपूपवान् अपवांश्चरुरेह सीदतु ।  
 लोककृतः पथिकृतो यजामहे ये देवानां हुतभागा इह स्थ ॥२४॥  
 अपूपापिहितान् कुम्भान् यांस्ते देवा अधारयन् ।  
 ते ते सन्तु स्वधावन्तो मधुमन्तो घृतश्रुतः ॥२५॥  
 यास्ते धाना अनुकिरामि तिलमिश्राः स्वधावतीः ।  
 तास्ते सन्तूद्भवीः प्रभ्वीस्तास्ते यमो राजानु मन्यताम् ॥२६॥  
 अक्षितिं भूयसीम् ॥२७॥  
 द्रप्सश्चस्कन्द पृथिवीमनु ग्रामिमं च योनिमनु यश्च पूर्वः ।  
 समानं योनिमनु संचरन्तं द्रप्सं जुहोम्यनु सप्त होत्राः ॥२८॥  
 शतधारं वायुमर्कं स्वविदं नृचक्षसस्ते अभि चक्षते रयिम् ।  
 ये पुनन्ति प्र च यच्छन्ति सर्वदा ते दुहते दक्षिणां सप्तमातरम् ॥२९॥  
 कोशं दुहन्ति कलशं चतुर्बिलमिडां धेनुं मधुमतीं स्वस्तये ।  
 ऊर्जं मदन्तीमदितिं जनेष्वग्ने मा हिंसीः परमे व्योमन् ॥३०॥ {२२}  
 एतत्ते देवः सविता वासो ददाति भर्तवे ।  
 तत्त्वं यमस्य राज्ये वसानस्तार्प्यं चर ॥३१॥  
 धाना धेनुरभवद्वत्सो अस्यास्तेलोऽभवत् ।  
 तां वै यमस्य राज्ये अक्षितामुप जीवति ॥३२॥  
 एतास्ते असौ धेनवः कामदुघा भवन्तु ।  
 एनीः श्येनीः सरूपा विरूपास्तिलवत्सा उप तिष्ठन्तु त्वात्र ॥३३॥  
 एनीर्धाना हरिणीः श्येनीरस्य कृष्णा धाना रोहिणीधेनवस्ते ।  
 तिलवत्सा ऊर्जमस्मै दुहाना विश्वाहा सन्त्वनपस्फुरन्तीः ॥३४॥  
 वैश्वानरे हविरिदं जुहोमि साहस्रं शतधारमुत्सम् ।  
 स बिभर्ति पितरं पितामहान् प्रपितामहान् बिभर्ति पिन्वमानः ॥३५॥  
 सहस्रधारं शतधारमुत्समक्षितं व्यच्यमानं सलिलस्य पृष्ठे ।  
 ऊर्जं दुहानमनपस्फुरन्तमुपासते पितरः स्वधाभिः ॥३६॥  
 इदं कसाम्बु चयनेन चितं तत्सजाता अव पश्यतेत ।  
 मर्त्योऽयममृतत्वमेति तस्मै गृहान् कृणुत यावत्सबन्धु ॥३७॥  
 इहैवैधि धनसनिरिहचित्त इहक्रतुः ।  
 इहैधि वीर्यवत्तरो वयोधा अपराहतः ॥३८॥  
 पुत्रं पौत्रमभितर्पयन्तीरापो मधुमतीरिमाः ।  
 स्वधां पितृभ्यो अमृतं दुहाना आपो देवीरुभयांस्तर्पयन्तु ॥३९॥  
 आपो अग्निं प्र हिणुत पितरुपेमं यज्ञं पितरो मे जुषन्ताम् ।  
 आसीनामूर्जमुप ये सचन्ते तै नो रयिं सर्ववीरं नि यच्छान् ॥४०॥ {२३}  
 समिन्धते अमर्त्यं हव्यवाहं घृतप्रियम् ।  
 स वेद निहितान् निधीन् पितृन् परावतो गतान् ॥४१॥  
 यं ते मन्थं यमोदनं यन् मांसं निपृणामि ते ।  
 ते ते सन्तु स्वधावन्तो मधुमन्तो घृतश्रुतः ॥४२॥  
 यास्ते धाना अनुकिरामि तिलमिश्राः स्वधावतीः ।  
 तास्ते सन्तूद्भवीः प्रभ्वीस्तास्ते यमो राजानु मन्यताम् ॥४३॥  
 इदं पूर्वमपरं नियानं येना ते पूर्वं पितरः परेताः ।  
 पुरोगवा ये अभिसाचो अस्य तै त्वा वहन्ति सुकृतामु लोकम् ॥४४॥  
 सरस्वतीं देवयन्तो हवन्ते सरस्वतीमध्वरे तायमाने ।  
 सरस्वतीं सुकृतो हवन्ते सरस्वती दाशुषे वार्यं दात् ॥४५॥  
 सरस्वतीं पितरो हवन्ते दक्षिणा यज्ञमभिनक्षमाणाः ।  
 आसद्यास्मिन् बर्हिषि मादयध्वमनमीवा इष आ धेह्यास्मे ॥४६॥  
 सरस्वति या सरथं ययाथोक्थैः स्वधाभिर्देवि पितृभिर्मदन्ती ।  
 सहस्रार्घमिडो अत्र भागं रायस्पोषं यजमानाय धेहि ॥४७॥

पृथिवीं त्वा पृथिव्यामा वेशयामि देवो नो धाता प्र तिरात्यायुः ।  
 परापरेता वसुविद्वो अस्त्वधा मृताः पितृषु सं भवन्तु ॥४८॥  
 आ प्र च्यवेथामप तन् मृजेथां यद्दामभिभा अत्रोचुः ।  
 अस्मादेतमच्च्यौ तद्वशीयो दातुः पितृष्विहभोजनौ मम ॥४९॥  
 एयमगन् दक्षिणा भद्रतो ना अनेन दत्ता सुदुघा वयोधाः ।  
 यौवने जीवान् उपपृञ्चती जरा पितृभ्य उपसंपराणयादिमान् ॥५०॥ {२४}  
 इदं पितृभ्यः प्र भ्रामि बर्हिर्जीवं देवेभ्य उत्तरं स्तुणामि ।  
 तदा रोह पुरुष मेध्यो भवन् प्रति त्वा जानन्तु पितरः परेतम् ॥५१॥  
 एदं बर्हिरसदो मेध्योऽभूः प्रति त्वा जानन्तु पितरः परेतम् ।  
 यथापरु तन्वं सं भरस्व गात्राणि ते ब्रह्मणा कल्पयामि ॥५२॥  
 पर्णो राजापिधानं चरूणामूर्जो बलं सह ओजो न आगन् ।  
 आयुर्जीवेभ्यो विदधद्दीर्घायुत्वाय शतशारदाय ॥५३॥  
 ऊर्जा भागो य इमं जजानाश्मान्नानामाधिपत्यं जगाम ।  
 तमर्चत विश्वमित्रा हविर्भिः स नो यमः प्रतरं जीवसे धात् ॥५४॥  
 यथा यमाय हर्म्यमवपन् पञ्च मानवाः ।  
 एवा वपामि हर्म्यं यथा मे भूरयोऽसत ॥५५॥  
 इदं हिरण्यं बिभृहि यत्ते पिताभिः पुरा ।  
 स्वर्गं यतः पितुर्हस्तं निर्मृष्टि दक्षिणम् ॥५६॥  
 ये च जीवा ये च मृता ये जाता ये च यज्ञियाः ।  
 तेभ्यो घृतस्य कुल्यैतु मधुधारा व्युन्दती ॥५७॥  
 वृषा मतीनां पवते विचक्षणः सूरौ अह्नां प्रतरीतोषसां दिवः ।  
 प्राणः सिन्धूनां कलशामचिक्रददिन्द्रस्य हार्दिमाविशन् मनीषया ॥५८॥  
 त्वेषस्ते धूम ऊर्णोतु दिवि षं छुक्र आततः ।  
 सूरौ न हि द्युता त्वं कृपा पावक रोचसे ॥५९॥  
 प्र वा एतीन्दुरिन्द्रस्य निष्कृतिं सखा सख्युर्न प्र मिनाति संगिरः ।  
 मर्य इव योषाः समर्षसे सोमः कलशे शतयामना पथा ॥६०॥ {२५}  
 अक्षन् अमीमदन्त ह्यव प्रियामधूषत ।  
 अस्तोषत स्वभानवो विप्रा यविष्ठा ईमहे ॥६१॥  
 आ यात पितरः सोम्यासो गम्भीरैः पथिभिः पितृयाणैः ।  
 आयुरस्मभ्यं दधतः प्रजां च रायश्च पोषैरभि नः सचध्वम् ॥६२॥  
 परा यात पितरः सोम्यासो गम्भीरैः पथिभिः पूर्याणैः ।  
 अधा मासि पुनरा यात नो गृहान् हविरत्तुं सुप्रजसः सुवीराः ॥६३॥  
 यद्वो अग्निरजहादेकमङ्गं पितृलोकं गमयं जातवेदाः ।  
 तद्व एतत्पुनरा प्याययामि साङ्गाः स्वर्गे पितरो मादयध्वम् ॥६४॥  
 अभूदूतः प्रहितो जातवेदाः सायं न्यह्न उपवन्द्यो नृभिः ।  
 प्रादाः पितृभ्यः स्वधया ते अक्षन् अद्धि त्वं देव प्रयता हवींषि ॥६५॥  
 असौ हा इह ते मनः ककुत्सलमिव जामयः ।  
 अभ्येनं भूम ऊर्णुहि ॥६६॥  
 शुम्भन्तां लोकाः पितृषदनाः पितृषदने त्वा लोक आ सादयामि ॥६७॥  
 ये अस्माकं पितरस्तेषां बर्हिरसि ॥६८॥  
 उदुत्तमं वरुण पाशमस्मदवाधमं श्रथाय ।  
 अधा वयमादित्य व्रते तवानागसो अदितये स्याम ॥६९॥  
 प्रास्मत्पाशान् वरुण मुञ्च सर्वान् यैः समामे बध्यते यैर्व्यामि ।  
 अधा जीवेम शरदं शतानि त्वया राजन् गुपिता रक्षमाणाः ॥७०॥ {२६}  
 अग्नये कव्यवाहनाय स्वधा नमः ॥७१॥  
 सोमाय पितृमते स्वधा नमः ॥७२॥  
 पितृभ्यः सोमवद्भ्यः स्वधा नमः ॥७३॥  
 यमाय पितृमते स्वधा नमः ॥७४॥  
 एतत्ते प्रततामह स्वधा ये च त्वामनु ॥७५॥  
 एतत्ते ततामह स्वधा ये च त्वामनु ॥७६॥  
 एतत्ते तत स्वधा ॥७७॥  
 स्वधा पितृभ्यः पृथिविषद्भ्यः ॥७८॥  
 स्वधा पितृभ्यो अन्तरिक्षसद्भ्यः ॥७९॥  
 स्वधा पितृभ्यो दिविषद्भ्यः ॥८०॥ {२७}  
 नमो वः पितर ऊर्जे नमो वः पितरो रसाय ॥८१॥  
 नमो वः पितरो भामाय नमो वः पितरो मन्यवे ॥८२॥  
 नमो वः पितरो यद्द्वोरं तस्मै नमो वः पितरो यत्क्रूरं तस्मै ॥८३॥  
 नमो वः पितरो यच्छिवं तस्मै नमो वः पितरो यत्स्थीनं तस्मै ॥८४॥  
 नमो वः पितरः स्वधा वः पितरः ॥८५॥  
 येऽत्र पितरः पितरो येऽत्र यूयं स्थ युष्मांस्तेऽनु यूयं तेषां श्रेष्ठा भूयास्थ ॥८६॥  
 य इह पितरो जीवा इह वयं स्मः ।  
 अस्मांस्तेऽनु वयं तेषां श्रेष्ठा भूयास्म ॥८७॥  
 आ त्वाग्न इधीमहि द्युमन्तं देवाजरम् ।  
 यद्द सा ते पनीयसी समिदीदयति द्यवि ।

इषं स्तोतृभ्य आ भर ॥८८॥  
चन्द्रमा अप्स्वन्तरा सुपर्णो धावते दिवि ।  
न वो हिरण्यनेमयः पदं विन्दन्ति विद्युतो वित्तं मे अस्य रोदसी ॥८९॥ {२८}

19.1

संसं स्रवन्तु नद्यः सं वाताः सं पतत्रिणः ।  
यज्ञमिमं वर्धयता गिरः संसाव्येण हविषा जुहोमि ॥१॥  
इमं होमा यज्ञमवतेमं संसावणा उत यज्ञमिमं वर्धयता गिरः संसाव्येण हविषा जुहोमि ॥२॥  
रूपंरूपं वयोवयः संरभ्यैनं परि ष्वजे ।  
यज्ञमिमं चतस्रः प्रदिशो वर्धयन्तु संसाव्येण हविषा जुहोमि ॥३॥

19.2

शं त आपो हैमवतीः शमु ते सन्तूत्स्याः ।  
शं ते सनिष्यदा आपः शमु ते सन्तु वर्ष्याः ॥१॥  
शं त आपो धन्वन्याः शं ते सन्तु नृप्याः ।  
शं ते खनित्रिमा आपः शं याः कुम्भभिराभृताः ॥२॥  
अनभ्रयः खनमाना विप्रा गम्भीरे अपसः ।  
भिषगभ्यो भिषक्तरा आपो अछा वदामसि ॥३॥  
अपामह दिव्यानामपां स्रोतस्यानाम् ।  
अपामह प्रणेजनेऽश्वो भवथ वाजिनः ॥४॥  
ता अपः शिवा अपोऽयक्ष्मंकरणीरपः ।  
यथैव तृप्यते मयस्तास्त आ दत्त भेसजीः ॥५॥

19.3

दिवस्पृथिव्याः पर्यन्तरिक्षाद्द्वनस्पतिभ्यो अद्योषधीभ्यः ।  
यत्रयत्र विभृतो जातवेदास्तत स्तुतो जुषमाणो न एहि ॥१॥  
यस्ते अप्सु महिमा यो वनेषु य ओषधीषु पशुष्वप्स्वन्तः ।  
अग्ने सर्वास्तन्वः सं रभस्व ताभिर्न एहि द्रविणोदा अजस्रः ॥२॥  
यस्ते देवेषु महिमा स्वर्गो या ते तनुः पितृष्वविवेश ।  
पुष्टिर्या ते मनुष्येषु पप्रथेऽग्ने तया रयिमस्मासु धेहि ॥३॥  
श्रुत्कर्णाय कवये वेद्याय वचोभिर्वाकैरुप यामि रातिम् ।  
यतो भयमभयं तन् नो अस्त्वव देवानां यज हेडो अग्ने ॥४॥

19.4

यामाहुतिं प्रथमामथर्वा या जाता या हव्यमकृणोज्जातवेदाः ।  
तां त एतां प्रथमो जोहवीमि ताभिष्टुप्तो वहतु हव्यमग्निरग्नये स्वाह ॥१॥  
आकृतिं देवीं सुभगां पुरो दधे चित्तस्य माता सुहवा नो अस्तु ।  
यामाशामेमि केवली सा मे अस्तु विदेयमेनां मनसि प्रविष्टाम् ॥२॥  
आकृत्या नो बृहस्पत आकृत्या न उपा गहि ।  
अथो भगस्य नो धेहाथो नः सुहवो भव ॥३॥  
बृहस्पतिर्म आकृतिमाङ्गिरसः प्रति जानातु वाचमेताम् ।  
यस्य देवा देवताः संबभूवुः स सुप्रणीताः कामो अन्वेत्वस्मान् ॥४॥

19.5

इन्द्रो राजा जगतश्चर्षणीनामधि क्षमि विषुरूपं यदस्ति ।  
ततो ददाति दाशुषे वसूनि चोदद्राध उपस्तुतश्चिदर्वाक् ॥१॥

19.6

सहस्रबाहुः पुरुषः सहस्राक्षः सहस्रपात् ।  
स भूमि विश्वतो वृत्वात्यतिष्ठदशाङ्गुलम् ॥१॥  
त्रिभिः पद्भिर्दामिरोहत्यादस्येहाभवत्पुनः ।  
तथा व्यक्रामद्विष्वडशनानशने अनु ॥२॥  
तावन्तो अस्य महिमानस्ततो ज्यायांश्च पूरुषः ।  
पादोऽस्य विश्वा भूतानि त्रिपादस्यामृतं दिवि ॥३॥  
पुरुष एवेदं सर्वं यद्भूतं यच्च भाव्यम् ।  
उतामृतत्वस्येश्वरो यदन्येनाभवत्सह ॥४॥  
यत्पुरुषं व्यदधुः कतिधा व्यकल्पयन् ।  
मुखं किमस्य किं बाहू किमूरू पादा उच्यते ॥५॥  
ब्राह्मणोऽस्य मुखमासीद्बाहू राजन्योऽभवत् ।  
मध्यं तदस्य यद्वैश्यः पदभ्यां शूद्रो अजायत ॥६॥  
चन्द्रमा मनसो जातश्चक्षुः सूर्यो अजायत ।

मुखादिन्द्रश्चाग्निश्च प्राणाद्वायुरजायत ॥७॥  
 नाभ्या आसीदन्तरिक्षं शीष्णो द्यौः समवर्तत ।  
 पद्भ्यां भूमिर्दिशः श्रोत्रात्तथा लोकामकल्पयन् ॥८॥  
 विराडग्रे समभवद्विराजो अधि पूरुषः ।  
 स जातो अत्यरिच्यत पश्चाद्भूमिमथो पुरः ॥९॥  
 यत्पुरुषेण हविषा देवा यज्ञमन्तन्वत ।  
 वसन्तो अस्यासीदाज्यं ग्रीष्म इध्मः शरद्धविः ॥१०॥  
 तं यज्ञं प्रावृषा प्रीक्षन् पुरुषं जातमग्रशः ।  
 तेन देवा अयजन्त साध्या वसवश्च ये ॥११॥  
 तस्मादश्वा अजायन्त ये च के चोभयादतः ।  
 गावो ह जज्ञिरे तस्मात्तस्माज्जाता अजावयः ॥१२॥  
 तस्माद्यज्ञात्सर्वहुत ऋचः सामानि जज्ञिरे ।  
 छन्दो ह जज्ञिरे तस्माद्यजुस्तस्मादजायत ॥१३॥  
 तस्माद्यज्ञात्सर्वहुतः संभूतं पृषदाज्यम् ।  
 पशूस्तांश्चक्रे वायव्यान् आरण्या ग्राम्याश्च ये ॥१४॥  
 सप्तास्यासन् परिधयस्त्रिः सप्त समिधः कृताः ।  
 देवा यद्यज्ञं तन्वाना अबध्नन् पुरुषं पशुम् ॥१५॥  
 मूर्ध्नो देवस्य बृहतो अंशवः सप्त सप्ततीः ।  
 राज्ञः सोमस्याजायन्त जातस्य पुरुषादधि ॥१६॥

19.7

चित्राणि साकं दिवि रोचनानि सरीसृपाणि भुवने जवानि ।  
 तुर्मिशं सुमतिमिच्छमानो अहानि गीर्भिः सपर्यामि नाकम् ॥१॥  
 सुहवमग्ने कृत्तिका रोहिणी चास्तु भद्रं मृगशिरः शमाद्रा ।  
 पुनर्वसू सूनृता चारु पुष्यो भानुराश्लेषा अयनं मघा मे ॥२॥  
 पुण्यं पूर्वा फल्गुन्यौ चात्र हस्तश्चित्रा शिवा स्वाति सुखो मे अस्तु ।  
 राधे विशाखे सुहवानुराधा ज्येष्ठा सुनक्षत्रमरिष्ट मूलम् ॥३॥  
 अन्नं पूर्वा रासतां मे अषाढा ऊर्जं देव्युत्तरा आ वहन्तु ।  
 अभिर्जिन् मे रासतां पुण्यमेव श्रवणः श्रविष्ठाः कुर्वतां सुपुष्टिम् ॥४॥  
 आ मे महच्छतभिषग्वरीय आ मे द्वया प्रोष्ठपदा सुशर्म ।  
 आ रेवती चाश्वयुजौ भगं म आ मे रयिं भरण्य आ वहन्तु ॥५॥

19.8

यानि नक्षत्राणि दिव्यन्तरिक्षे अप्सु भूमौ यानि नगेषु दिक्षु ।  
 प्रकल्पयंश्चन्द्रमा यान्येति सर्वाणि ममैतानि शिवानि सन्तु ॥१॥  
 अष्टाविंशानि शिवानि शग्मानि सह योगं भजन्तु मे ।  
 योगं प्र पद्ये क्षेमं च क्षेमं प्र पद्ये योगं च नमोऽहोरात्राभ्यामस्तु ॥२॥  
 स्वस्तितं मे सुप्रातः सुसायं सुदिवं सुमृगं सुशकुनं मे अस्तु ।  
 सुहवमग्ने स्वस्त्यमर्त्यं गत्वा पुनरायाभिनन्दन् ॥३॥  
 अनुहवं परिहवं परिवादं परिक्षवम् ।  
 सर्वैर्म रित्तकुम्भान् परा तान्त्सवितः सुव ॥४॥  
 अपपापं परिक्षवं पुण्यं भक्षीमहि क्षवम् ।  
 शिवा ते पाप नासिकां पुण्यगश्वाभि मेहताम् ॥५॥  
 इमा या ब्रह्मणस्पते विषुचीर्वात ईरते ।  
 सध्रीचीरिन्द्र ताः कृत्वा मह्यं शिवतमास्कृधि ॥६॥  
 स्वस्ति नो अस्त्वभयं नो अस्तु नमोऽहोरात्राभ्यामस्तु ॥७॥

19.9

शान्ता द्यौः शान्ता पृथिवी शान्तमिदमुर्वन्तरिक्षम् ।  
 शान्ता उदन्वतीरापः शान्ता नः सन्त्वोषधीः ॥१॥  
 शान्तानि पूर्वरूपाणि शान्तं नो अस्तु कृताकृतम् ।  
 शान्तं भूतं च भव्यं च सर्वमेव शमस्तु नः ॥२॥  
 इयं या परमेष्ठिनी वाग्देवी ब्रह्मसंशिता ।  
 ययैव ससृजे घोरं तयैव शान्तिरस्तु नः ॥३॥  
 इदं यत्परमेष्ठिनं मनो वां ब्रह्मसंशितम् ।  
 येनैव ससृजे घोरं तेनैव शान्तिरस्तु नः ॥४॥  
 इमानि यानि पञ्चेन्द्रियानि मनःषष्ठानि मे हृदि ब्रह्मणा संशितानि ।  
 यैरेव ससृजे घोरं तैरेव शान्तिरस्तु नः ॥५॥  
 शं नो मित्रः शं वरुणः शं विष्णुः शं प्रजापतिः ।  
 शं न इन्द्रो बृहस्पतिः शं नो भवत्वयमा ॥६॥  
 शं नो मित्रः शं वरुणः शं विवस्वां छमन्तकः ।  
 उत्पाताः पार्थिवान्तरिक्षाः शं नो दिविचरा ग्रहाः ॥७॥  
 शं नो भूमिर्वेप्यमाना शमुल्का निर्हतं च यत् ।  
 शं गावो लोहितक्षीराः शं भूमिरव तीर्यतीः ॥८॥

नक्षत्रमुल्काभिहतं शमस्तु नः शं नोऽभिचाराः शमु सन्तु कृत्याः ।  
 शं नो निखाता वल्गाः शमुल्का देशोपसर्गाः शमु नो भवन्तु ॥१॥  
 शं नो ग्रहाश्चान्द्रमसाः शमादित्यश्च राहुणा ।  
 शं नो मृत्युर्धूमकेतुः शं रुद्रास्तिग्मतैजसः ॥१०॥  
 शं रुद्राः शं वसवः शमादित्याः शमग्नयः ।  
 शं नो महर्षयो देवाः शं देवाः शं बृहस्पतिः ॥११॥  
 ब्रह्म प्रजापतिर्धाता लोका वेदाः सप्तऋषयोऽग्नयः ।  
 तैर्म कृतं स्वस्त्ययनमिन्द्रो मे शर्म यच्छतु ब्रह्मा मे शर्म यच्छतु ।  
 विश्वे मे देवाः शर्म यच्छन्तु सर्वे मे देवाः शर्म यच्छन्तु ॥१२॥  
 यानि कानि चिच्छान्तानि लोके सप्तऋषयो विदुः ।  
 सर्वाणि शं भवन्तु मे शं मे अस्त्वभयं मे अस्तु ॥१३॥  
 पृथिवी शान्तिरन्तरिक्षं शान्तिर्द्वाः शान्तिरापः शान्तिरोषधयः शान्तिर्वनस्पतयः शान्तिर्विश्वे मे देवाः शान्तिः सर्वे मे देवाः शान्तिः  
 शान्तिः शान्तिः शान्तिभिः ।  
 यदिह घोरं यदिह क्रूरं यदिह पापं तच्छान्तं तच्छिवं सर्वमेव शमस्तु नः ॥१४॥

#### 19.10

शं न इन्द्राग्नी भवतामवोभिः शं न इन्द्रावरुणा रातहव्या ।  
 शमिन्द्रासोमा सुविताय शं योः शं न इन्द्रापूषणा वाजसातौ ॥१॥  
 शं नो भगः शमु नः शंसो अस्तु शं नः पुरंधिः शमु सन्तु रायः ।  
 शं नः सत्यस्य सुयमस्य शंसः शं नो अर्यमा पुरुजातो अस्तु ॥२॥  
 शं नो धाता शमु धर्ता नो अस्तु शं न उरुची भवतु स्वधाभिः ।  
 शं रोदसी बृहती शं नो अद्रिः शं नो देवानां सुहवानि सन्तु ॥३॥  
 शं नो अग्निर्ज्योतिरनीको अस्तु शं नो मित्रावरुणावश्विना शम् ।  
 शं नः सुकृतां सुकृतानि सन्तु शं न इषिरो अभि वातु वातः ॥४॥  
 शं नो द्यावापृथिवी पूर्वहृतौ शमन्तरिक्षं दृश्ये नो अस्तु ।  
 शं न ओषधीर्वनिनो भवन्तु शं नो रजसस्पतिरस्तु जिष्णुः ॥५॥  
 शं न इन्द्रो वसुभिर्देवो अस्तु शमादित्येर्भिवरुणः सुशंसः ।  
 शं नो रुद्रो रुद्रैर्भिर्जलाषः शं नस्त्वष्टा ग्नाभिरिह शृणोतु ॥६॥  
 शं नः सोमो भवतु ब्रह्म शं नः शं नो ग्रावाणः शमु सन्तु यज्ञाः ।  
 शं नः स्वरूनां मितयो भवन्तु शं नः प्रस्वः शं वस्तु वेदिः ॥७॥  
 शं नः सूर्य उरुचक्षा उदेतु शं नो भवन्तु प्रदिशश्चतस्रः ।  
 शं नः पर्वता ध्रुवयो भवन्तु शं नः सिन्धवः शमु सन्त्वापः ॥८॥  
 शं नो अदितिर्भवतु व्रतेभिः शं नो भवन्तु मरुतः स्वर्काः ।  
 शं नो विष्णुः शमु पूषा नो अस्तु शं नो भवित्रं शं वस्तु वायुः ॥९॥  
 शं नो देवः सविता त्रायमाणः शं नो भवन्तूषसो विभातीः ।  
 शं नः पर्जन्यो भवतु प्रजाभ्यः शं नः क्षेत्रस्य पतिरस्तु शंभुः ॥१०॥

#### 19.11

शं नः सत्यस्य पतयो भवन्तु शं नो अर्वन्तः शमु सन्तु गावः ।  
 शं न ऋभवः सुकृतः सुहस्ताः शं नो भवतु पितरो हवेषु ॥१॥  
 शं नो देवा विश्वदेवा भवन्तु शं सरस्वती सह धीभिरस्तु ।  
 शमभिषाचः शमु रातिषाचः शं नो दिव्याः पार्थिवाः शं नो अप्याः ॥२॥  
 शं नो अज एकपाद्देवो अस्तु शमहिर्बुध्न्यः शं समुद्रः ।  
 शं नो अपां नपात्येरुरस्तु शं नः पृष्णिर्भवतु देवगोपा ॥३॥  
 आदित्या रुद्रा वसवो जुषन्तामिदं ब्रह्म क्रियमाणं नवीयः ।  
 सृण्वन्तु नो दिव्याः पार्थिवासो गोजाता उत ये यज्ञियासः ॥४॥  
 ये देवानामृत्विजो यज्ञियासो मनोर्यजत्रा अमृता ऋतज्ञाः ।  
 ते नो रासन्तामुरुगायमद्य यूयं पात स्वस्तिभिः सदा नः ॥५॥  
 तदस्तु मित्रावरुणा तदग्ने शं योरस्मभ्यमिदमस्तु शस्तम् ।  
 अशीमहि गाधमुत प्रतिष्ठां नमो दिवे बृहते सादनाय ॥६॥

#### 19.12

उषा अप स्वसुस्तमः सं वर्तयति वर्तनिं सुजातता ।  
 अया वाजं देवहितं सनेम मदेम शतहिमाः सुवीराः ॥१॥

#### 19.13

इन्द्रस्य बाहू स्थविरौ वृषाणौ चित्रा इमा वृषभौ पारयिष्णू ।  
 तौ योक्षे प्रथमो योग आगते याभ्यां जितमसुराणां स्वर्यत् ॥१॥  
 आशुः शिशानो वृषभो न भीमो घनाघनः क्षोभणश्चर्षणीनाम् ।  
 संक्रन्दनोऽनिमिष एकवीरः शतं सेना अजयत्साकमिन्द्रः ॥२॥  
 संक्रन्दनेनानिमिषेण जिष्णुनायोध्येन दुश्र्यवनेन धृष्णुना ।  
 तदिन्द्रेण जयत तत्सहध्वं युधो नर इषुहस्तेन वृष्णा ॥३॥  
 स इषुहस्तैः स निषङ्गिर्भिवशी संस्रष्टा स युध इन्द्रो गणेन ।

संसृष्टजित्सोमपा बाहुशर्धुग्रधन्वा प्रतिहिताभिरस्ता ॥४॥  
 बलविज्ञायः स्थविरः प्रवीरः सहस्वान् वाजी सहमान उग्रः ।  
 अभिवीरो अभिषत्वा सहोजिज्जैत्रमिन्द्र रथमा तिष्ठ गोविदम् ॥५॥  
 इमं वीरमनु हर्षध्वमुग्रमिन्द्रं सखायो अनु सं रभध्वम् ।  
 ग्रामजितं गोजितं वज्रबाहुं जयन्तमज्म प्रमृणन्तमोजसा ॥६॥  
 अभि गोत्राणि सहसा गाहमानीऽदाय उग्रः शतमन्युरिन्द्रः ।  
 दुश्श्ववनः पूतनाषाडयोध्योऽस्माकं सेना अवतु प्र युत्सु ॥७॥  
 बृहस्पते परि दीया रथेन रक्षोहामित्रामपबाधमानः ।  
 प्रभञ्जंछत्रून् प्रमृणन् अमित्रान् अस्माकमेध्यविता तनूनाम् ॥८॥  
 इन्द्र एषां नेता बृहस्पतिर्दक्षिणा यज्ञः पुर एतु सोमः ।  
 देवसेनानामभिभञ्जतीनां जयन्तीनां मरुतो यन्तु मध्ये ॥९॥  
 इन्द्रस्य वृष्णो वरुणस्य राज्ञ आदित्यानां मरुतां शर्ध उग्रम् ।  
 महामनसां भुवनच्यवानां घोषो देवानां जयतामुदस्थात् ॥१०॥  
 अस्माकमिन्द्रः समृतेषु ध्वजेष्वस्माकं या इषवस्ता जयन्तु ।  
 अस्माकं वीरा उत्तरे भवन्त्वस्मान् देवासोऽवता हवेषु ॥११॥

19.14

इदमुच्छ्रेयोऽवसानमागां शिवे मे द्यावापृथिवी अभूताम् ।  
 असपत्नाः प्रदिशो मे भवन्तु न वै त्वा द्विष्मो अभयं नो अस्तु ॥१॥

19.15

यत इन्द्र भयामहे ततो नो अभयं कृधि ।  
 मघवंछग्धि तव त्वं न ऊतिभिर्वि द्विषो वि मृधो जहि ॥१॥  
 इन्द्रं वयमनूराधं हवामहेऽनु राध्यास्म द्विपदा चतुष्पदा ।  
 मा नः सेना अरुषीरुप गुर्विषूचिरिन्द्र द्रुहो वि नाशय ॥२॥  
 इन्द्रस्त्रातोत वृत्रहा परस्फानो वरेण्यः ।  
 स रक्षिता चरमतः स मध्यतः स पश्चात्स पुरस्तान् नो अस्तु ॥३॥  
 उरुं नो लोकमनु नेषि विद्वान्त्स्वर्यज्ज्योतिरभयं स्वस्ति ।  
 उग्रा त इन्द्र स्थविरस्य बाहु उप क्षयेम शरणा बृहन्ता ॥४॥  
 अभयं नः करत्यन्तरिक्षमभयं द्यावापृथिवी उभे इमे ।  
 अभयं पश्चादभयं पुरस्तादुत्तरादधरादभयं नो अस्तु ॥५॥  
 अभयं मित्रादभयममित्रादभयं ज्ञातादभयं पुरो यः ।  
 अभयं नक्तमभयं दिवा नः सर्वा आशा मम मित्रं भवन्तु ॥६॥

19.16

असपत्नं पुरस्तात्पश्चान् नो अभयं कृतम् ।  
 सविता मा दक्षिणत उत्तरान् मा शचीपतिः ॥१॥  
 दिवो मादित्या रक्षतु भूम्या रक्षन्त्वग्नयः ।  
 इन्द्राग्नी रक्षतां मा पुरस्तादश्विनावभितः शर्म यच्छताम् ।  
 तिरश्चीन् अघ्न्या रक्षतु जातवेदा भूतकृतो मे सर्वतः सन्तु वर्म ॥२॥

19.17

अग्निर्मा पातु वसुभिः पुरस्तात्तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥१॥  
 वायुर्मान्तरिक्षणैतस्या दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥२॥  
 सोमो मा रुद्रैर्दक्षिणाया दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥३॥  
 वरुणो मादित्यैरेतस्या दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥४॥  
 सूर्यो मा द्यावापृथिवीभ्यां प्रतीच्या दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥५॥  
 आपो मौषधीमतीरेतस्या दिशः पान्तु तासु क्रमे तासु श्रये तां पुरं प्रैमि ।  
 ता मा रक्षन्तु ता मा गोपायन्तु ताभ्य आत्मानं परि ददे स्वाहा ॥६॥  
 विश्वकर्मा मा सप्तऋषिभिरुदीच्या दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥७॥  
 इन्द्रो मा मरुत्वान् एतस्या दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥८॥  
 प्रजापतिर्मा प्रजननवान्त्सह प्रतिष्ठया ध्रुवाया दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥९॥  
 बृहस्पतिर्मा विश्वैर्देवैरुर्ध्वाया दिशः पातु तस्मिन् क्रमे तस्मिं छ्रये तां पुरं प्रैमि ।  
 स मा रक्षतु स मा गोपायतु तस्मा आत्मानं परि ददे स्वाहा ॥१०॥

19.18

अग्निं ते वसुवन्तमृच्छन्तु ।  
 ये माघायवः प्राच्या दिशोऽभिदासान् ॥१॥  
 वायुं तेऽन्तरिक्षवन्तमृच्छन्तु ।  
 ये माघायव एतस्या दिशोऽभिदासान् ॥२॥  
 सोमं ते रुद्रवन्तमृच्छन्तु ।  
 ये माघायवो दक्षिणाया दिशोऽभिदासान् ॥३॥  
 वरुणं त आदित्यवन्तमृच्छन्तु ।  
 ये माघायव एतस्या दिशोऽभिदासान् ॥४॥  
 सूर्यं ते द्यावापृथिवीवन्तमृच्छन्तु ।  
 ये माघायव प्रतीच्या दिशोऽभिदासान् ॥५॥  
 अपस्त ओषधीमतीर्ऋच्छन्तु ।  
 ये माघायव एतस्या दिशोऽभिदासान् ॥६॥  
 विश्वकर्माणं ते सप्तऋषिवन्तमृच्छन्तु ।  
 ये माघायव उदीच्या दिशोऽभिदासान् ॥७॥  
 इन्द्रं ते मरुत्वन्तमृच्छन्तु ।  
 ये माघायव एतस्या दिशोऽभिदासान् ॥८॥  
 प्रजापतिं ते प्रजननवन्तमृच्छन्तु ।  
 ये माघायवो ध्रुवाया दिशोऽभिदासान् ॥९॥  
 बृहस्पतिं ते विश्वदेववन्तमृच्छन्तु ।  
 ये माघायव ऊर्ध्वाया दिशोऽभिदासान् ॥१०॥

19.19

मित्रः पृथिव्योदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥१॥  
 वायुरन्तरिक्षेणोदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥२॥  
 सूर्यो दिवोदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥३॥  
 चन्द्रमा नक्षत्रैरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥४॥  
 सोम ओषधीभिरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥५॥  
 यज्ञो दक्षिणाभिरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥६॥  
 समुद्रो नदीभिरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥७॥  
 ब्रह्म ब्रह्मचारिभिरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥८॥  
 इन्द्रो वीर्येणोदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥९॥  
 देवा अमृतेनोदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥१०॥  
 प्रजापतिः प्रजाभिरुदक्रामत्तां पुरं प्र णयामि वः ।  
 तामा विशत तां प्र विशत सा वः शर्म च वर्म च यच्छतु ॥११॥

19.20

अप न्यधुः पौरुषेयं वधं यमिन्द्राग्नी धाता सविता बृहस्पतिः ।  
 सोमो राजा वरुणो अश्विना यमः पूषास्मान् परि पातु मृत्योः ॥१॥  
 यानि चकार भुवनस्य यस्पतिः प्रजापतिर्मतिरिश्वा प्रजाभ्यः ।  
 प्रदिशो यानि वसते दिशश्च तानि मे वर्माणि बहुलानि सन्तु ॥२॥  
 यत्ते तनूष्वनह्यन्त देवा द्युराजयो देहिनः ।  
 इन्द्रो यच्चक्रे वर्म तदस्मान् पातु विश्वतः ॥३॥  
 वर्म मे द्यावापृथिवी वर्माहर्वर्म सूर्यः ।  
 वर्म मे विश्वे देवाः क्रन् मा मा प्रापत्प्रतीचिका ॥४॥

19.21

गायत्र्युष्णिगनुष्टुब्बहती पङ्क्तिस्त्रिष्टुब्जगत्यै ॥१॥

19.22

आङ्गिरसानामाद्यैः पञ्चानुवाकैः स्वाहा ॥१॥  
 षष्ठाय स्वाहा ॥२॥  
 सप्तमाष्टमाभ्यां स्वाहा ॥३॥  
 नीलनखेभ्यः स्वाहा ॥४॥  
 हरितेभ्यः स्वाहा ॥५॥



क्षुद्रेभ्यः स्वाहा ॥६॥  
 पर्यायिकेभ्यः स्वाहा ॥७॥  
 प्रथमेभ्यः शङ्खेभ्यः स्वाहा ॥८॥  
 द्वितीयेभ्यः शङ्खेभ्यः स्वाहा ॥९॥  
 तृतीयेभ्यः शङ्खेभ्यः स्वाहा ॥१०॥  
 उपोत्तमेभ्यः स्वाहा ॥११॥  
 उत्तमेभ्यः स्वाहा ॥१२॥  
 उत्तरेभ्यः स्वाहा ॥१३॥  
 ऋषिभ्यः स्वाहा ॥१४॥  
 शिखिभ्यः स्वाहा ॥१५॥  
 गणेभ्यः स्वाहा ॥१६॥  
 महागणेभ्यः स्वाहा ॥१७॥  
 सर्वेभ्योऽङ्गिरोभ्यो विदगणेभ्यः स्वाहा ॥१८॥  
 पृथक्सहस्राभ्यां स्वाहा ॥१९॥  
 ब्रह्मणे स्वाहा ॥२०॥  
 ब्रह्मज्येष्ठा सम्भृता विर्याणि ब्रह्माग्रे ज्येष्ठं दिवमा ततान ।  
 भूतानां ब्रह्मा प्रथमोत जज्ञे तेनार्हति ब्रह्मणा स्पर्धितुं कः ॥२१॥

19.23

आथर्वणानां चतुर्ऋचेभ्यः स्वाहा ॥१॥  
 पञ्चर्चेभ्यः स्वाहा ॥२॥  
 षष्ठ्यर्चेभ्यः स्वाहा ॥३॥  
 सप्तर्चेभ्यः स्वाहा ॥४॥  
 अष्टर्चेभ्यः स्वाहा ॥५॥  
 नवर्चेभ्यः स्वाहा ॥६॥  
 दशर्चेभ्यः स्वाहा ॥७॥  
 एकादशर्चेभ्यः स्वाहा ॥८॥  
 द्वादशर्चेभ्यः स्वाहा ॥९॥  
 त्रयोदशर्चेभ्यः स्वाहा ॥१०॥  
 चतुर्दशर्चेभ्यः स्वाहा ॥११॥  
 पञ्चदशर्चेभ्यः स्वाहा ॥१२॥  
 षोडशर्चेभ्यः स्वाहा ॥१३॥  
 सप्तदशर्चेभ्यः स्वाहा ॥१४॥  
 अष्टादशर्चेभ्यः स्वाहा ॥१५॥  
 एकोनविंशतिः स्वाहा ॥१६॥  
 विंशतिः स्वाहा ॥१७॥  
 महत्काण्डाय स्वाहा ॥१८॥  
 तृचेभ्यः स्वाहा ॥१९॥  
 एकर्चेभ्यः स्वाहा ॥२०॥  
 क्षुद्रेभ्यः स्वाहा ॥२१॥  
 एकानृचेभ्यः स्वाहा ॥२२॥  
 रोहितेभ्यः स्वाहा ॥२३॥  
 सूर्याभ्यां स्वाहा ॥२४॥  
 ब्राह्म्याभ्यां स्वाहा ॥२५॥  
 प्राजापत्याभ्यां स्वाहा ॥२६॥  
 विषासह्यै स्वाहा ॥२७॥  
 मङ्गलिकेभ्यः स्वाहा ॥२८॥  
 ब्रह्मणे स्वाहा ॥२९॥  
 ब्रह्मज्येष्ठा संभृता वीर्याणि ब्रह्माग्रे ज्येष्ठं दिवमा ततान ।  
 भूतानां ब्रह्मा प्रथमोत जज्ञे तेनार्हति ब्रह्मणा स्पर्धितुं कः ॥३०॥

19.24

येन देवं सवितारं परि देवा अधारयन् ।  
 तेनेमं ब्रह्मणस्पते परि राष्ट्राय धत्तन ॥१॥  
 परीममिन्द्रमायुषे महे क्षत्राय धत्तन ।  
 यथैनं जरसे नयाज्ज्योक्क्षत्रेऽधि जागरत् ॥२॥  
 परीममिन्द्रमायुषे महे श्रीत्राय धत्तन ।  
 यथैनं जरसे नयाज्ज्योक्क्षेत्रेऽधि जागरत् ॥३॥  
 परि धत्त धत्त नो वर्चसेमं जरामृत्युं कृणुत दीर्घमायुः ।  
 बृहस्पतिः प्रायच्छद्वास एतत्सोमाय राज्ञे परिधातवा उ ॥४॥  
 जरां सु गच्छ परि धत्स्व वासो भवा गृष्टीनामभिशस्तिपा उ ।  
 शतं च जीव शरदः पुरुची रायश्च पोषमुपसंव्ययस्व ॥५॥  
 परीदं वासो अधिथाः स्वस्तयेऽभूर्वापीनामभिशस्तिपा उ ।  
 शतं च जीव शरदः पुरुचीर्वसूनि चारुर्वि भजासि जीवन् ॥६॥

योगेयोगे तवस्तरं वाजेवाजे हवामहे ।  
सखाय इन्द्रमृतये ॥७॥  
हिरण्यवर्णो अजरः सुवीरो जरामृत्युः प्रजया सं विशस्व ।  
तदग्निराह तदु सोम आह बृहस्पतिः सविता तदिन्द्रः ॥८॥

19.25

अश्रान्तस्य त्वा मनसा युनज्मि प्रथमस्य च ।  
उत्कूलमुद्धहो भवोदुहा प्रति धावतात् ॥१॥

19.26

अग्नेः प्रजातं परि यद्धिरण्यममृतं दध्ने अधि मर्त्येषु ।  
य एनद्वेद स इदेनमर्हति जरामृत्युर्भवति यो बिभर्ति ॥१॥  
यद्धिरण्यं सूर्येण सुवर्णं प्रजावन्तो मनवः पूर्वं ईषिरे ।  
तत्त्वा चन्द्रं वर्चसा सं सृजत्यायुष्मान् भवति यो बिभर्ति ॥२॥  
आयुषे त्वा वर्चसे त्वीजसे च बलाय च ।  
यथा हिरण्यतेजसा विभासासि जनामनु ॥३॥  
यद्वेद राजा वरुणो वेद देवो बृहस्पतिः ।  
इन्द्रो यद्धृत्रहा वेद तत्त आयुष्यं भुवत्तत्ते वर्चस्यं भुवत् ॥४॥

19.27

गोभिष्ट्वा पात्वृषभो वृषा त्वा पातु वाजिभिः ।  
वायुष्ट्वा ब्रह्मणा पात्विन्द्रस्त्वा पात्विन्द्रियैः ॥१॥  
सोमस्त्वा पात्वोषधीभिर्नक्षत्रैः पातु सूर्यः ।  
मादभ्यस्त्वा चन्द्रो वृत्रहा वातः प्राणेन रक्षतु ॥२॥  
तिस्रो दिवस्तिस्त्रः पृथिवीस्त्रीण्यन्तरिक्षाणि चतुरः समुद्रान् ।  
त्रिवृतं स्तोमं त्रिवृत आप आहुस्तास्त्वा रक्षन्तु त्रिवृता त्रिवृद्धिः ॥३॥  
त्रीन् नाकांस्त्रीन् समुद्रांस्त्रीन् ब्रह्मांस्त्रीन् वैष्टपान् ।  
त्रीन् मातरिश्वनस्त्रीन्सूर्यान् गोप्तृन् कल्पयामि ते ॥४॥  
घृतेन त्वा समुक्षाम्यग्ने आज्येन वर्धयन् ।  
अग्नेश्चन्द्रस्य सूर्यस्य मा प्राणं मायिनो दभन् ॥५॥  
मा वः प्राणं मा वोऽपानं मा हरो मायिनो दभन् ।  
भ्राजन्तो विश्ववेदसो देवा दैव्येन धावत ॥६॥  
प्राणेनाग्निं सं सृजति वातः प्राणेन संहितः ।  
प्राणेन विश्वतोमुखं सूर्यं देवा अजनयन् ॥७॥  
आयुषायुःकृतां जीवायुष्मान् जीव मा मृथाः ।  
प्राणेनात्मन्वतां जीव मा मृत्योरुदगा वशम् ॥८॥  
देवानां निहितं निधिं यमिन्द्रोऽन्वविन्दत्पथिभिर्देवयानैः ।  
आपो हिरण्यं जुगुप्सुस्त्रिवृद्धिस्तास्त्वा रक्षन्तु त्रिवृता त्रिवृद्धिः ॥९॥  
त्रयस्त्रिंशद्देवतास्त्रीणि च वीर्याणि प्रियायमाणा जुगुप्सुस्त्रिवृद्धिः ।  
अस्मिंश्चन्द्रे अधि यद्धिरण्यं तेनायं कृणवद्दीर्याणि ॥१०॥  
ये देवा दिव्येकादश स्थ ते देवासो हविरिदं जुषध्वम् ॥११॥  
ये देवा अन्तरिक्ष एकादश स्थ ते देवासो हविरिदं जुषध्वम् ॥१२॥  
ये देवा पृथिव्यामेकादश स्थ ते देवासो हविरिदं जुषध्वम् ॥१३॥  
असपत्नं पुरस्तात्पश्यान् नो अभयं कृतम् ।  
सविता मा दक्षिणत उत्तरान् मा शचीपतिः ॥१४॥  
दिवो मादित्या रक्षन्तु भूम्या रक्षन्त्वग्नयः ।  
इन्द्राग्नी रक्षतां मा पुरस्तादश्विनावभितः शर्म यच्छताम् ।  
तिरश्चीन् अघ्न्या रक्षतु जातवेदा भूतकृतो मे सर्वतः सन्तु वर्म ॥१५॥

19.28

इमं बध्नामि ते मणिं दीर्घायुत्वाय तेजसे ।  
दर्भं सपत्नदम्भनं द्विषतस्तपनं हृदः ॥१॥  
द्विषतस्तापयन् हृदः शत्रूणां तापयन् मनः ।  
दुर्हार्दः सर्वास्त्वं दर्भं घर्म इवाभीन्त्सतापयन् ॥२॥  
घर्म इवाभितपन् दर्भं द्विषतो नितपन् मणे ।  
हृदः सपत्नानां भिन्द्नीन्द्र इव विरुजं बलम् ॥३॥  
भिन्द्ने दर्भं सपत्नानां हृदयं द्विषतां मणे ।  
उद्यन् त्वचमिव भूम्याः शिर एषां वि पातय ॥४॥  
भिन्द्ने दर्भं सपत्नान् मे भिन्द्ने मे पृतनायतः ।  
भिन्द्ने मे सर्वान् दुर्हार्दो भिन्द्ने मे द्विषतो मणे ॥५॥  
छिन्द्ने दर्भं सपत्नान् मे छिन्द्ने मे पृतनायतः ।  
छिन्द्ने मे सर्वान् दुर्हार्दो छिन्द्ने मे द्विषतो मणे ॥६॥  
वृश्च दर्भं सपत्नान् मे वृश्च मे पृतनायतः ।  
वृश्च मे सर्वान् दुर्हार्दो वृश्च मे द्विषतो मणे ॥७॥

कृन्त दर्भ सपत्नान् मे कृन्त मे पूतनायतः ।  
 कृन्त मे सर्वान् दुर्हार्दो कृन्त मे द्विषतो मणे ॥८॥  
 पिंश दर्भ सपत्नान् मे पिंश मे पूतनायतः ।  
 पिंश मे सर्वान् दुर्हार्दो पिंश मे द्विषतो मणे ॥९॥  
 विध्य दर्भ सपत्नान् मे विध्य मे पूतनायतः ।  
 विध्य मे सर्वान् दुर्हार्दो विध्य मे द्विषतो मणे ॥१०॥

19.29

निक्ष दर्भ सपत्नान् मे निक्ष मे पूतनायतः ।  
 निक्ष मे सर्वान् दुर्हार्दो निक्ष मे द्विषतो मणे ॥१॥  
 तृन्धि दर्भ सपत्नान् मे तृन्धि मे पूतनायतः ।  
 तृन्धि मे सर्वान् दुर्हार्दो तृन्धि मे द्विषतो मणे ॥२॥  
 रुन्धि दर्भ सपत्नान् मे रुन्धि मे पूतनायतः ।  
 रुन्धि मे सर्वान् दुर्हार्दो रुन्धि मे द्विषतो मणे ॥३॥  
 मृण दर्भ सपत्नान् मे मृण मे पूतनायतः ।  
 मृण मे सर्वान् दुर्हार्दो मृण मे द्विषतो मणे ॥४॥  
 मन्थ दर्भ सपत्नान् मे मन्थ मे पूतनायतः ।  
 मन्थ मे सर्वान् दुर्हार्दो मन्थ मे द्विषतो मणे ॥५॥  
 पिण्डि दर्भ सपत्नान् मे पिण्डि मे पूतनायतः ।  
 पिण्डि मे सर्वान् दुर्हार्दो पिण्डि मे द्विषतो मणे ॥६॥  
 ओष दर्भ सपत्नान् मे ओष मे पूतनायतः ।  
 ओष मे सर्वान् दुर्हार्दो ओष मे द्विषतो मणे ॥७॥  
 दह दर्भ सपत्नान् मे दह मे पूतनायतः ।  
 दह मे सर्वान् दुर्हार्दो दह मे द्विषतो मणे ॥८॥  
 जहि दर्भ सपत्नान् मे जहि मे पूतनायतः ।  
 जहि मे सर्वान् दुर्हार्दो जहि मे द्विषतो मणे ॥९॥

19.30

यत्ते दर्भ जरामृत्यु शतं वर्मसु वर्म ते ।  
 तेनेमं वर्मिणं कृत्वा सपत्नां जहि वीर्यैः ॥१॥  
 शतं ते दर्भ वर्माणि सहस्रं वीर्याणि ते ।  
 तमस्मै विश्वे त्वां देवा जरसे भर्तवा अदुः ॥२॥  
 त्वामाहुर्देववर्म त्वां दर्भ ब्रह्मणस्पतिम् ।  
 त्वामिन्द्रस्याहुर्वर्म त्वं राष्ट्राणि रक्षसि ॥३॥  
 सपत्नक्षयणं दर्भ द्विषतस्तपनं हृदः ।  
 मणिं क्षत्रस्य वर्धनं तनूपानं कृणोमि ते ॥४॥  
 यत्समुद्रो अभ्यक्रन्दत्पर्जन्यो विद्युता सह ।  
 ततो हिरन्ययो बिन्दुस्ततो दर्भो अजायत ॥५॥

19.31

औदुम्बरेण मणिना पुष्टिकामाय वेधसा ।  
 पशूणां सर्वेषां स्फाति गोष्ठे मे सविता करत् ॥१॥  
 यो नो अग्निर्गार्हपत्यः पशूनामधिपा असत् ।  
 औदुम्बरो वृषा मणिः सं मा सृजतु पुष्ट्या ॥२॥  
 करीषिणीं फलवतीं स्वधामिरां च नो गृहे ।  
 औदुम्बरस्य तेजसा धाता पुष्टिं दधातु मे ॥३॥  
 यद्द्विपाच्च चतुष्पाच्च यान्यन्नानि ये रसाः ।  
 गृह्णेऽहं त्वेषां भूमानं बिभ्रदौदुम्बरं मणिम् ॥४॥  
 पुष्टिं पशूनां परि जग्रभाहं चतुष्पदां द्विपदां यच्च धान्यम् ।  
 पयः पशूनां रसमोषधीनां बृहस्पतिः सविता मे नि यच्छात् ॥५॥  
 अहं पशूनामधिपा असानि मयि पुष्टं पुष्टपतिर्दधातु ।  
 महामौदुम्बरो मणिर्द्रविणानि नि यच्छतु ॥६॥  
 उप मौदुम्बरो मणिः प्रजया च धनेन च ।  
 इन्द्रेण जिन्वितो मणिरा मागन्त्सह वर्चसा ॥७॥  
 देवो मणिः सपत्नहा धनसा धनसातये ।  
 पशोरन्नस्य भूमानं गवां स्फातिं नि यच्छतु ॥८॥  
 यथाग्रे त्वं वनस्पते पुष्ट्या सह जज्ञिषे ।  
 एवा धनस्य मे स्फातिमा दधातु सरस्वती ॥९॥  
 आ मे धनं सरस्वती पयस्फातिं च धान्यम् ।  
 सिनीवाल्पुपा वहादयं चौदुम्बरो मणिः ॥१०॥  
 त्वं मणीणामधिपा वृषासि त्वयि पुष्टं पुष्टपतिर्जजान ।  
 त्वयीमे वाजा द्रविणानि सर्वौदुम्बरः स त्वमस्मत्सहस्वारादारादरातिममतिं क्षुधं च ॥११॥  
 ग्रामणीरसि ग्रामणीरुत्थाय अभिषिक्तोऽभि मा सिञ्च वर्चसा ।  
 तेजोऽसि तेजो मयि धारयाधि रयिरसि रयिं मे धेहि ॥१२॥

पुष्टिरसि पुष्ट्या मा समङ्गि गृहमेधी गृहपतिं मा कृणु ।  
 औदुम्बरः स त्वमस्मासु धेहि रयिं च नः सर्ववीरं नि यच्छ रायस्पोषाय प्रति मुञ्चे अहं त्वाम् ॥१३॥  
 अयमौदुम्बरो मणिर्वीरो वीराय बध्यते ।  
 स नः सनिं मधुमतीं कृणोतु रयिं च नः सर्ववीरं नि यच्छात् ॥१४॥

19.32

शतकाण्डो दुश्च्यवनः सहस्रपर्ण उत्तिरः ।  
 दर्भो य उग्र ओषधिस्तं ते बध्नाम्यायुषे ॥१॥  
 नास्य केशान् प्र वपन्ति नोरसि ताडमा घ्नते ।  
 यस्मा अछिन्नपर्णेन दर्भेन शर्म यच्छति ॥२॥  
 दिवि ते तूलमोषधे पृथिव्यामसि निष्ठितः ।  
 त्वया सहस्रकाण्डेनायुः प्र वर्धयामहे ॥३॥  
 तिस्रो दिवो अत्यतृणत्तिस्र इमाः पृथिवीरुत ।  
 त्वयाहं दुर्हादो जिह्वां नि तृणन्नि वचांसि ॥४॥  
 त्वमसि सहमानोऽहमस्मि सहस्वान् ।  
 उभौ सहस्वन्तौ भूत्वा सपत्नान् सहिषीवहि ॥५॥  
 सहस्व नो अभिमातिं सहस्व पृतनायतः ।  
 सहस्व सर्वान् दुर्हार्दः सुहार्दो मे बहून् कृधि ॥६॥  
 दर्भेण देवजातेन दिवि षम्भेन शश्वदित् ।  
 तेनाहं शश्वतो जनामसनं सनवानि च ॥७॥  
 प्रियं मा दर्भ कृणु ब्रह्मराजन्याभ्यां शूद्राय चार्याय च ।  
 यस्मै च कामयामहे सर्वस्मै च विपश्यते ॥८॥  
 यो जायमानः पृथिवीमदहद्यो अस्तभ्नादन्तरिक्षं दिवं च ।  
 यं बिभ्रतं ननु पाप्मा विवेद स नोऽयं दर्भो वरुणो दिवा कः ॥९॥  
 सपत्नहा शतकाण्डः सहस्वान् ओषधीनां प्रथमः सं बभूव ।  
 स नोऽयं दर्भः परि पातु विश्वतस्तेन साक्षीय पृतनाः पृतन्यतः ॥१०॥

19.33

सहस्रार्धः शतकाण्डः पयस्वान् अपामग्निर्वीरुधां राजसूयम् ।  
 स नोऽयं दर्भः परि पातु विश्वतो देवो मणिरायुषा सं सृजाति नः ॥१॥  
 घृतादुल्लुप्तो मधुमान् पयस्वान् भूमिदंहोऽच्युतश्र्यावयिष्णुः ।  
 नुदन्त्सपत्नान् अधरांश्च कृण्वन् दर्भा रोह महतामिन्द्रियेण ॥२॥  
 त्वं भूमिमत्येष्योजसा त्वं वेद्यां सीदसि चारुरध्वरे ।  
 त्वां पवित्रमृषयोऽभरन्त त्वं पुनीहि दुरितान्यस्मत् ॥३॥  
 तीक्ष्णो राजा विषासही रक्षोहा विश्वचर्षणिः ।  
 ओजो देवानां बलमुग्रमेतत्तं ते बध्नामि जरसे स्वस्तये ॥४॥  
 दर्भेण त्वं कृणवद्वीर्याणि दर्भं बिभ्रदात्मना मा व्यथिष्ठाः ।  
 अतिष्ठाय वर्चसाधान्यान्त्सूर्य इवा भाहि प्रदिशश्चतस्रः ॥५॥

19.34

जाङ्गिडोऽसि जङ्गिडो रक्षितासि जङ्गिडः ।  
 द्विपाच्चतुष्पादस्माकं सर्वं रक्षतु जङ्गिडः ॥१॥  
 या गृतस्यस्त्रिपञ्चाशीः शतं कृत्याकृतश्च ये ।  
 सर्वान् विनक्तु तेजसोऽरसां जङ्गिडस्करत् ॥२॥  
 अरसं कुत्रिमं नादमरसाः सप्त विस्रसः ।  
 अपेतो जङ्गिडामतिमिषुमस्तेव शातय ॥३॥  
 कृत्यादूषण एवायमथो अरातिदूषणः ।  
 अथो सहस्वाञ्जङ्गिडः प्र न आयूषि तारिषत् ॥४॥  
 स जङ्गिडस्य महिमा परि णः पातु विश्वतः ।  
 विष्कन्धं येन सासह संस्कन्धमोज ओजसा ॥५॥  
 त्रिष्ट्वा देवा अजनयन् निष्ठितं भूम्यामधि ।  
 तमु त्वाङ्गिरा इति ब्राह्मणाः पूव्या विदुः ॥६॥  
 न त्वा पूर्वा ओषधयो न त्वा तरन्ति या नवाः ।  
 विबाध उग्रो जङ्गिडः परिपाणः सुमङ्गलः ॥७॥  
 अथोपदान भगवो जाङ्गिडामितवीर्यं ।  
 पुरा त उग्रा ग्रसत उपेन्द्रो वीर्यं ददौ ॥८॥  
 उग्र इत्ते वनस्पत इन्द्र ओज्मानमा दधौ ।  
 अमीवाः सर्वाश्चातयं जहि रक्षास्योषधे ॥९॥  
 आशरीकं विशरीकं बलासं पृष्ट्यामयम् ।  
 तवमानं विश्वशारदमरसां जङ्गिडस्करत् ॥१०॥

19.35

इन्द्रस्य नाम गुह्यन्त ऋषयो जङ्गिडं ददुः ।  
 देवा यं चक्रुर्भेषजमग्रे विष्कन्धदूषणम् ॥१॥

स नो रक्षतु जङ्घिडो धनपालो धनेव ।  
 देवा यं चक्रुर्ब्राह्मणाः परिपाणमरातिहम् ॥२॥  
 दुर्हार्दः संघोरं चक्षुः पापकृत्वानमागमम् ।  
 तास्त्वं सहस्रचक्षो प्रतीबोधेन नाशय परिपाणोऽसि जङ्घिडः ॥३॥  
 परि मा दिवः परि मा पृथिव्याः पर्यन्तरिक्षात्परि मा वीरुद्भ्यः ।  
 परि मा भूतात्परि मोत भव्यादिशोदिशो जङ्घिडः पात्वस्मान् ॥४॥  
 य ऋष्णवा देवकृता य उतो ववृतेऽन्यः ।  
 सर्वास्तान् विश्वभेषजोऽरसां जङ्घिडस्करत् ॥५॥

19.36

शतवारो अनीनशद्यक्ष्मान् रक्षांसि तेजसा ।  
 आरोहन् वर्चसा सह मणिर्दुर्णामिचातनः ॥१॥  
 शृङ्गाभ्यां रक्षो नुदते मूलेन यातुधान्यः ।  
 मध्येन यक्ष्मं बाधते नैनं पाप्माति तत्रति ॥२॥  
 ये यक्ष्मासो अर्भका महान्तो ये च शब्दिनः ।  
 सर्वा दुर्णामहा मणिः शतवारो अनीनशत् ॥३॥  
 शतं वीरान् अजनयच्छतं यक्ष्मान् अपावपत् ।  
 दुर्णाम्निः सर्वान् हत्वाव रक्षांसि धनुते ॥४॥  
 हिरण्यशृङ्ग ऋषभः शातवारो अयं मणिः ।  
 दुर्णाम्निः सर्वास्तुध्वाव रक्षांस्यक्रमीत् ॥५॥  
 शतमहं दुर्णाम्नीनां गन्धर्वाप्सरसां शतम् ।  
 शतं शश्वन्वतीनां शतवारेण वारये ॥६॥

19.37

इदं वर्चो अग्निना दत्तमागन् भर्गो यशः सह ओजो वयो बलम् ।  
 त्रयस्त्रिंशद्यानि च वीर्याणि तान्यग्निः प्र ददातु मे ॥१॥  
 वर्च आ धेहि मे तन्वां सह ओजो वयो बलम् ।  
 इन्द्रियाय त्वा कर्मणे वीर्याय प्रति गृह्णामि शतशारदाय ॥२॥  
 ऊर्जे त्वा बलाय त्वौजसे सहसे त्वा ।  
 अभिभूयाय त्वा राष्ट्रभृत्याय पर्यूहामि शतशारदाय ॥३॥  
 ऋतुभ्यष्ट्वार्तवेभ्यो माद्भ्यः संवत्सरेभ्यः ।  
 धात्रे विधात्रे समृधे भूतस्य पतये यजे ॥४॥

19.38

न तं यक्ष्मा अरुन्धते नैनं शपथो अश्रुते ।  
 यं भेषजस्य गुल्गुलोः सुरभिर्गन्धो अश्रुते ॥१॥  
 विष्वञ्चस्तस्माद्यक्ष्मा मृगा अश्वा इवेरते ।  
 यद्गुल्गुलु सैन्धवं यद्वाप्यसि समुद्रियम् ॥२॥  
 उभयोरग्रभं नामास्मा अरिष्टतातये ॥३॥

19.39

ऐतु देवस्त्रायमाणः कुष्ठो हिमवतस्परि ।  
 तवम्नानं सर्वं नाशय सर्वाश्च यातुधान्यः ॥१॥  
 त्रीणि ते कुष्ठ नामानि नद्यमारो नद्यारिषः ।  
 नद्यायं पुरुषो रिषत् ।  
 यस्मै परिव्रवीमि त्वा सायंप्रातरथो दिवा ॥२॥  
 जीवला नाम ते माता जीवन्तो नाम ते पिता ।  
 नद्यायं पुरुषो रिषत् ।  
 यस्मै परिव्रवीमि त्वा सायंप्रातरथो दिवा ॥३॥  
 उत्तमो अस्योषधीनामनड्वान् जगतामिव व्याघ्रः श्वपदामिव ।  
 नद्यायं पुरुषो रिषत् ।  
 यस्मै परिव्रवीमि त्वा सायंप्रातरथो दिवा ॥४॥  
 त्रिः शाम्बुभ्यो अङ्गिरेभ्यस्त्रिरादित्येभ्यस्परि ।  
 त्रिर्जातो विश्वदेवेभ्यः ।  
 स कुष्ठो विश्वभेषजः साकं सोमेन तिष्ठति ।  
 अश्वत्थो देवसदनस्तृतीयस्यामितो दिवि ।  
 तत्रामृतस्य चक्षणं ततः कुष्ठो अजायत ।  
 स कुष्ठो विश्वभेषजः साकं सोमेन तिष्ठति ।  
 हिरण्ययी नौरचरद्विरण्यबन्धना दिवि ।  
 तत्रामृतस्य चक्षणं ततः कुष्ठो अजायत ।  
 स कुष्ठो विश्वभेषजः साकं सोमेन तिष्ठति ।  
 यत्र नावप्रभ्रंशनं यत्र हिमवतः शिरः ।  
 तत्रामृतस्य चक्षणं ततः कुष्ठो अजायत ।  
 स कुष्ठो विश्वभेषजः साकं सोमेन तिष्ठति ।

यं त्वा वेद पूर्व इक्ष्वाको यं वा त्वा कुष्ठ काम्यः ।  
यं वा वसो यमात्स्यस्तेनासि विश्वभेषजः ॥९॥  
शीर्षशोकं तृतीयकं सदंदिश्यश्च हायनः ।  
तक्मानं विश्वधावीर्याधराञ्चं परा सुव ॥१०॥

19.40

यन् मे छिद्रं मनसो यच्च वाचः सरस्वती मन्युमन्तं जगाम ।  
विश्वैस्तद्देवैः सह संविदानः सं दधातु बृहस्पतिः ॥१॥  
मा न आपो मेधां मा ब्रह्म प्र मथिष्टन ।  
सुष्यदा यूयं स्यन्दध्वमुपहृतोऽहं सुमेधा वर्चस्वी ॥२॥  
मा नो मेधां मा नो दीक्षां मा नो हिंसिष्टं यत्तपः ।  
शिवा नः शं सन्त्वायुषे शिवा भवन्तु मातरः ॥३॥  
या नः पीपरदश्विना ज्योतिष्मती तमस्तिरः ।  
तामस्मे रासतामिषम् ॥४॥

19.41

भद्रमिच्छन्त ऋषयः स्वर्विदस्तपो दीक्षामुपनिषेदुरग्रे ।  
ततो राष्ट्रं बलमोजश्च जातं तदस्मै देवा उपसंनमन्तु ॥१॥

19.42

ब्रह्म होता ब्रह्म यज्ञा ब्रह्मणा स्वरवो मिताः ।  
अध्वर्युर्ब्रह्मणो जातो ब्रह्मणोऽन्तर्हितं हविः ॥१॥  
ब्रह्म सुचो घृतवतीर्ब्रह्मणा वेदिरुद्धिता ।  
ब्रह्म यज्ञस्य तत्त्वं च ऋत्विजो ये हविष्कृतः ।  
शमिताय स्वाहा ॥२॥  
अंहोमुचे प्र भरे मनीषामा सुत्राव्यो सुमतिमावृणानः ।  
इममिन्द्र प्रति हव्यं गृभाय सत्याः सन्तु यजमानस्य कामाः ॥३॥  
अंहोमुचं ऋषभं यज्ञियानां विराजन्तं प्रथममध्वराणम् ।  
अपां नपातमश्विना हुवे धिय इन्द्रियेण त इन्द्रियं दत्तमोजः ॥४॥

19.43

यत्र ब्रह्मविदो यान्ति दीक्षया तपसा सह ।  
अग्निर्मा तत्र नयत्वग्निर्मेधा दधातु मे ।  
अग्नये स्वाहा ॥१॥  
यत्र ब्रह्मविदो यान्ति दीक्षया तपसा सह ।  
वायुर्मा तत्र नयतु वायुः प्रणान् दधातु मे वायवे स्वाहा ॥२॥  
यत्र ब्रह्मविदो यान्ति दीक्षया तपसा सह ।  
सूर्यो मा तत्र नयतु चक्षुः सूर्यो दधातु मे ।  
सूर्याय स्वाहा ॥३॥  
यत्र ब्रह्मविदो यान्ति दीक्षया तपसा सह ।  
चन्द्रो मा तत्र नयतु मनश्चन्द्रो दधातु मे ।  
चन्द्राय स्वाहा ॥४॥  
यत्र ब्रह्मविदो यान्ति दीक्षया तपसा सह ।  
सोमो मा तत्र नयतु पयः सोमो दधातु मे ।  
सोमाय स्वाहा ॥५॥  
यत्र ब्रह्मविदो यान्ति दीक्षया तपसा सह ।  
इन्द्रो मा तत्र नयतु बलमिन्द्रो दधातु मे ।  
इन्द्राय स्वाहा ॥६॥  
यत्र ब्रह्मविदो यान्ति दीक्षया तपसा सह ।  
आपो मा तत्र नयत्वमृतं मोष तिष्ठतु ।  
अद्भ्यः स्वाहा ॥७॥  
यत्र ब्रह्मविदो यान्ति दीक्षया तपसा सह ।  
ब्रह्मा मा तत्र नयतु ब्रह्मा ब्रह्म दधातु मे ।  
ब्रह्मणे स्वाहा ॥८॥

19.44

आयुषोऽसि प्रतरणं विप्रं भेषजमुच्यसे ।  
तदाञ्जन त्वं शंताते शमापो अभयं कृतम् ॥१॥  
यो हरिमा जायान्योऽङ्गभेदो विषल्पकः ।  
सर्वं ते यक्षमङ्गेभ्यो बहिर्निर्हन्त्वाञ्जनम् ॥२॥  
आञ्जनं पृथिव्यां जातं भद्रं पुरुषजीवनम् ।  
कृणोत्वप्रमायुकं रथजूतिमनागसम् ॥३॥  
प्राण प्राणं त्रायस्वार्सा असवे मृड ।  
निर्ऋते निर्ऋत्या नः पाशेभ्यो मुञ्च ॥४॥

सिन्धोर्गर्भोऽसि विद्युतां पुष्पम् ।  
 वातः प्राणः सूर्यश्चक्षुर्दिवस्पयः ॥५॥  
 देवाञ्जन त्रैककुद परि मा पाहि विश्वतः ।  
 न त्वा तरन्त्योषधयो बाह्याः पर्वतीया उत ॥६॥  
 वीदं मध्यमवासृपद्रक्षीहामीवचातनः ।  
 अमीवाः सर्वाश्चातयन् नाशयदभिभा इतः ॥७॥  
 बह्विदं राजन् वरुणानृतमाह पूरुषः ।  
 तस्मात्सहस्रवीर्यं मुञ्च नः पर्यहसः ॥८॥  
 यदापो अध्न्या इति वरुणेति यदूचिम ।  
 तस्मात्सहस्रवीर्यं मुञ्च नः पर्यहसः ॥९॥  
 मित्रश्च त्वा वरुणश्चानुप्रेयतुराञ्जन ।  
 तौ त्वानुगत्य दूरं भोगाय पुनरोहतुः ॥१०॥

19.45

ऋणादृणमिव सं नय कृत्यां कृत्याकृतो गृहम् ।  
 चक्षुर्मन्त्रस्य दुर्हार्दः पृष्टीरपि शृणाञ्जन ॥१॥  
 यदस्मासु दुष्वप्यं यद्गोषु यच्च नो गृहे ।  
 अनामगस्तं च दुर्हार्दः प्रियः प्रति मुञ्चताम् ॥२॥  
 अपामूर्जं ओजसो वावृधानमग्नेर्जातमधि जातवेदसः ।  
 चतुर्वीरं पर्वतीयं यदाञ्जनं दिशः प्रदिशः करदिच्छिवास्ते ॥३॥  
 चतुर्वीरं बध्यत आञ्जनं ते सर्वा दिशो अभयास्ते भवन्तु ।  
 ध्रुवस्तिष्ठासि सवितेव चार्यं इमा विशो अभि हरन्तु ते बलिम् ॥४॥  
 आक्ष्वैकं मणिमेकं क्रणुष्व स्नाह्येकेना पिबैकमेषाम् ।  
 चतुर्वीरं नैर्ऋतेभ्यश्चतुर्भ्यो ग्राह्या बन्धेभ्यः परि पात्वस्मान् ॥५॥  
 अग्निर्माग्निनावतु प्राणायानायुषे वर्चस ओजसे ।  
 तेजसे स्वस्तये सुभूतये स्वाहा ॥६॥  
 इन्द्रो मेन्द्रियेणावतु प्राणायानायुषे वर्चस ओजसे ।  
 तेजसे स्वस्तये सुभूतये स्वाहा ॥७॥  
 सोमो मा सौम्येनावतु प्राणायानायुषे वर्चस ओजसे ।  
 तेजसे स्वस्तये सुभूतये स्वाहा ॥८॥  
 भगो म भगेनावतु प्राणायानायुषे वर्चस ओजसे ।  
 तेजसे स्वस्तये सुभूतये स्वाहा ॥९॥  
 मरुतो मा गणैरवन्तु प्राणायानायुषे वर्चस ओजसे तेजसे ।  
 स्वस्तये सुभूतये स्वाहा ॥१०॥

19.46

प्रजापतिष्ट्वा बध्नात्प्रथममस्तुतं वीर्याय कम् ।  
 तत्ते बध्नाम्यायुषे वर्चस ओजसे च बलाय चास्तृतस्त्वाभि रक्षतु ॥१॥  
 ऊर्ध्वस्तिष्ठतु रक्षन् अप्रमादमस्तुतेमं मा त्वा दभन् पणयो यातुधानाः ।  
 इन्द्र इव दस्यून् अव धूनुष्व पृतन्यतः सर्वां छत्रून् वि षहस्वास्तृतस्त्वाभि रक्षतु ॥२॥  
 शतं च न प्रहरन्तो निघ्नन्तो न तस्तिरे ।  
 तस्मिन् इन्द्रः पर्यदत्त चक्षुः प्राणमथो बलमस्तृतस्त्वाभि रक्षतु ॥३॥  
 इन्द्रस्य त्वा वर्मणा परि धापयामो यो देवानामधिराजो बभूव ।  
 पुनस्त्वा देवाः प्र णयन्तु सर्वेऽस्तृतस्त्वाभि रक्षतु ॥४॥  
 अस्मिन् मणावेकशतं वीर्याणि सहस्रं प्राणा अस्मिन् अस्तृते ।  
 व्याघ्रः शत्रून् अभि तिष्ठ सर्वान् यस्त्वा पृतन्यादधरः सो अस्त्वस्तृतस्त्वाभि रक्षतु ॥५॥  
 घृतादुल्लुप्तो मधुमान् पयस्वान्त्सहस्रप्राणः शतयोनिर्वयोधाः ।  
 शम्भुश्च मयोभूश्चोर्जस्वांश्च पयस्वांश्चास्तृतस्त्वाभि रक्षतु ॥६॥  
 यथा त्वमुत्तरोऽसौ असपत्नः सपत्नहा ।  
 सजातानामसद्वशी तथा त्वा सविता करदस्तृतस्त्वाभि रक्षतु ॥७॥

19.47

आ रात्रि पार्थिवं रजः पितुरप्रायि धामभिः ।  
 दिवः सदांसि बृहती वि तिष्ठस आ त्वेषं वर्तते तमः ॥१॥  
 न यस्याः पारं ददृशे न योयुवद्विश्वमस्यां नि विशते यदेजति ।  
 अरिष्टासस्त उर्वि तमस्वति रात्रि पारमशीमहि भद्रे पारमशीमहि ॥२॥  
 ये ते रात्रि नृचक्षसो द्रष्टारो नवतिर्नव ।  
 अशीतिः सन्त्यष्टा उतो ते सप्त सप्ततिः ॥३॥  
 षष्टिश्च षट्च रेवति पञ्चाशत्पञ्च सुम्नयि ।  
 चत्वारश्चत्वारिंशच्च त्रयस्त्रिंशच्च वाजिनि ॥४॥  
 द्वौ च ते विंशतिश्च ते रात्र्येकादशावमाः ।  
 तेभिर्नो अद्य पायुभिर्नु पाहि दुहितर्दिवः ॥५॥  
 रक्षा माकिर्नो अघशंस ईशत मा नो दुःशंस ईशत ।  
 मा नो अद्य गवां स्तेनो मावीनां वृक ईशत ॥६॥

माश्वानां भद्रे तस्करो मा नृणां यातुधान्यः ।  
 परमेभिः पथिभि स्तेनो धावतु तस्करः ।  
 परेण दत्वती रज्जुः परेणाघायुरर्षतु ॥७॥  
 अध रात्रि तृष्टधूममशीर्षाणमहिं कृणु ।  
 हनु वृकस्य जम्भया स्तेनं द्रुपदे जहि ॥८॥  
 त्वयि रात्रि वसामसि स्वपिष्यामसि जागृहि ।  
 गोभ्यो नः शर्म यच्छाश्वेभ्यः पुरुषेभ्यः ॥९॥

19.48

अथो यानि च यस्मा ह यानि चान्तः परीणहि ।  
 तानि ते परि ददसि ॥१॥  
 रात्रि मातरुषसे नः परि देहि ।  
 उषा नो अह्ने परि ददात्वहस्तुभ्यं विभावरी ॥२॥  
 यत्किं चेदं पतयति यत्किं चेदं सरीसृपम् ।  
 यत्किं च पर्वतायासत्वं तस्मात्त्वं रात्रि पाहि नः ॥३॥  
 सा पश्चात्पाहि सा पुरः सोत्तरादधरादुत ।  
 गोपाय नो विभावरी स्तोतारस्त इह स्मसि ॥४॥  
 ये रात्रिमनुतिष्ठन्ति ये च भूतेषु जाग्रति ।  
 पशून् ये सर्वान् रक्षन्ति ते न आत्मसु जाग्रति ते नः पशुषु जाग्रति ॥५॥  
 वेद वै रात्रि ते नाम घृताची नाम वा असि ।  
 तां त्वां भरद्वाजो वेद सा नो वित्तेऽधि जाग्रति ॥६॥

19.49

इषिरा योषा युवतिर्दमूना रात्री देवस्य सवितुर्भगस्य ।  
 अश्वक्षभा सुहवा संभृतश्रीरा पप्रौ द्यावापृथिवी महित्वा ॥१॥  
 अति विश्वान्यरुहद्रम्भिरो वर्षिष्ठमरुहन्त श्रविष्ठाः ।  
 उशती रात्र्यनु सा भद्राभि तिष्ठते मित्र इव स्वधाभिः ॥२॥  
 वर्ये वन्दे सुभगे सुजात आजगन् रात्रि सुमना इह स्याम् ।  
 अस्मांस्त्रायस्व नयाणि जाता अथो यानि गव्यानि पुष्ट्या ॥३॥  
 सिंहस्य रात्र्युशती पीषस्य व्याघ्रस्य द्वीपिनो वर्च आ ददे ।  
 अश्वस्य ब्रध्नं पुरुषस्य मायुं पुरु रूपाणि कृणुषे विभाती ॥४॥  
 शिवां रात्रिमनुसूर्यं च हिमस्य माता सुहवा नो अस्तु ।  
 अस्य स्तोमस्य सुभगे नि बोध येन त्वा वन्दे विश्वासु दिक्षु ॥५॥  
 स्तोमस्य नो विभावरी रात्रि राजेव जोषसे ।  
 असाम सर्ववीरा भवाम सर्ववेदसो व्युच्छन्तीरनूषसः ॥६॥  
 शम्या ह नाम दधिषे मम दिप्सन्ति ये धना ।  
 रात्रीहि तान् असुतपा य स्तेनो न विद्यते यत्पुनर्न विद्यते ॥७॥  
 भद्रासि रात्रि चमसो न विष्टो विष्वङ्गोरूपं युवतिर्बिभर्षि ।  
 चक्षुष्मती मे उशती वपूष्णि प्रति त्वं दिव्या न क्षाममुक्थाः ॥८॥  
 यो अद्य स्तेन आयत्यघायुर्मर्त्यो रिपुः ।  
 रात्री तस्य प्रतीत्य प्र ग्रीवाः प्र शिरो हनत् ॥९॥  
 प्र पादौ न यथायति प्र हस्तौ न यथाशिषत् ।  
 यो मलिम्बुरुपायति स संपिष्टो अपायति ।  
 अपायति स्वपायति शुष्के स्थाणावपायति ॥१०॥

19.50

अध रात्रि तृष्टधूममशीर्षाणमहिं कृणु ।  
 अक्षौ वृकस्य निर्जह्यास्तेन तं द्रुपदे जहि ॥१॥  
 ये ते रात्र्यनड्वाहस्तीक्ष्णशृङ्गाः स्वाशवः ।  
 तेभिर्नो अद्य पारयाति दुर्गाणि विश्वहा ॥२॥  
 रात्रिरात्रिमरिष्यन्तस्तरेम तन्वा वयम् ।  
 गम्भीरमप्लवा इव न तरेयुररातयः ॥३॥  
 यथा शाम्याकः प्रपतन्न अपवान् नानुविद्यते ।  
 एवा रात्रि प्र पातय यो अस्मामभ्यघायति ॥४॥  
 अप स्तेनं वासयो गोअजमुत तस्करम् ।  
 अथो यो अर्वतः शिरोऽभिधाय निनीषति ॥५॥  
 यदद्य रात्रि सुभगे विभजन्त्ययो वसु ।  
 यदेतदस्मान् भोजय यथेदन्त्यान् उपायसि ॥६॥  
 उषसे नः परि देहि सर्वान् रात्र्यनागसः ।  
 उषा नो अह्ने आ भजादहस्तुभ्यं विभावरी ॥७॥

19.51

अयुतोऽहमयुतो म आत्मायुतं मे चक्षुरयुतं मे श्रोत्रम् ।  
 अयुतो मे प्राणोऽयुतो मेऽपानोऽयुतो मे व्यानोऽयुतोऽहं सर्वः ॥१॥



देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यां प्रसूत आ रभे ॥२॥

19.52

कामस्तदग्रे समवर्तत मनसो रेतः प्रथमं यदासीत् ।  
स काम कामेन बृहता सयोनी रायस्पोषं यजमानाय धेहि ॥१॥  
त्वं काम सहसासि प्रतिष्ठितो विभुर्विभावा सख आ सखीयते ।  
त्वमुग्रः पृतनासु ससहिः सह ओजो यजमानाय धेहि ॥२॥  
दूराच्चकमानाय प्रतिपाणायाक्षये ।  
आस्मा अशृण्वन्न आशाः कामेनाजनयन्त्स्वः ॥३॥  
कामेन मा काम आगन् हृदयाद्दृदयं परि ।  
यदमीषामदो मनस्तदैतूप मामिह ॥४॥  
यत्काम कामयमाना इदं कृण्मसि ते हविः ।  
तन् नः सर्वं समृध्यतामथैतस्य हविषो वीहि स्वाहा ॥५॥

19.53

कालो अश्वो वहति सप्तरश्मिः सहस्राक्षो अजरो भूरिरेताः ।  
तमा रोहन्ति कवयो विपश्चितस्तस्य चक्रा भुवनानि विश्वा ॥१॥  
सप्त चक्रान् वहति काल एष सप्तास्य नाभीरमृतं न्वक्षः ।  
स इमा विश्वा भुवनान्यञ्जत्कालः स ईयते प्रथमो नु देवः ॥२॥  
पूर्णः कुम्भोऽधि काल आहितस्तं वै पश्यामो बहुधा नु सन्तम् ।  
स इमा विश्वा भुवनानि प्रत्यङ्कालं तमाहुः परमे व्योमन् ॥३॥  
स एव सं भुवनान्याभरत्स एव सं भुवनानि पर्यैत् ।  
पिता सन्न अभवत्पुत्र एषां तस्माद्देवान्यत्परमस्ति तेजः ॥४॥  
कालोऽमूं दिवमजनयत्काल इमाः पृथिवीरुत ।  
काले ह भूतं भव्यं चेष्टितं ह वि तिष्ठते ॥५॥  
कालो भूतिमसृजत काले तपति सूर्यः ।  
काले ह विश्वा भूतानि काले चक्षुर्वि पश्यति ॥६॥  
काले मनः काले प्राणः काले नाम समाहितम् ।  
कालेन सर्वा नन्दन्त्यागतेन प्रजा इमाः ॥७॥  
काले तपः काले ज्येष्ठं काले ब्रह्म समाहितम् ।  
कालो ह सर्वस्येश्वरो यः पितासीत्प्रजापतेः ॥८॥  
तेनेष्टितं तेन जातं तदु तस्मिन् प्रतिष्ठितम् ।  
कालो ह ब्रह्म भूत्वा बिभर्ति परमेष्ठिनम् ॥९॥  
कालः प्रजा असृजत कालो अग्रे प्रजापतिम् ।  
स्वयंभूः कश्यपः कालात्तपः कालादजायत ॥१०॥

19.54

कालादापः समभवन् कालाद्ब्रह्म तपो दिशः ।  
कालेनोदेति सूर्यः काले नि विशते पुनः ॥१॥  
कालेन वातः पवते कालेन पृथिवी मही ।  
द्वौर्मही काल आहिता ॥२॥  
कालो ह भूतं भव्यं च पुत्रो अजनयत्पुरा ।  
कालादृचः समभवन् यजुः कालादजायत ॥३॥  
कालो यज्ञं समैरयद्देवेभ्यो भागमक्षितम् ।  
काले गन्धर्वाप्सरसः काले लोकाः प्रतिष्ठिताः ॥४॥  
कालेऽयमङ्गिरा देवोऽथर्वा चाधि तिष्ठतः ।  
इमं च लोकं परमं च लोकं पुण्यांश्च लोकान् विधृतीश्च पुण्याः ।  
सर्वल्लोकान् अभिजित्य ब्रह्मणा कालः स ईयते परमो नु देवः ॥५॥

19.55

रात्रिरात्रिमप्रयातं भरन्तोऽश्वयेव तिष्ठते घासमस्मै ।  
रायस्पोषेण समिषा मदन्तो मा ते अग्ने प्रतिवेशा रिषाम ॥१॥  
या ते वसोर्वत इषुः सा त एषा तया नो मूड ।  
रायस्पोषेण समिषा मदन्तो मा ते अग्ने प्रतिवेशा रिषाम ॥२॥  
सायंसायं गृहपतिर्नो अग्निः प्रातःप्रातः सौमनसस्य दाता ।  
वसोर्वसोर्वसुदान एधि वयं त्वेन्धानास्तन्वं पुषेम ॥३॥  
प्रातःप्रातर्गृहपतिर्नो अग्निः सायंसायं सौमनसस्य दाता ।  
वसोर्वसोर्वसुदान एधीन्धानास्त्वा शतंहिमा ऋधेम ॥४॥  
अपश्चा दग्धानस्य भूयासम् ।  
अन्नादायान्नपतये रुद्राय नमो अग्नये ।  
सभ्यः सभां मे पाहि ये च सभ्याः सभासदः ॥५॥  
त्वामिन्द्रा पुरुहूत विश्वमायुर्व्यश्रवन् ।  
अहरहर्बलिमिर्त्त हरन्तोऽश्वयेव तिष्ठते घासमग्ने ॥६॥

19.56

यमस्य लोकादध्या बभूविथ प्रमदा मर्त्यान् प्र युनक्षि धीरः ।  
एकाकिना सरथं यासि विद्वान्स्वप्नं मिमानो असुरस्य योनौ ॥१॥  
बन्धस्त्वाग्रे विश्वचया अपश्यत्पुरा रात्र्या जनितोरेके अह्नि ।  
ततः स्वप्नेदमध्या बभूविथ भिषग्भ्यो रूपमपगृहमानः ॥२॥  
बृहद्वावासुरेभ्योऽधि देवान् उपावर्तत महिमानमिच्छन् ।  
तस्मै स्वप्राय दधुराधिपत्यं त्रयस्त्रिंशसः स्वरानशानाः ॥३॥  
नैतां विदुः पितरो नोत देवा येषां जल्पिश्वरत्यन्तरेदम् ।  
त्रिते स्वप्नमदधुरापत्ये नर आदित्यासो वरुणेनानुशिष्टाः ॥४॥  
यस्य क्रूरमभजन्त दुष्कृतोऽस्वप्नेन सुकृतः पुण्यमायुः ।  
स्वर्मदसि परमेण बन्धुना तप्यमानस्य मनसोऽधि जज्ञिषे ॥५॥  
विद्म ते सर्वाः परिजाः पुरस्ताद्विद्म स्वप्न यो अधिपा इहा ते ।  
यशश्चिनो नो यशसेह पाह्याराद्विषेभिरप याहि दूरम् ॥६॥

19.57

यथा कलां यथा शफं यथा र्णं सन्नयन्ति ।  
एवा दुष्वप्यं सर्वमप्रिये सं नयामसि ॥१॥  
सं राजानो अगुः सम्णाम्यगुः सं कुष्ठा अगुः सं कला अगुः ।  
समस्मासु यदुष्वप्यं निर्दिषते दुष्वप्यं सुवाम ॥२॥  
देवानां पत्नीनां गर्भं यमस्य कर यो भद्रः स्वप्न ।  
स मम यः पापस्तद्विषते प्र हिण्मः ।  
मा तृष्टानामसि कृष्णशकुनेर्मुखम् ॥३॥  
तं त्वा स्वप्न तथा सं विद्म स त्वं स्वप्नाश्च इव कायमश्च इव नीनाहम् ।  
अनास्माकं देवपीयुं पियारुं वप यदस्मासु दुष्वप्यं यद्गोषु यच्च नो गृहे ॥४॥  
अनास्माकस्तद्देवपीयुः पियारुर्निष्कमिव प्रति मुञ्चताम् ।  
नवारत्नीन् अपमया अस्माकं ततः परि ।  
दुष्वप्यं सर्वं द्विषते निर्दयामसि ॥५॥

19.58

घृतस्य जूतिः समना सदेवा संवत्सरं हविषा वर्धयन्ती ।  
श्रोत्रं चक्षुः प्राणोऽच्छिन्नो नो अस्त्वच्छिन्ना वयमायुषो वर्चसः ॥१॥  
उपास्मान् प्राणो ह्वयतामुप प्राणं हवामहे ।  
वर्चो जग्राह पृथिव्यन्तरिक्षं वर्चः सोमो बृहस्पतिर्विधत्ता ॥२॥  
वर्चसो द्यावापृथिवी संग्रहणी बभूवथुर्वर्चो गृहीत्वा पृथिवीमनु सं चरेम ।  
यशसं गावो गोपतिमुप तिष्ठन्त्यायतीर्यशो गृहीत्वा पृथिवीमनु सं चरेम ॥३॥  
व्रजं कृणुध्वं स हि वो नृपाणो वर्मा सीव्यध्वं बहुला पृथूनि ।  
पुरः कृणुध्वमायसीरधृष्टा मा वः सुस्रोच्चमसो दंहत तम् ॥४॥  
यज्ञस्य चक्षुः प्रभृतिर्मुखं च वाचा श्रोत्रेण मनसा जुहोमि ।  
इमं यज्ञं विततं विश्वकर्मणा देवा यन्तु सुमनस्यमानाः ॥५॥  
ये देवानामृत्विजो ये च यज्ञिया येभ्यो हव्यं क्रियते भागधेयम् ।  
इमं यज्ञं सह पत्नीभिरेत्य यावन्तो देवास्तविषा मादयन्ताम् ॥६॥

19.59

त्वमग्ने व्रतपा असि देव आ मर्त्येष्वाम् ।  
त्वं यज्ञेष्वीड्यः ॥१॥  
यद्गो वयं प्रमिनाम व्रतानि विदुषां देवा अविदुष्टरासः ।  
अग्निष्टद्विश्वादा पूणातु विद्वान्त्सोमस्य यो ब्राह्मणामाविवेश ॥२॥  
आ देवानामपि पन्थामगन्म यच्छवन्नवाम तदनुप्रवोढुम् ।  
अग्निर्विद्वान्त्स यजात्स इद्धोता सोऽध्वरान्त्स ऋतून् कल्पयाति ॥३॥

19.60

वाङ्म आसन् नसोः प्राणश्चक्षुरक्ष्णोः श्रोत्रं कर्णयोः ।  
अपलिताः केशा अशोणा दन्ता बहु बाह्वोर्बलम् ॥१॥  
ऊर्वोरोजो जङ्घयोर्जवः पादयोः ।  
प्रतिष्ठा अरिष्टानि मे सर्वात्मानिभृष्टः ॥२॥

19.61

तनूस्तन्वा मे सहे दतः सर्वमायुरशीय ।  
स्योनं मे सीद पुरुः पूणस्व पवमानः स्वर्गे ॥१॥

19.62

प्रियं मा कृणु देवेषु प्रियं राजसु मा कृणु ।  
प्रियं सर्वस्य पश्यत उत शूद्र उतार्ये ॥१॥

19.63

उत्तिष्ठ ब्रह्मणस्पते देवान् यज्ञेन बोधय ।  
आयुः प्राणं प्रजां पशून् कीर्तिं यजमानं च वर्धय ॥१॥

19.64

अग्ने समिधमाहार्षं बृहते जातवेदसे ।  
स मे श्रद्धां च मेधां च जातवेदाः प्र यच्छतु ॥१॥  
इध्मेन त्वा जातवेदः समिधा वर्धयामसि ।  
तथा त्वमस्मान् वर्धय प्रजया च धनेन च ॥२॥  
यदग्ने यानि कानि चिदा ते दारूणि दध्मसि ।  
सर्वं तदस्तु मे शिवं तज्जुषस्व यविष्ठ्य ॥३॥  
एतास्ते अग्ने समिधस्त्वमिद्धः समिद्धव ।  
आयुरस्मासु धेह्यमृतत्वमाचार्याय ॥४॥

19.65

हरिः सुपर्णो दिवमारुहोऽर्चिषा ये त्वा दिप्सन्ति दिवमुत्पतन्तम् ।  
अव तां जहि हरसा जातवेदोऽबिभ्यदुगोऽर्चिषा दिवमा रोह सूर्य ॥१॥

19.66

अयोजाला असुरा मायिनोऽयस्मयैः पाशैरङ्कितो ये चरन्ति ।  
तांस्ते रन्धयामि हरसा जातवेदः सहस्रऋष्टिः सपत्नान् प्रमृणन् पाहि वज्रः ॥१॥

19.67

पश्येम शरदः शतम् ॥१॥  
जीवेम शरदः शतम् ॥२॥  
बुध्येम शरदः शतम् ॥३॥  
रोहेम शरदः शतम् ॥४॥  
पूषेम शरदः शतम् ॥५॥  
भवेम शरदः शतम् ॥६॥  
भूषेम शरदः शतम् ॥७॥  
भूयसीः शरदः शतम् ॥८॥

19.68

अव्यसश्च व्यचसश्च बिलं वि ष्यामि मायया ।  
ताभ्यामुद्धृत्य वेदमथ कर्माणि कृण्महे ॥१॥

19.69

जीवा स्थ जीव्यासं सर्वमायुर्जीव्यासम् ॥१॥  
उपजीवा स्थोप जीव्यासं सर्वमायुर्जीव्यासम् ॥२॥  
संजीवा स्थ सं जीव्यासं सर्वमायुर्जीव्यासम् ॥३॥  
जीवला स्थ जीव्यासं सर्वमायुर्जीव्यासम् ॥४॥

19.70

इन्द्र जीव सूर्य जीव देवा जीवा जीव्यासमहम् ।  
सर्वमायुर्जीव्यासम् ॥१॥

19.71

स्तुता मया वरदा वेदमाता प्र चोदयन्तां पावमानी द्विजानाम् ।  
आयुः प्राणं प्रजां पशुं कीर्तिं द्रविणं ब्रह्मवर्चसम् ।  
मह्यं दत्त्वा व्रजत ब्रह्मलोकम् ॥१॥

19.72

यस्मात्कोशादुदभराम वेदं तस्मिन् अन्तरव दध्म एनम् ।  
कृतमिष्टं ब्रह्मणो वीर्येण तेन मा देवास्तपसावतेह ॥१॥

20.1

इन्द्र त्वा वृषभं वयं सुते सोमे हवामहे ।  
स पाहि मध्वो अन्धसः ॥१॥  
मरुतो यस्य हि क्षये पाथा दिवो विमहसः ।  
स सुगोपातमो जनः ॥२॥  
उक्षान्नाय वशान्नाय सोमपृष्ठाय वेधसे ।

स्तोमैर्विधेमाग्नये ॥३॥

20.2

मरुतः पोत्रात्सुष्टुभः स्वर्कादृतुना सोमं पिबन्तु ॥१॥  
अग्निराग्नीध्रात्सुष्टुभः स्वर्कादृतुना सोमं पिबतु ॥२॥  
इन्द्रो ब्रह्मा ब्राह्मणात्सुष्टुभः स्वर्कादृतुना सोमं पिबतु ॥३॥  
देवो द्रविणोदाः पोत्रात्सुष्टुभः स्वर्कादृतुना सोमं पिबतु ॥४॥

20.3

आ याहि सुषुमा हि त इन्द्र सोमं पिबा इमम् ।  
एदं बर्हिः सदो मम ॥१॥  
आ त्वा ब्रह्मयुजा हरी वहतामिन्द्र केशिना ।  
उप ब्रह्माणि नः शृणु ॥२॥  
ब्रह्माणस्त्वा वयं युजा सोमपामिन्द्र सोमिनः ।  
सुतावन्तो हवामहे ॥३॥

20.4

आ नो याहि सुतावतोऽस्माकं सुष्टुतीरुप ।  
पिबा सु शिप्रिन् अन्धसः ॥१॥  
आ ते सिञ्चामि कुक्ष्योरनु गात्रा वि धावतु ।  
गृभाय जिह्वया मधु ॥२॥  
स्वादुष्टे अस्तु संसुदे मधुमान् तन्वे तव ।  
सोमः शमस्तु ते हृदे ॥३॥

20.5

अयमु त्वा विचर्षणे जनीरिवाभि संवृतः ।  
प्र सोम इन्द्र सर्पतु ॥१॥  
तुविग्रीवो वपोदरः सुबाहुरन्धसो सदे ।  
इन्द्रो वृत्राणि जिघ्नते ॥२॥  
इन्द्र प्रेहि पुरस्त्वं विश्वस्येशान ओजसा ।  
वृत्राणि वृत्रहं जहि ॥३॥  
दीर्घस्ते अस्त्वङ्कुशो येना वसु प्रयच्छसि ।  
यजमानाय सुन्वते ॥४॥  
अयं त इन्द्र सोमो निपूतो अधि बर्हिषि ।  
एहीमस्य द्रवा पिब ॥५॥  
शाचिगो शाचिपूजनायं रणाय ते सुतः ।  
आखण्डल प्र ह्यसे ॥६॥  
यस्ते शृङ्गवृषो नपात्प्रणपात्कुण्डपाय्यः ।  
न्यस्मिन् दध्न आ मनः ॥७॥

20.6

इन्द्र त्वा वृषभं वयं सुते सोमे हवामहे ।  
स पाहि मध्वो अन्धसः ॥१॥  
इन्द्र क्रतुविदं सुतं सोमं हर्यं पुरुष्टुत ।  
पिबा वृषस्व तात्पिम् ॥२॥  
इन्द्र प्र णो धितावानं यज्ञं विश्वेभिर्देवेभिर् ।  
तिर स्तवान विशपते ॥३॥  
इन्द्र सोमाः सुता इमे तव प्र यन्ति सत्पते ।  
क्षयं चन्द्रास इन्दवः ॥४॥  
दधिष्वा जठरे सुतं सोममिन्द्र वरेण्यम् ।  
तव द्युक्षास इन्दवः ॥५॥  
गिर्वणः पाहि नः सुतं मधोर्धाराभिरज्यसे ।  
इन्द्र त्वादातमिद्यशः ॥६॥  
अभि द्युम्नानि वनिन इन्द्रं सचन्ते अक्षिता ।  
पीत्वी सोमस्य वावृधे ॥७॥  
अर्वावतो न आ गहि परावतश्च वृत्रहन् ।  
इमा जुषस्व नो गिरः ॥८॥  
यदन्तरा परावतमर्वावतं च ह्यसे ।  
इन्द्रेह तत आ गहि ॥९॥

20.7

उद्धेदभि श्रुतामघं वृषभं नर्यापसम् ।  
अस्तारमेषि सूर्य ॥१॥  
नव यो नवर्ति पुरो बिभेद बाह्वोजसा ।

अहिं च वृत्रहावधीत् ॥२॥  
स न इन्द्रः शिवः सखाश्वान्द्रोमद्यवमत् ।  
उरुधारेव दोहते ॥३॥  
इन्द्र क्रतुविदं सुतं सोमं हर्यं पुरुष्टुत ।  
पिबा वृषस्व तातृपिम् ॥४॥

20.8

एवा पाहि प्रत्नथा मन्दतु त्वा श्रुधि ब्रह्म वावृधस्वोत गीर्भिः ।  
आविः सूर्यं कृणुहि पीपिहीषो जहि शत्रूरभि गा इन्द्र तृन्धि ॥१॥  
अवाडेहि सोमकामं त्वाहुरयं सुतस्तस्य पिबा मदाय ।  
उरुव्यचा जठर आ वृषस्व पितेव नः शृणुहि ह्यमानः ॥२॥  
आपूर्णां अस्य कलशः स्वाहा सेक्तेव कौशं सिषिचे पिबध्वै ।  
समु प्रिया आववृत्रन् मदाय प्रदक्षिणिदभि सोमास इन्द्रम् ॥३॥

20.9

तं वो दस्ममृतीषहं वसोर्मन्दानमन्धसः ।  
अभि वत्सं न स्वसरेषु धेनव इन्द्रं गीर्भिर्नवामहे ॥१॥  
द्युक्षं सुदानुं तविषीभिरावृतं गिरिं न पुरुभोजसम् ।  
क्षुमन्तं वाजं शतिनं सहस्रिणं मक्षुं गोमन्तमीमहे ॥२॥  
तत्त्वा यामि सुवीर्यं तदब्रह्म पूर्वचित्तये ।  
येना यतिभ्यो भगवे धने हितं येन प्रस्कण्वमाविध ॥३॥  
येना समुद्रमसृजो महीरपस्तदिन्द्र वृष्णि ते शवः ।  
सद्यः सो अस्य महिमा न संनशे यं क्षोणीरनुचक्रदे ॥४॥

20.10

उदु ते मधुमत्तमा गिर स्तोमास ईरते ।  
सत्राजितो धनसा अक्षितोतयो वाजयन्तो रथा इव ॥१॥  
कण्वा इव भृगवः सूर्या इव विश्वमिद्धीतमानशुः ।  
इन्द्रं स्तोमोभिर्महयन्त आयवः प्रियमेधासो अस्वरन् ॥२॥

20.11

इन्द्रः पूर्भिदातिरद्वासमर्केर्विदद्वसुर्दयमानो वि शत्रून् ।  
ब्रह्मजतस्तन्वा वावृधानो भूरिदात्र आपृणद्रोदसी उभे ॥१॥  
मखस्य ते तविषस्य प्र जूतिमियर्मिं वाचममृताय भूषन् ।  
इन्द्र क्षितीनामसि मानुषीणां विशां दैवीनामुत पूर्वयावा ॥२॥  
इन्द्रो वृत्रमवृणोच्छर्धनीतिः प्र मायिनाममिनाद्वर्षणीतिः ।  
अहन् व्यंसमुशधग्वनेष्वाविर्धना अकृणोद्राम्याणाम् ॥३॥  
इन्द्रः स्वर्षा जनयन् अहानि जिगायोशिग्भिः पूतना अभिष्टिः ।  
प्रारोचयन् मनवे केतुमहामविन्दज्ज्योतिर्बृहते रणाय ॥४॥  
इन्द्रस्तुजो बर्हणा आ विवेश नृवहृधानो नर्या पुरूणि ।  
अचेतयद्विद्य इमा जरित्रे प्रेमं वर्णमतिरच्छुक्रमासाम् ॥५॥  
महो महानि पनयन्त्यस्येन्द्रस्य कर्म सुकृता पुरूणि ।  
वृजनेन वृजिनान्तसं पिपेष मायाभिर्दस्यूरभिभृत्योजाः ॥६॥  
युधेन्द्रो महा वरिश्चकार देवेभ्यः सत्पतिश्चर्षणिप्राः ।  
विवस्वतः सदने अस्य तानि विप्रा उक्थेभिः कवयो गृणन्ति ॥७॥  
सत्रासाहं वरेण्यं सहोदां ससवांसं स्वरपश्च देवीः ।  
ससान यः पृथिवीं द्यामुतेमामिन्द्रं मदन्त्यनु धीरणासः ॥८॥  
ससानात्यामुत सूर्यं ससानेन्द्रः ससान पुरुभोजसं गाम् ।  
हिरण्ययमुत भोगं ससान हत्वी दस्युन् प्रार्यं वर्णमावत् ॥९॥  
इन्द्र ओषधीरसनोदहानि वनस्पतीरसनोदन्तरिक्षम् ।  
बिभेद बलं ननुदे विवाचोऽथाभवहृमिताभिक्रतूनाम् ॥१०॥  
शुनं हुवेम मघवानमिन्द्रमस्मिन् भरे नृतमं वाजसातौ ।  
शृण्वन्तमुग्रमृतये समत्सु घन्तं वृत्राणि संजितं धनानाम् ॥११॥

20.12

उदु ब्रह्माण्यैरत श्रवस्येन्द्रं समर्ये महया वसिष्ठ ।  
आ यो विश्वानि शवसा ततानोपश्रोता म ईवतो वचांसि ॥१॥  
अयामि घोष इन्द्र देवजामिरिरज्यन्त यच्छुरुधो विवाचि ।  
नहि स्वमायुश्चिकिते जनेषु तानीदंहास्यति पर्थ्यस्मान् ॥२॥  
युजे रथं गवेषणं हरिभ्यामुप ब्रह्माणि जुजुषाणमस्थुः ।  
वि बाधिष्ट स्य रोदसी महित्वेन्द्रो वृत्राण्यप्रती जघन्वान् ॥३॥  
आपश्चित्पिप्यु स्तर्यो न गावो नक्षत्रं ऋतं जरितारस्त इन्द्र ।  
याहि वायुर्न नियुतो नो अछा त्वं हि धीभिर्दयसे वि वाजान् ॥४॥  
ते त्वा मदा इन्द्र मादयन्तु शुष्मिणं तुविराधसं जरित्रे ।

एको देवत्रा दयसे हि मर्तान् अस्मिन् छूर सवने मादयस्व ॥५॥  
 एवेदिन्द्रं वृषणं वज्रबाहुं वसिष्ठासो अभ्यर्चन्त्यर्केः ।  
 स न स्तुतो वीरवद्भ्रातु गोमद्वयं पात स्वस्तिभिः सदा नः ॥६॥  
 ऋजीषी वज्री वृषभस्तुराषाट्छुष्मी राजा वृत्रहा सोमपावा ।  
 युक्त्वा हरिभ्यामुप यासदवाङ्गाध्यंदिने सवने मत्सदिन्द्रः ॥७॥

20.13

इन्द्रश्च सोमं पिबतं बृहस्पतेऽस्मिन् यज्ञे मन्दसाना वृषण्वसू ।  
 आ वां विशन्त्विन्दवः स्वाभुवोऽस्मे रयिं सर्ववीरं नि यच्छतम् ॥१॥  
 आ वो वहन्तु सप्तयो रघुष्यदो रघुपत्वानः प्र जिगात बाहुभिः ।  
 सीदता बर्हिरुरु वः सदस्कृतं मादयध्वं मरुतो मध्वो अन्धसः ॥२॥  
 इमं स्तोममर्हते जातवेदसे रथमिव सं महेमा मनीषया ।  
 भद्रा हि नः प्रमतिरस्य संसद्यग्ने सख्ये मा रिषामा वयं तव ॥३॥  
 ऐभिरग्ने सरथं याह्यर्वाङ्गानारथं वा विभवो ह्यश्वः ।  
 पत्नीवतस्त्रिंशतं त्रींश्च देवान् अनुष्वधमा वह मादयस्व ॥४॥

20.14

वयमु त्वामपूर्व्यं स्थूरं न कच्चिद्भ्रन्तोऽवस्यवः ।  
 वाजे चित्रं हवामहे ॥१॥  
 उप त्वा कर्मन् ऊतये स नो युवोग्रश्चक्राम यो धृषत् ।  
 त्वामिद्धावितारं ववमहे सखाय इन्द्र सानसिम् ॥२॥  
 यो न इदमिदं पुरा प्र वस्य आनिनाय तमु व स्तुषे ।  
 सखाय इन्द्रमूतये ॥३॥  
 हर्यश्वं सत्पतिं चर्षणीसहं स हि ष्मा यो अमन्दत ।  
 आ तु नः स वयति गव्यमश्व्यं स्तोतृभ्यो मघवा शतम् ॥४॥

20.15

प्र महिष्ठाय बृहते बृहद्रये सत्यशुष्माय तवसे मतिं भरे ।  
 अपामिव प्रवणे यस्य दुर्धरं राधो विश्वायु शवसे अपावृतम् ॥१॥  
 अध ते विश्वमनु हासदिष्टय आपो निम्नेव सवना हविष्मतः ।  
 यत्पर्वते न समशीत हर्यत इन्द्रस्य वज्रः श्रथिता हिरण्ययः ॥२॥  
 अस्मै भीमाय नमसा समध्वर उषो न शुभ्र आ भरा पनीयसे ।  
 यस्य धाम श्रवसे नामेन्द्रियं ज्योतिरकारि हरितो नायसे ॥३॥  
 इमे त इन्द्र ते वयं पुरुष्टुत ये त्वारभ्य चरामसि प्रभूवसो ।  
 नहि त्वदन्यो गिर्वणो गिरः सधत्क्षोणीरिव प्रति नो हर्यं तद्वचः ॥४॥  
 भूरि त इन्द्र वीर्यं तव स्मस्यस्य स्तोतुर्मघवन् काममा पृण ।  
 अनु ते द्यौर्बृहती वीर्यं मम इयं च ते पृथिवी नेम ओजसे ॥५॥  
 त्वं तमिन्द्र पर्वतं महामुरुं वज्रेण वज्जिन् पर्वशश्वकर्तिथ ।  
 अवासृजो निवृताः सर्तवा अपः सत्रा विश्वं दधिषे केवलं सहः ॥६॥

20.16

उदप्रुतो न वयो रक्षमाणा वावदतो अभ्रियस्येव घोषाः ।  
 गिरिभ्रजो नोर्मयो मदन्तो बृहस्पतिमभ्यर्का अनावन् ॥१॥  
 सं गोभिरङ्गिरसो नक्षमाणो भग इवेदर्यमणं निनाय ।  
 जने मित्रो न दम्पती अनक्ति बृहस्पते वाजयाशूरिवाजौ ॥२॥  
 साध्वर्या अतिथिनीरिषिरा स्पर्हाः सुवर्णा अनवद्यरूपाः ।  
 बृहस्पतिः पर्वतेभ्यो वितूर्या निर्गा ऊपे यवमिव स्थिविभ्यः ॥३॥  
 आपुषायन् मधुना ऋतस्य योनिमवक्षिपन् अर्क उल्कामिव द्यौः ।  
 बृहस्पतिरुद्धरन् अश्मनो गा भूम्या उदनेव वि त्वचं बिभेद ॥४॥  
 अप ज्योतिषा तमो अन्तरिक्षदुदनः शीपालमिव वात आजत् ।  
 बृहस्पतिरनुमृश्या वलस्याभ्रमिव वात आ चक्र आ गाः ॥५॥  
 यदा वलस्य पीयतो जसुं भेद्बृहस्पतिरग्नितपोभिरर्केः ।  
 दद्भिर्न जिह्वा परिविष्टमाददाविर्निर्धीरकृणोदुस्त्रियाणाम् ॥६॥  
 बृहस्पतिरमत हि त्यदासां नाम स्वरीणां सदने गुहा यत् ।  
 आण्डेव भित्वा शकुनस्य गर्भमुदुस्त्रियाः पर्वतस्य त्मनाजत् ॥७॥  
 अश्रापिनद्धं मधु पर्यपश्यन् मत्स्यं न दीन उदनि क्षियन्तम् ।  
 निष्टज्जभार चमसं न वृक्षाद्बृहस्पतिर्विरवेणा विकृत्य ॥८॥  
 सोषामविन्दत्स स्वः सो अग्निं सो अर्केण वि बबाधे तमांसि ।  
 बृहस्पतिर्गोवपुषो वलस्य निर्मज्जानं न पर्वणो जभार ॥९॥  
 हिमेव पर्णा मुषिता वनानि बृहस्पतिनाकृपयद्वलो गाः ।  
 अनानुकृत्यमपुनश्चकार यात्सूर्यामासा मिथ उच्चरातः ॥१०॥  
 अभि श्यावं न कृशनेभिरश्वं नक्षत्रेभिः पितरो द्यामपिंशन् ।  
 रात्र्यां तमो अदधुज्योतिरहन् बृहस्पतिर्भिन्दद्रिं विदद्गाः ॥११॥  
 इदमकर्म नमो अभ्रियाय यः पूर्वैरन्वानोनवीति ।

बृहस्पतिः स हि गोभिः सो अश्वैः स वीरेभिः स नृभिर्नो वयो धात् ॥१२॥

20.17

अच्छा म इन्द्रं मतयः स्वर्विदः सध्रीचीर्विश्वा उशतीरनूषत ।  
परि ष्वजन्ते जनयो यथा पतिं मर्यं न शुन्ध्युं मघवानमूतये ॥१॥  
न घा त्वद्विगप वेति मे मनस्त्वे इत्कामं पुरुहूत शिश्रय ।  
राजैव दस्म नि षदोऽधि बर्हिष्पस्मिन्त्सु सोमेऽवपानमस्तु ते ॥२॥  
विष्वदिन्द्रो अमुतेरुत क्षुधः स इद्रायो मघवा वस्व ईशते ।  
तस्येदिमे प्रवणे सप्त सिन्धवो वयो वर्धन्ति वृषभस्य शुष्मिणः ॥३॥  
वयो न वृक्षं सुपलाशमासदन्त्सोमास इन्द्रं मन्दिनश्चमूषदः ।  
प्रैषामनीकं शवसा दविद्युतद्विदत्स्वर्मनवे ज्योतिरार्यम् ॥४॥  
कृतं न श्वघ्नी वि चिनोति देवने संवर्गं यन् मघवा सूर्यं जयत् ।  
न तत्ते अन्यो अनु वीर्यं शकन् न पुराणो मघवन् नोत नूतनः ॥५॥  
विशंविशं मघवा पर्यशायत जनानां धेना अवचाकशदृषा ।  
यस्याह शक्रः सवनेषु रण्यति स तीव्रैः सोमैः सहते पृतन्यतः ॥६॥  
आपो न सिन्धुमभि यत्समक्षरन्त्सोमास इन्द्रं कुल्या इव हृदम् ।  
वर्धन्ति विप्रा महो अस्य सादने यवं न वृष्टिदिव्येन दानुना ॥७॥  
वृषा न क्रुद्धः पतयद्रजःस्वा यो अर्यपत्नीरकृणोदिमा अपः ।  
स सुन्वते मघवा जीरदानवेऽविन्दज्ज्योतिर्मनवे हविष्मते ॥८॥  
उज्जायतां परशु ज्योतिषा सह भूया ऋतस्य सुदुघा पुराणवत् ।  
वि रोचतामरुषो भानुना शुचिः स्वर्नं शक्रं शुशुचीत सत्पतिः ॥९॥  
गोभिष्टरेमामतिं दुरेवां यवेन क्षुधं पुरुहूत विश्वाम् ।  
वयं राजभिः प्रथमा धनान्यस्माकेन वृजनेना जयेम ॥१०॥  
बृहस्पतिर्नः परि पातु पश्चादुतोत्तरस्मादधरादघायोः ।  
इन्द्रः पुरस्तादूत मध्यतो नः सखा सखिभ्यः वरिवः कृणोतु ॥११॥  
बृहस्पते युवमिन्द्रश्च वस्वो दिव्यस्येशाथे उत पार्थिवस्य ।  
धत्तं रयिं स्तुवते कीरये चिद्वयं पात स्वस्तिभिः सदा नः ॥१२॥

20.18

वयमु त्वा तदितर्था इन्द्र त्वायन्तः सखायः ।  
कण्वा उक्थेभिर्जरन्ते ॥१॥  
न धेमन्यदा पपन वज्रिन् अपसो नविष्टौ ।  
तवेदु स्तोमं चिकेत ॥२॥  
इच्छन्ति देवाः सुन्वन्तं न स्वप्राय स्पृहयन्ति ।  
यन्ति प्रमादमतन्द्राः ॥३॥  
वयमिन्द्र त्वायवोऽभि प्र णोनुमो वृषन् ।  
विद्धि त्वस्य नो वसो ॥४॥  
मा नो निदे च वक्तवोऽर्यो रन्धीररात्ने ।  
त्वे अपि क्रतुर्मम ॥५॥  
त्वं वर्मासि सप्रथः पुरोयोधश्च वृत्रहन् ।  
त्वया प्रति ब्रुवे युजा ॥६॥

20.19

वार्त्रहत्याय शवसे पृतनाषाहाय च ।  
इन्द्र त्वा वर्तयामसि ॥१॥  
अर्वाचीनं सु ते मन उत चक्षुः शतक्रतो ।  
इन्द्र कृण्वन्तु वाघतः ॥२॥  
नामानि ते शतक्रतो विश्वाभिर्गीर्भिरीमहे ।  
इन्द्राभिमातिषाहो ॥३॥  
पुरुष्टुतस्य धामभिः शतेन महयामसि ।  
इन्द्रस्य चर्षणीधृतः ॥४॥  
इन्द्रं वृत्राय हन्तवे पुरुहूतमुप ब्रुवे ।  
भरेषु वाजसातये ॥५॥  
वाजेषु सासहिर्भव त्वामीमहे शतक्रतो ।  
इन्द्र वृत्राय हन्तवे ॥६॥  
द्युम्नेषु पृतनाज्ये पृतसुतूर्षु श्रवःसु च ।  
इन्द्र साक्ष्वाभिमातिषु ॥७॥

20.20

शुष्मिन्तमं न ऊतये द्युम्निनं पाहि जागृविम् ।  
इन्द्र सोमं शतक्रतो ॥१॥  
इन्द्रियाणि शतक्रतो या ते जनेषु पञ्चसु ।  
इन्द्र तानि त आ वृणे ॥२॥  
अगन् इन्द्र श्रवो बृहद्द्युम्नं दधिष्व दुष्टरम् ।

उक्ते शुष्मं तिरामसि ॥३॥  
 अर्वावतो न आ गृह्णथो शक्र परावतः ।  
 उ लोको यस्ते अद्रिव इन्द्रेह तत आ गहि ॥४॥  
 इन्द्रो अङ्गं महद्भयमभि षदप चुच्यवत् ।  
 स हि स्थिरो विचर्षणिः ॥५॥  
 इन्द्रश्च मृलयाति नो न नः पश्चादघं नशत् ।  
 भद्रं भवाति नः पुरः ॥६॥  
 इन्द्र आशाभ्यस्परि सर्वाभ्यो अभयं करत् ।  
 जेता शत्रून् विचर्षणिः ॥७॥

20.21

न्यू षु वाचं प्र महे भ्रामहे गिर इन्द्राय सदनं विवस्वतः ।  
 नू चिद्धि रत्नं ससतामिवाविदन् न दुष्टतिर्द्रविणोदेषु शस्यते ॥१॥  
 दुरो अश्वस्य दुर इन्द्र गोरसि दुरो यवस्य वसुन इनस्पतिः ।  
 शिक्षानरः प्रदिवो अकामकर्शनः सखा सखिभ्यस्तमिदं गृणीमसि ॥२॥  
 शचीव इन्द्र पुरुकृद्दयुमत्तम तवेदिदमभितश्चेकिते वसु ।  
 अतः संगृह्याभिभूत आ भर मा त्वायतो जरितुः काममूनयीः ॥३॥  
 एभिर्द्युभिर्सुमना एभिरिन्दुभिर्निरुन्धानो अमतिं गोभिरश्विना ।  
 इन्द्रेण दस्युं दरयन्त इन्दुभिर्युतद्वेषसः समिषा रभेमहि ॥४॥  
 समिन्द्र राया समिषा रभेमहि सं वाजेभिः पुरुश्चन्द्रैरभिद्युभिः ।  
 सं देव्या प्रमत्या वीरशुष्मया गोअग्रयाश्चावत्या रभेमहि ॥५॥  
 ते त्वा मदा अमदन् तानि वृष्ण्या ते सोमासो वृत्रहत्येषु सत्पते ।  
 यत्कारवे दश वृत्राण्यप्रति बर्हिष्मते नि सहस्राणि बर्हयः ॥६॥  
 युधा युधमुप घेषि धृष्णुया पुरा पुरं समिदं हंस्योजसा ।  
 नम्या यदिन्द्र सख्या परावति निबर्हयो नमुचिं नाम मायिनम् ॥७॥  
 त्वं करञ्जमुत पर्णयं वधीस्तेजिष्ठयातिथिग्वस्य वर्तनी ।  
 त्वं शता वङ्गदस्याभिनत्पुरोऽनानुदः परिषूता ऋजिश्चना ॥८॥  
 त्वमेतां जनराज्ञो द्विर्दशाबन्धुना सुश्रवसोपजग्मुषः ।  
 षष्टिं सहस्रा नवतिं नव श्रुतो नि चक्रेण रथ्या दुष्पदावृणक् ॥९॥  
 त्वमाविथ सुश्रवसं तवोतिभिस्तव त्रामभिरिन्द्र तूर्वयाणम् ।  
 त्वमस्मै कुत्समतिथिग्वमायुं महे राज्ञे यूने अरन्धनायः ॥१०॥  
 य उदृचीन्द्र देवगोपाः सखायस्ते शिवतमा असाम ।  
 त्वां स्तोषाम त्वया सुवीरा द्राघीय आयुः प्रतरं दधानाः ॥११॥

20.22

अभि त्वा वृषभा सुते सुतं सृजामि पीतये ।  
 तृम्पा व्यश्रुही मदम् ॥१॥  
 मा त्वा मूरा अविष्यवो मोपहस्वान आ दभन् ।  
 मार्कीं ब्रह्मद्विषो वनः ॥२॥  
 इह त्वा गोपरीणसा महे मन्दन्तु राधसे ।  
 सरो गौरो यथा पिब ॥३॥  
 अभि प्र गोपतिं गिरेन्द्रमर्च यथा विदे ।  
 सूनुं सत्यस्य सत्पतिम् ॥४॥  
 आ हरयः ससृजिरेऽरुषीरथि बर्हिषि ।  
 यत्राभि संनवामहे ॥५॥  
 इन्द्राय गाव आशिरं दुदुहे वज्रिणे मधु ।  
 यत्सीमुपह्वरे विदत् ॥६॥

20.23

आ तू न इन्द्र मद्र्यग्धुवानः सोमपीतये ।  
 हरिभ्यां याह्यद्रिवः ॥१॥  
 सत्तो होता न ऋत्वियस्तिस्तिरे बर्हिरानुषक् ।  
 अयुञ्जन् प्रातरद्रयः ॥२॥  
 इमा ब्रह्म ब्रह्मवाहः क्रियन्त आ बर्हिः सीद ।  
 वीहि शूर पुरोलाशम् ॥३॥  
 रारन्धि सवनेषु ण एषु स्तोमेषु वृत्रहन् ।  
 उक्थेष्विन्द्र गिर्वणः ॥४॥  
 मतयः सोमपामुरुं रिहन्ति शवसस्पतिम् ।  
 इन्द्रं वत्सं न मातरः ॥५॥  
 स मन्दस्वा ह्यन्धसो राधसे तन्वा महे ।  
 न स्तोतारं निदे करः ॥६॥  
 वयमिन्द्र त्वायवो हविष्मन्तो जरामहे ।  
 उत त्वमस्मयुर्वसो ॥७॥  
 मारे अस्मद्धि मुमुचो हरिप्रियार्वान्ज्याहि ।



इन्द्र स्वधावो मत्स्वेह ॥८॥  
अर्वाञ्चं त्वा सुखे रथे वहतामिन्द्र केशिना ।  
घृतस्नू बर्हिरासदे ॥९॥

20.24

उप नः सुतमा गहि सोममिन्द्र गवाशिरम् ।  
हरिभ्यां यस्ते अस्मयुः ॥१॥  
तमिन्द्र मदमा गहि बर्हिष्ठां ग्रावभिः सुतम् ।  
कुविन् न्वस्य तृष्णवः ॥२॥  
इन्द्रमित्था गिरो ममाछागुरिषिता इतः ।  
आवृते सोमपीतये ॥३॥  
इन्द्रं सोमस्य पीतये स्तोमैरिह हवामहे ।  
उक्थेभिः कुविदागमत् ॥४॥  
इन्द्र सोमाः सुता इमे तान् दधिष्व शतक्रतो ।  
जठरे वाजिनीवसो ॥५॥  
विद्वा हि त्वा धनंजयं वाजेषु दधृषं कवे ।  
अथा ते सुम्नमीमहे ॥६॥  
इममिन्द्र गवाशिरं यवाशिरं च नः पिब ।  
आगत्या वृषभिः सुतम् ॥७॥  
तुभ्येदिन्द्र स्व ओक्थे सोमं चोदामि पीतये ।  
एष रारन्तु ते हृदि ॥८॥  
त्वां सुतस्य पीतये प्रत्नमिन्द्र हवामहे ।  
कुशिकासो अवस्यवः ॥९॥

20.25

अश्रावति प्रथमो गोषु गच्छति सुप्रावीरिन्द्र मर्त्यस्तवोतिभिः ।  
तमितृष्णक्षि वसुना भवीयसा सिन्धुमापो यथाभितो विचेतसः ॥१॥  
आपो न देवीरुप यन्ति होत्रियमवः पश्यन्ति विततं यथा रजः ।  
प्राचैर्देवासः प्र णयन्ति देवयुं ब्रह्मप्रियं जोषयन्ते वरा इव ॥२॥  
अधि द्वयोरदधा उक्थं वचो यतसुचा मिथुना या सपर्यतः ।  
असंयत्तो व्रते ते क्षेति पुष्यति भद्रा शक्तिर्यजमानाय सुन्वते ॥३॥  
आदङ्गिराः प्रथमं दधिरे वय इद्धाग्नयः शम्या ये सुकृत्यया ।  
सर्वं पणोः समविन्दन्त भोजनमश्रावन्तं गोमन्तमा पशुं नरः ॥४॥  
यज्ञैरथर्वा प्रथमः पथस्तते ततः सूर्यो व्रतपा वेन आजनि ।  
आ गा आजदुशना काव्यः सचा यमस्य जातममृतं यजामहे ॥५॥  
बर्हिर्वा यत्स्वपत्याय वृज्यतेऽर्को वा श्लोकमाघोषते दिवि ।  
ग्रावा यत्र वदति करुरुक्थ्यस्तस्येदिन्द्रो अभिपित्वेषु रण्यति ॥६॥  
प्रोग्रां पीतिं वृष्ण इयमिं सत्यां प्रयै सुतस्य हर्यश्च तुभ्यम् ।  
इन्द्र धेनाभिरिह मादयस्व धीभिर्विश्वाभिः शच्या गृणानः ॥७॥

20.26

योगेयोगे तवस्तरं वाजेवाजे हवामहे ।  
सखाय इन्द्रमृतये ॥१॥  
आ घा गमद्यादि श्रवत्सहस्रिणीभिरूतिभिः ।  
वाजेभिरुप नो हवम् ॥२॥  
अनु प्रत्नस्यौकसो हुवे तुविप्रतिं नरम् ।  
यं ते पूर्वं पिता हुवे ॥३॥  
युञ्जन्ति ब्रध्नमरुषं चरन्तं परि तस्थुषः ।  
रोचन्ते रोचना दिवि ॥४॥  
युञ्जन्ति अस्य काम्या हरी विपक्षसा रथे ।  
शोणा धृष्णू नृवाहसा ॥५॥  
केतुं कुण्वन् अकेतवे पेशो मर्या अपेशसे ।  
समुषद्भिरजायथाः ॥६॥

20.27

यदिन्द्राहं यथा त्वमीशीय वस्व एक इत् ।  
स्तीता मे गोषखा स्यात् ॥१॥  
शिक्षेयमस्मै दित्सेयं शचीपते मनीषिणे ।  
यदहं गोपतिः स्याम् ॥२॥  
धेनुष्ट इन्द्र सूनृता यजमानाय सुन्वते ।  
गामश्वं पिप्पुषी दुहे ॥३॥  
न ते वर्तास्ति राधस इन्द्र देवो न मर्त्यः ।  
यद्वित्ससि स्तुतो मघम् ॥४॥  
यज्ञ इन्द्रमवधेयद्यद्भूमिं व्यवर्तयत् ।

चक्राण ओपशं दिवि ॥५॥  
वावुधानस्य ते वयं विश्वा धनानि जिग्युषः ।  
ऊर्तिमिन्द्रा वृणीमहे ॥६॥

20.28

व्यन्तरिक्षमतिरन् मदे सोमस्य रोचना ।  
इन्द्रो यदभिनद्वलम् ॥१॥  
उद्रा आजदङ्गिरोभ्य आविष्प्रण्वन् गुहा सतीः ।  
अर्वाञ्चं नुनुदे वलम् ॥२॥  
इन्द्रेण रोचना दिवो दृल्हानि दृहितानि च ।  
स्थिराणि न पराणुदे ॥३॥  
अपामूर्मिर्मदन् इव स्तोम इन्द्राजिरायते ।  
वि ते मदा अराजिषुः ॥४॥

20.29

त्वं हि स्तोमवर्धन इन्द्रास्युक्थवर्धनः ।  
स्तोतृणामुत भद्रकृत् ॥१॥  
इन्द्रमित्केशिना हरी सोमपेयाय वक्षतः ।  
उप यज्ञं सुराधसम् ॥२॥  
अपां फेनेन नमुचेः शिर इन्द्रोदवर्तयः ।  
विश्वा यदजय स्पृधः ॥३॥  
मायाभिरुत्सिसृप्सत इन्द्र द्यामारुरुक्षतः ।  
अव दस्यूरधूनुथाः ॥४॥  
असुन्वामिन्द्र संसदं विषूचीं व्यनाशयः ।  
सोमपा उत्तरो भवन् ॥५॥

20.30

प्र ते महे विदथे शंसिषं हरी प्र ते वन्वे वनुषो हर्यतं मदम् ।  
घृतं न यो हरिभिश्चारु सेचत आ त्वा विशन्तु हरिवर्षसं गिरः ॥१॥  
हरिं हि योनिमभि ये समस्वरन् हिन्वन्तो हरी दिव्यं यथा सदः ।  
आ यं पृणन्ति हरिभिर्न धेनव इन्द्राय शूशं हरिवन्तमर्चत ॥२॥  
सो अस्य वज्रो हरितो य आयसो हरिर्निकामो हरिरा गभस्त्योः ।  
द्युम्नी सुशिप्रो हरिमन्युसायक इन्द्रे नि रूपा हरिता मिमिक्षिरे ॥३॥  
दिवि न केतुरधि धायि हर्यतो विव्यचद्रज्जो हरितो न रंह्या ।  
तुददहिं हरिशिप्रो य आयसः सहस्रशोका अभवद्धरिम्भरः ॥४॥  
त्वत्वमहर्यथा उपस्तुतः पूर्वैभिरिन्द्र हरिकेश यज्वभिः ।  
त्वं हर्यसि तव विश्वमुक्थमसामि राधो हरिजात हर्यतम् ॥५॥

20.31

ता वज्रिणं मन्दिनं स्तोम्यं मद इन्द्रं रथे वहतो हर्यता हरी ।  
पुरूण्यस्मै सवनानि हर्यत इन्द्राय सोमा हरयो दधन्विरे ॥१॥  
अरं कामाय हरयो दधन्विरे स्थिराय हिन्वन् हरयो हरी तुरा ।  
अर्वद्विर्यो हरिभिर्जोषमीयते सो अस्य कामं हरिवन्तमानशं ॥२॥  
हरिशमशारुर्हरिकेश आयसस्तुरस्पेये यो हरिपा अवर्धत ।  
अर्वद्विर्यो हरिभिर्वाजिनीवसुरति विश्वा दुरिता पारिषद्दुरी ॥३॥  
श्रुवेव यस्य हरिणी विपेततुः शिप्रे वाजाय हरिणी दविध्वतः ।  
प्र यत्कृते चमसे मर्मजद्दुरी पीत्वा मदस्य हर्यतस्यान्धसः ॥४॥  
उत स्म सदन् हर्यतस्य पस्त्योरत्यो न वाजं हरिवामचिक्रदत् ।  
मही चिद्धि धिषणाहर्यदोजसा बृहद्वयो दधिषे हर्यतस्विदा ॥५॥

20.32

आ रोदसी हर्यमाणो महित्वा नव्यंनव्यं हर्यसि मन्म नु प्रियम् ।  
प्र पस्त्यमसुर हर्यतं गोराविष्कृधि हरये सूर्याय ॥१॥  
आ त्वा हर्यन्तं प्रयुजो जनानां रथे वहन्तु हरिशिप्रमिन्द्र ।  
पिबा यथा प्रतिभृतस्य मध्वो हर्यन् यज्ञं सधमादे दशोणिम् ॥२॥  
अपाः पूर्वेषां हरिवः सुतानामथो इदं सवनं केवलं ते ।  
ममद्धि सोमं मधुमन्तमिन्द्र सत्रा वृषं जथर आ वृषस्व ॥३॥

20.33

अप्सु धृतस्य हरिवः पिबेह नृभिः सुतस्य जठरं पृणस्व ।  
मिमिक्षुर्यमद्रय इन्द्र तुभ्यं तेभिर्वर्धस्व मदमुक्थवाहः ॥१॥  
प्रोग्रां पीति वृष्ण इयर्मि सत्यां प्रयै सुतस्य हर्यश्च तुभ्यम् ।  
इन्द्र धेनाभिरिह मादयस्व धीभिर्विश्वाभिः शच्या गृणानः ॥२॥  
ऊती शचीवस्तव वीर्येण वयो दधाना उशिज ऋतज्ञाः ।

प्रजावदिन्द्र मंसो दुरोणे तस्थुर्गणन्तः सधमाद्यासः ॥३॥

20.34

यो जात एव प्रथमो मनस्वान् देवो देवान् क्रतुना पर्यमूषत् ।  
यस्य शुष्माद्रोदसी अभ्यसेतां नृम्णस्य मन्त्रा स जनास इन्द्रः ॥१॥  
यः पृथिवीं व्यथमानामर्दहृद्यः पर्वतान् प्रकुपितामरम्णात् ।  
यो अन्तरिक्षं विममे वरीयो यो द्यामस्तभ्नात्स जनास इन्द्रः ॥२॥  
यो हत्वाहिमरिणात्सप्त सिन्धून् यो गा उदाजदपथा वलस्य ।  
यो अश्मनोरन्तरग्निं जजान संवृक्समत्सु स जनास इन्द्रः ॥३॥  
येनेमा विश्वा च्यवना कृतानि यो दासं वर्णमधरं गुहाकः ।  
श्वघ्नीव यो जिगीवां लक्षमाददर्यः पुष्टानि स जनास इन्द्रः ॥४॥  
यं स्मा पृच्छन्ति कुह सेति घोरमुतेमाहुर्नैषो अस्तीत्येनम् ।  
सो अर्यः पुष्टीर्विज इवा मिनाति श्रदस्मै धत्त स जनास इन्द्रः ॥५॥  
यो रधस्य चोदिता यः कृशस्य यो ब्रह्मणो नाधमानस्य कीरेः ।  
युक्तग्राव्णो योऽविता सुशिप्रः सुतसोमस्य स जनास इन्द्रः ॥६॥  
यस्याश्वसः प्रदिशि यस्य गावो यस्य ग्रामा यस्य विश्वे रथासः ।  
यः सूर्यं य उषसं जजान यो अपां नेता स जनास इन्द्रः ॥७॥  
यं क्रन्दसी संयती विह्वयेते परेऽवरे उभया अमित्राः ।  
समानं चिद्रथमातस्थिवांसा नाना हवेते स जनास इन्द्रः ॥८॥  
यस्मान् न ऋते विजयन्ते जनासो यं युध्यमाना अवसे हवन्ते ।  
यो विश्वस्य प्रतिमानं बभूव यो अच्युतच्युत्स जनास इन्द्रः ॥९॥  
यः शस्वतो मह्येनो दधानान् अमन्यमानां छर्वा जघान ।  
यः शर्धते नानुददाति शृध्यां यो दस्योर्हन्ता स जनास इन्द्रः ॥१०॥  
यः शम्भरं पर्वतेषु क्षियन्तं चत्वारिंश्यां शरद्यन्वविन्दत् ।  
ओजायमानं यो अहिं जघान दानुं शयानं स जनास इन्द्रः ॥११॥  
यः शम्भरं पर्यतरत्कसीभिर्योऽचारुकास्नापिबत्सुतस्य ।  
अन्तर्गिरौ यजमानं बहुं जनं यस्मिन् आमूर्धत्स जनास इन्द्रः ॥१२॥  
यः सप्तरश्मिर्वृषभस्तुविष्मान् अवासुजत्सर्तवे सप्त सिन्धून् ।  
यो रौहिणमस्फुरद्बज्रबाहुर्दामारोहन्तं स जनास इन्द्रः ॥१३॥  
द्यावा चिदस्मै पृथिवी ममेते शुष्माच्चिदस्य पर्वता भयन्ते ।  
यः सोमपा निचितो वज्रबाहुर्यो वज्रहस्तः स जनास इन्द्रः ॥१४॥  
यः सुन्वन्तमवति यः पचन्तं यः शंसन्तं यः शशमानमूर्ती ।  
यस्य ब्रह्म वर्धनं यस्य सोमो यस्येदं राधः स जनास इन्द्रः ॥१५॥  
जातो व्यख्यत्पित्रोरुपस्थे भुवो न वेद जनितुः परस्य ।  
स्तविष्ममाणो नो यो अस्मद्व्रता देवानां स जनास इन्द्रः ॥१६॥  
यः सोमकामो हर्यश्वः सूरिर्यस्माद्रेजन्ते भुवनानि विश्वा ।  
यो जघान शम्बरं यश्च शृष्णं य एकवीरः स जनास इन्द्रः ॥१७॥  
यः सुन्वते पचते दुध आ चिद्वाजं दर्दषिं स किलासि सत्यः ।  
वयं त इन्द्र विश्वह प्रियासः सुवीरासो विदथमा वदेम ॥१८॥

20.35

अस्मा इदु प्र तवसे तुराय प्रयो न हर्मि स्तोमं माहिनाय ।  
ऋचीषमायाग्निगव ओहमिन्द्राय ब्रह्माणि राततमा ॥१॥  
अस्मा इदु प्रय इव प्र यंसि भराभ्यान्गुषं बाधे सुवृक्ति ।  
इन्द्राय हृदा मनसा मनीषा प्रत्नाय पत्ये धियो मर्जयन्त ॥२॥  
अस्मा इदु त्यमुपमं स्वर्षां भराभ्याङ्गुषमास्येन ।  
महिष्ठमच्छोक्तिभिर्मतीनां सुवृक्तिभिः सूरिं वावृधध्वै ॥३॥  
अस्मा इदु स्तोमं सं हिनोमि रथं न तष्टेव तत्सिनाय ।  
गिरश्च गिर्वाहसे सुवृक्तीन्द्राय विश्वमिन्वं मेधिराय ॥४॥  
अस्मा इदु सप्तमिव श्रवस्येन्द्रायार्कं जुह्वा समञ्जे ।  
वीरं दानौकसं वन्दध्वै पुरां गूर्तश्रवसं दर्माणम् ॥५॥  
अस्मा इदु त्वष्टा तक्षद्बज्रं स्वपस्तमं स्वयं रणाय ।  
वृत्रस्य चिद्विदद्येन मर्म तुजन् ईशानस्तुजता कियेधाः ॥६॥  
अस्येदु मातुः सवनेषु सद्यो महः पितु पपिवां चार्वन्ना ।  
मुषार्याद्विष्णुः पचतं सहीयान् विध्यद्वराहं तिरो अद्रिमस्ता ॥७॥  
अस्मा इदु ग्नाश्विदेवपत्नीरिन्द्रायार्कमहिहत्य ऊवुः ।  
परि द्यावापृथिवी जभ्र उर्वी नास्य ते महिमानं परि ष्टः ॥८॥  
अस्येदेव प्र रिरिचे महित्वं दिवस्पृथिव्याः पर्यन्तरिक्षात् ।  
स्वरालिन्द्रो दम आ विश्वगूर्तः स्वरिरमत्रो ववक्षे रणाय ॥९॥  
अस्येदेव शवसा शुशन्तं वि वृश्वद्वज्रेण वृत्रमिन्द्रः ।  
गा न व्राणा अवनीरमूञ्चदभि श्रवो दावने सचेताः ॥१०॥  
अस्येदु त्वेषसा रन्त सिन्धवः परि यद्वज्रेण सीमयच्छत् ।  
ईशानकृद्वाशुषे दशस्यन् तुर्वीतये गाधं तुर्वणिः कः ॥११॥  
अस्मा इदु प्र भरा तूतुजानो वृत्राय वज्रमीशानः कियेधाः ।

गोर्न पर्व वि रदा तिरश्चेष्यन् अर्णास्यपां चरध्वै ॥१२॥  
 अस्येदु प्र ब्रूहि पूर्व्याणि तुरस्य कर्माणि नव्य उक्थैः ।  
 युधे यदिष्णान आयुधान्युघायमाणो निरिणाति शत्रून् ॥१३॥  
 अस्येदु भिया गिरयश्च दृल्हा द्यावा च भूमा जनुषस्तुजेते ।  
 उपो वैनस्य जोगुवान ओणिं सद्यो भुवद्वीर्याय नोधाः ॥१४॥  
 अस्मा इदु त्यदनु दाय्येषामेको यद्वृत्नं भुरेरीशानः ।  
 प्रैतशं सूर्ये पस्पृधानं सौवश्ये सुष्विमावदिन्द्रः ॥१५॥  
 एवा ते हारियोजना सुवृत्तीन्द्र ब्रह्माणि गोतमासो अक्रन् ।  
 ऐषु विश्वपेशसं धियं धाः प्रातर्मक्षु धियावसुर्जगम्यात् ॥१६॥

20.36

य एक इद्धव्यश्वर्षणीनामिन्द्रं तं गीर्भिरभ्यर्च आभिः ।  
 यः पत्यते वृषभो वृष्ण्यावान्त्सत्यः सत्वा पुरुमायः सहस्वान् ॥१॥  
 तमु नः पूर्वं पितरो नवग्वाः सप्त विप्रासो अभि वाजयन्तः ।  
 नक्षद्वाभं ततुरिं पर्वतेषामद्रोघवाचं मतिभिः शविष्ठम् ॥२॥  
 तमीमहे इन्द्रमस्य रायः पुरुवीरस्य नृततः पुरुक्षोः ।  
 यो अष्कृधोयुरजरः स्ववान् तमा भर हरिवो मादयध्वै ॥३॥  
 तन् नो वि वोचो यदि ते पूरा चिज्जरितार आनशुः सुम्नमिन्द्र ।  
 कस्ते भागः किं वयो दुध खिदुः पुरुहूत पुरुवसोऽसुरघ्नः ॥४॥  
 तं पृच्छन्ती वज्रहस्तं रथेष्णामिन्द्रं वेपी वक्वरी यस्य नू गीः ।  
 तुविग्राभं तुविकूर्मिं रभोदां गातुमिषे नक्षते तुम्रमच्छ ॥५॥  
 अया ह त्यं मायया वावृधानं मनोजुवा स्वतवः पर्वतेन ।  
 अच्युता चिद्वीलिता स्वोजो रुजो वि दृल्हा धृषता विरप्शिन् ॥६॥  
 तं वो धिया नव्यस्या शविष्ठं प्रत्नं प्रत्नवत्परितसयध्वै ।  
 स नो वक्षदनिमानः सुवह्नेन्द्रो विश्वान्यति दुर्गहाणि ॥७॥  
 आ जनाय द्रुह्वणे पार्थिवानि दिव्यानि दीपयोऽन्तरिक्षा ।  
 तपा वृषन् विश्वतः शोचिषा तान् ब्रह्मद्विषे शोचय क्षामपश्च ॥८॥  
 भुवो जनस्य दिव्यस्य राजा पार्थिवस्य जगतस्त्वेषसंदृक् ।  
 धिष्व वज्रं दक्षिण इन्द्र हस्ते विश्वा अजुर्य दयसे वि मायाः ॥९॥  
 आ संयतमिन्द्र णः स्वस्तिं शत्रुतूर्याय बृहतीममध्राम् ।  
 यया दासान्यार्याणि वृत्रा करो वज्रिन्त्सुतुका नाहुषाणि ॥१०॥  
 स नो नियुद्धिः पुरुहूत वेधो विश्ववाराभिरा गहिं प्रयज्यो ।  
 न या अदेवो वरते न देव आभिर्याहि तूयमा मद्रयद्रिक् ॥११॥

20.37

यस्तिग्मशङ्को वृषभो न भीमः एकः कृष्टीश्रयवयति प्र विश्वाः ।  
 यः शश्रुतो अदाशुषो गयस्य प्रयन्तासि सुष्वितराय वेदः ॥१॥  
 त्वं ह त्यदिन्द्र कुत्समावः शुश्रूषमाणस्तन्वा समर्ये ।  
 दासं यच्चुष्णं कुयवं न्यस्मा अरन्धय आर्जुनेयाय शिक्षन् ॥२॥  
 त्वं धृष्णो धृषता वीतहव्यं प्रावो विश्वाभिरूतिभिः सुदासम् ।  
 प्र पौरुकुत्सिं त्रसदस्युमावः क्षेत्रसाता वृत्रहत्येषु पूरुम् ॥३॥  
 त्वं नृभिर्नृमणो देववीतो भूरीणि वृत्रा हर्यश्च हंसि ।  
 त्वं नि दस्युं चुमुरिं धुनिं चास्वापयो दभीतये सुहन्तु ॥४॥  
 तव च्यौत्नानि वज्रहस्त तानि नव यत्पुरो नवति च सद्यः ।  
 निवेशने शततमाविवेषीरहं च वृत्रं नमुचिमुताहन् ॥५॥  
 सना ता त इन्द्र भोजनानि रातहव्याय दाशुषे सुदासे ।  
 वृष्णे ते हरी वृषणा युनज्मि व्यन्तु ब्रह्माणि पुरुशाक वाजम् ॥६॥  
 मा ते अस्यां सहसावन् परिष्ठावघाय भूम हरिवः परादौ ।  
 त्रायस्व नोऽवृकेभिरूथैस्तव प्रियासः सूरिषु स्याम ॥७॥  
 प्रियास इत्ते मघवन् अभिष्टौ नरो मदेम शरणे सखायः ।  
 नि तुर्वशं नि याद्वं शिशीह्यतिथिग्वाय शंस्यं करिष्यन् ॥८॥  
 सद्यश्चिन् नु ते मघवन् अभिष्टौ नरः शंसन्त्युक्थशास उक्था ।  
 ये ते हवेभिर्वि पर्णीरदाशन् अस्मान् वृणीष्व युज्याय तस्मै ॥९॥  
 एते स्तोमा नरां नृतम तुभ्यमस्मद्रयज्चो ददतो मघानि ।  
 तेषामिन्द्र वृत्रहत्ये शिवो भूः सखा च शूरोऽविता च नृणाम् ॥१०॥  
 नू इन्द्र शूर स्तवमान ऊती ब्रह्मजुतस्तन्वा वावृधस्व ।  
 उप नो वाजान् मिमीह्युप स्तीन् युयं पात स्वस्तिभिः सदा नः ॥११॥

20.38

आ याहि सुषुमा हि त इन्द्र सोमं पिबा इमम् ।  
 एदं बर्हिः सदा मम ॥१॥  
 आ त्वा ब्रह्मयुजा हरी वहतामिन्द्र केशिना ।  
 उप ब्रह्माणि नः शृणु ॥२॥  
 ब्रह्माणस्त्वा वयं युजा सोमपामिन्द्र सोमिनः ।

सुतावन्तो हवामहे ॥३॥  
इन्द्रमिद्राथिनो बृहदिन्द्रमर्केभिरकिणः ।  
इन्द्रं वाणीरनूषत ॥४॥  
इन्द्र इन्द्रयोः सचा संमिश्र आ वचोयुजा ।  
इन्द्रो वज्री हिरण्ययः ॥५॥  
इन्द्रो दीर्घाय चक्षस आ सूर्य रोहयदिवि ।  
वि गोभिरद्रिमैरयत् ॥६॥

20.39

इन्द्रं वो विश्वतस्परि हवामहे जनेभ्यः ।  
अस्माकमस्तु केवलः ॥१॥  
व्यन्तरिक्षमतिरन् मदे सोमस्य रोचना ।  
इन्द्रो यदभिनद्वलम् ॥२॥  
उद्गा आजदङ्गिरोभ्य आविष्कृष्वन् गुहा सतीः ।  
अर्वाञ्चं नुनुदे वलम् ॥३॥  
इन्द्रेण रोचना दिवो दृहानि दृहितानि च ।  
स्थिराणि न पराणुदे ॥४॥  
अपामूर्मिर्मदन्न इव स्तोम इन्द्राजिरायते ।  
वि ते मदा अराजिषुः ॥५॥

20.40

इन्द्रेण सं हि दृक्षसे संजग्मानो अबिभ्युषा ।  
मन्दू समानवर्चसा ॥१॥  
अनवद्यैरभिद्युभिर्मखः सहस्वदर्चति ।  
गणैरिन्द्रस्य काम्यैः ॥२॥  
आदह स्वधामनु पुनर्गर्भत्वमेरिरे ।  
दधाना नाम यज्ञियम् ॥३॥

20.41

इन्द्रो दधीचो अस्थभिर्वृत्राण्यप्रतिष्कृतः ।  
जघान नवतीर्नव ॥१॥  
इच्छन् अश्वस्य यच्छिरः पर्वतेष्वपश्रितम् ।  
तद्विदच्छर्यणावति ॥२॥  
अत्राह गोरमन्वत नाम त्वष्टुरपीच्यम् ।  
इत्था चन्द्रमसो गृहे ॥३॥

20.42

वाचमष्टापदीमहं नवसक्तिमृतस्पृशम् ।  
इन्द्रात्परि तन्वं ममे ॥१॥  
अनु त्वा रोदसी उभे क्रक्षमाणमकृपेताम् ।  
इन्द्र यद्दस्युहाभवः ॥२॥  
उत्तिष्ठन् ओजसा सह पीत्वी शिप्रे अवेपयः ।  
सोममिन्द्र चमू सुतम् ॥३॥

20.43

भिन्धि विश्वा अप द्विषः बाधो जही मृधः ।  
वसु स्पार्हं तदा भर ॥१॥  
यद्वीलाविन्द्र यत्स्थिरे यत्पशानि पराभृतम् ।  
वसु स्पार्हं तदा भर ॥२॥  
यस्य ते विश्वमानुषो भूरेर्दत्तस्य वेदति ।  
वसु स्पार्हं तदा भर ॥३॥

20.44

प्र सम्राजं चर्षणीनामिन्द्रं स्तोता नव्यं गीर्भिः ।  
नरं नृषाहं मंहिष्ठम् ॥१॥  
यस्मिन् उक्थानि रण्यन्ति विश्वानि च श्रवस्य ।  
अपामवो न समुद्रे ॥२॥  
तं सुष्टुत्या विवासे ज्येष्ठराजं भरे कृत्नुम् ।  
महो वाजिनं सनिभ्यः ॥३॥

20.45

अयमु ते समतसि कपोत इव गर्भधिम् ।  
वचस्तच्चिन् न ओहसे ॥१॥  
स्तोत्रं राधानां पते गिर्वाहो वीर यस्य ते ।

विभूतिरस्तु सूनृता ॥२॥  
ऊर्ध्वस्तिष्ठा न ऊतयेऽस्मिन् वाजे शतक्रतो ।  
समन्येषु ब्रवावहै ॥३॥

20.46

प्रणेतारं वस्यो अछा कर्तारं ज्योतिः समत्सु ।  
सासह्वासं युधामित्रान् ॥१॥  
स नः पप्रिः पारयाति स्वस्ति नावा पुरुहूतः ।  
इन्द्रो विश्वा अति द्विषः ॥२॥  
स त्वं न इन्द्र वाजोभिर्दशस्या च गातुया च ।  
अछा च नः सुम्नं नेषि ॥३॥

20.47

तमिन्द्रं वाजयामसि महे वृत्राय हन्तवे ।  
स वृषा वृषभो भुवत् ॥१॥  
इन्द्रः स दामने कृत औजिष्ठः स मदे हितः ।  
द्युम्नी श्लोकी स सोम्यः ॥२॥  
गिरा वज्रो न संभूतः सबलो अनपच्युतः ।  
ववक्ष ऋष्वो अस्तुतः ॥३॥  
इन्द्रमिद्राथिनो बृहदिन्द्रमर्केभिरर्किणः ।  
इन्द्रं वाणीरनूषत ॥४॥  
इन्द्र इन्द्रयोः सचा संमिश्र आ वचोयुजा ।  
इन्द्रो वज्री हिरण्ययः ॥५॥  
इन्द्रो दीर्घाय चक्षस आ सूर्य रोहयदिवि ।  
वि गोभिरद्रिमैरयत् ॥६॥  
आ याहि सुषुमा हि त इन्द्र सोमं पिबा इमम् ।  
एदं बर्हिः सदो मम ॥७॥  
आ त्वा ब्रह्मयुजा हरी वहतामिन्द्र केशिना ।  
उप ब्रह्माणि नः शृणु ॥८॥  
ब्रह्माणस्त्वा वयं युजा सोमपामिन्द्र सोमिनः ।  
सुतावन्तो हवामहे ॥९॥  
युञ्जन्ति ब्रध्नमरुषं चरन्तं परि तस्थुषः ।  
रोचन्ते रोचना दिवि ॥१०॥  
युञ्जन्त्यस्य काम्या हरी विपक्षसा रथे ।  
शोणा धृष्णू नृवाहसा ॥११॥  
केतुं कृण्वन् अकेतवे पेशो मर्या अपेशसे ।  
समुषद्भिरजायथाः ॥१२॥  
उदु त्यं जातवेदसं देवं वहन्ति केतवः ।  
दृशे विश्वाय सूर्यम् ॥१३॥  
अप त्ये तायवो यथा नक्षत्रा यन्त्यक्तुभिः ।  
सूराय विश्वचक्षसे ॥१४॥  
अदृश्रन् अस्य केतवो वि रश्मयो जनामनु ।  
भ्राजन्तो अग्नयो यथा ॥१५॥  
तरणिर्विश्वदर्शतो ज्योतिष्कृदसि सूर्य ।  
विश्वमा भासि रोचन ॥१६॥  
प्रत्यङ्देवानां विशः प्रत्यङ्ङुदेषि मानुषीः ।  
प्रत्यङ्ङुविश्वं स्वर्दृशे ॥१७॥  
येना पावक चक्षसा भुरण्यन्तं जनामनु ।  
त्वं वरुण पश्यसि ॥१८॥  
वि द्यामेषि रजस्पृध्वहर्मिमानो अक्तुभिः ।  
पश्यं जन्मानि सूर्य ॥१९॥  
सप्त त्वा हरितो रथे वहन्ति देव सूर्य ।  
शोचिष्केशं विचक्षणम् ॥२०॥  
अयुक्त सप्त शुन्ध्युवः सूरौ रथस्य नपत्यः ।  
ताभिर्याति स्वयुक्तिभिः ॥२१॥

20.48

अभि त्वा वर्चसा गिरः सिञ्चन्त्या चरण्युवः ।  
अभि वत्सं न धेनवः ॥१॥  
ता अर्षन्ति शुभ्रियः पृञ्चतीर्वर्चसा पयः ।  
जातं जनिर्यथा हृदा ॥२॥  
वज्रापवसाध्यः कीर्तिर्भ्रियमाणमावहन् ।  
मह्यमायुर्धृतं पयः ॥३॥  
आयं गौः पृश्निरक्रीदसदन् मातरं पुरः ।

पितरं च प्रयन्स्वः ॥४॥  
अन्तश्चरति रोचना अस्य प्राणादपानतः ।  
व्यख्यन् महिषः स्वः ॥५॥  
त्रिंशद्भामा वि राजति वाक्पतङ्गो अशिश्रियत् ।  
प्रति वस्तोरहर्दुभिः ॥६॥

20.49

यच्छक्रा वाचमारुहन् अन्तरिक्षं सिषासथः ।  
सं देवा अमदन् वृषा ॥१॥  
शक्रो वाचमधृष्टायोरुवाचो अधृष्णुहि ।  
मंहिष्ठ आ मददिवि ॥२॥  
शक्रो वाचमधृष्णुहि धामधर्मन् वि राजति ।  
विमदन् बहिरासरन् ॥३॥  
तं वो दस्ममृतीषहं वसोर्मन्दानमन्धसः ।  
अभि वत्सं न स्वसरेषु धेनव इन्द्रं गीर्भिर्नवामहे ॥४॥  
द्युक्षं सुदानुं तविषीभिरावृतं गिरिं न पुरुभोजसम् ।  
क्षुमन्तं वाजं शतिनं सहस्रिणं मक्षू गोमन्तमीमहे ॥५॥  
तत्त्वा यामि सुवीर्यं तद्ब्रह्म पूर्वचित्तये ।  
येना यतिभ्यो भृगवे धने हितं येन प्रस्कण्वमाविथ ॥६॥  
येना समुद्रमसृजो महीरपस्तदिन्द्र वृष्णि ते शवः ।  
सद्यः सो अस्य महिमा न संनशे यं क्षीणीरनुचक्रदे ॥७॥

20.50

कन् नव्यो अतसीनां तूरो गृणीत मर्त्यः ।  
नही न्वस्य महिमानमिन्द्रियं स्वर्गणन्त आनशुः ॥१॥  
कदु स्तुवन्त ऋतयन्त देवत ऋषिः को विप्र ओहते ।  
कदा हवं मघवन् इन्द्र सुन्वतः कदु स्तुवत आ गमः ॥२॥

20.51

अभि प्र वः सुराधसमिन्द्रमर्चं यथा विदे ।  
यो जरितृभ्यो मघवा पुरूवसुः सहस्रेणैव शिक्षति ॥१॥  
शतानीकेव प्र जिगाति धृष्णुया हन्ति वृत्राणि दाशुषे ।  
गिरेरिव प्र रसा अस्य पिन्विरे दत्राणि पुरुभोजसः ॥२॥  
प्र सु श्रुतं सुराधसमर्चा शक्रमभिष्टये ।  
यः सुन्वते स्तुवते काम्यं वसु सहस्रेणैव मंहते ॥३॥  
शतानीका हेतयो अस्य दुष्टरा इन्द्रस्य समिषो महीः ।  
गिरिर्न भुज्मा मघत्सु पिन्वते यदीं सुता अमन्दिषुः ॥४॥

20.52

वयं घ त्वा सुतावन्त आपो न वृक्तबर्हिषः ।  
पवित्रस्य प्रस्रवणेषु वृत्रहन् परि स्तोतार आसते ॥१॥  
स्वरन्ति त्वा सुते नरो वसो निरेक उक्थिनः ।  
कदा सुतं तृषाण ओक आ गम इन्द्र स्वब्दीव वंसगः ॥२॥  
कण्वेभिर्धृष्णावा धृसद्वाजं दर्षि सहस्रिणम् ।  
पिशङ्गरूपं मघवन् विचर्षणे मक्षू गोमन्तमीमहे ॥३॥

20.53

क ई वेद सुते सचा पिबन्तं कद्वयो दधे ।  
अयं यः पुरो विभिनत्त्योजसा मन्दानः शिप्र्यन्धसः ॥१॥  
दाना मृगो न वारणः पुरुत्रा चरथं दधे ।  
नकिष्ट्वा नि यमदा सुते गमो महाश्वरस्योजसा ॥२॥  
य उग्रः सन्न अनिष्टत स्थिरो रणाय संस्कृतः ।  
यदि स्तोतुर्मघवा शृणवद्भवं नेन्द्रो योषत्या गमत् ॥३॥

20.54

विश्वाः पूतना अभिभूतरं नरं सजूस्ततक्षुरिन्द्रं जजनुश्च राजसे ।  
क्रत्वा वरिष्ठं वर आमुरिमुतोग्रमोजिष्ठं तवसं तरस्विनम् ॥१॥  
सर्मी रेभासो अस्वरन् इन्द्रं सोमस्य पीतये ।  
स्वर्पतिं यदीं वृधे धृतव्रतो ह्योजसा समूतिभिः ॥२॥  
नेमिं नमन्ति चक्षसा मेषं विप्रा अभिस्वरा ।  
सुदीतयो वो अद्भुहोऽपि कर्णे तरस्विनः समृक्वभिः ॥३॥

20.55

तमिन्द्रं जोहवीमि मघवानमुग्रं सत्रा दधानमप्रतिष्कृतं शवांसि ।

मंहिष्ठो गीर्भिरा च यज्ञियो वर्तद्राये नो विश्वा सुपथा कृणोतु वज्री ॥१॥  
या इन्द्र भुज आभरः स्वर्गामसुरेभ्यः ।  
स्तोतारमिन् मघवन् अस्य वर्धय ये च त्वे वृक्तबर्हिषः ॥२॥  
यमिन्द्र दधिषे त्वमश्वं गां भागमव्ययम् ।  
यजमाने सुन्वति दक्षिणावति तस्मिन् तं धेहि मा पणौ ॥३॥

20.56

इन्द्रो मदाय वावुधे शवसे वृत्रहा नृभिः ।  
तमिन् महत्स्वाजिषूतेमर्भे हवामहे स वाजेषु प्र नोऽविषत् ॥१॥  
असि हि वीर सेन्योऽसि भूरि पराददिः ।  
असि दभ्रस्य चिद्धृधो यजमानाय शिक्षसि सुन्वते भूरि ते वसु ॥२॥  
यदुदीरत आजयो धृष्णावे धीयते धना ।  
युक्ष्वा मदच्युता हरीं कं हनः कं वसौ दधोऽस्मामिन्द्र वसौ दधः ॥३॥  
मदेमदे हि नो ददिर्यूथा गवामृजुक्रतुः ।  
सं गृभाय पुरु शतोभयाहस्त्या वसु शिशीहि राय आ भर ॥४॥  
मादयस्व सुते सचा शवसे शूर राधसे ।  
विद्वा हि त्वा पुरुवसुमुप कामान्त्ससृज्महेऽथा नोऽविता भव ॥५॥  
एते त इन्द्र जन्तवो विश्वं पुष्यन्ति वार्यम् ।  
अन्तर्हि ख्यो जनानामर्यो वेदो अदाशुषां तेषां नो वेद आ भर ॥६॥

20.57

सुरूपकृत्नुमूतये सुदुघामिव गोदुहे ।  
जुहूमसि द्यविद्यवि ॥१॥  
उप नः सवना गहि सोमस्य सोमपाः पिब ।  
गोदा इद्रेवतो मदः ॥२॥  
अथा ते अन्तमानां विद्याम सुमतीनाम् ।  
मा नो अति ख्य आ गहि ॥३॥  
शुष्मिन्तमं न ऊतये द्युम्निनं पाहि जागृविम् ।  
इन्द्र सोमं शतक्रतो ॥४॥  
इन्द्रियाणि शतक्रतो या ते जनेषु पञ्चसु ।  
इन्द्र तानि त आ वृणे ॥५॥  
अगन् इन्द्र श्रवो बृहद्दयुम्नं दधिष्व दुष्टरम् ।  
उत्ते शुष्मं तिरामसि ॥६॥  
अर्वावतो न आ गृह्यथो शक्र परावतः ।  
उ लोको यस्ते अद्रिव इन्द्रेह तत आ गहि ॥७॥  
इन्द्रो अङ्ग महद्भयमभी षदप चुच्यवत् ।  
स हि स्थिरो विचर्षनिः ॥८॥  
इन्द्रश्च मूलयाति नो न नः पश्चादघं नशत् ।  
भद्रं भवाति नः पुरः ॥९॥  
इन्द्र आशाभ्यस्परि सर्वाभ्यो अभयं करत् ।  
जेता शत्रून् विचर्षणिः ॥१०॥  
क ई वेद सुते सचा पिबन्तं कद्वयो दधे ।  
अयं यः पुरो विभिनत्त्योजसा मन्दानः शिष्यन्धसः ॥११॥  
दाना मृगो न वारणः पुरुत्रा चरथं दधे ।  
नकिष्ट्वा नि यमदा सुते गमो महांश्ररस्योजसा ॥१२॥  
य उग्रः सन्न अनिष्टुत् स्थिरो रणाय संस्कृतः ।  
यदि स्तोतुर्मघवा शृणवद्धवं नेन्द्रो योषत्या गमत् ॥१३॥  
वयं घ त्वा सुतावन्त आपो न वृक्तबर्हिषः ।  
पवित्रस्य प्रस्रवणेषु वृत्रहन् परि स्तोतार आसते ॥१४॥  
स्वरन्ति त्वा सुते नरो वसो निरेक उक्थिनः ।  
कदा सुतं तृषाण ओक आ गम इन्द्र स्वब्दीव वंसगः ॥१५॥  
कण्वेभिर्धृष्णावा धृषट्वाजं दर्षि सहस्रिणम् ।  
पिशङ्गरूपं मघवन् विचर्षणे मक्षू गोमन्तमीमहे ॥१६॥

20.58

श्रायन्त इव सूर्यं विश्वेदिन्द्रस्य भक्षत ।  
वसूनि जाते जनमान ओजसा प्रति भागं न दीधिम् ॥१॥  
अनर्शरतिं वसुदामुप स्तुहि भद्रा इन्द्रस्य रातयः ।  
सो अस्य कामं विधतो न रोषति मनो दानाय चोदयन् ॥२॥  
बण्महामसि सूर्यं बडादित्य महामसि ।  
महस्ते सतो महिमा पनस्यतेऽद्धा देव महामसि ॥३॥  
बट्सूर्यं श्रवसा महामसि सत्रा देव महामसि ।  
मह्ना देवानामसुर्यः पुरोहितो विभु ज्योतिरदाभ्यम् ॥४॥



20.59

उदु त्ये मधु मत्तमा गिर स्तोमास ईरते ।  
सत्राजितो धनसा अक्षितोतयो वाजयन्तो रथा इव ॥१॥  
कण्वा इव भृगवः सूर्य इव विश्वमिद्धीतमानशुः ।  
इन्द्रं स्तोमेभिर्महयन्त आयवः प्रियमेधासो अस्वरन् ॥२॥  
उदिन् न्वस्य रिच्यतेऽंशो धनं न जिग्युसः ।  
य इन्द्रो हरिवान् न दभन्ति तं रिपो दक्षं दधाति सोमिनि ॥३॥  
मन्त्रमखर्वं सुधितं सुपेशसं दधात यज्ञियेष्वा ।  
पूर्वीश्चन प्रसितयस्तरन्ति तं य इन्द्रे कर्मणा भुवत् ॥४॥

20.60

एवा ह्यसि वीरयुरेवा शूर उत स्थिरः ।  
एवा ते राध्यं मनः ॥१॥  
एवा रातिस्तुवीमघ विश्वेभिर्धायि धातृभिः ।  
अघा चिदिन्द्र मे सचा ॥२॥  
मो षु ब्रह्मेव तन्द्रयुर्भुवो वाजानां पते ।  
मत्स्वा सुतस्य गोमतः ॥३॥  
एवा ह्यस्य सूनृता विरष्णी गोमती मही ।  
पक्वा शाखा न दाशुषे ॥४॥  
एवा हि ते विभूतय ऊतय इन्द्र मावते ।  
सद्यश्चित्सन्ति दाशुषे ॥५॥  
एवा ह्यस्य काम्या स्तोम उक्थं च शंस्या ।  
इन्द्राय सोमपीतये ॥६॥

20.61

तं ते मदं गृणीमसि वृषणं पृत्सु सासहिम् ।  
उ लोककल्नुमद्रिवो हरिश्रियम् ॥१॥  
येन ज्योतीम्ष्यायवे मनवे च विवेदिथ ।  
मन्दानो अस्य बर्हिषो वि राजसि ॥२॥  
तदद्या चित्त उक्थिनोऽनु षुवन्ति पूर्वथा ।  
वृषपत्नीरपो जया दिवेदिवे ॥३॥  
तं वभि प्र गायत पुरुहूतं पुरुष्टुतम् ।  
इन्द्रं गीर्भिस्तविषमा विवासत ॥४॥  
यस्य द्विबर्हसो बृहत्सहो दाधार रोदसी ।  
गिरीरज्जामपः स्वर्वृषत्वना ॥५॥  
स राजसि पुरुष्टुतमेको वृत्राणि जिघ्नसे ।  
इन्द्र जैत्रा श्रवस्य च यन्तवे ॥६॥

20.62

वयमु त्वामपूर्व्यं स्थूरं न कच्चिद्भरन्तोऽवस्यवः ।  
वाजे चित्रं हवामहे ॥१॥  
उप त्वा कर्मन् ऊतये स नो युवोग्रश्चक्राम यो धृषत् ।  
त्वामिद्धावितारं ववृमहे सखाय इन्द्र सानसिम् ॥२॥  
यो न इदमिदं पुरा प्र वस्य आनिनाय तमु व स्तुषे ।  
सखाय इन्द्रमृतये ॥३॥  
हर्यश्वं सत्पतिं चर्षणीसहं स हि ष्मा यो अमन्दत ।  
आ तु नः स वयति गव्यमश्व्यं स्तोतृभ्यो मघवा शतम् ॥४॥  
इन्द्राय साम गायत विप्राय बृहते बृहत् ।  
धर्मकृते विपश्चिते पनस्यवे ॥५॥  
त्वमिन्द्राभिभूरसि त्वं सूर्यमरोचयः ।  
विश्वकर्मा विश्वदेवो महामसि ॥६॥  
विभ्राजं ज्योतिषा स्वरगच्छो रोचनं दिवः ।  
देवास्त इन्द्र सख्याय येमिरे ॥७॥  
तं वभि प्र गायत पुरुहूतं पुरुष्टुतम् ।  
इन्द्रं गीर्भिस्तविषमा विवासत ॥८॥  
यस्य द्विबर्हसो बृहत्सहो दाधार रोदसी ।  
गिरीरज्जामपः स्वर्वृषत्वना ॥९॥  
स राजसि पुरुष्टुतमेको वृत्राणि जिघ्नसे ।  
इन्द्र जैत्रा श्रवस्य च यन्तवे ॥१०॥

20.63

इमा नु कं भुवना सीषधामेन्द्रश्च विश्वे च देवाः ।  
यज्ञं च नस्तन्वं च प्रजां चादित्यैरिन्द्रः सह चीकूपाति ॥१॥  
आदित्यैरिन्द्रः सगणो मरुद्भिरस्माकं भूत्वविता तनूनाम् ।

हत्वाय देवा असुरान् यदायन् देवा देवत्वमभिरक्षमाणाः ॥२॥  
 प्रत्यञ्चमर्कमनयं छचीभिरादित्स्वधामिषिरां पर्यपश्यन् ।  
 अया वाजं देवहितं सनेम मदेम शतहिमाः सुवीराः ॥३॥  
 य एक इद्विदयते वसु मर्तयि दाशुषे ।  
 ईशानो अप्रतिष्कृत इन्द्रो अङ्ग ॥४॥  
 कदा मर्तमराधसं पदा क्षुम्पमिव स्फुरत् ।  
 कदा नः शुश्रवद्विर इन्द्रो अङ्ग ॥५॥  
 यश्चिद्धि त्वा बहुभ्य आ सुतावामाविवासति ।  
 उग्रं तत्पत्यते शव इन्द्रो अङ्ग ॥६॥  
 य इन्द्र सोमपातमो मदः शविष्ठ चेतति ।  
 येना हंसि न्यत्रिणं तमीमहे ॥७॥  
 येना दशगवमग्निं वेपयन्तं स्वर्णरम् ।  
 येना समुद्रमाविथा तमीमहे ॥८॥  
 येन सिन्धुं महीरपो रथामिव प्रचोदयः ।  
 पन्थामृतस्य यातवे तमीमहे ॥९॥

20.64

एन्द्र नो गधि प्रियः सत्राजिदगोह्यः ।  
 गिरिर्न विश्वतस्पृथुः पतिर्दिवः ॥१॥  
 अभि हि सत्य सोमपा उभे बभूथ रोदसी ।  
 इन्द्रासि सुन्वतो वृधः पतिर्दिवः ॥२॥  
 त्वं हि शश्वतीनामिन्द्र दर्ता पुरामसि ।  
 हन्ता दस्योर्मनीर्वृधः पतिर्दिवः ॥३॥  
 एदु मध्वो मदिन्तरं सिञ्च वाध्वर्यो अन्धसः ।  
 एवा हि वीर स्तवते सदावृधः ॥४॥  
 इन्द्र स्थातर्हरीणां नकिप्ते पूर्वस्तुतिम् ।  
 उदानंश शवसा न भन्दना ॥५॥  
 तं वो वाजानां पतिमहूमहि श्रवस्यवः ।  
 अप्रायुभिर्यज्ञेभिर्वावृधेन्यम् ॥६॥

20.65

एतो न्विन्द्रं स्तवाम सखाय स्तोम्यं नरम् ।  
 कुष्टीर्यो विश्वा अभ्यस्त्येक इत् ॥१॥  
 अगोरुधाय गविषे द्युक्षाय दस्यं वचः ।  
 घृतात्स्वादीयो मधुनश्च वोचत ॥२॥  
 यस्यामितानि वीर्यो न राधः पर्येतवे ।  
 ज्योतिर्न विश्वमभ्यस्ति दक्षिणा ॥३॥

20.66

स्तुहीन्द्रं व्यश्ववदनुर्मिं वाजिनं यमम् ।  
 अर्यो गयं मंहमानं वि दाशुषे ॥१॥  
 एवा नूनमुप स्तुहि वैयश्च दशमं नवम् ।  
 सुविद्वासं चर्कृत्यं चरणीनाम् ॥२॥  
 वेत्था हि निर्ऋतीनां वज्रहस्त परिवृजम् ।  
 अहरहः शुन्ध्युः परिपदामिव ॥३॥

20.67

वनोति हि सुन्वन् क्षयं परीणसः सुन्वानो हि ष्मा यजत्यव द्विषो देवानामव द्विषः ।  
 सुन्वान इत्सिषासति सहस्रा वाज्यवृतः ।  
 सुन्वानायेन्द्रो ददात्याभुवं रयिं ददात्याभुवम् ॥१॥  
 मो षु वो अस्मदभि तानि पौस्या सना भूवन् द्युम्नानि मोत जारिषुरस्मत्पुरोत जारिषुः ।  
 यद्वश्चित्रं युगेयुगे नव्यं घोषादमर्त्यम् ।  
 अस्मासु तन् मरुतो यच्च दुष्टरं दिधृता यच्च दुष्टरम् ॥२॥  
 अग्निं होतारं मन्ये दास्वन्तं वसुं सूनुं सहसो जातवेदसं विप्रं न जातवेदसम् ।  
 य ऊर्ध्वया स्वध्वरो देवो देवाच्या कृपा ।  
 घृतस्य विभ्राष्टिमनु वष्टि शोचिषाजुह्वानस्य सर्पिषः ॥३॥  
 यज्ञैः संमिश्लाः पृषतीभिर्ऋष्टिभिर्यामं ह्यभ्रासो अज्जिषु प्रिया उत ।  
 आसद्या बर्हिर्भरतस्य सूनवः पोत्रादा सोमं पिबता दिवो नरः ॥४॥  
 आ वक्षि देवामिह विप्रं यक्षि चोशन् होतर्नि षदा योनिषु त्रिषु ।  
 प्रति वीहि प्रस्थितं सोम्यं मधु पिबाग्नीध्रात्तव भागस्य तृस्पुहि ॥५॥  
 एष स्य ते तन्वो नृम्णवर्धनः सह ओजः प्रदिवि बाह्वोर्हितः ।  
 तुभ्यं सुतो मघवन् तुभ्यमाभूतस्त्वमस्य ब्राह्मणादा तृपत्पिब ॥६॥  
 यमु पूर्वमहुवे तमिदं हुवे सेदु हव्यो ददिर्यो नाम पत्यते ।  
 अध्वर्युभिः प्रस्थितं सोम्यं मधु पोत्रात्सोमं द्रविणोदः पिब ऋतुभिः ॥७॥

20.68

सुरूपकृत्नुमूतये सुदुघामिव गोदुहे ।  
जुहूमसि द्यविद्यवि ॥१॥  
उप नः सवना गहि सोमस्य सोमपाः पिब ।  
गोदा इद्रेवतो मदः ॥२॥  
अथा ते अन्तमानां विद्याम सुमतीनाम् ।  
मा नो अति ख्य आ गहि ॥३॥  
परेहि विग्रमस्तुतमिन्द्रं पृष्ठा विपश्चितम् ।  
यस्ते सखिभ्य आ वरम् ॥४॥  
उत ब्रुवन्तु नो निदो निरन्यतश्चिदारत ।  
दधाना इन्द्र इदुवः ॥५॥  
उत नः सुभगामरिर्वोचेयुर्दस्म कृष्टयः ।  
स्यामेदिन्द्रस्य शर्मणि ॥६॥  
एमाशुमाशवे भर यज्ञश्रियं नृमादनम् ।  
पतयन् मन्दयत्सखम् ॥७॥  
अस्य पीत्वा शतक्रतो घनो वृत्राणामभवः ।  
प्रावो वाजेषु वाजिनम् ॥८॥  
तं त्वा वाजेषु वाजिनं वाजयामः शतक्रतो ।  
धनानामिन्द्र सातये ॥९॥  
यो रायोऽवनिर्महान्तसुपारः सुन्वतः सखा ।  
तस्मा इन्द्राय गायत ॥१०॥  
आ त्वेता नि षीदतेन्द्रमभि प्र गायत ।  
सखाय स्तोमवाहसः ॥११॥  
पुरूतमं पुरूणामीशानं वार्याणाम् ।  
इन्द्रं सोमे सचा सुते ॥१२॥

20.69

स घा नो योग आ भुवत्स राये स पुरंध्याम् ।  
गमद्वाजेभिरा स नः ॥१॥  
यस्य संस्थे न वृण्वते हरी समत्सु शत्रवः ।  
तस्मा इन्द्राय गायत ॥२॥  
सुतपाव्ने सुता इमे शुचयो यन्ति वीतये ।  
सोमासो दध्याशिरः ॥३॥  
त्वं सुतस्य पीतये सद्यो वृद्धो अजायथाः ।  
इन्द्र ज्यैष्ठ्याय सुक्रतो ॥४॥  
आ त्वा विशन्त्वाशवः सोमास इन्द्र गिर्वणः ।  
शं ते सन्तु प्रचेतसे ॥५॥  
त्वां स्तोमा अवीवृधन् त्वामुक्था शतक्रतो ।  
त्वां वर्धन्तु नो गिरः ॥६॥  
अक्षितोतिः सनेदिमं वाजमिन्द्रः सहस्रिणम् ।  
यस्मिन् विश्वानि पौस्या ॥७॥  
मा नो मर्ता अभि द्रुहन् तनूनामिन्द्र गिर्वणः ।  
ईशानो यवया वधम् ॥८॥  
युञ्जन्ति ब्रध्नमरुषं चरन्तं परि तस्थुषः ।  
रोचन्ते रोचना दिवि ॥९॥  
युञ्जन्त्यस्य काम्या हरी विपक्षसा रथे ।  
शोणा धृष्णू नृवाहसा ॥१०॥  
केतुं कृण्वन् अकेतवे पेशो मर्या अपेशसे ।  
समुषद्विरजायथाः ॥११॥  
आदह स्वधामनु पुनर्गर्भत्वमेरिरे ।  
दधाना नाम यज्ञियम् ॥१२॥

20.70

वीलु चिदारुजत्नुभिर्गुहा चिदिन्द्र वह्निभिः ।  
अविन्द उस्त्रिया अनु ॥१॥  
देवयन्तो यथा मतिमच्छा विदद्वसुं गिरः ।  
महामनूषत श्रुतम् ॥२॥  
इन्द्रेण सं हि दृक्षसे संजग्मानो अबिभ्युषा ।  
मन्दू समानवर्चसा ॥३॥  
अनवद्वैरभिद्युभिर्मखः सहस्वदर्चति ।  
गणैरिन्द्रस्य काम्यैः ॥४॥  
अतः परिज्मन् आ गहि दिवो वा रोचनादधि ।  
समस्मिन् ऋञ्जते गिरः ॥५॥

इतो वा सातिमीमहे दिवो वा पार्थिवादधि ।  
 इन्द्रं महो वा रजसः ॥६॥  
 इन्द्रमिद्रथिनो बृहदिन्द्रमर्केभिरर्किणः ।  
 इन्द्रं वाणीरनूषत ॥७॥  
 इन्द्र इद्ध्योः सचा संमिश्र आ वचोयुजा ।  
 इन्द्रो वज्री हिरण्ययः ॥८॥  
 इन्द्रो दीर्घाय चक्षस आ सूर्य रोहयद्वि ।  
 वि गोभिरिन्द्रमैरयत् ॥९॥  
 इन्द्र वाजेषु नोऽव सहस्रप्रधनेषु च ।  
 उग्र उग्राभिरूतिभिः ॥१०॥  
 इन्द्रं वयं महाधन इन्द्रमर्भ हवामहे ।  
 युजं वृत्रेषु वज्रिणम् ॥११॥  
 स नो वृषन् अमुं चरं सत्रादावन् अपा वृधि ।  
 अस्मभ्यमप्रतिष्कृतः ॥१२॥  
 तुञ्जेतुञ्जे य उत्तरे स्तोमा इन्द्रस्य वज्रिणः ।  
 न विन्धे अस्य सुष्टुतिम् ॥१३॥  
 वृषा यूथेव वंसगः कृष्टीरियत्योजसा ।  
 ईशानो अप्रतिष्कृतः ॥१४॥  
 य एकश्वर्षणीनां वसूनामिरज्यति ।  
 इन्द्रः पञ्च क्षितीनाम् ॥१५॥  
 इन्द्रं वो विश्वतस्परि हवामहे जनेभ्यः ।  
 अस्माकमस्तु केवलः ॥१६॥  
 एन्द्र सानसि रयिं सजित्वानं सदासहम् ।  
 वर्षिष्ठमूतये भर ॥१७॥  
 नि येन मुष्टिहत्यया नि वृत्रा रुणधामहै ।  
 त्वोतासो न्यर्वता ॥१८॥  
 इन्द्र त्वोतासो आ वयं वज्रं घना ददीमहि ।  
 जयेम सं युधि स्पृधः ॥१९॥  
 वयं शूरेभिरस्तुभिरिन्द्र त्वया युजा वयम् ।  
 सासह्याम पृतन्यतः ॥२०॥

20.71

महामिन्द्रः परश्च नु महित्वमस्तु वज्रिणे ।  
 द्यौर्न प्रथिना शवः ॥१॥  
 समोहे वा य आशत नरस्तोकस्य सनितौ ।  
 विप्रासो वा धियायवः ॥२॥  
 यः कुक्षिः सोमपातमः समुद्र इव पिन्वते ।  
 उर्वीरापो न काकुदः ॥३॥  
 एवा ह्यस्य सूनृता विरप्शी गोमती मही ।  
 पक्वा शाखा न दाशुषे ॥४॥  
 एवा हि ते विभूतय ऊतय इन्द्र मावते ।  
 सद्यश्चित्सन्ति दाशुषे ॥५॥  
 एवा ह्यस्य काम्या स्तोम उक्थं च शंस्या ।  
 इन्द्राय सोमपीतये ॥६॥  
 इन्द्रेहि मत्स्यन्धसो विश्वेभिः सोमपर्वभिः ।  
 महामभिष्टिरोजसा ॥७॥  
 एमेनं सजता सुते मन्दिमिन्द्राय मन्दिने ।  
 चक्रिं विश्वानि चक्रये ॥८॥  
 मत्स्वा सुशिप्र मन्दिभि स्तोमेभिर्विश्वचर्षणे ।  
 सचैषु सवनेष्वा ॥९॥  
 असृग्रमिन्द्र ते गिरः प्रति त्वामुदहासत ।  
 अजोषा वृषभं पतिम् ॥१०॥  
 सं चोदय चित्रमर्वाग्राध इन्द्र वरेण्यम् ।  
 असदित्ते विभु प्रभु ॥११॥  
 अस्मान्तसु तत्र चोदयेन्द्र राये रभस्वतः ।  
 तुविद्युम्न यशस्वतः ॥१२॥  
 सं गोमदिन्द्र वाजवदस्मे पृथु श्रवो बृहत् ।  
 विश्वायुर्धेहाक्षितम् ॥१३॥  
 अस्मे धेहि श्रवो बृहद्युम्नं सहस्रसातमम् ।  
 इन्द्र ता रथिनीरिषः ॥१४॥  
 वसोरिन्द्रं वसुपतिं गीर्भिर्गृणन्त ऋग्मियम् ।  
 होम गन्तारमूतये ॥१५॥  
 सुतेसुते न्योकसे बृहद्बृहत् एदरिः ।  
 इन्द्राय शूषमर्चति ॥१६॥

20.72

विश्वेषु हि त्वा सवनेषु तुज्जते समानमेकं वृषमण्यवः पृथक्स्वः सनिष्यवः पृथक् ।  
तं त्वा नावं न पर्षणि शूषस्य धुरि धीमहि ।  
इन्द्रं न यज्ञैश्चतयन्त आयव स्तोमेभिरिन्द्रमायवः ॥१॥  
वि त्वा ततस्त्रे मिथुना अवस्यवो व्रजस्य साता गव्यस्य निःसृजः सक्षन्त इन्द्र निःसृजः ।  
यद्रव्यन्ता द्वा जना स्वर्यन्ता समूहसि ।  
आविष्करिकद्रुषणं सचाभुवं वज्रमिन्द्र सचाभुवम् ॥२॥  
उतो नो अस्या उषसो जुषेत ह्यर्कस्य बोधि हविषो हवीमभिः स्वर्षाता हवीमभिः ।  
यदिन्द्र हन्तवे मृधो वृषा वज्रिं चिकेतसि ।  
आ मे अस्य वेधसो नवीयसो मन्म श्रुधि नवीयसः ॥३॥

20.73

तुभ्येदिमा सवना शूर विश्वा तुभ्यं ब्रह्माणि वर्धना कृणोमि ।  
त्वं नृभिर्हव्यो विश्वधासि ॥१॥  
नू चिन् नु ते मन्यमानस्य दस्मोदश्रुवन्ति महिमानमुग्र ।  
न वीर्यमिन्द्र ते न राधः ॥२॥  
प्र वो महे महिवृधे भरध्वं प्रचेतसे प्र सुमतिं कृणुध्वम् ।  
विशः पूर्वीः प्र चरा चर्षणिप्राः ॥३॥  
यदा वज्रं हिरण्यमिदथा रथं हरी यमस्य वहतो वि सूरिभिः ।  
आ तिष्ठति मघवा सनश्रुत इन्द्रो वाजस्य दीर्घश्रवसस्पतिः ॥४॥  
सो चिन् नु वृष्टिर्यूथ्या स्वा सचामिन्द्रः श्मश्रूणि हरिताभि पुष्णुते ।  
अव वेति सुक्षयं सुते मधूदिन्द्रोणोति वातो यथा वनम् ॥५॥  
यो वाचा विवाचो मृधवाचः पुरू सहस्राशिवा जघान ।  
तत्तदिदस्य पौंस्यं गृणीमसि पितेव यस्तविषीं वावृधे शवः ॥६॥

20.74

यच्चिद्धि सत्य सोमपा अनाशस्ता इव स्मसि ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥१॥  
शिप्रिन् वाजानां पते शचीवस्तव दंसना ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥२॥  
नि ष्वापया मिथूदृशा सस्तामबुध्यमाने ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥३॥  
ससन्तु त्या अरातयो बोधन्तु शूर रातयः ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥४॥  
समिन्द्र गर्दभं मृण नुवन्तं पपयामुया ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥५॥  
पताति कुण्डणाच्या दूरं वातो वनादधि ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥६॥  
सर्वं परिक्रोशं जहि जम्भया कृकदाश्वम् ।  
आ तू न इन्द्र शंसय गोष्वश्वेषु शुभिषु सहस्रेषु तुवीमघ ॥७॥

20.75

वि त्वा ततस्त्रे मिथुना अवस्यवो व्रजस्य साता गव्यस्य निःसृजः सक्षन्त इन्द्र निःसृजः ।  
यद्रव्यन्त द्वा जना स्वर्यन्ता समूहसि ।  
आविष्करिकद्रुषणं सचाभुवं वज्रमिन्द्र सचाभुवम् ॥१॥  
विदुष्टे अस्य वीर्यस्य पूरवः पुरो यदिन्द्र शारदीरवातिरः सासहानो अवातिरः ।  
शासस्तमिन्द्र मर्त्यमयजुं शवसस्पते ।  
महीममुष्णाः पृथिवीमिमा अपो मन्दसान इमा अपः ॥२॥  
आदिते अस्य वीर्यस्य चर्किरन् मदेषु वृषन् उशिजो यदाविथ सखीयतो यदाविथ ।  
चकर्थ कारमेभ्यः पृतनासु प्रवन्तवे ।  
ते अन्यामन्यां नद्यं सनिष्णत श्रवस्यन्तः सनिष्णत ॥३॥

20.76

वने न वा यो न्यधायि चाक्रं छुचिर्वा स्तोमो भुरणावजीगः ।  
यस्येदिन्द्रः पुरुदिनेषु होता नृणां नर्वो नृतमः क्षपावान् ॥१॥  
प्र ते अस्या उषसः प्रापरस्या नृतौ स्याम नृतमस्य नृणाम् ।  
अनु त्रिशोकः शतमावहन् नूनं कुत्सेन रथो यो असत्ससवान् ॥२॥  
कस्ते मद इन्द्र रन्त्यो भूहुरो गिरो अभ्युगो वि धाव ।  
कद्वाहो अर्वागुप मा मनीषा आ त्वा शक्यामुपमं राधो अन्नैः ॥३॥  
कदु द्युम्निन्द्र त्वावतो नूनं कया धिया करसे कन् न आगन् ।  
मित्रो न सत्य उरुगाय भृत्या अन्ने समस्य यदसन् मनीषाः ॥४॥  
प्रेरय सूरौ अर्थं न पारं ये अस्य कामं जनिधा इव ग्मन् ।  
गिरश्च ये ते तुविजात पूर्वीर्नर इन्द्र प्रतिशिक्षन्त्यन्नैः ॥५॥

मात्रे नु ते सुमिते इन्द्र पूर्वी द्यौर्मज्जना पृथिवी काव्येन ।  
 वराय ते घृतवन्तः सुतासः स्वादनन् भवन्तु पीतये मधूनि ॥६॥  
 आ मध्वो अस्मा असिचन्न अमत्रमिन्द्राय पूर्णं स हि सत्यराधाः ।  
 स वावृधे वरिमन् आ पृथिव्या अभि क्रत्वा नर्यः पौंस्यैश्च ॥७॥  
 व्यानळ् इन्द्रः पृतनाः स्वोजा आस्मै यतन्ते सख्याय पूर्वीः ।  
 आ स्मा रथं न पृतनासु तिष्ठ यं भद्रया सुमत्या चोदयासे ॥८॥

20.77

आ सत्यो यातु मघवामृजीषी द्रवन्त्वस्य हरय उप नः ।  
 तस्मा इदन्धः सुषुमा सुदक्षमिहाभिपित्वं करते गृणानः ॥१॥  
 अव स्य शूराध्वनो नान्तेऽस्मिन् नो अद्य सवने मन्दधै ।  
 शंसात्युवथमुशनेव वेधाश्चिकितुषे असुर्याय मन्म ॥२॥  
 कविर्न निष्यं विदधानि साधन् वृषा यत्सेकं विपिपानो अर्चात् ।  
 दिव इत्था जीजनत्सप्त कारून् अह्ना चिच्चक्रुर्वयुना गृणन्तः ॥३॥  
 स्वयं द्वेदि सुदृशीकमकैर्महि ज्योती रुरुचुर्यद्ध वस्तोः ।  
 अन्धा तर्मासि दुधिता विचक्षे नृभ्यश्चकार नूतमो अभिष्टौ ॥४॥  
 ववक्ष इन्द्रो अमितमृजिष्युभे आ पप्रौ रोदसी महित्वा ।  
 अतश्चिदस्य महिमा वि रेच्यभि यो विश्वा भुवना बभूव ॥५॥  
 विश्वानि शक्रो नर्याणि विद्वान् अपो रिरिच सखिभिर्निकामैः ।  
 अश्मानं चिद्ये बिभितुर्वचोभिर्ब्रजं गोमन्तमुशिजो वि ववृः ॥६॥  
 अपो वृत्रं वत्रिवांसं पराहन् प्रावत्ते वज्रं पृथिवी सचेताः ।  
 प्राणार्सिं समुद्रियाण्यैनोः पतिर्भवं छवसा शूर धृष्णो ॥७॥  
 अपो यदद्रिं पुरुहूत दर्दराविर्भूवत्सरमा पूर्व्यं ते ।  
 स नो नेता वाजमा दर्षि भूरिं गोत्रा रुजन् अङ्गिरोभिर्गृणानः ॥८॥

20.78

तद्धो गाय सुते सचा पुरुहूताय सत्वने ।  
 शं यद्वे न शाकिने ॥१॥  
 न घा वसुर्नि यमते दानं वाजस्य गोमतः ।  
 यत्सीमुप श्रवद्भिरः ॥२॥  
 कुवित्सस्य प्र हि व्रजं गोमन्तं दस्युहा गमत् ।  
 शचीभिरप नो वरत् ॥३॥

20.79

इन्द्र क्रतुं न आ भर पिता पुत्रेभ्यो यथा ।  
 शिक्षा णो अस्मिन् पुरुहूत यामनि जीवा ज्योतिरशीमहि ॥१॥  
 मा नो अज्ञाता वृजना दुराध्यो माशिवासो अव क्रमुः ।  
 त्वया वयं प्रवतः शश्वतीरपोऽति शूर तरामसि ॥२॥

20.80

इन्द्र ज्येष्ठं न आ भरमोजिष्ठं पपुरि श्रवः ।  
 येनेमे चित्र वज्रहस्त रोदसी ओभे सुशिप्र प्राः ॥१॥  
 त्वामुग्रमवसे चर्षणीसहं राजन् देवेषु हूमहे ।  
 विश्वा सु नो विथुरा पिब्दना वसोऽमित्रान् सुषहान् कृधि ॥२॥

20.81

यद्दयाव इन्द्र ते शतं शतं भूमिरुत स्युः ।  
 न त्वा वज्रिन्त्सहस्रं सूर्या अनु न जातमष्ट रोदसी ॥१॥  
 आ पप्राथ महिना कृष्ण्या वृषन् विश्वा शविष्ठ शवसा ।  
 अस्मामव मघवन् गोमति व्रजे वज्रिं चित्राभिरूतिभिः ॥२॥

20.82

यदिन्द्र यावतस्त्वमेतावदहमीशीय ।  
 स्तोतारमिद्दिधिषेय रदावसो न पापत्वाय रासीय ॥१॥  
 शिक्षेयमिन् महयते दिवेदिवे राय आ कुहचिद्विदे ।  
 नहि त्वदन्यन् मघवन् न आप्यं वस्यो अस्ति पिता चन ॥२॥

20.83

इन्द्र त्रिधातु शरणं त्रिवरूथं स्वस्तिमत् ।  
 छर्दिर्यच्छ मघवद्भ्यश्च मह्यं च यावया दिद्युमेभ्यः ॥१॥  
 ये गव्यता मनसा शत्रुमादभुरभिप्रघ्नन्ति धृष्णुया ।  
 अघ स्मा नो मघवन् इन्द्र गिर्वणस्तनूपा अन्तमो भव ॥२॥

20.84

इन्द्रा याहि चित्रभानो सुता इमे त्वायवः ।  
 अण्वीभिस्तना पूतासः ॥१॥  
 इन्द्रा याहि धिर्येषितो विप्रजुतः सुतावतः ।  
 उप ब्रह्माणि वाघतः ॥२॥  
 इन्द्रा याहि तूतुजान उप ब्रह्माणि हरिवः ।  
 सुते दधिष्व नश्चनः ॥३॥

20.85

मा चिदन्यद्वि शंसत सखायो मा रिषण्यत ।  
 इन्द्रमित्तोता वृषणं सचा सुते मुहुरुक्था च शंसत ॥१॥  
 अवक्रक्षिणं वृषभं यथाजुरं गां न चर्षणीसहम् ।  
 विद्वेषणं संवननोभयंकरं मंहिष्ठमुभयाविनम् ॥२॥  
 यच्चिद्धि त्वा जना इमे नाना हवन्त ऊतये ।  
 अस्माकं ब्रह्मेदमिन्द्र भूतु तेऽहा विश्वा च वर्धनम् ॥३॥  
 वि तर्तूर्यन्ते मघवन् विपश्चितोऽर्यो विपो जनानाम् ।  
 उप क्रमस्व पुरुरूपमा भर वाजं नेदिष्ठमूतये ॥४॥

20.86

ब्रह्मणा ते ब्रह्मयुजा युनज्मि हरी सखाया सधमाद आशू ।  
 स्थिरं रथं सुखमिन्द्राधितिष्ठन् प्रजानन् विद्वामुप याहि सोमम् ॥१॥

20.87

अध्वर्यवोऽरुणं दुग्धमंशुं जुहोतन वृषभाय क्षितीनाम् ।  
 गौराद्वेदीयामवपानमिन्द्रो विश्वाहेद्याति सुतसोममिच्छन् ॥१॥  
 यद्दधिषे प्रदिवि चार्वन्न दिवेदिवे पीतिमिदस्य वक्षि ।  
 उत हृदोत मनसा जुषाण उशन्न इन्द्र प्रस्थितान् पाहि सोमान् ॥२॥  
 जज्ञानः सोमं सहसे पपाथ प्र ते माता महिमानमुवाच ।  
 एन्द्र पप्राथोर्वन्तरिक्षं युधा देवेभ्यो वरिवश्चकर्थ ॥३॥  
 यद्योधया महतो मन्यमानान् साक्षाम तान् बाहुभिः शाशदानान् ।  
 यद्वा नृभिर्वृत इन्द्राभियुध्यास्तं त्वयाजिं सौश्रवसं जयेम ॥४॥  
 प्रेन्द्रस्य वोचं प्रथमा कृतानि प्र नूतना मघवा या चकार ।  
 यदेददेवीरसहिष्ट माया अथाभवत्केवलः सोमो अस्य ॥५॥  
 तवेदं विश्वमभितः पशव्यं यत्पश्यसि चक्षसा सूर्यस्य ।  
 गवामसि गोपतिरेक इन्द्र भक्षीमहि ते प्रयतस्य वस्वः ॥६॥  
 बृहस्पते युवमिन्द्रश्च वस्वो दिव्यस्येशाथे उत पार्थिवस्य ।  
 धत्तं रयिं स्तुवते कीरये चिद्व्यं पात स्वस्तिभिः सदा नः ॥७॥

20.88

यस्तस्तम्भ सहसा वि ज्मो अन्तान् बृहस्पतिस्त्रिषधस्थो रवेण ।  
 तं प्रत्नास ऋषयो दीध्यानाः पुरो विप्रा दधिरे मन्द्रजिह्वम् ॥१॥  
 धुनेतयः सुप्रकेतं मदन्तो बृहस्पते अभि ये नस्ततस्त्रे ।  
 पृषन्तं सृप्रमदब्धमूर्ध्वं बृहस्पते रक्षतादस्य योनिम् ॥२॥  
 बृहस्पते या परमा परावदत आ ते ऋतस्पृशो नि षेदुः ।  
 तुभ्यं खाता अवता अद्रिदुग्धा मध्व श्रोतन्त्यभितो विरप्शाम् ॥३॥  
 बृहस्पतिः प्रथमं जायमानो महो ज्योतिषः परमे व्योमन् ।  
 सप्तास्यस्तुविजातो रवेण वि सप्तरश्मिरधमत्तमांसि ॥४॥  
 स सुष्टुभा स ऋक्वता गणेन वलं रुरोज फलिगं रवेण ।  
 बृहस्पतिरुस्रिया हव्यसूदः कनिक्रदद्वावशतीरुदाजत् ॥५॥  
 एवा पित्रे विश्वदेवाय वृष्णे यज्ञैर्विधेम नमसा हविर्भिः ।  
 बृहस्पते सुप्रजा वीरवन्तो वयं स्याम पतयो रयीणाम् ॥६॥

20.89

अस्तेव सु प्रतरं लायमस्यन् भूषन्न इव प्र भरा स्तोममस्मै ।  
 वाचा विप्रास्तरत वाचमर्यो नि रामय जरितः सोम इन्द्रम् ॥१॥  
 दोहेन गामुप शिक्षा सखायं प्र बोधय जरितर्जारमिन्द्रम् ।  
 कोशं न पूर्णं वसुना न्युष्टमा च्यावय मघदेयाय शूरम् ॥२॥  
 किमङ्ग त्वा मघवन् भोजमाहुः शिशीहि मा शिशयं त्वा शृणोमि ।  
 अप्रस्वती मम धीरस्तु शक्र वसुविदं भगमिन्द्रा भरा नः ॥३॥  
 त्वां जना ममसत्येष्विन्द्र संतस्थाना वि ह्वयन्ते समीके ।  
 अत्रा युजं कृणुते यो हविष्मान् नासुन्वता सख्यं वष्टि शूरः ॥४॥  
 धनं न स्पन्दं बहुलं यो अस्मै तीव्रान्तसोमामासुनोति प्रयस्वान् ।  
 तस्मै शत्रून्स्तुतुकान् प्रातरहो नि स्वष्टान् युवति हन्ति वृत्रम् ॥५॥  
 यस्मिन् वयं दधिमा शंसमिन्द्रे यः शिश्राय मघवा काममस्मै ।  
 आराच्चित्सन् भयतामस्य शत्रुर्न्यस्मै द्युम्ना जन्या नमन्ताम् ॥६॥

आराच्छत्रमप बाधस्व दूरमुग्रो यः शम्बः पुरुहूत तेन ।  
 अस्मे धेहि यवमद्गोमदिन्द्र कृधी धियं जरित्रे वाजरत्नाम् ॥७॥  
 प्र यमन्तवृषसवासो अज्मन् तीव्राः सोमा बहुलान्तास इन्द्रम् ।  
 नाह दामानं मघवा नि यंसन् नि सुन्वते वहति भूरि वामम् ॥८॥  
 उत प्रहामतिदीवा जयति कृतमिव श्वघ्नी वि चिनोति काले ।  
 यो देवकामो न धनं रुणद्धि समित्तं रायः सृजति स्वधाभिः ॥९॥  
 गोभिष्टरेमामतिं दुरेवां यवेन वा क्षुधं पुरुहूत विश्वे ।  
 वयं राजसु प्रथमा धनान्यरिष्टासो वृजनोभिर्जयेम ॥१०॥  
 बृहस्पतिर्नः परि पातु पश्चादुतोत्तरस्मादधरादघयोः ।  
 इन्द्रः पुरस्तादुत मध्यतो नः सखा सखिभ्यो वरीयः कृणोतु ॥११॥

20.90

यो अद्रिभित्प्रथमजा ऋतावा बृहस्पतिराङ्गिरसो हविष्मान् ।  
 द्विबर्हज्मा प्राघर्मसत्पिता न आ रोदसी वृषभो रोरवीति ॥१॥  
 जनाय चिद्य ईवते उ लोकं बृहस्पतिर्देवहृती चकार ।  
 घनं वृत्राणि वि पुरो दर्दरीति जयं छत्रंरमित्रान् पृत्सु साहन् ॥२॥  
 बृहस्पतिः समजयद्वसूनि महो ब्रजान् गौमते देव एषः ।  
 अपः सिषासन्त्स्वरप्रतीतो बृहस्पतिर्हन्त्यमित्रमर्कैः ॥३॥

20.91

इमां धियं सप्तशीर्ष्णीं पिता न ऋतप्रजातां बृहतीमविन्दत् ।  
 तुरीयं स्विज्जनयद्विश्वजन्योऽयास्य उक्थमिन्द्राय शंसन् ॥१॥  
 ऋतं शंसन्त ऋजु दीध्याना दिवस्पुत्रासो असुरस्य वीराः ।  
 विप्रं पदमङ्गिरसो दधाना यज्ञस्य धाम प्रथमं मनन्त ॥२॥  
 हंसैरिव सखिभिर्वावदद्विरश्मन्मयानि नहना व्यस्यन् ।  
 बृहस्पतिरभिकनिक्रदद्वा उत प्रास्तौदुच्य विद्वामगायत् ॥३॥  
 अवो द्वाभ्यां पर एकया गा गुहा तिष्ठन्तीरनृतस्य सेतौ ।  
 बृहस्पतिस्तमसि ज्योतिरिच्छन् उदुसा आकर्षि हि तिस्र आवः ॥४॥  
 विभिद्या पुरं शयथेमपाचीं निस्त्रीणि साकमुदधेरकृन्तत् ।  
 बृहस्पतिरुषसं सूर्यं गामर्कं विवेद स्तनयन् इव द्यौः ॥५॥  
 इन्द्रो वलं रक्षितारं दुघानां करणेव वि चकर्ता रवेण ।  
 स्वेदाञ्जिभिराशिरमिच्छमानोऽरोदयत्पणिमा गा अमुष्णात् ॥६॥  
 स ई सत्योभिः सखिभिः शुचिद्विर्गोधायसं वि धनसैरदर्दः ।  
 ब्रह्मणस्पतिर्वृषभिर्वराहैर्धर्मस्वैर्देभिर्द्रविणं व्यानत् ॥७॥  
 ते सत्येन मनसा गोपतिं गा इयानास इषणयन्त धीभिः ।  
 बृहस्पतिर्मिथोअवद्यपेभिरुदुस्रिया असृजत स्वयुग्भिः ॥८॥  
 तं वर्धयन्तो मतिभिः शिवाभिः सिंहमिव नानदतं सधस्थे ।  
 बृहस्पतिं वृषणं शूरसातौ भरेभरे अनु मदेम जिष्णुम् ॥९॥  
 यदा वाजमसनद्विश्वरूपमा द्यामरुक्षदुत्तराणि सद्य ।  
 बृहस्पतिं वृषणं वर्धयन्तो नाना सन्तो बिभ्रतो ज्योतिरासा ॥१०॥  
 सत्यमाशिषं कृणुता वयोधे कीरिं चिद्भ्यवथ स्वेभिरेवैः ।  
 पश्चा मृधो अप भवन्तु विश्वास्तद्रोदसी शृणुतं विश्वमिन्वे ॥११॥  
 इन्द्रो मह्ना महतो अर्णवस्य वि मूर्धानमभिनदर्बुदस्य ।  
 अहन् अहिमरिणात्सप्त सिन्धून् देवैर्द्यावापृथिवीं प्रावतं नः ॥१२॥

20.92

अभि प्र गोपतिं गिरेन्द्रमर्च यथा विदे ।  
 सूतुं सत्यस्य सत्पतिम् ॥१॥  
 आ हरयः ससृञ्जिरेऽरुषीरधि बर्हिषि ।  
 यत्राभि संनवामहे ॥२॥  
 इन्द्राय गाव आशिरं दुदुहे वज्रिणे मधु ।  
 यत्सीमुपह्वरे विदत् ॥३॥  
 उद्यदब्रध्नस्य विष्टपं गृहमिन्द्रश्च गन्वहि ।  
 मध्वः पीत्वा सचेवहि त्रिः सप्त सख्युः पदे ॥४॥  
 अर्चत प्रार्चत प्रियमेधासो अर्चत ।  
 अर्चन्तु पुत्रका उत पुरं न धृष्ववर्चत ॥५॥  
 अव स्वराति गर्गरो गोधा परि सनिष्वणत् ।  
 पिङ्गा परि चनिष्कददिन्द्राय ब्रह्मोद्यतम् ॥६॥  
 आ यत्पतन्त्येन्यः सुदुघा अनपस्फुरः ।  
 अपस्फुरं गृभायत सोममिन्द्राय पातवे ॥७॥  
 अपादिन्द्रो अपादग्निर्विश्वे देवा अमत्सत ।  
 वरुण इदिह क्षयत्तमापो अभ्यनूषत वत्सं संशिश्वरीरिव ॥८॥  
 सुदेवो असि वरुण यस्य ते सप्त सिन्धवः ।  
 अनुक्षरन्ति काकुदं सूर्यं सुषिरामिव ॥९॥



यो व्यतीरफाणयत्सुयुक्तामुप दाशुषे ।  
 तक्वो नेता तदिद्वपुरुपमा यो अमुच्यत ॥१०॥  
 अतीदु शक्र ओहत इन्द्रो विश्वा अति द्विषः ।  
 भिनत्कनीन ओदनं पच्यमानं परो गिरा ॥११॥  
 अर्भको न कुमारकोऽधि तिष्ठन्न अवं रथम् ।  
 स पक्षन् महिषं मृगं पित्रे मात्रे विभुक्रतुम् ॥१२॥  
 आ तू सुशिप्र दंपते रथं तिष्ठा हिरण्ययम् ।  
 अध द्युक्षं सचेवहि सहस्रपादमरुषं स्वस्तिगामनेहसम् ॥१३॥  
 तं घेमिन्त्था नमस्विन उप स्वराजमासते ।  
 अर्थं चिदस्य सुधितं यदेतवे आवर्तयन्ति दावने ॥१४॥  
 अनु प्रत्नस्यौकसः प्रियमेधास एषाम् ।  
 पूर्वामनु प्रयति वृक्तबर्हिषो हितप्रयस आशत ॥१५॥  
 यो राजा चर्षणीनां याता रथेभिरध्रिगुः ।  
 विश्वासां तरुता पृतनानां ज्येष्ठो यो वृत्रहा गृणे ॥१६॥  
 इन्द्रं तं शुम्भ पुरुहन्मन् अवसे यस्य द्विता विधर्तरे ।  
 हस्ताय वज्रः प्रति धायि दर्शतो महो दिवे न सूर्यः ॥१७॥  
 नकिष्टं कर्मणा नशद्यश्चकार सदावृधम् ।  
 इन्द्रं न यज्ञैर्विश्वगूर्तमृभवसमधृष्टं धृष्णवोजसम् ॥१८॥  
 अषाल्हमुग्रं पृतनासु सासहिं यस्मिन् महीरुरुज्रयः ।  
 सं धेनवो जायमाने अनोनवुद्यावः क्षामो अनोनवुः ॥१९॥  
 यद्दयाव इन्द्र ते शतं शतं भूमीरुत स्युः ।  
 न त्वा वज्रिन्त्सहस्रं सूर्या अनु न जातमष्ट रोदसी ॥२०॥  
 आ पप्राथ महिना वृष्ण्या वृषन् विश्वा शविष्ठ शवसा ।  
 अस्मामव मघवन् गोमति व्रजे वज्रि चित्राभिरूतिभिः ॥२१॥

20.93

उत्त्वा मन्दन्तु स्तोमाः कृणुष्व राधो अद्रिवः ।  
 अव ब्रह्मद्विषो जहि ॥१॥  
 पदा पणीरराधसो नि बाधस्व महामसि ।  
 नहि त्वा कश्चन प्रति ॥२॥  
 त्वमीशिषे सुतानामिन्द्र त्वमसुतानाम् ।  
 त्वं राजा जनानाम् ॥३॥  
 ईड्खयन्तीरपस्युव इन्द्रं जातमुपासते ।  
 भेजानासः सुवीर्यम् ॥४॥  
 त्वमिन्द्र बलादधि सहसो जात ओजसः ।  
 त्वं वृषन् वृषेदसि ॥५॥  
 त्वमिन्द्रासि वृत्रहा व्यन्तरिक्षमतिरः ।  
 उद्दयामस्तभ्ना ओजसा ॥६॥  
 त्वमिन्द्र सजोषसमर्कं बिभर्षि बाह्वोः ।  
 वज्रं शिशान ओजसा ॥७॥  
 त्वमिन्द्राभिभुरसि विश्वा जातान्योजसा ।  
 स विश्वा भुव आभवः ॥८॥

20.94

आ यात्विन्द्रः स्वपतिर्मदाय यो धर्मणा तूतुजानस्तुविष्मान् ।  
 प्रत्वक्षाणो अति विश्वा सहांस्यपारेण महता वृष्ण्येन ॥१॥  
 सुष्ठामा रथः सुयमा हरी ते मिम्यक्ष वज्रो नृपते गभस्तौ ।  
 शीभं राजन् सुपथा याह्यर्वाड्वधाम ते पपुसा वृष्ण्यानि ॥२॥  
 एन्द्रवाहो नृपति वज्रबाहुमुग्रमुग्रासस्तविषास एनम् ।  
 प्रत्वक्षसं वृषभं सत्यशुष्ममेमस्मत्रा सधमादो वहन्तु ॥३॥  
 एवा पति द्रोणसाचं सचेतसमूर्जं स्कम्भं धरुण आ वृषायसे ।  
 ओजः कृष्व सं गृभाय त्वे अप्यसो यथा केनिपानामिनो वृधे ॥४॥  
 गमन् अस्मे वसून्या हि शंसिषं स्वाशिषं भरमा याहि सोमिनः ।  
 त्वमीशिषे सास्मिन् आ सत्सि बर्हिष्यनाधृष्या तव पात्राणि धर्मणा ॥५॥  
 पृथक्प्रायन् प्रथमा देवहृतयोऽकृण्वत श्रवस्यानि दुष्टरा ।  
 न ये शेकुर्यज्ञियां नावमारुहमिमेव ते न्यविशन्त केपयः ॥६॥  
 एवैवापागपरे सन्तु दृध्योऽश्वा येषां दुर्युग आयुयुजे ।  
 इत्था ये प्रागुपरे सन्ति दावने पुरूणि यत्र वयुनानि भोजना ॥७॥  
 गिरीरज्रान् रेजमानामधारयद्द्यूः क्रन्ददन्तरिक्षाणि कोपयत् ।  
 समीचीने धिषणे वि ष्कभायति वृष्णाः पीत्वा मद उक्थानि शंसति ॥८॥  
 इमं बिभर्मि सुकृतं ते अडकुशं येनारुजासि मघवं छफारुजः ।  
 अस्मिन्त्सु ते सवने अस्त्वोक्त्यं सुत इष्टौ मघवन् बोध्याभगः ॥९॥  
 गोभिष्टरेमामतिं दुरेवां यवेन क्षुधं पुरुहूत विश्वाम् ।  
 वयं राजभिः प्रथमा धनान्यस्माकेन वृजनेना जयेम ॥१०॥

बृहस्पतिर्नः परि पातु पश्चादुतोत्तरस्मादधरादघयोः ।  
इन्द्रः पुरस्तादुत मध्यतो नः सखा सखिभ्यो वरिवः कृणोतु ॥११॥

20.95

त्रिकद्रुकेषु महिषो यवाशिरं तुविशुष्मस्तृप्तसोममपिबद्विष्णुना सुतं यथावशत् ।  
स ई ममाद महि कर्म कर्तव्यं महामुरुं सैनं सश्रुदेवो देवं सत्यमिन्द्रं सत्य इन्दुः ॥१॥  
प्रो ष्वस्मै पुरोरथमिन्द्राय शूषमर्चत ।  
अभीके चिदु लोककृत्संगे समत्सु वृत्रहास्माकं बोधि चोदिता नभन्तामन्यकेषां ज्याका अधि धन्वसु ॥२॥  
त्वं सिन्धूरवासुजोऽधराचो अहन्न अहिम् ।  
अशत्रुरिन्द्र जज्ञिषे विश्वं पुष्यसि वार्यं तं त्वा परि ष्वजामहे नभन्तामन्यकेषां ज्याका अधि धन्वसु ॥३॥  
वि षु विश्वा अरातयोऽर्यो नशन्त नो धियः ।  
अस्तासि शत्रवे वधं यो न इन्द्र जिघांसति या ते रातिर्ददिवसु ।  
नभन्तामन्यकेषां ज्याका अधि धन्वसु ॥४॥

20.96

तीव्रस्याभिवयसो अस्य पाहि सर्वरथा वि हरी इह मुञ्च ।  
इन्द्र मा त्वा यजमानासो अन्ये नि रीरमन् तुभ्यमिमं सुतासः ॥१॥  
तुभ्यं सुतास्तुभ्यमु सोत्वासस्त्वां गिरः श्वात्र्या आ ह्वयन्ति ।  
इन्द्रेदमद्य सवनं जुषाणो विश्वस्य विद्वामिह पाहि सोमम् ॥२॥  
य उशता मनसा सोममस्मै सर्वहृदा देवकामः सुनोति ।  
न गा इन्द्रस्तस्य परा ददाति प्रशस्तमिच्चारुमस्मै कृणोति ॥३॥  
अनुस्पष्टो भवत्येषो अस्य यो अस्मै रेवान् न सुनोति सोमम् ।  
निररत्नौ मघवा तं दधाति ब्रह्मद्विषो हन्त्यनानुदिष्टः ॥४॥  
अश्रायन्तो गव्यन्तो वाजयन्तो हवामहे त्वोपगन्तवा उ ।  
आभूषन्तस्ते सुमतौ नवायां वयमिन्द्र त्वा शुनं हुवेम ॥५॥  
मुञ्चामि त्वा हविषा जीवनाय कमज्ञातयक्ष्मादुत राजयक्ष्मात् ।  
ग्राहिर्जग्राह यद्येतदतस्या इन्द्राग्नी प्र मुमुक्तमेनम् ॥६॥  
यदि क्षितायुर्यदि वा परेतो यदि मृत्योरन्तिकं नीत एव ।  
तमा हरामि निर्ऋतेरुपस्थादस्पाशमेनं शतशारदाय ॥७॥  
सहस्राक्षेण शतवीर्येण शतायुषा हविषाहार्षमेनम् ।  
इन्द्रो यथैनं शरदो नयात्यति विश्वस्य दुरितस्य पारम् ॥८॥  
शतं जीव शरदो वर्धमानः शतं हेमन्तान् छतमु वसन्तान् ।  
शतं त इन्द्रो अग्निः सविता बृहस्पतिः शतायुषा हविषाहार्षमेनम् ॥९॥  
आहार्षमविदं त्वा पुनरागाः पुनर्णवः ।  
सर्वाङ्ग सर्व ते चक्षुः सर्वमायुश्च तेऽविदम् ॥१०॥  
ब्रह्मणाग्निः सन्विदानो रक्षोहा बाधतामितः ।  
अमीवा यस्ते गर्भं दुर्णामा योनिमाशये ॥११॥  
यस्ते गर्भममीवा दुर्णामा योनिमाशये ।  
अग्निष्टं ब्रह्मणा सह निष्क्रव्यादमनीनशत् ॥१२॥  
यस्ते हन्ति पतयन्तं निषत्सुं यः सरीसृपम् ।  
जातं यस्ते जिघांसति तमितो नाशयामसि ॥१३॥  
यस्त ऊरू विहरत्यन्तरा दम्पती शये ।  
योनिं यो अन्तरारेल्हि तमितो नाशयामसि ॥१४॥  
यस्त्वा भ्राता पतिर्भूत्वा जारो भूत्वा निपद्यते ।  
प्रजां यस्ते जिघांसति तमितो नाशयामसि ॥१५॥  
यस्त्वा स्वप्नेन तमसा मोहयित्वा निपद्यते ।  
प्रजां यस्ते जिघांसति तमितो नाशयामसि ॥१६॥  
अक्षीभ्यां ते नासिकाभ्यां कर्णाभ्यां ह्रुबुकादधि ।  
यक्ष्मं शीर्षण्यं मस्तिष्काज्जिह्वाया वि वृहामि ते ॥१७॥  
ग्रीवाभ्यस्त उष्णिहाभ्यः कीकसाभ्यो अनुक्यात् ।  
यक्ष्मं दोषण्यमसाभ्यां बाहुभ्यां वि वृहामि ते ॥१८॥  
हृदयात्ते परि क्लोम्नो हलीक्षणात्पाशुभ्याम् ।  
यक्ष्मं मतस्नाभ्यां प्लीहो यक्नस्ते वि वृहामसि ॥१९॥  
आन्त्रेभ्यस्ते गुदाभ्यो वनिष्ठोरुदरादधि ।  
यक्ष्मं कुक्षिभ्यां प्लाशेर्नाभ्या वि वृहामि ते ॥२०॥  
ऊरुभ्यां ते अष्ठीवद्भ्यां पाष्णिभ्यां प्रपदाभ्याम् ।  
यक्ष्मं भसद्यं श्रोणिभ्यां भासद्यं भांससो वि वृहामि ते ॥२१॥  
अमेहनाद्वनंकरणात्लोमभ्यस्ते नखेभ्यः ।  
यक्ष्मं सर्वस्मादात्मनस्तमिदं वि वृहामि ते ॥२२॥  
अस्थिभ्यस्ते मज्जभ्यः स्नावभ्यो धमनिभ्यः ।  
यक्ष्मं पाणिभ्यामङ्गुलिभ्यो नखेभ्यो वि वृहामि ते ॥२२॥  
अङ्गेअङ्गे लोम्निलोम्नि यस्ते पर्वणिपर्वणि ।  
यक्ष्मं त्वचस्यं ते वयं कश्यपस्य वीबर्हेण विष्वञ्चं वि वृहामसि ॥२३॥  
अपेहि मनसस्पतेऽप काम परश्चर ।

परो निर्ऋत्या आ चक्ष्व बहुधा जीवतो मनः ॥२४॥

20.97

वयमेनमिदा ह्योपीपेमेह वज्रिणम् ।  
तस्मा उ अद्य समना सुतं भरा नूनं भूषत श्रुते ॥१॥  
वृकश्चिदस्य वारण उरामथिरा वयुनेषु भूषति ।  
समं नः स्तोमं जुजुषाण आ गहीन्द्र प्र चित्रया धिया ॥२॥  
कदु न्वस्याकृतमिन्द्रस्यास्ति पौंस्यम् ।  
केनो नु कं श्रोमतेन न शुश्रुवे जनुषः परि वृत्रहा ॥३॥

20.98

त्वामिद्धि हवामहे साता वाजस्य कारवः ।  
त्वां वृत्रेष्विन्द्र सत्पतिं नरस्त्वां काष्ठास्वर्वतः ॥१॥  
स त्वं नश्चित्र वज्रहस्त धृष्णुया मह स्तवानो अद्रिवः ।  
गामश्वं रथ्यमिन्द्र सं किर सत्रा वाजं न जिग्युषे ॥२॥

20.99

अभि त्वा पूर्वपीतय इन्द्र स्तोमेभिरायवः ।  
समीचीनास ऋभवः समस्वरन् रुद्रा गृणन्त पूर्व्यम् ॥१॥  
अस्येदिन्द्रो वावुधे वृष्ण्यं शवो मदे सुतस्य विष्णवि ।  
अद्या तमस्य महिमानमायवोऽनु ष्टवन्ति पूर्वथा ॥२॥

20.100

अथा हीन्द्र गिर्वण उप त्वा कामान् महः ससृज्महे ।  
उदेव यन्त उदभिः ॥१॥  
वार्णं त्वा यव्याभिर्वर्धन्ति शूर ब्रह्माणि ।  
वावृध्वांसं चिदद्रिवो दिवेदिवे ॥२॥  
युञ्जन्ति हरी इषिरस्य गाथयोरौ रथ उरुयुगे ।  
इन्द्रवाहा वचोयुजा ॥३॥

20.101

अग्निं दूतं वृणीमहे होतारं विश्ववेदसम् ।  
अस्य यज्ञस्य सुक्रतुम् ॥१॥  
अग्निमग्निं हवीमभिः सदा हवन्त विशपतिम् ।  
हव्यवाहं पूरुप्रियम् ॥२॥  
अग्ने देवामिहा वह जज्ञानो वृक्तबर्हिषे ।  
असि होता न ईड्यः ॥३॥

20.102

ईलेन्यो नमस्यस्तिरस्तमांसि दर्शतः ।  
समग्निरेध्यते वृषा ॥१॥  
वृषो अग्निः समिध्यतेऽश्वो न देववाहनः ।  
तं हविष्मन्तः ईलते ॥२॥  
वृषणं त्वा वयं वृषन् वृषणः समिधीमहि ।  
अग्ने दीद्यतं बृहत् ॥३॥

20.103

अग्निमीलिष्वावसे गाथाभिः शीरशोचिषम् ।  
अग्निं राये पुरुमील्ह श्रुतं नरोऽग्निं सुदीतये छर्दिः ॥१॥  
अग्न आ याह्याग्निभिर्होतारं त्वा वृणीमहे ।  
आ त्वामनक्तु प्रयता हविष्मती यजिष्ठ बर्हिरासदे ॥२॥  
अच्छ हि त्वा सहसः सूनो अङ्गिरः सुचश्चरन्त्यध्वरे ।  
ऊर्जां नपातं घृतकेशमीमहेऽग्निं यज्ञेषु पूर्व्यम् ॥३॥

20.104

इमा उ त्वा पुरूवसो गिरो वर्धन्तु या मम ।  
पावकवर्णाः शुचयो विपश्चितोऽभि स्तोमैरनूषत ॥१॥  
अयं सहस्रमृषिभिः सहस्कृतः समुद्र इव पप्रथे ।  
सत्यः सो अस्य महिमा गृने शवो यज्ञेषु विप्रराज्ये ॥२॥  
आ नो विश्वासु हव्य इन्द्रः समत्सु भूषतु ।  
उप ब्रह्माणि सवनानि वृत्रहा परमज्या ऋचीषमः ॥३॥  
त्वं दाता प्रथमो राघसामस्यसि सत्य ईशानकृत् ।  
तुविद्युम्नस्य युज्या वृणीमहे पुत्रस्य शवसो महः ॥४॥

20.105

त्वमिन्द्र प्रतूर्तिष्वभि विश्वा असि स्पृधः ।  
अशस्तिहा जनिता विश्वतूरसि त्वं तूर्य तरुष्यतः ॥१॥  
अनु ते शुष्मं तुरयन्तमीयतुः क्षोणी शिशुं न मातरा ।  
विश्वास्ते स्पृधः श्रथयन्त मन्यवे वृत्रं यदिन्द्र तूर्वसि ॥२॥  
इत ऊती वो अजरं प्रहेतारमप्रहितम् ।  
आशुं जेतारं हेतारं रथीतममतूर्तं तुग्यावृधम् ॥३॥  
यो राजा चर्षणीनां याता रथेभिरधिगुः ।  
विश्वासां तरुता पृतनानां ज्येष्ठो यो वृत्रहा गृणे ॥४॥  
इन्द्रं तं शुम्भ पुरुहन्मन् अवसे यस्य द्विता विधर्तरि ।  
हस्ताय वज्रः प्रति धायि दर्शतो महो दिवे न सूर्यः ॥५॥

20.106

तव त्यदिन्द्रियं बृहत्तव शुष्ममुत क्रतुम् ।  
वज्रं शिशाति धिषणा वरेण्यम् ॥१॥  
तव द्यौरिन्द्र पौंस्यं पृथिवी वर्धति श्रवः ।  
त्वामापः पर्वतासश्च हिन्विरे ॥२॥  
त्वां विष्णुर्बृहन् क्षयो मित्रो गृणाति वरुणः ।  
त्वां शर्धो मदत्यनु मारुतम् ॥३॥

20.107

समस्य मन्यवे विशो विश्वा नमन्त कुष्टयः ।  
समुद्रायेव सिन्धवः ॥१॥  
ओजस्तदस्य तित्विष उभे यत्समवर्तयत् ।  
इन्द्रश्चर्मैव रोदसी ॥२॥  
वि चिद्वृत्रस्य दोधतो वज्रेण शतपर्वणा ।  
शिरो बिभेद्वृष्णिना ॥३॥  
तदिदास भुवनेषु ज्येष्ठं यतो जज्ञ उग्रस्त्वेषुनृम्णः ।  
सद्यो जज्ञानो नि रिणाति शत्रून् अनु यदेनं मदन्ति विश्व ऊमाः ॥४॥  
वावृधानः शवसा भूर्योजाः शत्रुर्दासाय भियसं दधाति ।  
अव्यनच्च व्यनच्च सस्नि सं ते नवन्त प्रभृता मदेषु ॥५॥  
त्वे क्रतुमपि पृञ्चन्ति भूरि द्विर्यदेते त्रिर्भवन्त्यूमाः ।  
स्वादोः स्वादीयः स्वादुना सृजा समदः सु मधु मधुनाभि योधीः ॥६॥  
यदि चिन् नु त्वा धना जयन्तं रणेरणे अनुमदन्ति विप्राः ।  
ओजीयः शुष्मिन्तिस्थरमा तनुष्व मा त्वा दभन् दुरेवासः कशोकाः ॥७॥  
त्वया वयं शाशद्बहे रणेषु प्रपश्यन्तो युधेन्यानि भूरि ।  
चोदयामि त आयुधा वचोभिः सं ते शिशामि ब्रह्मणा वयांसि ॥८॥  
नि तद्दधिषेऽवरे परे च यस्मिन् आविथावसा दुरोणे ।  
आ स्थापयत मातरं जिगत्नुमत इन्वत कर्वराणि भूरि ॥९॥  
स्तुष्व वर्ष्मन् पुरुवर्त्मनिं समृभ्वाणमिनतममाप्तमाप्त्यानाम् ।  
आ दर्शति शवसा भूर्योजाः प्र सक्षति प्रतिमानं पृथिव्याः ॥१०॥  
इमा ब्रह्म बृहद्विः कृणवदिन्द्राय शूषमग्नेयः स्वर्षाः ।  
महो गोत्रस्य क्षयति स्वराजा तुरक्षिद्विश्वमर्णवत्तपस्वान् ॥११॥  
एवा महान् बृहद्विः अथर्वावोचत्स्वां तन्वमिन्द्रमेव ।  
स्वसारौ मातरिभ्वरी अरिप्रे हिन्वन्ति चैने शवसा वर्धयन्ति च ॥१२॥  
चित्रं देवानां केतुरनीकं ज्योतिष्मान् प्रदिशः सूर्य उद्यन् ।  
दिवाकरोऽति द्युमैस्तमांसि विश्वातारीदुरितानि शुक्रः ॥१३॥  
चित्रं देवानामुदगादनीकं चक्षुर्मित्रस्य वरुणस्याग्नेः ।  
आप्राहृयावापृथिवी अन्तरिक्षं सूर्य आत्मा जगतस्तस्थुषश्च ॥१४॥  
सूर्यो देवीमुषसं रोचमानां मर्यो न योषामभ्येति पश्चात् ।  
यत्रा नरो देवयन्तो युगानि वितन्वते प्रति भद्राय भद्रम् ॥१५॥

20.108

त्वं न इन्द्रा भरमोजो नृम्णं शतक्रतो विचर्षणे ।  
आ वीरं पृतनाषहम् ॥१॥  
त्वं हि नः पिता वसो त्वं माता शतक्रतो बभूविथ ।  
अथा ते सुम्नमीमहे ॥२॥  
त्वां शुष्मिन् पुरुहूत वाजयन्तमुप ब्रुवे शतक्रतो ।  
स नो रास्व सुवीर्यम् ॥३॥

20.109

स्वादोरित्था विषुवतो मध्वः पिबन्ति गौर्यः ।  
या इन्द्रेण सयावरीर्वृष्णा मदन्ति शोभसे वस्वीरनु स्वराज्यम् ॥१॥  
ता अस्य पृशनायुवः सोमं श्रीणन्ति पृश्नयः ।

प्रिया इन्द्रस्य धेनवो वज्रं हिन्वन्ति सायकं वस्वीरनु स्वराज्यम् ॥२॥  
ता अस्य नमसा सहः सपर्यन्ति प्रचेतसः ।  
व्रतान्यस्य सश्विरे पुरूणि पूर्वाचित्तये वस्वीरनु स्वराज्यम् ॥३॥

20.110

इन्द्राय मदूने सुतं परि षोभन्तु नो गिरः ।  
अर्कमर्चन्तु कारवः ॥१॥  
यस्मिन् विश्वा अधि श्रियो रणन्ति सप्त संसदः ।  
इन्द्रं सुते हवामहे ॥२॥  
त्रिकद्रुकेषु चेतनं देवासो यज्ञमत्नत ।  
तमिद्धर्धन्तु नो गिरः ॥३॥

20.111

यत्सोममिन्द्र विष्णवि यद्वा घ त्रित आप्त्ये ।  
यद्वा मरुत्सु मन्दसे समिन्दुभिः ॥१॥  
यद्वा शक्र परावति समुद्रे अधि मन्दसे ।  
अस्माकमित्सुते रणा समिन्दुभिः ॥२॥  
यद्वासि सुन्वतो वृधो यजमानस्य सत्पते ।  
उक्थे वा यस्य रण्यसि समिन्दुभिः ॥३॥

20.112

यदद्य कच्च वृत्रहन् उदगा अभि सूर्य ।  
सर्वं तदिन्द्र ते वशे ॥१॥  
यद्वा प्रवृद्ध सत्पते न मरा इति मन्यसे ।  
उतो तत्सत्यमित्तव ॥२॥  
ये सोमासः परावति ये अर्वावति सुन्विरे ।  
सर्वास्तामिन्द्र गच्छसि ॥३॥

20.113

उभयं शृणवच्च न इन्द्रो अर्वागिदं वचः ।  
सत्राच्या मघवा सोमपीतये धिया शविष्ठ आ गमत् ॥१॥  
तं हि स्वराजं वृषभं तमोजसे धिषणे निष्टतक्षतुः ।  
उतोपमानां प्रथमो नि षीदसि सोमकामं हि ते मनः ॥२॥

20.114

अभ्रातव्योऽना त्वमनापिरिन्द्र जनुषा सनादसि ।  
युधेदापित्वमिच्छसे ॥१॥  
नकी रेवन्तं सख्याय विन्दसे पीयन्ति ते सुराश्वः ।  
यदा कृणोषि नदनुं समूहस्यादित्पितेव ह्यसे ॥२॥

20.115

अहमिद्धि पितुष्परि मेधामृतस्य जग्रभ ।  
अहं सूर्य इवाजनि ॥१॥  
अहं प्रत्नेन मन्मना गिरः शुम्भामि कण्ववत् ।  
येनेन्द्रः शुष्ममिहृधे ॥२॥  
ये त्वामिन्द्र न तुष्टुवुर्ऋषयो ये च तुष्टुवुः ।  
ममेद्धर्धस्व सुष्टुतः ॥३॥

20.116

मा भूम निष्ट्या इवेन्द्र त्वदरणा इव ।  
वनानि नि प्रजहितान्यद्रिवो दुरोषासो अमन्महि ॥१॥  
अमन्महीदनाशवोऽनुग्रासश्च वृत्रहन् ।  
सुकृत्सु ते महता शूर राधसानु स्तोमं मुदीमहि ॥२॥

20.117

पिबा सोममिन्द्र मन्दतु त्वा यं ते सुषाव हर्यश्वाद्रिः ।  
सोतुर्बाहुभ्यां सुयतो नार्वा ॥१॥  
यस्तं मदो युजस्वारुरस्ति येन वृत्राणि हर्यश्च हंसि ।  
स त्वामिन्द्र प्रभूवसो ममन्तु ॥२॥  
बोधो सु मे मघवन् वाचमेमां यां ते वसिष्ठो अर्चति प्रशस्तिम् ।  
इमा ब्रह्म सधमादे जुषस्व ॥३॥

20.118

शग्ध्यु षु शचीपत इन्द्र विश्वाभिरूतिभिः ।

भगं न हि त्वा यशसं वसुविदमनु शूर चरामसि ॥१॥  
 पौरो अश्वस्य पुरुकृद्गवामस्युत्सो देव हिरण्ययः ।  
 नकिर्हि दानं परिमार्धिषत्त्वे यद्यद्यामि तदा भर ॥२॥  
 इन्द्रमिद्वेवतातये इन्द्रं प्रयत्यध्वरे ।  
 इन्द्रं समीके वनिनो हवामह इन्द्रं धनस्य सातये ॥३॥  
 इन्द्रो मह्ना रोदसी पप्रथच्छव इन्द्रः सूर्यमरोचयत् ।  
 इन्द्रे ह विश्वा भुवनानि येमिर इन्द्रे सुवानास इन्द्रवः ॥४॥

20.119

अस्तावि मन्म पूर्वं ब्रह्मेन्द्राय वोचत ।  
 पूर्वीर्ऋतस्य बृहतीरनूषत स्तोतुर्मघा असूक्षत ॥१॥  
 तुरण्यवो मधुमन्तं घृतश्रुतं विप्रासो अर्कमानुचुः ।  
 अस्मे रयिः पप्रथे वृष्ण्यं शवोऽस्मे सुवानास इन्द्रवः ॥२॥

20.120

यदिन्द्र प्रागपागुदङ्ग्यग्वा ह्यसे नृभिः ।  
 सिमा पुरू नृषूतो अस्यानवेऽसि प्रशर्ध तुर्वशे ॥१॥  
 यद्वा रुमे रुशमे श्यावके कृप इन्द्र मादयसे सचा ।  
 कण्वासस्त्वा ब्रह्मभि स्तोमवाहस इन्द्रा यच्छन्त्या गहि ॥२॥

20.121

अभि त्वा शूर नोनुमोऽदुग्धा इव धेनवः ।  
 ईशानमस्य जगतः स्वर्दृशमीशानमिन्द्र तस्थुषः ॥१॥  
 न त्वावामन्यो दिव्यो न पार्थिवो न जातो न जनिष्यते ।  
 अश्वायन्तो मघवन् इन्द्र वाजिनो गव्यन्तस्त्वा हवामहे ॥२॥

20.122

रेवतीर्नः सधमाद इन्द्रे सन्तु तुविवाजाः ।  
 क्षुमन्तो याभिर्मदेम ॥१॥  
 आ घ त्वावान् त्मनाप्त स्तोतृभ्यो धृष्णवियानः ।  
 ऋणोरक्षं न चक्रयोः ॥२॥  
 आ यद्दुवः शतक्रतवा कामं जरितृणाम् ।  
 ऋणोरक्षं न शचीभिः ॥३॥

20.123

तत्सूर्यस्य देवत्वं तन् महित्वं मध्या कर्तोर्विततं सं जभार ।  
 यदेदयुक्त हरितः सधस्थादाद्रात्री वासस्तनुते सिमस्मै ॥१॥  
 तन् मित्रस्य वरुणस्याभिचक्षे सूर्यो रूपं कृणुते द्यौरुपस्थे ।  
 अनन्तमन्यद्दुशदस्य प्राजः कृष्णमन्यद्हरितः सं भरन्ति ॥२॥

20.124

कया नश्चित्र आ भुवदृती सदावृधः सखा ।  
 कया शचिष्ठया वृता ॥१॥  
 कस्त्वा सत्यो मदानां मंहिष्ठो मत्सदन्धसः ।  
 दृल्हा चिदारुजे वसु ॥२॥  
 अभी षु नः सखीनामविता जरितृणाम् ।  
 शतं भवास्यूतिभिः ॥३॥  
 इमा नु कं भुवना सीषधामेन्द्रश्च विश्वे च देवाः ।  
 यज्ञं च नस्तन्वं च प्रजां चादित्वैरिन्द्रः सह चीकृपाति ॥४॥  
 आदित्वैरिन्द्रः सगणो मरुद्भिरस्माकं भूत्वविता तनूनाम् ।  
 हत्वाय देवा असुरान् यदायन् देवा देवत्वमभिरक्षमाणाः ॥५॥  
 प्रत्यञ्चमर्कमनयं छचीभिरादित्वधामिषिरां पर्यपश्यन् ।  
 अया वाजं देवहितं सनेम मदेम शतहिमाः सुवीराः ॥६॥

20.125

अपेन्द्र प्राचो मघवन् अमित्रान् अपापाचो अभिभूते नुदस्व ।  
 अपोदीचो अप शूराधराच उरौ यथा तव शर्मन् मदेम ॥१॥  
 कुविदङ्ग यवमन्तो यवं चिद्यथा दान्त्यनुपूर्वं वियूय ।  
 इहेहैषां कृणुहि भोजनानि ये बहिष्ठो नमोवृक्तिं न जग्मुः ॥२॥  
 नहि स्थूर्यतुथा यातमस्ति नोत श्रवो विविदे संगमेषु ।  
 गव्यन्त इन्द्रं सख्याय विप्रा अश्वायन्तो वृष्णं वाजयन्तः ॥३॥  
 युवं सुराममश्विना नमुचावासुरे सचा ।  
 विपिपाना शुभस्पती इन्द्रं कर्मस्वावतम् ॥४॥  
 पुत्रमिव पितरावश्विनोभेन्द्रावधुः काव्यैर्दसनाभिः ।

यत्सुरामं व्यपिबः शचीभिः सरस्वती त्वा मघवन् अभिष्णक् ॥५॥  
 इन्द्रः सुत्रामा स्ववामवोभिः सुमृडीको भवतु विश्ववेदाः ।  
 बाधतां द्वेषो अभयं नः कृणोतु सुवीर्यस्य पतयः स्याम ॥६॥  
 स सुत्रामा स्ववामिन्द्रो अस्मदाराच्चिद्वेषः सनुतर्युयोतु ।  
 तस्य वयं सुमतौ यज्ञियस्यापि भद्रे सौमनसे स्याम ॥७॥

20.126

वि हि सोतोरसृक्षत नेन्द्रं देवममंसत ।  
 यत्रामददृषाकपिरर्यः पुष्टेषु मत्सखा विश्वस्मादिन्द्र उत्तरः ॥१॥  
 परा हीन्द्र धावसि वृषाकपेरति व्यथिः ।  
 नो अह प्र विन्दस्यन्यत्र सोमपीतये विश्वस्मादिन्द्र उत्तरः ॥२॥  
 किमयं त्वां वृषाकपिश्चकार हरितो मृगः ।  
 यस्मा इरस्यसीदु न्वर्यो वा पुष्टिमद्वसु विश्वस्मादिन्द्र उत्तरः ॥३॥  
 यमिमं त्वं वृषाकपिं प्रियमिन्द्राभिरक्षसि ।  
 श्वा न्वस्य जम्भिषदपि कर्णे वराहयुर्विश्वस्मादिन्द्र उत्तरः ॥४॥  
 प्रिया तष्टानि मे कपिव्यक्ता व्यदूषत् ।  
 शिरो न्वस्य राविषं न सुगं दुष्कृतं भुवं विश्वस्मादिन्द्र उत्तरः ॥५॥  
 न मत्स्त्री सुभसत्तरा न सुयाशुतरा भुवत् ।  
 न मत्प्रतिच्यवीयसी न सक्थ्युद्यमीयसी विश्वस्मादिन्द्र उत्तरः ॥६॥  
 उवे अम्ब सुलाभिके यथेवाङ्गं भविष्यति ।  
 भसन् मे अम्ब सक्थि मे शिरो मे वीव हृष्यति विश्वस्मादिन्द्र उत्तरः ॥७॥  
 किं सुबाहो स्वङ्गुरे पृथुष्टो पृथुजाघने ।  
 किं शूरपत्नि नस्त्वमभ्यमीषि वृषाकपिं विश्वस्मादिन्द्र उत्तरः ॥८॥  
 अवीरामिव मामयं शरारुरभि मन्यते ।  
 उताहमस्मि वीरिणीन्द्रपत्नी मरुत्सखा विश्वस्मादिन्द्र उत्तरः ॥९॥  
 संहोत्रं स्म पुरा नारी समनं वाव गच्छति ।  
 वेधा ऋतस्य वीरिणीन्द्रपत्नी महीयते विश्वस्मादिन्द्र उत्तरः ॥१०॥  
 इन्द्राणीमासु नारिषु सुभगामहमश्रवम् ।  
 नह्यस्या अपरं चन जरसा मरते पतिर्विश्वस्मादिन्द्र उत्तरः ॥११॥  
 नाहमिन्द्राणि रारण सख्युर्वृषाकपेरृते ।  
 यस्येदमप्यं हविः प्रियं देवेषु गच्छति विश्वस्मादिन्द्र उत्तरः ॥१२॥  
 वृषाकपायि रेवति सुपुत्र आदु सुस्तुषे ।  
 घसत्त इन्द्र उक्षणः प्रियं काचित्करं हविर्विश्वस्मादिन्द्र उत्तरः ॥१३॥  
 उक्षणो हि मे पञ्चदश साकं पचन्ति विंसतिम् ।  
 उताहमस्मि पीव इदुभा कुक्षी पूणन्ति मे विश्वस्मादिन्द्र उत्तरः ॥१४॥  
 वृषभो न तिग्मशृङ्गोऽन्तयूथेषु रौरवत् ।  
 मन्थस्त इन्द्र शं हृदे यं ते सुनोति भावयुर्विश्वस्मादिन्द्र उत्तरः ॥१५॥  
 न शेषे यस्य रम्बतेऽन्तरा सक्थ्या कपूत् ।  
 सेदीशे यस्य रोमशं निषेदुषो विजृम्भते विश्वस्मादिन्द्र उत्तरः ॥१६॥  
 न शेषे यस्य रोमशं निषेदुषो विजृम्भते ।  
 सेदीशे यस्य रम्बतेऽन्तरा सक्थ्या कपृत्विश्वस्मादिन्द्र उत्तरः ॥१७॥  
 अयमिन्द्र वृषाकपिः परस्वन्तं हतं विदत् ।  
 असिं सूनां नवं चरुमादेधस्यान आचितं विश्वस्मादिन्द्र उत्तरः ॥१८॥  
 अयमेमि विचाकशद्विचिन्वन् दासमार्यम् ।  
 पिबामि पाकसुत्वनोऽभि धीरमचाकशं विश्वस्मादिन्द्र उत्तरः ॥१९॥  
 धन्व च यत्कृन्तत्रं च कति स्वित्ता वि योजना ।  
 नेदीयसो वृषाकपेऽस्तमेहि गृहामुप विश्वस्मादिन्द्र उत्तरः ॥२०॥  
 पुनरेहि वृषाकपे सुविता कल्पयावहै ।  
 य एष स्वप्रनंशनोऽस्तमेषि पथा पुनर्विश्वस्मादिन्द्र उत्तरः ॥२१॥  
 यदुदञ्चो वृषाकपे गृहमिन्द्राजगन्तन ।  
 क्व स्य पुत्वघो मृगः कमगं जनयोपनो विश्वस्मादिन्द्र उत्तरः ॥२२॥  
 पर्शुर्ह नाम मानवी साकं ससूव विंशतिम् ।  
 भद्रं भल त्यस्या अभूद्यस्या उदरमामयद्विश्वस्मादिन्द्र उत्तरः ॥२३॥

20.127

इदं जना उप श्रुत नराशंस स्तविष्यते ।  
 षष्टिं सहस्रा नवतिं च कौरम आ रुशमेषु दद्महे ॥१॥  
 उष्ट्रा यस्य प्रवाहणो वधूमन्तो द्विर्दश ।  
 वर्ष्मा रथस्य नि जिहीडते दिव ईषमाणा उपस्पृशः ॥२॥  
 एष इषाय मामहे शतं निष्कान् दश स्रजः ।  
 त्रीणि शतान्यर्वतां सहस्रा दश गोनाम् ॥३॥  
 वच्यस्व रेभ वच्यस्व वृक्षे न पक्वे शकुनः ।  
 नष्टे जिह्वा चर्चरीति क्षुरो न भूरिजोरिव ॥४॥  
 प्र रेभासो मनीषा वृषा गाव इवेरते ।

अमोतपुत्रका एषाममोत गा इवासते ॥५॥  
 प्र रेभ धीं भरस्व गोविदं वसुविदम् ।  
 देवत्रेमां वाचं स्त्रीणीहीषुर्नवीरस्तारम् ॥६॥  
 राज्ञो विश्वजनीनस्य यो देवोमर्त्यामिति ।  
 वैश्वानरस्य सुष्टुतिमा सुनोता परिक्षितः ॥७॥  
 परिच्छिन्नः क्षेममकरोत्तम आसनमाचरन् ।  
 कुलायन् कृण्वन् कौरव्यः पतिर्वदति जायया ॥८॥  
 कतरत् आ हराणि दधि मन्थां परि श्रुतम् ।  
 जायाः पतिं वि पृच्छति राष्ट्रे राज्ञः परिक्षितः ॥९॥  
 अभीवस्वः प्र जिहीते यवः पक्वः पथो बिलम् ।  
 जनः स भद्रमेधति राष्ट्रे राज्ञः परिक्षितः ॥१०॥  
 इन्द्रः कारुमबुधदुत्तिष्ठ वि चरा जनम् ।  
 ममेदुगस्य चर्कधि सर्व इत्ते पृणादरिः ॥११॥  
 इह गावः प्र जायध्वमिहाश्वा इह पूरुषाः ।  
 इहो सहस्रदक्षिणोपि पूषा नि षीदति ॥१२॥  
 नेमा इन्द्र गावो रिषन् मो आसां गोप रीरिषत् ।  
 मासाममित्रयुर्जन इन्द्र मा स्तेन ईशत ॥१३॥  
 उप नो न रमसि सूक्तेन वचसा वयं भद्रेण वचसा वयम् ।  
 वनादधिध्वनो गिरो न रिष्येम कदा चन ॥१४॥

20.128

यः सभेयो विदथ्यः सुत्वा यज्वाथ पूरुषः ।  
 सूर्यं चामू रिशादसस्तद्देवाः प्रागकल्पयन् ॥१॥  
 यो जाम्या अप्रथयस्तद्यत्सखायं दुधूर्षति ।  
 ज्येष्ठो यदप्रचेतास्तदाहुरधरागिति ॥२॥  
 यद्भद्रस्य पुरुषस्य पुत्रो भवति दाधृषिः ।  
 तद्विप्रो अब्रवीद् तद्वन्धर्वः काम्यं वचः ॥३॥  
 यश्च पणि रघुजिष्ठ्यो यश्च देवामदाशुरिः ।  
 धीराणां शश्वतामहं तदपागिति शुश्रुम ॥४॥  
 ये च देवा अयजन्ताथो ये च पराददिः ।  
 सूर्यो दिवमिव गत्वाय मघवा नो वि रप्शते ॥५॥  
 योऽनाक्ताक्षो अनभ्यक्तो अमणिवो अहिरण्यवः ।  
 अब्रह्मा ब्रह्मणः पुत्रस्तोता कल्पेषु संमिता ॥६॥  
 य आक्ताक्षः सुभ्यक्तः सुमणिः सुहिरण्यवः ।  
 सुब्रह्मा ब्रह्मणः पुत्रस्तोता कल्पेषु संमिता ॥७॥  
 प्रपाणा च वेशन्ता रेवामप्रतिदिश्ययः ।  
 अयभ्या कन्या कल्याणी तोता कल्पेषु संमिता ॥८॥  
 सुप्रपाणा च वेशन्ता रेवान्सुप्रतिदिश्ययः ।  
 सुयभ्या कन्या कल्याणी तोता कल्पेषु संमिता ॥९॥  
 परिवृक्ता च महिषी स्वस्त्या च युधि गमः ।  
 अनाशुरश्यायामी तोता कल्पेषु संमिता ॥१०॥  
 वावाता च महिषी स्वस्त्या च युधि गमः ।  
 श्वाशुरश्यायामी तोता कल्पेषु संमिता ॥११॥  
 यदिन्द्रादो दाशराज्ञे मानुषं वि गाहथाः ।  
 विरूपः सर्वस्मा आसीत्सह यक्षाय कल्पते ॥१२॥  
 त्वं वृषाक्षुं मघवन् अग्रं मर्याकरो रविः ।  
 त्वं रीहिणं व्यास्यो वि वृत्रस्याभिनच्छिरः ॥१३॥  
 यः पर्वतान् व्यदधाद्यो अपो व्यगाहथाः ।  
 इन्द्रो यो वृत्रहान्महं तस्मादिन्द्र नमोऽस्तु ते ॥१४॥  
 पृष्ठं धावन्तं हर्योरौच्यैः श्रवसमब्रुवन् ।  
 स्वस्त्यश्च जैत्रायेंद्रमा वह सुस्रजम् ॥१५॥  
 ये त्वा श्वेता अजैश्रवसो हार्यो युञ्जन्ति दक्षिणम् ।  
 पूर्वा नमस्य देवानां बिभ्रदिन्द्र महीयते ॥१६॥

20.129

एता अश्वा आ प्लवन्ते ॥१॥  
 प्रतीपं प्राति सुत्वनम् ॥२॥  
 तासामेका हरिक्निका ॥३॥  
 हरिक्निके किमिच्छासि ॥४॥  
 साधुं पुत्रं हिरण्ययम् ॥५॥  
 क्वाहर्तं परास्यः ॥६॥  
 यत्रामूस्तिः शिंशपाः ॥७॥  
 परि त्रयः ॥८॥  
 पृदाकवः ॥९॥



शृङ्गं धमन्त आसते ॥१०॥  
अयन्महा ते अर्वाहः ॥११॥  
स इच्छकं सघाघते ॥१२॥  
सघाघते गोमीद्या गोगतीरिति ॥१३॥  
पुमां कुस्ते निमिच्छसि ॥१४॥  
पल्प बद्ध वयो इति ॥१५॥  
बद्ध वो अघा इति ॥१६॥  
अजागार केविका ॥१७॥  
अश्वस्य वारो गोशपद्यके ॥१८॥  
शयेनीपती सा ॥१९॥  
अनामयोपजिह्विका ॥२०॥

20.130

को अर्यं बहुलिमा इषूनि ॥१॥  
को असिद्याः पयः ॥२॥  
को अर्जुन्याः पयः ॥३॥  
कः काष्ण्याः पयः ॥४॥  
एतं पृच्छ कुहं पृच्छ ॥५॥  
कुहाकं पक्वकं पृच्छ ॥६॥  
यवानो यतिष्वभिः कुभिः ॥७॥  
अकुप्यन्तः कुपायकुः ॥८॥  
आमणको मणत्सकः ॥९॥  
देव त्वप्रतिसूर्य ॥१०॥  
एनश्चिपङ्क्तिका हविः ॥११॥  
प्रदुद्रुदो मघाप्रति ॥१२॥  
शृङ्ग उत्पन्न ॥१३॥  
मा त्वाभि सखा नो विदन् ॥१४॥  
वशायाः पुत्रमा यन्ति ॥१५॥  
इरावेदुमयं दत् ॥१६॥  
अथो इयन्नियन् इति ॥१७॥  
अथो इयन्निति ॥१८॥  
अथो श्वा अस्थिरो भवन् ॥१९॥  
उयं यकाशलोकका ॥२०॥

20.131

आमिनोनिनि भद्यते ॥१॥  
तस्य अनु निभञ्जनम् ॥२॥  
वरुणो याति वस्वभिः ॥३॥  
शतं वा भारती शवः ॥४॥  
शतमाश्व हिरण्ययाः ।  
शतं रथ्या हिरण्ययाः ।  
शतं कुथा हिरण्ययाः ।  
अहल कुश वर्त्तक ॥६॥  
शफेन इव ओहते ॥७॥  
आय वनेनती जनी ॥८॥  
वनिष्ठा नाव गृह्णन्ति ॥९॥  
इदं मह्यं मदूरिति ॥१०॥  
ते वृक्षाः सह तिष्ठति ॥११॥  
पाक बलिः ॥१२॥  
शक बलिः ॥१३॥  
अश्वत्थ खदिरो धवः ॥१४॥  
अरदुपरम ॥१५॥  
शयो हत इव ॥१६॥  
व्याप पूरुषः ॥१७॥  
अदूहमित्यां पूषकम् ॥१८॥  
अत्यर्धर्च परस्वतः ॥१९॥  
दौव हस्तिनो दृती ॥२०॥

20.132

आदलाबुकमेककम् ॥१॥  
अलाबुकं निखातकम् ॥२॥  
कर्करिको निखातकः ॥३॥  
तद्वात उन्मथायति ॥४॥  
कुलायं कृणवादिदि ॥५॥

उग्रं वनिषदाततम् ॥६॥  
 न वनिषदनाततम् ॥७॥  
 क एषां कर्करी लिखत् ॥८॥  
 क एषां दुन्दुभिं हनत् ॥९॥  
 यदीयं हनत्कथं हनत् ॥१०॥  
 देवी हनत्कुहनत् ॥११॥  
 पर्यागारं पुनःपुनः ॥१२॥  
 त्रीण्युष्टस्य नामानि ॥१३॥  
 हिरण्य इत्येके अब्रवीत् ॥१४॥  
 द्वौ वा ये शिशवः ॥१५॥  
 नीलशिखण्डवाहनः ॥१६॥

20.133

विततौ किरणौ द्वौ तावा पिनष्टि पूरुषः ।  
 न वै कुमारि तत्तथा यथा कुमारि मन्यसे ॥१॥  
 मातुष्टे किरणौ द्वौ निवृत्तः पुरुषानृते ।  
 न वै कुमारि तत्तथा यथा कुमारि मन्यसे ॥२॥  
 निगूह्य कर्णकौ द्वौ निरायच्छसि मध्यमे ।  
 न वै कुमारि तत्तथा यथा कुमारि मन्यसे ॥३॥  
 उत्तानायै शयानायै तिष्ठन्ती वाव गूहसि ।  
 न वै कुमारि तत्तथा यथा कुमारि मन्यसे ॥४॥  
 श्लक्षणायां श्लक्षिणकायां श्लक्षणेवाव गूहसि ।  
 न वै कुमारि तत्तथा यथा कुमारि मन्यसे ॥५॥  
 अवश्लक्षणमिव भ्रंशदन्तलोममति हृदे ।  
 न वै कुमारि तत्तथा यथा कुमारि मन्यसे ॥६॥

20.134

इहेत्थ प्रागपागुदगधरागरालागुदभर्त्सथ ॥१॥  
 इहेत्थ प्रागपागुदगधरागवत्साः पुरुषन्त आसते ॥२॥  
 इहेत्थ प्रागपागुदगधराक्स्थालीपाको वि लीयते ॥३॥  
 इहेत्थ प्रागपागुदगधराक्स वै पृथु लीयते ॥४॥  
 इहेत्थ प्रागपागुदगधरागास्ते लाहाणि लीशाथी ॥५॥  
 इहेत्थ प्रागपागुदगधरागक्षिल्ली पुच्छिलीयते ॥६॥

20.135

भुगित्यभिगतः शलित्यपक्रान्तः फलित्यभिष्ठितः ।  
 दुन्दुभिमाहननाभ्यां जरितरोथामो दैव ॥१॥  
 कोशबिले रजनि ग्रन्थेर्धानमुपानहि पादम् ।  
 उत्तमां जनिमां जन्यानुत्तमां जनीन् वर्त्मन्यात् ॥२॥  
 अलाबूनि पृषातकान्यश्वत्थपलाशम् ।  
 पिपीलिकावतश्वसो विद्युत्स्वापर्णशफो गोशफो जरितरोथामो दैव ॥३॥  
 वीमे देवा अक्रसताध्वयो क्षिप्रं प्रचर ।  
 सुसत्यमिद्रवामस्यसि प्रखुदसि ॥४॥  
 पत्नी यदश्यते पत्नी यक्ष्यमाणा जरितरोथामो दैव ।  
 होता विष्टीमेन जरितरोथामो दैव ॥५॥  
 आदित्या ह जरितरङ्गिरोभ्यो दक्षिणामनयन् ।  
 तां ह जरितः प्रत्यायंस्तामु ह जरितः प्रत्यायन् ॥६॥  
 तां ह जरितर्नः प्रत्यगृष्णंस्तामु ह जरितर्नः प्रत्यगृष्णः ।  
 अहानेतरसं न वि चेतनानि यज्ञान् एतरसं न पुरोगवामः ॥७॥  
 उत श्वेत आशुपत्वा उतो पद्याभिर्यविष्ठः ।  
 उतेमाशु मानं पिपति ॥८॥  
 आदित्या रुद्रा वसवस्त्वेनु त इदं राधः प्रति गृष्णीह्यङ्गिरः ।  
 इदं राधो विभु प्रभु इदं राधो बृहत्पृथु ॥९॥  
 ० देवा ददत्वासुरं तद्धो अस्तु सुचेतनम् ।  
 युष्मामस्तु दिवेदिवे प्रत्येव गृभायत् ॥१०॥  
 त्वमिन्द्र शर्मरिणा हव्यं पारावतेभ्यः ।  
 विप्राय स्तुवते वसुवर्निं दुरश्रवसे वह ॥११॥  
 त्वमिन्द्र कपोताय छिन्नपक्षाय वञ्चते ।  
 श्यामाकं पक्वं पीलु च वारस्मा अकृणोर्बहुः ॥१२॥  
 अरंगरो वावदीति त्रेधा बद्धो वरत्रया ।  
 इरामह प्रशंसत्यनिरामप सेधति ॥१३॥

20.136

यदस्या अंहुभेद्याः कृधु स्थूलमुपातसत्।

मुष्काविदस्या एजतो गोशफे शकुलाविव ॥१॥  
 यदा स्थूलेन पससाणौ मुष्का उपावधीत् ।  
 विष्वज्चा वस्या वर्धतः सिकतास्वेव गर्दभौ ॥२॥  
 यदल्पिकास्वल्पिका कर्कधूकेवषट्पाते ।  
 वासन्तिकमिव तेजनं यन्त्यवाताय वित्पति ॥३॥  
 यद्देवासो ललामगुं प्रविष्टीमिनमाविषुः ।  
 सकुला देदिश्यते नारी सत्यस्याक्षिभुवो यथा ॥४॥  
 महानग्न्यतृप्रद्वि मोक्रददस्थानासरन् ।  
 शक्तिकानना स्वचमशकं सक्तु पद्यम ॥५॥  
 महानग्न्युलूखलमतिक्रामन्त्यब्रवीत् ।  
 यथा तव वनस्पते निरघ्नन्ति तथैवेति ॥६॥  
 महानग्न्युप ब्रूते भ्रष्टोथाप्यभूभुवः ।  
 यथैव ते वनस्पते पिप्पति तथैवेति ॥७॥  
 महानग्न्युप ब्रूते भ्रष्टोथाप्यभूभुवः ।  
 यथा वयो विदाह्य स्वर्गे नमवदह्यते ॥८॥  
 महानग्न्युप ब्रूते स्वसावेशितं पसः ।  
 इत्थं फलस्य वृक्षस्य शूर्पे शूर्पे भजेमहि ॥९॥  
 महानग्नी कृकवाकं शम्यया परि धावति ।  
 अयं न विद्म यो मृगः शीष्णा हरति धाणिकाम् ॥१०॥  
 महानग्नी महानग्नं धावन्तमनु धावति ।  
 इमास्तदस्य गा रक्ष यभ मामद्भ्यौदनम् ॥११॥  
 सुदेवस्त्वा महानग्नीर्बबाधते महतः साधु खोदनम् ।  
 कुसं पीवरो नवत् ॥१२॥  
 वशा दग्धामिमाङ्गुरिं प्रसृजतोग्रतं परे ।  
 महान् वै भद्रो यभ मामद्भ्यौदनम् ॥१३॥  
 विदेवस्त्वा महानग्नीर्विबाधते महतः साधु खोदनम् ।  
 कुमारिका पिङ्गलिका कार्द भस्मा कु धावति ॥१४॥  
 महान् वै भद्रो बिल्वो महान् भद्र उदुम्बरः ।  
 महामभिक्त बाधते महतः साधु खोदनम् ॥१५॥  
 यः कुमारी पिङ्गलिका वसन्तं पीवरी लभेत् ।  
 तैलकुण्डमिमाङ्गुषं रोदन्तं शुदमुद्धरेत् ॥१६॥

20.137

यद्ध प्राचीरजगन्तोरो मण्डूरधाणिकीः ।  
 हता इन्द्रस्य शत्रवः सर्वे बुद्धुदयाशवः ॥१॥  
 कपुन नरः कपृथमुद्घातन चोदयत खुदत वाजसातये ।  
 निष्टिग्र्यः पुत्रमा च्यावयोतय इन्द्रं सबाध इह सोमपीतये ॥२॥  
 दधिक्रावणो अकारिषं जिष्णोरश्वस्य वाजिनः ।  
 सुरभि नो मुखा करत्प्र ण आयूंषि तारिषत् ॥३॥  
 सुतासो मधुमन्तमाः सोमा इन्द्राय मन्दिनः ।  
 पवित्रवन्तो अक्षरन् देवान् गच्छन्तु वो मदाः ॥४॥  
 इन्दुरिन्द्राय पवत इति देवासो अब्रुवन् ।  
 वाचस्पतिर्मखस्यते विश्वस्येशान ओजसा ॥५॥  
 सहस्रधारः पवते समुद्रो वाचमीङ्खयः ।  
 सोमः पती रयीणां सखेन्द्रस्य दिवेदिवे ॥६॥  
 अव द्रप्सो अंशुमतीमतिष्ठदियानः कृष्णो दशभिः सहस्रैः ।  
 आवत्तमिन्द्रः शच्या धमन्तमप स्नेहितीर्नमणा अधत्त ॥७॥  
 द्रप्समपश्यं विषुणे चरन्तमुपह्वरे नद्यो अंशुमत्याः ।  
 नभो न कृष्णमवतस्थिवांसमिष्यामि वो वृषणो युध्यताजौ ॥८॥  
 अध द्रप्सो अंशुमत्या उपस्थेऽधारयत्तन्वं तित्विषाणः ।  
 विशो अदेवीरभ्याचरन्तीर्बृहस्पतिना युजेन्द्रः ससाहे ॥९॥  
 त्वं ह त्यत्साप्तभ्यो जायमानोऽशत्रुभ्यो अभवः शत्रुरिन्द्र ।  
 गूल्हे द्यावापृथिवी अन्वविन्दो विभुमदभ्यो भुवनेभ्यो रणं धाः ॥१०॥  
 त्वं ह त्यदप्रतिमानमोजो वज्रेण वज्रिन् धृषितो जघन्थ ।  
 त्वं शृष्णस्यावातिरो वधत्रैस्त्वं गा इन्द्र शच्येदविन्द्रः ॥११॥  
 तमिन्द्रं वाजयामसि महे वृत्राय हन्तवे ।  
 स वृषा वृषभो भुवत् ॥१२॥  
 ३ इन्द्रः स दामने कृत ओजिष्ठः स मदे हितः ।  
 ह्युम्नी श्लोकी स सौम्यः ॥१३॥  
 गिरा वज्रो न संभृतः सबलो अनपच्युतः ।  
 ववक्ष ऋष्वो अस्तृतः ॥१४॥

20.138

महामिन्द्रो य ओजसा पर्जन्यो वृष्टिमामिव ।

स्तोमैर्वत्सस्य वावृधे ॥१॥  
प्रजामृतस्य पिप्रतः प्र यद्भरन्त वह्नयः ।  
विप्रा ऋतस्य वाहसा ॥२॥  
कण्वाः इन्द्रं यदक्रत स्तोमैर्यज्ञस्य साधनम् ।  
जामि ब्रुवत आयुधम् ॥३॥

20.139

आ नूनमश्विना युवं वत्सस्य गन्तमवसे ।  
प्रास्मै यच्छतमवृकं पृथु छर्दिर्युतं या अरातयः ॥१॥  
यदन्तरिक्षे यद्वि वि यत्पञ्च मानुषामनु ।  
नृम्नं तद्धत्तमश्विना ॥२॥  
ये वां दंसांस्यश्विना विप्रासः परिमामृशुः ।  
एवेत्काण्वस्य बोधतम् ॥३॥  
अयं वां घर्मो अश्विना स्तोमेन परि षिच्यते ।  
अयं सोमो मधुमान् वाजिनीवसू येन वृत्रं चिकेतथः ॥४॥  
यदप्सु यद्वनस्पतौ यदोषधीषु पुरुदंससा कृतम् ।  
तेन माविष्टमश्विना ॥५॥

20.140

यन् नासत्या भुरण्यथो यद्वा देव भिषज्यथः ।  
अयं वां वत्सो मतिभिर्न विन्धते हविष्मन्तं हि गच्छथः ॥१॥  
आ नूनमश्विनोऋषि स्तोमं चिकेत वामया ।  
आ सोमं मधुमत्तमं घर्मं सिञ्चादथर्वणि ॥२॥  
आ नूनं रघुवर्तनि रथं तिष्ठाथो अश्विना ।  
आ वां स्तोमा इमे मम नभो न चुच्यवीरत ॥३॥  
यदद्य वां नासत्योक्थैराचुच्युवीमहि ।  
यद्वा वाणीभिरश्विनेवेत्काण्वस्य बोधतम् ॥४॥  
यद्वा कक्षीवामुत यदव्यश्व ऋषिर्यद्वा दीर्घतमा जुहाव ।  
पृथी यद्वां वैन्यः सादनेष्वेवेदतो अश्विना चेतयेथाम् ॥५॥

20.141

यातं छर्दिष्वा उत परस्या भूतं जगत्या उत नस्तनूपा ।  
वर्तिस्तोकाय तनयाय यातम् ॥१॥  
यदिन्द्रेण सरथं याथो अश्विना यद्वा वायुना भवथः समोकसा ।  
यदादित्येभिर्ऋभुभिः सजोषसा यद्वा विष्णोर्विक्रमणेषु तिष्ठथः ॥२॥  
यदद्याश्विनावहं हुवेय वाजसातये ।  
यत्पृत्सु तुर्वणे सनस्तच्छ्रेष्ठमश्विनोरवः ॥३॥  
आ नूनं यातमश्विनेमा हव्यानि वां हिता ।  
इमे सोमासो अधि तुर्वशे यदाविमे कण्वेषु वामथ ॥४॥  
यन् नासत्या पराके अर्वाके अस्ति भेषजम् ।  
तेन नूनं विमदाय प्रचेतसा छर्दिवत्साय यच्छतम् ॥५॥

20.142

अभुत्स्यु प्र देव्या साकं वाचाहमश्विनोः ।  
व्यावर्देव्या मतिं वि रातिं मर्त्येभ्यः ॥१॥  
प्र बोधयोषो अश्विना प्र देवि सूनुते महि ।  
प्र यज्ञहोतरानुषक्प्र मदाय श्रवो बृहत् ॥२॥  
यदुषो यासि भानुना सं सूर्येण रोचसे ।  
आ हायमश्विनो रथो वर्तिर्याति नृपाय्यम् ॥३॥  
यदापीतासो अंशवो गावो न दुह ऊधभिः ।  
यद्वा वाणीरनुषत प्र देवयन्तो अश्विना ॥४॥  
प्र द्युम्नाय प्र शवसे प्र नृषाहाय शर्मणे ।  
प्र दक्षाय प्रचेतसा ॥५॥  
यन् नूनं धीभिरश्विना पितुर्योना निषीदथः ।  
यद्वा सुम्नेभिरुक्थ्या ॥६॥

20.143

तं वां रथं वयमद्या हुवेम पृथुज्रयमश्विना संगतिं गोः ।  
यः सूर्या वहति वन्धुरायुर्गिर्वाहसं पुरुतमं वसूयुम् ॥१॥  
युवं श्रियमाश्विना देवता तां दिवो नपाता वनथः शचीभिः ।  
युवोर्वपुरभि पृक्षः सचन्ते वहन्ति यत्ककुहासो रथे वाम् ॥२॥  
को वामद्या करते रातहव्य ऊतये वा सुतपेयाय वार्कैः ।  
ऋतस्य वा वनुषे पूर्व्याय नमो येमानो अश्विना ववर्तत् ॥३॥  
हिरण्ययेन पुरुभू रथेनेमं यज्ञं नासत्योप यातम् ।

पिबाथ इन् मधुनः सोम्यस्य दधथो रत्नं विधते जनाय ॥४॥  
आ नो यातं दिवो अच्छ पृथिव्या हिरण्ययेन सुवृता रथेन ।  
मा वामन्ये नि यमन् देवयन्तः सं यद्दे नाभिः पूर्व्या वाम् ॥५॥  
नू नो रयिं पुरुवीरं बृहन्तं दस्रा मिमाथामुभयेष्वस्मे ।  
नरो यद्दामश्विना स्तोममावन्त्सधस्तुतिमाजमील्हासो अगमन् ॥६॥  
इहेह यद्वां समना पपृक्षे सेयमस्मे सुमतिर्वाजरत्ना ।  
उरुष्यतं जरितारं युवं ह श्रितः कामो नासत्या युवद्रिक् ॥७॥  
मधुमतीरोषधीर्द्याव आपो मधुमन् नो भवत्वन्तरिक्षम् ।  
क्षेत्रस्य पतिर्मधुमान् नो अस्त्वरिष्यन्तो अन्वेनं चरेम ॥८॥  
पनाय्यं तदश्विना कृतं वां वृषभो दिवो रजसः पृथिव्याः ।  
सहस्रं शंसा उत ये गविष्टौ सर्वामित्तामुप याता पिबध्वै ॥९॥